



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.


About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>

Ex libris



Thomas Spencer Jerome



BR

65

.C9

178

OPERA OMNIA
SANCTORUM PATRUM

LATINORUM.

VOLUMEN III

O P E R A O M N I A
SANCTORUM PATRUM
L A T I N O R U M .
V O L U M E N I I I

Cyprianus, Saint

S. CÆCILII CYPRIANI
EPISCOPI CARTHAG. ET MARTYRIS
OPERA OMNIA.

ACCEDIT
PRÆTER VARIA VARIORUM OPERA
MINUCII FELICIS OCTAVIUS.



TOMUS I.

WIRCEBURGI,
In Officina Libraria STAHELIANA.

MDCCLXXXII.

CONTINENTUR TOMO HOC I.

PROEMIUM EPISTOLICUM.

VITA S. CYPRIANI A PONTIO EJUS DIACONO SCRIPTA.

EPISTOLÆ LXXXIII. S. CYPRIANI.

EPISTOLA CORNELII PAPÆ AD CYPRIANUM

. . . CYPRIANI AD PLEBEM CARTHAGINIS.

. . . CYPRIANI AD TURASIUM PRESBYTERUM.

LIBER DE HABITU VIRGINUM.

. . . DE LAPSIIS.

. . . DE UNITATE ECCLESIAE.

. . . DE ORATIONE DOMINICA.

. . . AD DEMETRIANUM.

. . . DE IDOLORUM VANITATE.

. . . DE MORTALITATE.

. . . DE OPERE ET ELEEMOSYNIS.

. . . DE BONO PATIENTIAE.

. . . DE ZELO ET LIVORE.

EPISTOLA AD FORTUNATUM DE EXHORTATIONE MARTYRIL



DE
OPERUM D. CÆCILII CYPRIANI

EDITIONE NOVA WIRCEBURGENSI

AD

CELEBERRIMUM VIRUM
MICHAELEM IGNATIUM
SCHMIDT

S. THEOL. DOCTOREM, S. CÆSAREÆ MAJESTATIS
CONSILIARIUM AULICUM, TABULARII SECRETIO-
RIS CÆSAREO - REGIO - AUSTRIACI EPHORUM, ET
COLLEGII CUI CENSURA LIBRORUM NOVORUM DE-
MANDATA EST, ASSESSOREM.

EPISTOLA

FRANCISCI OBERTHÜR

S. THEOL. ET U. J. DOCTORIS, INSIGNIS ECCLE-
SIÆ HAUGENSIS CANONICI CAPIT. THEOL. DOGM.
ET POLEM. IN ALMA WIRCEB. UNIVERSITATE PRO-
FESSORIS PUB. ORD. REV. ET CÆLSSS. PRINCIPIS
EPISC. BAMB. ET WIRCEB. IN CONSISTORIO
ET VICARIATU CONSILIARII.

Quod adscriptum tibi soli, vir celeberrime,
mihique amicissime, hocce ad novam
operum D. Cypriani editionem proe-
mium, & partem aliquam laborum, quos
edendis Ecclesiæ Patribus impendere statui,
dedicatam vides, id eo potissimum fine factum,
ut insignium tuorum in me meritorum, ut in-
timæ quæ dudum mihi tecum intercedit, con-
suetudinis, ut grati erga te animi mei memo-
ria

ria hoc perenni monumento seræ posteritati
servaretur.

Inter tua autem in me merita primo illuc
loco censeo, quod meum erga bona studia amo-
rem, quem post gustata vix primis labris scien-
tiarum rudimenta mirum in modum jam con-
ceperam, tu adjuvisti, aluisti, auxisti;

Eo quidem primum tempore, quo tali ad-
jutore, & nutritio quam maxime indiguerat
illos intelligo annos vitæ meæ, qui intra septem
seminarii transigendi, meæ ad publica aliquan-
do gerenda munia præparationi universum, &
præcipue pro Ecclesiasticæ meæ vocationis con-
gruentia studiis theologicis destinati erant.

Redux enim ex Suevia, ubi sacerdotium ali-
quod dederat oportuno tuis Musis otium, huc
in patriam tuam, vastius tuæ nunc adultæ scien-
tiæ theatrum futuram, & in ipsum quidem, ubi
degebam ego, seminarium, cujus & tu olim
alumnus fueras, primum Directoris tunc Ro-
mæ absentis vice, dein nobilium puerorum
qui ibidem una cum Clericis educantur, mo-
deratoris munere functurus, adeo pronum in
me animum — quo meo merito, aut quo ope-
re Divum id factum, nescio — tecum attuli-
sti, ut facillimum mihi fuerit, tuam gratiam
mereri & frequentem ad te accessum.

Parum putaveras mihi semel in gratiam
& clientelam recepto, commoda theologicis
meis studiis consilia suggerere, & optimos li-
bros in hoc genere scientiarum;

Etiam

Etiam ut impensi philosophiæ peripathetico-scholasticæ, biennii jacturam, æquius ferrem, novumque haberem ad meliorem quoque Theologiam vehiculum, — hæc enim disciplina prout tunc in scholis dominabatur, vulgari philosophiæ, peripathetico-scholasticæ scilicet, omnino similis erat — melioris philosophiæ genuinam indolem patefecisti, tradidisti que ejus præcepta, ac legendos per intervalla una cum theologis, optimos quarumcunque nationum & ætatum scriptores philosophos.

Musis etiam amœnioribus me reddidisti, inde a meo ex humanioribus scholis ubi græcas latinasque aliquo studio pro more & modo illius temporis, meæque tunc ætatis ratione, cæterum in Europææ, &, — quod referre quam maxime pudet — theodiscæ litteraturæ annalibus omnino peregrinus, colue-ram, ad philosophicas ac theologicas disciplinas transitu penitus, non mea tamen omni, & sola culpa, a me neglectis Musis me reddidisti, adeo ut ex tunc Europæas æque ac Græ-
jas, latinasque de facie nossem, & per vices nunc has, nunc illas in meum Musæum admittam, plicatam in rugas frontem, mente intenta serias, altasque veritates perscrutato, & morosum post acta negotia animum, ad hilaritatem rursus explicaturas.

Libros quoque, qui bellarum artium, quarum præcipuam patriam, litterario in Italiam mox suscipiendo itineri jam accinctus, tunc invisum ibam, amorem inspirarent, conceptumque suppeditata aliqua de earum genio notione, nutrent, & firmarent, quos legerem mihi nominasti, & ex parte commodasti.

Operis magnifici, nondum quidem adhuc ad apicem perfecti, melioris scilicet in Franconia pædagogicæ prima fundamenta jaciebatis interea, tu, vir celeberrime & amicitissime, & qui tunc Seminario Director præfuerat, vir dexterrimus & solertissimus:

Hac quoque occasione in meum commodum usus id effecisti, ut quo privato meo studio aliqua in eo exercitatio accederet, ego quatuor nobilibus bonæ indolis & spei adolescentibus præceptor præficerer, tibi que ac tuo hoc in moliendo novo opere collegæ socius darer, atque sic sub talium Duumvirum magisterio, artis præclaræ pædagogicæ, elementa, optimo certe modo, vobis scilicet cooperando, discerem.

Atque hæc sunt illa documenta, quæ de hoc primo tuo in me merito, quo meum erga bona studia amorem in hac vitæ meæ privatæ periodo, adjuvisti, aluisti, auxistique, posteritati fidem facient.

Eodem beneficio ornasti partem aliquam vitæ meæ jam publico muneri dicatæ, & ita quidem, ut eandem etiam summa cum jucunditate transactam tibi simul in acceptis referam ;

De illo brevi nimium, nec ultra septennium extenso temporis spacio loquor, quod a meo ex Italia reditu, ubi in idem Theologorum in patria Universitate academicum collegium ambo sumus cooptati, usque ad tuum ex Franconia ad aulam Cæsaris discessum interfuit.

Etenim hyberno quovis vespere, — secundum binas anni tempestates quasi discretum & divisum hoc tuum beneficium refero — cum lassatus domi animus interponere quædam gaudia publicis curis ac laboribus monuisset, optata, & frustra alibi quæsita gaudia, dederunt ædes tuæ, gratissimum mihi inter omnia diverforium :

Eramus tunc una simul, Tu, vir celeberrime, & amicissime, quasi commune, ad quod omnes intendebamus, oraculum; contubernalis tuus, vir optimus, Columbanus Ræffer — cujus piis & charis Manibus sine ut hic aliquam lacrymulam quasi in via libem; — Ego; & qui eodem ex fine illuc congregabantur, viri adhuc alii pauci, sed boni, probi, literis dediti, patriam & se invicem sincere amantes;

X s

Indul-

Indulgebamus faciles aliis aliorum conventibus suas, quæ fallendi temporis & animi relaxandi causa luderent, pictas tabulas, suas aleas, & quidquid est talium deliciarum;

Ab Ephemeridibus litterariis nostri congressus auspicia sumebantur; sequebatur amica ac libera de litteris, Musis, Artibus, rebus patriæ, ac totius humanitatis confabulatio;

Non erat inter sodales unus, qui non aliquid præclare cogitatum, quod aut suum omnino erat, aut alienum legendo acceptum, ut suam symbolam ad commune thema afferret;

Siquis novi quid cogitaverat domi, aut audendum aliquid in bonum patriæ sub pectore versabat, aliorum desuper iudicium rogabat, & consilium.

Sic tota percurrebatur encyclopædia rerum ad litteras & humanitatem pertinentium, cui nemo in Musæi suo secreto solus suffecisset; eramque alter alteri insignis in omnigena eruditione profectus causa, magno singulorum compendio laboris & temporis.

Videtur mihi sæpius, cum hæc vespas mente recolo, iste tuis in ædibus, vir celeberrime & amicissime, conventus noster quasi Institutorum ad nobile quoddam Emporium concursus, ubi sicut hi pro mercibus merces & nummos, sic nos pro cogitatis cogitata, pro consiliis consilia alter alteri reddidimus: & cum

Plato-

Platonem lego, aut Xenophontem, talem fuisse mihi imaginor Atheniensem Socratis scholam.

Sed nec deerant quæ ad exhilarandum animum proprie faciunt, immisti scilicet non raro, seriæ fermocinationi multo attico sale conditi joci, & toto ex pectore inde exciti risus; ita, ut transactis apud te aliquot horis redirem domum & melior, & doctior, & sanior, & ad negotia mea vegetior ac paratior.

Placidior quavis anni temperie, invitantem in campos apertos naturam sequuti, sub dio philosophatum ivimus; jam soli nos duo, tu, vir celeberrime & amicissime, & ego, agri Herbipolensis amenissimas regiones ambulando pererrantes, quotiescunque id licuerat;

Stato autem cujusvis hebdomadis die, omnes tecum intimiores amici, socraticum nostrum celebrantes conventum: — mox in suburbano tuo, vel alterius ex sodalibus horto, — mox alio in solitario & ad philosophandum per suum secretum invitante loco, — mox in vico urbi vicino, ubi amicus hospes frugalem mensam cibis plerumque inemptis opaca sub arbore paraverat, — mox simul omnes una scapha leniter, patris Meni unda prætervecti confitas pratis, hortis, frugiferis campis, pagis, ripas, & in quos hæ sensim assurgunt, vitiferos utrinque colles.

Distin-

Distinguebantur hi rusticani nostri congressus ab hybernis illis & urbanis quadam religiosa sanctitate; ruri enim positi quasi in quodam templo augustissimo, ubi summus rerum Dominus mediam inter tot sua opera magna, mirabiliaque Majestatem explicat, nefas credebamus, aliunde eos, quam quodam admirationis, & adorationis libamine auspicari; atque hunc in finem aliquid temporis, insignis alicujus ex tot naturæ miraculis considerationi dabatur.

Facere specialem mentionem in hac dedicatione ad te vir celeberrime & amicissime, epistola, horum campestrium nostrorum conventuum, primum persuasit Minutius Felix in Octavio, qui Cypriano in hac editione accedet, videbatur enim mihi quædam, cum editionem ejus, secundum quam nunc aliam hanc novam exprimerem, reviderem, cum hoc præclaro scriptore intercedere in hoc similitudo, quod & ille Octavii amici memoriam recenseat, & in loca ubi de Religionis Christianæ veritate, de unius Dei magnitudine & Majestate tam graviter sunt invicem fermocinati, recordatione redeat, & hæc loca etiam Campestria fuerint, littus scilicet ostiense;

Credidi præterea rem tibi gratam facere, si eos tibi in memoriam revocarem; testantur enim mihi litteræ tuæ, te inter medias Viennensium delicias campestras, quas celebrata satis,
vicina

vicina aquis Danubii nemora, larga copia offerunt, illos nostros conventus rusticanos cogitare, & nos, tuos ad te amicos tacitis votis reclamare.

Gratissima certo est amicis tuis eorundem recordatio; scis ipse, quam infixæ sit menti doctissimi Abrahami Isaaci Penzel, qui quondam nobiscum conversatus, nunc post varios casus, & tot discrimina rerum apud Cracovienses Presbyter & Bibliothecarius est, illorum conventuum, illius præsertim super Meni aquas navigationis imago, ut nullæ ejus ad nos litteræ migrent, quibus non insit illorum aliqua memoria, & desiderium:

Ego quidem nunc sæpius solitarius plerumque, interdum uno ex veteribus sodalibus stipatus loca illa nobis quondam familiaria invisito, tantum ut monitus ibi in memoriam eorum, quæ simul in his locis gustavimus, gaudiorum certius reducar, & vividiorum illorum conventuum mihi fingere in anima imaginem liceat.

Si longior fui in enarrando hoc tuo in merito, quod in gemina hac vitæ meæ periodo meum erga bona studia amorem adjuveris, alueris, auxerisque, dabis id gratitudini meæ quam solam mihi rependere in vicem licet;

Quanquam & hoc tibi quasi in præmium dedisse Providentiam putem, quod me ad aliquod

quod tempus in uno tecum honoris & muneris publici gradu constitutum, e propinquo tanquam opus aliquod magna ex parte tuum suspexeris, possisque fructus studiorum meorum si qui adhuc fuerunt, & deinceps futuri sunt, tanquam a te ut plurimum profectos quodam tuo jure tibi vindicare.

Recenseo etiam inter tua apud me merita, quod gloria tam insigni quali ante te, quali post te vix unus, aut alter, — non finit enim verecundia tua dicere, quali nemo, — qui hic unquam litteris aut scriptis claruere, clarebuntque, patriæ meæ, tibi mecum communis nomen auxeris, per libros tuos immortalitate dignissimos; illam cathechizandi methodum; illam sensus sui ipsius philosophicam historiam; illam communi litterati orbis applausu susceptam Nationis Germanorum historiam; hos enim, qui patriæ meæ aliquid ornamenti afferunt, æque ut patriam diligo, diligo autem patriam quantum me ipsum;

Est mihi præter hoc officium gratitudinis erga te meæ & hæc dedicandi tibi, vir celeberrime & amicissime, aliquid laboris mei patriæ, causa specialis, ut tecum, qui primus consilii mei de recudendis in hac enchiridii forma veteribus Doctoribus Ecclesiæ particeps fuisti, communicem magnum, quo nunc jam fruor, solatium, fructum hujus laboris mei quotidie ultra spem multiplicari vident.

Cum

Cum enim hoc negotium primum aggressus meos in theologica disciplina candidatos potissimum quibus prodessem ob oculos habuerim; ecce tibi non tantum plures indies exterarum provinciarum Germani sua interemptores novæ hujus SS. PP. editionis, & hujus instituti laudatores profitentur nomina; sed & Italiam invasit mirum ejus habendæ in magna exemplarium copia desiderium, ex quo ope Tertulliani mei, illustri & charo nomini viri optimi & amicissimi, Francisci Antonii Vitale, inscripti, & in Romanensibus rerum ad litteras pertinentium ephemeridibus multum laudati, hujus instituti notitia illuc pervenit; insuper recens audio in Helvetiam quoque & Galliam non exiguum exemplarium numerum postulantibus qui illic negotiantur, librariis transmittendum esse, ad magnum sane & patristici studii, simul & Wirceburgensis commercii incrementum. — Pro qua suæ benedictionis ubertate Deo animum voveo gratum, & ad majora semper audenda paratum, nec ullo labore vincendum!

Venio nunc ad ipsum de hac nova operum D. Cæcili Cypriani editione proemium.

Refert ea editionem Marani non quidem Parisinam illam anni 1727 nec Venetam anni 1728, sed alteram Venetam anni 1758 apud Hyeronimum Doringonium, factam; cum priores, hac postrema certo meliores ad manum non fuerint:

Hujus

Hujus autem errores quibus scatere eam fecit editor negligentissimus, magna prius impensa opera, & frequenti ad Parisiensem aliam Cypriani editionem per Rigaltium factam, quæ mihi præsto est, recurſu, correxi, antequam nostro prelo eam recudendam darem :

Maranianam operum D. Cypriani recensio-
nem quam hic repeterem, Rigaltianæ prætulī,
quia est ista novior, & locupletior, licet ad
prodigalitatem usque, atque ita, ut confusum
chaos variorum operum exhibeat, aliorum
quæ Cypriano non ita certo attribui possint,
aliorum, quæ Cypriano potius abnegari sanior
crisis jubet, aliorum quorum author ignora-
tur, aliorum, quæ certis quidem a nostri ta-
men Cypriani ævo remotissimis authoribus de-
bentur: negotiique mihi non parum faceſſerit,
quo selectum instituerem, quid ex hac farragi-
ne libellorum ad hanc novam editionem re-
cudendum assumerem, quidve præterirem,
secernens, ac quendam inter selecta ordinem
justum componerem.

Tandem hic placuit, ut post *Concilium Car-
thaginense*, inter opera quæ sine ulla unquam
contradictione Cypriano adjudicantur, postre-
mum, statim e vestigio sequatur *liber de Specta-
culis*. Quod a stili cum aliis Cypriani genuinis
& indubitatis operibus æqualitate, & a suffra-
giorum Baronii, Jacobi Pamelii, Petri Fabri
Sanjoriani, Jacobi Sirmondi, Desiderii He-
raldi,

raldi, Bellarmini &c. contra paucos contradicentes, pluralitate, Cypriano vindicandus videatur.

Pertinent hi quos nominavi, & quos nominabo adhuc, libelli ad secundum volumen, quod, interrupto paulisper, ut eo maturius fiat, ipso quem texere incepti indice, moneo; — quæ enim primum hocce volumen contineat opera Cypriani, genuina omnia, & indubitata, jam adversa prima pagina indicat: —

Et ante Concilium quidem Carthaginense adhuc ponentur in limine secundi hujus Voluminis, *Libri tres Testimoniorum* dicti.

Hos autem, & Concilium Carthaginense mediam interfero *D. Cypriani exhortationem ad pœnitentiam*, quæ secunda nunc vice prelum experitur;

Primam ea lucem vidit Bononiæ anno Domini M D C C L I ex Typographia S. Thomæ Aquinatis apud Hieronymum Corciolani, vulgante eam ex M. S. Codice Bibliothecæ Canonicorum Regularium Congregationis S. Salvatoris quæ Bononiæ est, viro eruditissimo, quem ipse ego olim Bononiæ coram veneratus, insigni ejus eruditione, & colloquii suavitate, & instructissimi Numophilacii perlustratione mire sum delectatus, Reverendissimo Domino
)()(hujus

hujus ipsius Congregationis quondam Abbate
Generali Joanne Chrysostomo Trombellio.

Ediderat jam ille adstipulantibus aliis suæ congregationis, quæ eruditissimis viris abundat, Canonicis, similium anecdotorum Patrum Latinorum opusculorum Volumen unum. Et in Voluminis II. prima parte ita inscripta: "Cypriani, Hilarii, aliorumque Veterum Patrum Latinorum Opuscula a Canonicis Regularibus S. Salvatoris nunc primum edita,, communicat cum eruditis hunc Cypriani libellum.

Sagacissimus editor, licet non omni certitudine asserat, proprium esse hunc libellum D. Cypriani opus, pronus tamen omnino est, huic S. Doctori eum ut vindicet; primo quod Cypriani nomen illi præpositum codex referat; secundo quod eadem qua in libris testimoniorum Cyprianus utitur, & hic adhibeatur disputandi, scripturæque testimonia alligandi ratio; tertio quod disciplina hic stabiliatur, quæ Cypriani tempore impugnata tali vindice indiguerat; indicatur enim ibi non obscure recipiendos in Ecclesiam lapsos, & a spe veniæ minime arcendos quorumvis criminum reos, dummodo canonicæ poenitentiae sese subjecerint.

Nec tacet, quæ in contrarium adducuntur argumenta; infringit tamen illa: primum est, interpret-

terpretationem scripturæ hic allegari valde diversam ab ea, qua utitur Cyprianus; huic Trombellius replicat, veteres modo unam, modo aliam scripturæ interpretationem sequi, huiusque rei adeo multa, adeo perspicua documenta haberi, ut de ea jam nemo dubitet; assertque unum, sed manifestum exemplum in Augustino, qui versiculum 22 cap. XVIII Ezech. quater adducit, & diverso semper modo; incusat præterea Amanuenses, quod licentiam non levem sibi arrogarint substituendi non raro interpretationem sibi prædilectam interpretationi qua usus fuerat author ille, quem exscribebant.

Alterum est, quod veterum nemo hunc libellum alleget, aut Cypriano attribuat: cui id opponendum putat Trombellius, nec ita temere affirmandum, veteres alios hunc libellum non allegasse, cum tot Doctorum opera adhuc desideremus, nec multum curandum esse negativum argumentum, ex veterum silentio desumptum; dari autem posse rationem satis probabilem, cur ex veteribus, quos quidem habemus, nemo libellum hunc alleget, quod desierit haud multo post Cypriani tempora error is, quem libellus iste confutat, ideoque desierit etiam occasio, ob quam allegaretur.

Jungit etiam hanc de libelli auctore dubitandi rationem, quod extiterint jam pridem

))((2

non-

nonnulli etiam inter Latinos, qui Cyprianum hoc in scribendi genere imitabantur, in quorum numero Pelagius eminuerit.

Cum expensis hisce omnibus maxime tamen vero simile sit, ad Cyprianum pertinere hunc libellum, vel saltem ad vetustum, valde probabilem, & coævum Cypriano scriptorem; & libris testimoniorum adeo æqualem, ut quasi unum cum illis corpus, si jungatur, videri debeat; nec modica, ut Trombellius judicat, ejus sit utilitas, eum ego censui nec præteriri posse, nec a libris Testimoniorum separari debere.

De ipsa autem libelli hujus utilitate ita doctissimus Editor differit: "Annon valde utilis est libellus, in quo usitatissimæ Ecclesiæ mos eminet, ut scilicet exortus error adductis pluribus scripturarum testimoniis statim reprimatur; & in quo tanta vetustissimæ versionis portio inest? quodsi eo ordine, quo codices eorum temporum conscripti erant, sacros libros hic allegari censes, emolumentum aliud continuo in eo habes, quod quidem hic multis commendare minime est opus, sed profecto non leve est. Habet etiam hoc commodi, ut sacras scripturas allegans, *Ecclesiastici* librum adducat, exemplo suo ostendens, quanto in pretio prioribus ipsis Ecclesiæ sæculis habitus sit liber ille, quem nunc Protestantes minimi faciunt. „

Digres-

Digressio jam semel mihi a proposito, indulge & hoc, vir celeberrime & amicissime, ut pauculas adhuc lineas recolendæ consuetudinis arctissimæ, quæ mihi Romæ degenti fuerat, estque adhuc mediante epistolico commercio, cum viro amandissimo hujus congregationis post Trombellium, ex aliquo intervallo, Abbate Generali, Reverendissimo D. Francisco Josepho Ridolphi, impendam, & pro diuturna ejus incolumitate, sui que in me favoris & amoris perennitate aliqua vota faciam, viri enim hujus optimi, amandissimi, meique studiosissimi utut alias semper memor, hac occasione monitus, præsertim quod ex ipso S. Salvatoris Bononiensi Collegio, & ab ipso quidem, qui tunc Bibliothecæ præerat mihi que ejus thesauros ostenderat, viro Clarissimo, Jacobo Lavrenti, datis commendatitiis litteris meæ cum hoc viro amicitiae initia sint facta, mirum, quantum vix alias, cepi desiderium. —

Jam ad Cyprianum, texendumque recudendorum nunc libellorum indicem revertor:

Librum de Spectaculis excipient, primo *Libro de Laude Martyrii*, qui ob imbecillum unum argumentum a stili diversitate desumptum, & ob anacronismi suspensionem, cui tamen in aliquibus tantum codicibus temere ab aliquo

adjecta nomina Moyſis & Maximi occaſionem dedere; a pauciſſimis Cypriano negatur, a pluribus autem probabilius adjudicatur; dein: *Epiftola de diſciplina & bono pudicitiae*; poſt: *tractatus ad Novatianum*.

Quæ duo opuſcula, licet Maranus incerto authori tribuat, fide Bellarmini tamen, Labbæi, & aliorum criticorum qui Cypriano adjudicant, & hauſta aliqua probabilitate ex ratione temporis, & tractatæ ibi materiæ, aliquo ſaltem modo ad Cyprianum pertinere viſa, claudere Cyprianicorum operum ſeriem volo.

Quæ adhuc alia cum operibus Cypriani divulgari ſolent, quæque apud Rigaltium & Maranum inveni, ut primam appendicem Cypriano adnectam: hoc quidem ordine. 1. *Anonymi librum de rebaptismo, non debere de-nuo baptizari, qui ſemel in nomine Domini Jeſu Chriſti ſint tincti*.

Hunc libellum Maranus monente primum Philippo Labbeo ſcriptum cenſet ab Urſino Monacho Afro, quem Gennadius in *libro de ſcriptoribus Eccleſiaſticis* inter ſcriptores ævi quarti jam deſinentis nominat, & ſcripſiſſe tradit adverſus eos, qui rebaptizandos hæreticos decernunt, atque docuiſſe, rebaptizandos non eſſe eos qui in nomine vel ſimpliciter Chriſti, vel in nomine Patris, & Filii,
&

& Spiritus S. quamvis pravo sensu baptizantur, iis autem post simplicem Trinitatis confessionem, sufficere ad salutem manuum impositionem.

Persuaserunt potissimum Marano, ut opusculum hoc Ursino tribueret, licet Guilielmus Cave illud, quod invalescente persecutione scriptum videatur, ævo Cypriani asserat, illa verba: *post tot seculorum tantam seriem*, quæ ipsum inter & Apostolos intercesserit; elisamque putat Cavei censuram exinde, quod, ut ipse alias de tempore Concilii Eliberitani ostendisset, mentio persecutionis facta antiquitus fuerit ab iis etiam qui diu post extinctam persecutionem vixere.

2. *Tractatum de Montibus Sina, & Sion adversus Judæos.* Cui ob affinitatem materiæ jungentur

3. *Tractatus alter adversus Judæos qui insecuti sunt Dominum N. J. C. &*

4. *Celsi cujusdam in altercationem Jasonis & Papisci de Judaica incredulitate ad Vigilium Episcopum præfatio*, quæ inter opera Cypriani ideo forsân adoptata licet præcipiti nimium judicio aliquando fuit, quod in codice Colbertino 1453. signato, hoc ejus initium sit: "*Cyprianus Vigilio fratri salutem!*",

Præcedentium tractatum auctores adeo Marano ignoti sunt, ut nequidem per conjecturam eos indagare fuerit ausus: de ipsa autem *Jasonis & Papisci altercatione*, in quam *Præfationem* hanc, quam in ista editione repetito, celsus scripsit, ne curiosus hæreat lector, quod mihi ex Guilelmo Cave constat, hic adscribo: fide S. Maximi in scholiis ad Dionysium de Mystica Theol. cap. I. debetur illa Aristoni cuidam Pellæo, Pellæ in Palæstina nato, circa annum cxxxvi. claro, qui etiam obfessionem Betharæ, & Judæorum expugnationem scripsit, quo ex opere quædam Eusebius l. iv. c. 6. profert.

In hac altercatione id Jasoni Christiano contigit, ut Papiscus Judæus Alexand. suis de veritate Religionis Christianæ argumentis convictus Judaismo renunciaret, & baptismum enixe postularet.

Extiterunt olim græce, imo si Rigaltio in notis in Celsi præfat. fides adhibenda, verba quædam inde citanti, jam extant acta concertationis hujusce, sive ab Aristone sive ab alio quodam in litteras redacta.

Ea tanquam insulsum quoddam opus olim sugillavit Celsus Epicuræus, cujus iniquam idcirco censuram diluit Origenes l. iv. adversus Cels. §. 52. fol. 547. edit. Wirceb. & egregium iis eruditionis elogium tribuit. Me-

minit

minit etiam eorundem Hieronymus in quæst. in Genesin.

Quis, qualisve fuerit Celsus ille, qui ea in latinum sermonem versa, præfatione bene longa Vigilio Episcopo nuncupata auxit, non constat; id solum liquet ex plurimis præfationis locis, eum vigentibus adhuc persecutionum temporibus, & ante susceptam ab Imperatoribus fidem Christianam scripsisse.

Quinto loco sequetur *liber de aleatoribus*, quem Maranus censet perperam Cypriano adscribi, Bellarminus vero rectius Pontifici cuidam Romano ævi a Cyprianico remotioris.

Sexto. *De duodecim abusionibus sæculi tractatus*, iudice Marano nec Cypriano, nec Augustino adscribendus.

Septimo. *Libellus de singularitate Clericorum*, subin Cypriano, subin Augustino, sæpius etiam Origeni, sed omnibus his perperam, a Caveo autem melius Authori incerto quidem, non condemnandæ tamen vetustatis, nec Hieronymiano ævō inferiori, adjudicatus; ab editionis Oxoniensis Origenis curatore circa Beadæ ætatem scriptus esse creditus.

Octavo. *Expositio in symbolum Apostolorum*. Ruffini Torani est illa Aquilejensis Ecclesiæ Presbyteri, & alias cum operibus Hieronymi divulgari solet.

) () (5

Nono.

Nono. *De Duplici Martyrio ad Fortunatum.*

Decimo. *De Revelatione capitis S. Joannis Baptistæ.* Ad quod proprie ævum hi tractatus incertorum omnino authorum pertineant, ex unica utriusque nota perspicui potest. In primo de Turcis, in altero de Pipino Rege Francorum agitur.

Demum Ultimum hujus primæ appendicis locum occupabit libellus *cæna*, alias *dispositio cænæ* inscriptus, opus, ut cave censet, ineptum, ridiculum; quod nec ipse Maranus adscribi Cypriano vult.

Appendix altera completetur *Cypriani Antiocheni* opera; scilicet primo *Confessionem* sive *Pœnitentiam* ejus; qua prioris vitæ flagitia uberrime deflet.

Hanc primus edidit Cyprianicorum operum Oxoniensis editor, & post eum Parisiensis meus, quem sequor; qui tamen & ipsam illam græce quoque protulit ex Bibliotheca Colbertina, atque ad latus latinæ versionis posuit, quod plurimis hæc scateat nævis, ex græco forsan facilius corrigendis.

Præsulem Antiochenum hunc fuisse dicunt alii, passumque Nicomediæ sub Diocletiano marty-

martyrium una cum Justina Virgine, quam insane deperibat. Nazianzenus, Prudentius, Metaphrastes, alii, cum Carthaginensi Cypriano confundunt. Oxoniensis Operum Cyprianicorum editor non contemnendis fultus conjecturis diserte affirmat, talem Cyprianum Antiochenum nusquam extitisse, quin totam quæ circumfertur de eo, narrationem, miram sane, vetustissimam tamen fabulam, & ante Nazianzeni tempora jam natam, quam & heroïco carmine tribus libris Eudocia Augusta olim depinxit, nihil aliud esse, quam Cypriani Carthag. historiam ab aliquo ex eorum numero, qui Martyrum res gestas, novis argumentis decorare gestiebant, mire interpolatam, vel potius de novo conditam.

Secundo : *Orationem pro Martyribus.*

Et tertio : *Orationem quam sub die passionis suæ dixit :*

Quam utramque Maranus meus sub uno rubro : *Opera S. Cypriani Antioch.* junctam exhibet, Cave vero sine omni alio indicio inter opera Cypriano Carthag. falso inscripta recenseret :

Qua autem ex causa idem Maranus illam confessionem ejusdem Antiocheni Cypriani tanto

tanto intervallo ab hac gemina ejus oratio
sejunctam ad calcem suæ editionis rejecer
& sub simplici quidem titulo tantum : *C*
fissio S. Cypriani, id ignoro; juvat certo utru
que consuluisse, & Maranum, & Caveum
ut suo hæc tria opuscula loco, junctaque
poni potuerint.

Nihil porro ex Marano addam Cypria
meo; Carmina enim quæ adhuc ejus edi
tione continet, nuper jam Tertulliano meo ad C
cem operum ejus adjunxi, quod tam in
quam Cypriano fuerint adscripta.

Nec, quæ Maranus præterea cum
Cypriano edidit, opera *Arnoldi Abbatis Be*
callis, hic repetenda judicavi,

Primo quod scriptor hic tot sæculorum
intereapedine a Cypriano remotus duode
mo scilicet sæculo jam ad finem vergente
ruerit, Divo Bernardo familiaris; secum
quod præter duos a Cypriani editore meo
los vulgatos tractatus, unum *de novissimis*
verbis Domini in cruce, & alterum *de*
dinalibus operibus Christi, qui Cypriano o
suppositus inter ejus opera habere alias
cum solet, extent adhuc alii ejus libelli si
sim editi, quos, si cui hic scriptor talem o
ram mereri videbitur, junctos simul recud
oporteret; Catalogum eorum Caveus ex
be

bet in *scriptorum Ecclesiast. historia literaria* edit.
Lond. fol. 680.

Substituam autem, jure, ut puto, meliore, in tertia appendice, opera *Novatiani*. Stoici quondam Philosophi, postea Christiani, & Ecclesiæ Rom. Presbyteri, demum schismatici, & hæretici, asserentis pœnitentes ad Ecclesiæ pacem nunquam esse admitte-
tendos, nec in Ecclesiæ potestate situm esse, veniam iis concedere, quin tales solius Dei
judicio relinquendos, in reliquis tamen dog-
matibus cum Ecclesia sentientis.

Extat enim jam Cyprianicis immixta aliqua ejus epistola, xxx nimirum, antequam schisma faceret, nomine Cleri Rom. ad Cyprianum eleganter scripta.

Cui prope jungi fas esse puto alia, quæ supersunt opera ejus; librum scilicet *de Trinitate* post schisma exaratum, qui quasi epitome quædam est operis Tertulliani de eodem argumento. Et *Epistolam de cibis Judaicis*. De qua tamen, an Novatiani sit, adhuc satis non liquet.

Ex hoc etiam titulo hæc opuscula huc pertinere mihi videntur, quod Tertulliano ambo a multis, alterum etiam Cypriano, tribuantur, atque cum Tertulliani operibus divulgari soleant, jamque ego ipsi nuper Ter-
tullia-

tulliano junxissem, nisi justī voluminis mēsuram excedere timuissē;

Reperam autem ea ex Editione Tertulliana Parisi facta MDCVIII.

Scripsit præter hæc *Novatianus* sed quā tempore, incertum, *de Pascha, de Sabbato, de Sacerdote, de Oratione, de Animalibus mundis & immundis quæstiunculas* (quas idem fuisse opus cum illo *de Cibis Jud.* jure quis suspicari possit). *De Instantia, de Attalo, de Circumcisione, libellum contra Cornelium*, multæque alia, quæ non extant, nisi quod habetur inter opera *Hieronymo* adscripta liber hoc titulo: *de vera circumcisione*; an vero iste *Novatiani* opus, merito dubitari potest.

Quarta demum accedet *Cypriano* appendix *M. Minutii Felicis Octavius*, ex editione Longobaliffensi anni MDCCLXXIII. a Johanne Gottlieb Lindnero, Scholæ Arnstadiensis Rectore, curata depromptus; quæ scriptoris hujus optima & novissima editio magis adhuc a doctissimi Ernesti præfatione, & præmissa Dialogi ipsius Logica, atque literaria historia, & ab apparatu critico adjuncto commendatur.

Retu-

Retuli vero huc scriptorem istum, quod Tertulliano suppar, Cyprianum paucis tantum annis præcesserit; imo, extitisse Cyprianum inter colloquentes cum Minutio unum, Cæcilium nempe, valde verisimile sit; dein quod solus ob libelli exilitatem, justum volumen, nisi contra instituti mei rationem multo apparatu eum locupletassem, non impleturus fuisset.

Supereſt, ut moneam, me ex Rigaltio præmiſſiſſe primo Volumini vitam Cypriani a Pontio ejus Diacono ſcriptam, & utrumque Volumen quodam indice præcipuarum lectionis varietatum, & criticarum obſervationum, clauſurum eſſe, harumque in Minutiana Felicem novum promptuarium me nuper inveniſſe in *Epistoſa Critica Joannis Chriſtophori Bremeri Illuſtris Quedlei Præreſtoris ad virum Clar. atque Doctiſſim. Johannem Georg. Chriſtophor. Neide, Gymnaſii Urb. Magdeburg. Subconreſt. ſuper aliquot Minutii locis, Quedlinburgi edita* MDCC LXXX. una ſolum plagula conſtante, ſed uti ſpes facta eſt, altera epiſtola aliquando augenda.

Habes nunc, vir celeberrime, & amiciffime totam Oeconomiam novæ hujus Cypriani editionis, tuo illuſtri nomini nuncupatæ!
ſimul

simul nunc etiam totius hujus ad te epistolæ, habe Coronidem, hanc summam votorum meorum: *Dei Deus studiis tuis fructum uberrimum: Tibi, & Maximo Casarum, qui te, tuaque nunc studia fovet, JOSEPHO II. longævam felicitatem! Amen.*

EX MUSÆO
Idibus Januariis
CIC IO CC LXXXII.

VITA



V I T A

S. CÆCILII CYPRIANI

PER

PONTIUM EJUS DIACONUM.

Cyprianus religiosus antistes, ac testis Dei gloriosus, tametsi multa conscripsit, per quæ memoria digni nominis supervivat; etsi eloquentiæ ejus ac Dei gratiæ larga fecunditas ita fecunditæ & ubertate sermonis extendit, ut usque in finem mundi fortasse non taceat: tamen, quia operibus ejus ac meritis etiam hæc prærogativa debetur, ut exemplum suum in literas dirigatur; placuit summratim pauca conscribere, non quod aliquem gentilium lateat tanti viri vita, sed ut ad posterum quoque nostros incomparabile ac grande documentum in immortalem memoriam porrigatur.

Certe durum erat, ut, cum majores nostri plebeis & catechumenis martyrium consecutis, tantum honoris pro martyrii ipsius veneratione dederint, ut de passionibus eorum multa, aut, prope dixerim, pene cuncta conscripserint, ut ad nostram quoque notitiam, qui nondum nati fuimus, pervenirent: Cypriani, tanti sacerdotis, & tanti martiris

S. Cypriani Tom. I.

tyris passio præteriretur, qui & sine martyrio habuit
 quæ doceret, & quæ dum vixit gesserit, non pate-
 rent; quæ quidem tanta, atque tam magna, & mira
 sunt, ut magnitudinis contemplatione deterrear,
 ac imparem me esse confitear ad proferendum digne
 pro meritorum honore sermonem, nec posse sic
 prosequi facta tam grandia, ut, quanta sunt, tanta
 videantur; nisi quod numerositas gloriarum sibi met
 ipsa sufficiens, alieno præconio non eget.

Accedit ad cunulū, quod & vos de eo mul-
 tum, aut, si fieri potest, totum desideratis audire,
 concupiscentes ardore flagranti, vel facta ejus cog-
 noscere, etsi interim viva verba tacuerunt. In qua
 parte si dixerō nos opibus facundiæ defici, minus
 dico, facundia enim ipsa deficit digna facultate,
 quæ desiderium vestrum pleno spiritu satiet. Ita
 utrimque graviter urgemur: ille nos virtutibus suis
 onerat, vos nos precibus fatigatis. Unde igitur
 incipiam? unde exordium bonorum ejus aggrediar,
 nisi a principio fidei, & nativitate cælesti? siqui-
 dem hominis Dei facta non debent aliunde nume-
 rari, nisi ex quo Deo natus est. Fuerint licet stu-
 dia, & bonæ artes devotum pectus imbuerint: ta-
 men illa prætereo, nondum enim ad utilitatem,
 nisi sæculi, pertinebant, postquam & sacras literas
 docuit, & mundi nube discessit in lucem sapientiæ
 spiritalis emerfit, si quibus ejus interfui, si quæ de
 antiquioribus ejus operibus comperi, dicam: hanc
 tamen petens veniam, ut quicquid minus dixerō,
 minus

„ minus enim dicam necesse est, ignorantia: meæ po-
 „ tius, quam illius gloriæ derogetur.

„ Inter fidei suæ prima rudimenta nihil aliud credi-
 „ dit Deo dignam, quam si continentiam tueretur: tunc
 „ enim posse idoneum fieri pectus, & sensum ad plenam
 „ veri capacitatem pervenire, si concupiscentiam
 „ carnis robusto atque integro sanctimonie vigore cal-
 „ caret. Quis unquam tanti miraculi meminit? Non-
 „ dum secunda nativitas novum hominem splendore
 „ toto divinæ lucis oculaverat, & jam veteres ac pristi-
 „ nas tenebras sola lucis paratura vincebat. Deinde
 „ quod majus est, cum de lectione divina quædam jam
 „ non pro conditione novitatis, sed pro fidei festinatio-
 „ ne didicisset, statim rapuit quod invenit promerendo
 „ domino profuturum. Distractis rebus suis ad in-
 „ digentiam pauperum sustentandam, tota prædia pre-
 „ tio dispensans, duo bona simul junxit, ut & ambitio-
 „ nem sæculi sperneret, qua perniciosius nihil est, &
 „ misericordiam, quam Deus etiam sacrificiis suis
 „ prætulit, quam nec ille, qui legis omnia mandata
 „ servasse se dixerat, fecit, impletet: & præprope-
 „ ra velocitate pietatis pene ante cœpit perfectus esse,
 „ quam disceret.

„ Quis, oro, de veteribus hoc fecit? Quis de anti-
 „ quissimis in fide senibus, quorum mentes & aures
 „ per plurimos annos divina verba pulsaverant, tale
 „ aliquid impendit, quale adhuc rudis fidei homo, &
 „ cui nondum forsitan crederetur, supergressus ve-
 „ „ tusta-

„tustatis ætatem, gloriosis & admirandis operibus
„perpetravit?

„Nemo metit statim, ut sevit. Nemo vinde-
„miam de novellis scrobibus expressit. Nemo ad-
„huc unquam de noviter plantatis arbusculis matura
„poma quæsit. In illo omnia incredibilia cucurre-
„runt. Prævenit, si potest dici, (res enim fidem non
„capit) prævenit, inquam, tritura sementem, vin-
„demia palmitem, poma radicem. Ajunt Apostoli
„literæ, debere neophytos præteriri, ne stupore
„gentilitatis nondum fundatis sensibus adhærente, ali-
„quid in Deum novitas inerudita peccaret. Ille fuit
„primus, & puto, solus exemplo, plus fide posse,
„quam tempore promoveri. Sed etsi in Apostolorum
„Actis eunuchus ille describitur, quia toto corde
„crediderat, a Philippo statim tinctus; non est simi-
„lis comparatio. Ille enim & Judæus erat, & de tem-
„plo Domini veniens Prophetam legebat Isaiam, &
„sperabat in Christo, etsi nondum eum venisse cre-
„diderat: Hic de imperitis gentibus veniens, tam ma-
„tura cæpit fide, quanta pauci fortasse perfece-
„rint. Mora denique circa gratiam Dei nulla, nul-
„la dilatio.

„Parum dixi: Presbyterium & Sacerdotium sta-
„tim accepit. Quis enim non omnes honorum gra-
„tus crederet tali mente credenti? Multa sunt, quæ
„adhuc plebeius, multa, quæ jam Presbyter fecit,
„multa quæ ad veterum exempla justorum, imita-
„tione

„tione confirmi profecutus, promerendo Dominum
 „totius religionis obsequio præstitit. Nam & sermo
 „illi de hoc fuerat usitatus, ut, siquem prædicatum
 „Dei laudatione legisset, suaderet inquiri, propter
 „quæ facta Deo placuisset. Si Job Dei testimonio
 „gloriosus, dictus est verus Dei cultor, & cui in
 „terris nemo compararetur, faciendum docebat ille,
 „quidquid Job ante fecisset: ut dum & nos paria faci-
 „mus, simile in nos Dei testimonium provocemus.

„Contemptis ille dispendiis rei familiaris, in tan-
 „tum exercitata virtute profecit, ut nec pietatis tem-
 „poralia damna sentiret. Non illum penuria, non
 „dolor fregit. Non uxoris suadela deflexit: non pro-
 „prij corporis dira pœna concussit. Permanfit in suis
 „sedibus fixa virtus, & altis radicibus fundata devo-
 „tio; nullo diaboli tentantis impetu cessit, quomi-
 „nus Dominum suum, fide grata, etiam inter adver-
 „sa benediceret. Domus ejus patuit cuicunque ve-
 „nienti. Nulla vidua reversa est sinu vacuo: nullus
 „indigens lumine, non illo comite directus est: nul-
 „lus debilis gressu, non illo bajulo vectus est: nullus
 „nudus auxilio de potentioris manu, non illo tutore
 „protectus est. Hæc debent facere, dicebat, qui Deo
 „placere desiderant. Et sic per bonorum omnium do-
 „cumenta decurrens, dum meliores semper imitatur,
 „etiam ipse se fecit imitandum. Erat sane illi etiam
 „de nobis contubernium viri justî, & laudabilis me-
 „morix Cæcilii, & ætate tunc & honore Presbyteri,
 „qui eum ad agnitionem veræ divinitatis a sæculari

errore correxerat. Hunc toto honore atque omni
 observantia diligebat, obsequenti veneratione sus-
 piciens, non jam ut amicum animæ æqualem, sed
 tanquam novæ vitæ parentem. Denique, ille de-
 mulsus ejus obsequiis, in tantum dilectionis immen-
 sæ merito provocatus est, ut de sæculo excedens,
 arcessitione jam proxima commendaret illi conjugem
 ac liberos suos, & quem fecerat de sectæ commu-
 nione participem, postmodum faceret pietatis hæ-
 redem.

Longum est, ire per singulæ: sancta ejus facta
 onerosum est enumerare. Ad probationem bono-
 rum operum solum hoc arbitror satis esse: quod ju-
 dicio Dei & plebis favore, ad officium Sacerdotii, &
 Episcopatus gradum adhuc neophytus, & ut puta-
 batur, novellus electus est. Quamvis in primis fidei
 suæ adhuc diebus & rudī vitæ spiritualis ætate, sic
 generosa indoles reluceret; ut, etsi nondum officii,
 spei tamen fulgore resplendens, imminentis Sacer-
 dotil totam fiduciam polliceretur. Non præteribo
 etiam illud eximium, quemadmodum cum in dile-
 ctionem ejus & honorem totus populus adspirante
 Domino prosiliret, humiliter ille secessit; antiquio-
 ribus cedens, & indignum se titulo tanti honoris
 existimans, ut dignus magis fieret. Magis enim
 dignus efficitur, qui, quod meretur, excusat. Quod
 tunc ardore plebs æstuans fluctuabat, spiritali desi-
 derio concupiscens, ut exitus docuit, non tantum
 Episcopum: sed in eo, quem tunc latentem divini-
 tatis

S. CÆCILII CYPRIANI. (vii)

„tatis præfagio taliter flagitabat, futurum etiam Mar-
 „tyrem requirebat. Obsederat fores domus copiosa
 „fraternitas, & per omnes aditus sollicita charitas
 „circuibat. Potuisset fortasse tunc illi Apostolicum
 „illud evenire, quod voluit, ut per fenestram depo-
 „neretur; si eum Apostolo etiam ordinationis hono-
 „re similaret. Erat videre ceteros omnes suspensos
 „anxio spiritu expectare venturum, cum gaudio ni-
 „mio excipere venientem.

„Invitus dico; sed dicam necesse est. Quidam illi
 „restituerunt, etiam ut vinceret. Quibus tamen quan-
 „ta lenitate, quam patienter, quam benevolenter in-
 „dulsit, quam clementer ignovit, amicissimos eos
 „postmodum inter & necessarios computans miranti-
 „bus multis? Cui enim posset non esse miracula tam
 „memoriosæ mentis oblivio? Exinde quemadmodum
 „se gesserit, quis referre sufficiat? quæ illi pietas? Qui
 „vigor? misericordiarum quanta? quanta censura? tan-
 „tum sanctitatis & gratiæ ex ore ejus lucebat, ut con-
 „funderet intuentium mentes. Gravis vultus & læ-
 „tus; nec severitas tristis, nec comitas nimia, sed ad-
 „mixta utrinque temperies, ut esset ambigere, ve-
 „reri plus an diligi mereretur: nisi quod & vereri &
 „diligi merebatur. Sed nec cultus fuit dispar a vultu,
 „temperatus & ipse de medio. Non illum superbia
 „secularis inflaverat, nec tamen prorsus affectata pe-
 „nuria sordidarat: quia & hoc vestitus genus a jactan-
 „tia minus non est, quam ostentata taliter ambitiosa
 „frugalitas. Quid autem circa pauperes Episcopus fa-
 „ceret

* 4

„ceret, quos catechumenus diligebat? Viderint pie-
 „tatis Antistites, seu quos ad officium boni operis in-
 „struxit ipsius ordinis disciplina: seu quos sacramenti
 „religio communis, ad obsequium exhibendæ dile-
 „ctionis artavit. Cyprianum de suo talem accepit ca-
 „thedra, non fecit. Statim denique pro talibus meri-
 „tis etiam Proscriptionis gloriam consecutus est. Nec
 „enim aliud oportebat, quam ut eum, qui intra secre-
 „tam conscientiae latebram, religionis & fidei toto ho-
 „nore florebat, etiam publice celebrata gentilium
 „fama titularet.

„Potuisset quidem tunc pro velocitate, qua sem-
 „per omnia consecutus est, etiam martyrii circa eum
 „corona debita properare; maxime cum & suffragiis
 „sæpe repetitis ad leonem postularetur; nisi per
 „omnes ordines gloriarum transeundum illi esset, &
 „sic ad summa veniendum; & nisi imminens ruina ope-
 „tam sacundi pectoris indigeret. Finge enim tunc il-
 „lum martyrii dignatione translatus. Quis emolu-
 „mentum gratiæ per fidem proficientis ostenderet?
 „Quis virgines ad congruentem pudicitiae disciplinam
 „& habitum sanctimoniae dignum, velut frenis quibus-
 „dam lectionis Dominicæ coerceret? Quis doceret
 „pœnitentiam lapsos, veritatem hæreticos, schismati-
 „cos unitatem, filios Dei pacem, & Evangelicæ precis
 „legem? per quem gentiles blasphemi percussis in-
 „se iis, quæ nobis ingerunt, vincerentur? A quo chri-
 „stiani mollioris affectus circa amissionem suorum, aut
 „quod magis est, fidei parvioris consolarentur spe fu-
 „turo-

„tutorum? Unde sic misericordiam, unde patientiam
 „disceremus? Quis livorem de venenatæ invidiæ ma-
 „lignitate venientem dulcedine remedii salutaris inhi-
 „beret? Quis martyres tantos exhortatione divini
 „sermonis erigeret? quis denique tot confessores
 „frontium notatarum secunda inscriptione signatos,
 „& ad exemplum martyrii superstites reservatos, in-
 „centivo tubæ cælestis animaret? Bene, bene tunc,
 „& vere spiritualiter contigit, quod vir tam necessa-
 „rius, tam multis & tam bonis rebus a martyrii con-
 „summatione dilatus est.

„Vultis scire secessum illum non fuisse formidi-
 „nem? Ut nihil aliud excussem, ipse postmodum
 „passus est: quam passionem utique ex more vitaret,
 „si & ante vitasset. Fuit vero formido illa, sed justa,
 „formido, quæ Dominum timeret offendere: formido,
 „quæ præceptis Dei mallet obsequi, quam sic corona-
 „ri. Dicata enim in omnibus Deo mens, & fides divi-
 „nis admonitionibus mancipata, credidit se, nisi Do-
 „mino latebram tunc iubenti paruisset, etiam ipsa
 „passione peccare. Puto denique etiam hunc aliqua
 „de dilationis utilitate differenda, tametsi jam dudum
 „pauca perstrinximus: per hæc enim, quæ videntur
 „postmodum subsecuta sciamus, sequitur ut probe-
 „mus; secessum illum non hominis pusillanimitate
 „conceptum, sed sicuti est, vere fuisse divinum.

„Vastaverat Dei populum persecutionis infestæ,
 „insolens, atque acerba grassatio, & quia omnes de-

„cipere una fraude non poterat artifex hostis: quæ
 „cunque miles incautus prodiderat latus nudum, dispa-
 „ri genere saviendi, singulos diversa strage dejecerat.
 „Debebat esse, qui posset faucios homines & vari-
 „expugnantis inimici arte jaculatos, adhibita medicina
 „cælestis medela pro qualitate vulneris vel secare in-
 „terim, vel fovere. Servatus est vir, ingenii præ-
 „ter cætera etiam spiritaliter temperati: qui inter re-
 „sultantes collidentium schismatum fluctus, Ecclesia
 „iter medium, librato limite gubernaret. Nonne hæc
 „oro, consilia diſſilia sunt? Hoc fieri sine Deo potuit.
 „Viderint, qui putant posse fortuito ista contingere.
 „Ecclesia illis clara voce respondet, dicens: Ego sine
 „Dei nutu necessarios reservari non admitto. Percur-
 „ramus tamen cætera, si videtur. Erupit postmodum
 „lues dira, & detestabilis morbi vastitas nimia, innu-
 „meros per diem populos a sua quemque sede abrupto
 „impetu rapiens, continuatas per ordinem domos vul-
 „gi trementis invasit. Horrere omnes, fugere, vitare
 „contagium; exponere suos impie: quasi cum illo pe-
 „ste morituro, etiam mortem ipsam aliquis posset ex-
 „cludere. Jacebant interim tota civitate non jam cor-
 „pora, sed cadavera plurimorum: & misericordiam
 „in se transeuntium, contemplatione fortis mutua
 „flagitabant. Nemo respexit aliud, præterquam lucra
 „crudelia. Nemo similis eventus recordatione tre-
 „pidavit. Nemo fecit alteri, quod sibi fieri voluit.

„Quid inter hæc egerit Christi & Dei Pontifex, qui
 „pontifices mundi hujus tanto plus pietate, quanto reli-
 „gionis

„gionis veritate præcellerat, scelus est præterire. Ag-
 „gregatam primo in loco uno plebem de misericordiæ
 „bonis instruit; docens divinæ lectionis exemplis,
 „quantum ad promerendum Deum prosint officia pie-
 „tatis. Tunc deinde subjungit non esse mirabile, si no-
 „stros tantum debito charitatis obsequio foveremus;
 „eum perfectum posse fieri, qui plus aliquid publicano
 „vel ethnico fecerit; qui malum bono vincens, & divi-
 „næ clementiæ instar exercens, inimicos quoque dile-
 „xerit; qui pro persequentium se salute, sicut Dominus
 „monet, & hortatur, orarit. Oriri facit Deus jugiter
 „solem suum, & pluvias subinde nutriendis seminibus
 „impertit; exhibens cuncta ista non suis tantum, sed
 „etiam alienis; & qui se Dei etiam filium esse profitetur,
 „cur non exemplum patris imitatur? Respondere nos
 „debet natalibus nostris, & quo renatos per Deum
 „constat, degeneres esse non congruit; sed probare
 „potius in sobole traducem boni patris æmulatione
 „bonitatis.

„Multa alia & quidem magna prætereo, quæ
 „temperandi voluminis ratio non patitur prolixiore
 „sermone replicari. De quibus hoc tantum dixisse
 „satis est. Quodsi illa gentiles pro rostris audire
 „potuissent, forsitan statim crederent. Quid chri-
 „stiana plebs faceret, cui de fide nomen est? Dis-
 „tributa sunt ergo continuo pro qualitate hominum
 „atque ordinum ministeria. Multi, qui angustia
 „paupertatis beneficia sumptus exhibere non pote-
 „rant, plus sumptibus exhibebant; compensantes
 „pro-

„ proprio labore mercedem divitiis omnibus cario-
 „ rem. Et quis non sub tanto doctore properaret
 „ inveniri in parte aliqua talis militiae, per quam pla-
 „ ceret & Deo patri, & iudici Christo, & tam bono
 „ interim sacerdoti? Fiebat itaque exuberantium ope-
 „ rum largitate, quod bonum est ad omnes, non ad
 „ solos domesticos fidei. Fiebat plus aliquid quam
 „ de incomparabili Tobiae pietate signatum est. Ignos-
 „ cat ille, & ignoscat iterum, & frequenter ignoscat :
 „ aut, ut verius dixerim: merito concedat, tametsi
 „ ante Christum plurimum licuit, plus aliquid licuisse
 „ post Christum: cuius temporibus plenitudo debe-
 „ tur. Necatos ille a rege & projectos sui tantum
 „ generis colligebat. His tam bonis & tam piis acti-
 „ bus supervenit exilium. Hanc enim vicem semper
 „ repræsentat impietas, ut melioribus pejora re-
 „ stituat.

„ Et, ut quid sacerdos Dei Proconsule interro-
 „ gante responderit, taceam, sunt acta, quæ refe-
 „ rant. Excluditur interim e civitate, ille qui fece-
 „ rat boni aliquid pro civitatis salute; ille, qui labo-
 „ raverat, ne viventium oculi paterentur infernæ se-
 „ dis horrorem; ille, inquam, qui excubiis pietatis in-
 „ vigilans, pro nefas! ingrata bonitate providerat,
 „ ne omnibus tetram civitatis faciem relinquentibus
 „ multos exules, deserta respublica, ac destituta
 „ patria sentiret. Sed viderit sæculum, cui inter
 „ poenas exilium computatur: Nobis patria minus ea-
 „ ra, & commune nomen est; qui parentes ipsos, si

„ con-

S. CÆCILII CYPRIANI. (XIII)

„contra Dominum suaserint, abhorremus. Illis ex-
 „tra civitatem suam vivere gravis pœna est. Chri-
 „stiano, totus hic mundus, una domus est. Un-
 „de licet in abditum & abstrusum locum fuerit rele-
 „gatus; admixtus Dei sui rebus, exilium non potest
 „computare. Adde, quod Deo integre serviens,
 „etiam propria in civitate peregrinus est. Tum enim
 „se carnalibus desideriis continentia sancti Spiritus ab-
 „stinet, conversationem prioris hominis exponens;
 „etiam inter cives suos, aut prope dixerim, inter pa-
 „rentes ipsos vitæ terrestris alienus est. Accedit,
 „quod & si hæc talia pœna possent videri, in hujusmodi
 „tamen causis atque sententiis, quas ob approbandæ
 „virtutis experimenta perpetimur, non est pœna, quia
 „gloria est. Sed esto sane nobis pœna exilium. Illis
 „ultimum crimen, pessimum nefas etiam ipsorum con-
 „scientia testis adscribat, qui possunt innocentibus
 „irrogare, quod putant pœnam.

„Nolo nunc describere loci gratiam, & delicias
 „rum omnium paraturam interim transeo. Fingamus
 „locum illum situ fordidum, squalidum visu, non
 „salubres aquas habentem, non amœnitatem viroris;
 „non viciniam litoris; sed rupes vastas sylvarum, in-
 „ter inhospitas fauces desertæ admodum solitudinis
 „avia mundi parte summotum. Posset licet talis lo-
 „cus habere nomen exilii, quo Cyprianus sacerdos
 „Dei venerat, cui si hominum ministeria deficerent,
 „vel alites, ut Helix, vel ut Danieli Angeli mini-
 „strarent? Absit, ut credat aliquis, cuilibet mini-

mo,

„mo, dummodo in confessione nominis constituto
 „aliquid defuturum. Tantum abest, ut Dei Pont
 „fex ille, qui misericordiae semper rebus institerat
 „horum omnium opibus indigeret. Tam nunc quo
 „secundo posueram loco, cum gratiarum actione re
 „petamus. Provisum esse divinitus etiam pro animo
 „tanti viri, apicum & competentem locum, hospi
 „tium pro voluntate secretum, & quidquid apponi ei
 „ante promissum est, qui regnum & justitiam De
 „quærunt.

„Atque ut omittam frequentiam visitantium fra
 „trum, & ipsorum inde civium charitatem, quæ re
 „præsentabat omnia, quibus videbatur esse fraudat
 „us: admirabilem visitationem Dei non præteribo
 „qua Antistitem suum sic in exilio esse voluit de se
 „cutura passione securum, ut imminentis martyri
 „pleniore fiducia non exulem tantummodo Curubi
 „sed & martyrem possideret. Eo enim die, quo pri
 „mum in exilij loco mansimus (nam & me inter dome
 „sticos comites dignatio charitatis ejus delegerat ex
 „ulem voluntarium, quod utinam & in passione licuif
 „set,) apparuit mihi, inquit, nondum somni quiete
 „sopito, juvenis ultra modum hominis enormis: qui
 „cum me quasi ad prætorium duceret, videbar mihi
 „tribunali sedentis tum Proconsulis admoveri. Is u
 „in me respexit, adnotare statim capit in tabula sen
 „tentiam, quam non sciebam, nihil enim de me so
 „lita interrogatione quæsierat; sed enim juvenis, qui
 „a tergo ejus stabat, admodum curiosus legit, quid
 „quid

S. CÆCILII CYPRIANI. (xv)

„quid fuerat adnotatum. Et quia id verbis proferre
 „non poterat, nutu declarante monstravit, quid in
 „litteris tabulæ illius haberetur. Manu enim expansa
 „& complanata ad spatæ modum, ictum solitæ animæ
 „adversus imitatus; quod volebat intelligi, ad-
 „instar liquidi sermonis expressit. Intellexi senten-
 „tiam passionis futuram. Rogare cæpi, & petere
 „continuo, ut dilatio mihi vel unius diei prorogare-
 „tur, donec res meas legitima ordinatione dispone-
 „rem. Et cum preces frequenter iterassem, rursus
 „in tabula cæperat, nescio quid, adnotare. Sensi ta-
 „men de vultus serenitate iudicis mentem, quasi
 „iusta petitione commotam. Sed & ille juvenis, qui
 „jam dudum de passionis indicio gestu potius quam
 „sermone prodiderat, clandestino identidem nutu
 „concessam dilationem, quæ in crastinum petebatur,
 „contortis post invicem digitis significare properavit.
 „Ego quamvis non esset læta sententia, etsi de gau-
 „dio dilationis acceptæ læto admodum corde gaude-
 „rem; metu tamen interpretationis incertæ sic tre-
 „mebam, ut reliquæ formidinis cor exultans adhuc
 „toto pavore pulsarent.

„Quid hac revelatione manifestius? Quid hac dig-
 „natione felicius? Ante illi prædicta sunt omnia,
 „quæcunque postmodum subsequuta sunt. Nihil Dei
 „verbis imminutum: nihil de tam sancta promissione
 „mutilatum. Singula denique, secundum quod osten-
 „sa sunt, recognoscite. Dilationem petit crastini,
 „cum

„ cum de passionis sententia cogitaretur: postulans, ut
 „ res suas die illo, quem impetraverat, ordinaret. Hic
 „ dies unus significabat annum, quo ille post visionem
 „ acturus in sæculo fuerat. Nam ut manifestius dicam,
 „ eo die post exactum annum coronatus est, quo hoc illi
 „ ante annum fuerat ostensum. Diem autem Domini,
 „ etsi non annum in divinis literis legimus, promissioni
 „ tamen futurorum, debitum illud tempus accipimus.
 „ Inde nihil interest, si sub diei significatione solus
 „ annus ostensus est; quia illud plenius debet esse, quod
 „ majus est. Quod vero nutu potius, & non sermo-
 „ ne explanatum est, repræsentationi temporis serva-
 „ batur sermonis expressio. solet enim tunc verbis
 „ quodcumque proferri, quoties, quidquid profertur,
 „ impletur. Nam & vere nemo cognovit, quare hoc
 „ ei ostensum fuisset, nisi postquam eodem die, quo
 „ id viderat, coronatus est. Medio nihilominus tem-
 „ pore imminens passio pro certo ab omnibus scieba-
 „ tur: Passionis tamen dies certus ab eisdem omnibus
 „ quasi ignorantibus tacebatur. Sane & in scripturis
 „ tale aliquid invenio. Nam Zacharias sacerdos pro-
 „ misso sibi per Angelum filio, quia non crediderat,
 „ obmutuit; ita ut filii nomen, scripturus potius quam
 „ relaturus, nutu tabulas postularet. Merito & hic,
 „ ubi Dei nuncius passionem Antistitis imminentem
 „ nutu potius expressit; & fidem admonuit, & sacerdo-
 „ tem munivit. Dilationis autem petendæ ratio de
 „ ordinatione rerum, & de voluntatis dispositione ve-
 „ niebat. Quæ vero res illi, aut quæ voluntas ordi-
 „ nan-

S. CECILII CYPRIANI (XVII)

„nanda, nisi Ecclesiastici status? suprema iccirco ac-
„cepta dilatio est, ut quidquid circa pauperum fo-
„vendorum curam supremo iudicio disponendum fue-
„rat, ordinaretur. Et puto propter nihil aliud, im-
„mo vero propter hoc tantum, etiam indulgentia ab
„ipsis, qui ejecerant, & qui occisuri erant, admissa
„est; ut præsens præsentes pauperes, novissimæ dif-
„pensationis extremis, & ut plenius dixerim, totis
„sumptibus relevaret.

„Ordinatis ergo tam pie rebus & sic voluntate
„disposita, proximabat dies crastinus. Jam de Xi-
„sto bono ac pacifico sacerdote, ac propterea beatif-
„simo Martyre, ab urbe nuntius venerat. Speraba-
„tur jam jamque carnifex veniens, qui devota san-
„ctissimæ victimæ colla percuteret: & sic erant omnes
„dies illi quotidiana expectatione moriendi, ut coro-
„na singulis posset adscribi. Conveniebant interim
„plures egregii & clarissimi ordinis & sanguinis, sed
„& sæculi nobilitate generosi, qui propter amicitiam
„ejus antiquam, secessum subinde suaderent; & ne
„parum esset nuda suadela, etiam loca, in quæ sece-
„deret, offerebant. Ille vero jam mundum suspen-
„sa ad cælum mente neglexerat, nec suadelis blan-
„dientibus annuebat. Fecisset fortasse tunc etiam,

S. Cypriani Tom. I.

**

„quod

„ quod a plurimis & fidelibus petebatur, si & divino
„ imperio juberetur. Sed nec illa sublimis tanti
„ viri gloria sine præconio transeunda est: quia jam
„ sæculo tumefcente & de fiducia Principum infe-
„ stationem nominis anhelante, ille servos Dei,
„ prout dabatur occasio, exhortationibus domini-
„ cis instruebat, & ad calcandas passionis hujus tem-
„ poris, contemplatione superventuræ claritatis ani-
„ mabat. Videlicet tanta illi fuit sacri cupido fer-
„ monis, ut optaret sic sibi passionis vota contin-
„ gere, ut dum de Deo loquitur, in ipso sermonis
„ opere necaretur.

„ Et hi erant quotidiani actus destinati ad placen-
„ tem Deo hostiam sacerdotis; cum ecce Proconfu-
„ lis jussu ad hortos ejus (ad hortos, inquam, quos
„ inter initia fidei suæ venditos, & Dei indulgentia
„ restitutos, pro certo iterum in usus pauperum ven-
„ didisset, nisi invidiam de persecutione vetaret,) cum
„ militibus suis princeps repente subitavit; immo, ut
„ verius dixerim, subitasse se credidit. Unde enim pos-
„ set tanquam improvise impetu mens semper parata
„ subitari? Processit ergo jam certus expungi, quod
„ diu fuerat retardatum; processit animo sublimi &
„ erecto, hilaritatem præferens vultu, & corde vir-
„ tutem.

„tutem. Sed dilatus in crastinum ad domum prin-
 „cipis a prætorio revertebatur; cum subito per Car-
 „thaginem totam sparsus rumor increbuit, productum
 „esse jam Thascium, quem præter celebrem gloriosa
 „opinionem notitiam etiam de commemoratione præ-
 „clarissimi operis nemo non noverat. Concurrebant
 „undique versus omnes ad spectaculum, nobis pro
 „devotione fidei gloriosum, gentilibus & dolendum.
 „Receptum eum tamen & in domo principis consti-
 „tutum una nocte continuit custodia delicata; ita ut
 „convivæ ejus, & cari in contubernio ex more fueri-
 „mus. Plebs interim tota sollicita, ne per noctem
 „aliquid sine conscientia sui fieret, ante fores prin-
 „cipis excubabat. Concessit ei divina tunc bonitas
 „vere digno, ut populus Dei etiam in sacerdotis
 „passione vigilaret.

„Forſitan tamen quærat aliquis, quæ causa
 „fuerit a prætorio revertendi ad principem. Et
 „volunt hoc scilicet quidam de suo, tunc Pro-
 „consulem noluisse. Absit ut in rebus divinitus
 „gestis segnitiam sive fastidium Proconsulis con-
 „querar. Absit ut malum hoc intra conscien-
 „tiam religiosæ mentis admittam; ut de tam bea-
 „tissimo Martyre rictus hominis judicaret. Sed

„ crastinus dies ille, quem ante annum dignatio
„ divina prædixerat, vere crastinus esse debebat.
„ Illuxit denique dies alius, ille signatus, ille
„ promissus, ille divinus; quem si Tyrannus ipse
„ differre voluisset, nunquam prorsus valeret; dies
„ de conscientia futuri Martyris lætus; & discussis
„ per totum mundi ambitum nubibus, claro sole ra-
„ diatus. Egressus est domum principis, sed Christi
„ & Dei princeps, & agminibus multitudinis mixtæ
„ ex omni parte vallatus est. Sic enim comitatu ejus
„ infinitus exercitus adhærebat, quasi ad expugnandam
„ mortem manu facta veniretur. Eundi autem inter-
„ fuit transitus stadii. Bene vero, & quasi de indu-
„ stria factum, ut et locum congruentis certaminis
„ præteriret, qui ad coronam justitiæ consummato
„ agone currebat. Sed ubi ad prætorium ventum est,
„ nondum procedente Proconsule, secretior locus da-
„ tus est. Illic eum post iter longum nimio sudore
„ madidatus sederet, (sedile autem erat fortuito
„ linteo tectum, ut & sub ictu passionis episcopatus
„ honore frueretur) quidam ex tesserariis quondam
„ christianus res suas obtulit; quasi vellet ille
„ vestimentis suis humidis sicciora mutare: qui
„ videlicet nihil aliud in rebus oblati ambiebat,
„ quam ut proficiscentis ad Deum Martyris sudores

„ jam

S. CÆCILII CYPRIANI. (XXI)

„jam sanguineos possideret. Cui ille respondit, &
„dixit: Medelas adhibemus querelis, quæ hodie for-
„sitan non erunt, mirum, si contempsit laborem
„corpore, qui mortem mente contempserat. Quid
„plura? subito Proconsuli nunciatus est; produci-
„tur, admovetur, interrogatur de suo nomine, se
„esse respondit; & hæcenus verba.

„Legit itaque de tabula jam sententiam iudex,
„quam nuper in visione non legerat: sententiam
„spiritalem non temere dicendam; sententiam Epi-
„scopo tali, & tali teste condignam; sententiam
„gloriosam; in qua dictus est sectæ signifer, & inimi-
„cus deorum, & qui suis futurus esset ipse docu-
„mento, & quod sanguine ejus inciperet disciplina
„sanciri. Nihil hac sententia plenius, nihil verius;
„omnia quippe, quæ dicta sunt, licet a gentili di-
„cta, divina sunt. Nec mirum utique, cum soleant
„de passione Pontifices prophetare. Signifer fue-
„rat, qui de ferendo signo Christi docebat: inimi-
„cus deorum, qui idola destruenda mandabat: do-
„cumento autem suis fuit, qui multis pari genere
„secuturis, prior in Provincia; martyrii primitias
„dedicavit. Sanciri etiam coepit ejus sanguine disci-
„plina: sed martyrum; qui doctorem suum imitatio-

„ne gloriæ consimilis æmulati, ipsi quoque disci-
„nam exempli sui proprio cruore sanxerunt.
„cum exiret prætorii fores, ibat comes militum t-
„ba, & ne quid in passione deesset, centuriones,
„tribuni latus texerant: ipse autem locus æqua-
„est, ubi pati contigit, ut arboribus ex omni p-
„te densatis sublime spectaculum præbeat. S-
„per enormitatem spatii longioris visu denega-
„per confusam nimis turbam, personæ favent
„in ramos arborum repserant; ne vel hoc illi r-
„garetur, ut ad Zachei similitudinem de arborib-
„videretur.

„Sed jam ligatis per manus suas oculis mora
„carnificis urgere tentabat, cujus munus est fe-
„rum; & labente dextera gladium vix trementib-
„digitis circuibat, donec ad perpetrandam pretio-
„viri mortem, clarificationis hora matura, cent-
„rionis manum concessio desuper vigore firmatar
„permisissis tandem viribus expediret. O beatu
„Ecclesiæ populum, qui Episcopo suo tali & ocul-
„pariter & sensibus, & quod est amplius, publico
„voce compassus est; & sicut ipso tractante se-
„per audierat, Deo iudice coronatus est. Quam-
„vis enim non potuerit evenire, quod optabant v-
„ta

S. CÆCILII CYPRIANI. (XXII)

„ta communia, ut consortio paris gloriæ simul plebs
„tota pateretur; quicumque sub Christi spectantis
„oculis, & sub auribus sacerdotis ex animo pati vo-
„luit, per idoneum voti sui testem legationis quo-
„dam modo literas ad Deum misit.

„Sic consummata passione perfectum est; ut Cy-
„prius, qui bonorum omnium fuerat exemplum,
„etiam sacerdotales coronas in Africa primus im-
„bueret; quia & talis esse post Apostolos prior cœ-
„perat. Ex quo enim Carthagini Episcopatus ordo
„numeratur, nunquam aliquis, quamvis ex bonis,
„& sacerdotibus ad passionem venisse memoratur;
„licet semper Deo mancipata devotio, dicatis ho-
„minibus pro martyrio deputetur: Cyprianus ta-
„men etiam ad perfectam coronam Domino con-
„summante profecit; ut in civitate ipsa in qua tali-
„ter vixerat, & in qua prior fecerat multa præcla-
„ra, prior etiam sacerdotii cœlestis insignia gloriose
„cruore decoraret.

„Quid hoc loco faciam, inter gaudium passio-
„nis, & remanendi dolorem? in partes divisus ani-
„mus; & angustum nimis pectus affectus duplices
„onerant. Dolebo, quod non comes fuerim? sed,

„ illius

(XXIV) VITA S. CÆCILII CYPRIANI.

„ Illius victoria triumphanda est. De victoria tri-
„ phabo? sed doleo, quod comes non sim. Ver-
„ vobis tamen & simpliciter confitendum est, qu-
„ & vos scitis, in hac me fuisse sententia. Multu-
„ ac nimis multum de gloria ejus exulto; plus tamen
„ doleo, quod remansi. „

Divi



DIVI
CÆCILII CYPRIANI
EPISCOPI CARTHAGINENSIS
EPISTOLÆ.

EPISTOLA PRIMA.

Ad Donatum.

CÆCILIIUS Cyprianus Donato salutem. Bene admones, Donate carissime. Nam & promississe me memini, & reddendi tempestivum prorsus hoc tempus est, quum indulgente vindemia solutus animus in quietem solennes ac statas anni fatiscantis inducias sortitur. Locus etiam cum die convenit, & mulcendis sensibus ac fovendis ad lenes auras blandientis autumnii hortorum facies amœna consentit. Hic jucundum sermonibus diem ducere, & studentibus fabulis in divina præcepta conscientiam pectoris erudire: ac ne colloquium nostrum arbiter prophanus impediatur, aut clamor intemperans familiæ strepentis obtundat, petamus hanc sedem. Dant secessum vicina secreta; ubi dum erratici palmitum lapsus nexibus pendulis per arundines bajulas repunt, viteam porticum frondea tecta fecerunt. Bene hic studia in aures damus; & dum in arbores & in vites oblectante prospectu oculos amœnamus, animum simul & auditus instruit & pascit obtutus. Quamquam tibi sola nunc gratia, sola cura sermonis est. Contemptis voluptariæ visionis illecebris in me oculus tuus fixus est.

S. Cypriani Tom. I.

A

Tam

Tam aure quam mente totus auditor es, & hoc amore quo diligis. Ceterum quale vel quantum est, quod in pectus tuum veniat ex nobis? Exilis ingenii angusta mediocritas tenues admodum fruges parit, nullis ad copiam fecundi cespitis culminibus ingravescit. Aggrediar tamen facultate qua valeo; nam & materia dicendi facit mecum. In judiciis, in concione pro rostris, opulenta facundia volubili ambitione jactetur: cum vero de Domino Deo vox est, vocis pura sinceritas non eloquentiæ viribus nititur ad fidei argumenta, sed rebus. Denique accipe non diserta, sed fortia, nec ad audientiæ popularis illecebram culto sermone fucata, sed ad divinam indulgentiam prædicandam rudi veritate simplicia. Accipe, quod sentitur antequam discitur, nec per moras temporum longa agnitione colligitur, sed compendio gratiæ maturantis hauritur. Ego cum in tenebris atque in nocte cæca jacerem, cumque in salo jactantis sæculi nutabundus ac dubius vestigiis oberrantibus fluctuarem, vitæ meæ nescius, veritatis ac lucis alienus, difficile prorsus ac durum pro illis tunc moribus opinabar, quod in salutem mihi divina indulgentia pollicebatur, ut quis renasci denuo posset, utque in novam vitam lavacro aquæ salutaris animatus, quod prius fuerat, exponeret, & corporis licet manente compage, hominem animo ac mente mutaret. Qui possibilis, aiebam, est tanta conversio, ut repente ac perneciter exuatur, quod vel genuinum situ materiæ naturalis obduruit, vel usurpatum diu senio vetustatis inolevit? Alta hæc & profunda penitus radice sederunt. Quando parsimoniam discit, qui epularibus cœnis & largis dapibus assuevit, & qui pretiosa veste conspicuus, in auro atque in purpura fulsit, ad plebejum se ac simplicem cultum quando deponit? Fascibus ille oblectatus & honoribus esse privatus & inglorius non potest. Hic stipatus clientium cuneis,
frequent-

frequentiore comitatu officiosi agminis honestatus, pœnam putat esse cum solus est. Tenacibus semper illecebris necesse est, ut solebat, vinolentia invitet, inflat superbia, iracundia inflammet, rapacitas inquietet, crudelitas stimulet, ambitio delectet; libido præcipitet. Hæc egomet sæpe mecum. Nam ut ipse quamplurimis vitæ prioris erroribus implicitus tenebar, quibus exui me posse non crederem, sic vitiis adhærentibus obsecundans eram, & desperatione meliorum malis meis veluti jam propriis ac vernaculis affavebam. Sed postquam undæ genitalis auxilio superioris ævi labe deterfa, in expiatum pectus serenum ac purum, desuper se lumen infudit, postquam cœlitus spiritu hausto in novum me hominem nativitas secunda reparavit; mirum in modum protinus confirmare se dubia, patere clausa, lucere tenebrosa, facultatem dare, quod prius difficile videbatur, geri posse, quod impossibile putabatur, ut esset agnoscere terrenum fuisse, quod prius carnaliter natum delictis obnoxium viveret, Dei esse cœpisse, quod jam spiritus sanctus animaret. Scis ipse profecto & mecum pariter recognoscis, quid detraxerit nobis quidve contulerit mors ista criminum, vita virtutum. Scis ipse, nec prædico. In proprias laudes odiosa jactatio est, quamvis non jactatum possit esse, sed gratum, quicquid non virtuti hominis ascribitur, sed de Dei munere prædicatur; ut jam non peccare esse cœperit fidei, quod ante peccatum est, fuerit erroris humani. Dei est, inquam, Dei est omne quod possumus. Inde vivimus, inde polemamus, inde sumpto & concepto vigore, hic adhuc positi futurorum indicia prænoscamus. Sit tantum timor innocentiae custos, ut qui in mentes nostras indulgentiæ cœlestis allapsu clementer Dominus influxit, in animi oblectantis hospitio iusta obtemperacione teneatur, ne accepta securitas indili-

diligentiam pariat, & vetus denuo hostis obrepat. Ceterum si tu innocentiae, si iustitiae viam teneas, si illapsa firmitate vestigii tui incedas, si in Deum viribus totis ac toto corde suspensus, hoc sis tantum quod esse cepisti; tantum tibi ad licentiam datur, quantum gratiae spiritalis augetur. Non enim, qui beneficiorum terrestrium mos est, in capeffendo munere coelesti mensura ulla vel modus est. Profluens largiter spiritus nullis finibus premitur, nec coercentibus claustris intra certa metarum spatia frænatur. Manat jugiter, exuberat affluenter. Nostrum tantum sitiat pectus & pateat. Quantum illuc fidei capax afferimus, tantum gratiae inundantis haurimus. Inde jam facultas datur, castitate sobria, mente integra, voce pura, virtute sincera, in medelam dolentium posse venenorum virus extinguere, animorum desipientium labes reddita sanitate purgare, infestis jubere pacem, violentis quietem, ferocientibus lenitatem, immundos & erraticos spiritus, qui se expugnandis hominibus immerferint, ad confessionem minis increpantibus cogere, ut recedant, duris verberibus urgere, confictantes, ejulantes, gementes incremento poenae propagantis extendere, flagris cedere, igne torrere. Res illic geritur, nec videtur; occulta plaga, & poena manifesta. Ita quod esse jam coepimus, acceptus spiritus licentia sua potitur; quod necdum corpus ac membra mutavimus, adhuc carnalis aspectus saeculi nube coecatur. Quantus hic animi potentatus, quanta vis est, non tantum ipsum esse subtractum perniciosis contactibus mundi, ut quis expiatus & purus nulla incurfantis inimici labe capiatur, sed adhuc majorem & fortio rem viribus fieri, ut in omnem adversarii grassantis exercitum imperioso jure dominetur? Atque ut illustrius veritate patefacta divini muneris indicia clarescant, lucem tibi ad cognitionem dabo, malorum caligine absterfa, operti saeculi

culi tenebras revelabo. Paulisper te crede subduci in montis ardui verticem celsiorem, speculari inde rerum infra te jacentium facies; & oculis in diversa porrectis, ipse a terrenis contactibus liber fluctuantis mundi turbines intuere. Jam sæculi & ipse misereberis, tuique admonitus & plus in Deum gratus, majore lætitia quod evaseris, gratulaberis. Cerne tu itinera latronibus clausa, maria obsessa prædonibus, cruento horrore castrorum bella ubique divisa. Madet orbis mutuo sanguine; & homicidium cum admittunt singuli, crimen est, virtus vocatur cum publice geritur. Impunitatem sceleribus acquirit non innocentiae ratio, sed sævitiae magnitudo. Jam si ad urbes ipsas oculos tuos atque ora convertas, celebritatem offendes omni solitudine tristiore. Paratur gladiatorius ludus, ut libidinem crudelium luminum sanguis oblectet. Impletur in succum cibus fortioribus corpus, & arvinæ toris membrorum moles robusta pinguescit, ut saginatus in pœnam carius pereat. Homo occiditur in hominis voluptatem; & ut quis possit occidere peritia est, usus est, ars est. Scelus non tantum geritur, sed & docetur. Quid potest inhumanius, quid acerbius dici? Disciplina est, ut perimere quis possit, & gloria est, quod perimit. Quid illud, oro te, quale est ubi se feris obijciunt, quos nemo damnavit, ætate integra, honesta satis forma, veste pretiosa, viventes in ultro-neum funus ornantur, malis suis miseri gloriantur. Pugnant ad bestias, non crimine, sed furore. Spectant filios suos patres. Frater in cavea est, & soror præsto est. Et spectaculi licet pretium largior muneris apparatus amplificet, ut mœroribus suis mater intersit, hoc, proh dolor, mater & redimit; & in tam impiis spectaculis tamque diris & funestis esse se non putant oculis parricidas. Converte hinc vultus ad diversi spectaculi non minus pœnitenda conta-

gia; in theatris quoque conspicias, quod tibi & dolori sit & pudori. Cothurnus est tragicus prisca facinora carmine recensere. De parricidiis & incestis horror antiquus expressa ad imaginem veritatis actione replicatur, ne sæculis transeuntibus exolescat, quod aliquando commissum est. Admonetur ætas omnis auditu, fieri posse quod factum est. Numquam ævi senio delicta moriuntur, numquam temporibus crimen obruitur, numquam scelus oblivione sepelitur. Exempla fiunt quæ esse jam facinora destiterunt. Tum delectat in mimis turpitudinum magisterio vel quid domi gesserit recognoscere, vel quid gerere possit audire. Adulterium discitur, dum videtur; & lenocinante ad vitia publicæ auctoritatis malo, quæ pudica fortasse ad spectaculum matrona processerat, de spectaculo revertitur impudica. Adhuc deinde morum quanta labes, quæ probrorum fomenta, quæ alimentum vitiorum, histrionicis gestibus inquinari? videre contra fœdus jusque nascendi patientiam incestæ turpitudinis elaboratam? Evirantur mares, honor omnis & vigor sexus enervati corporis dedecore molliuntur, plusque illic placet quisquis virum in feminam magis fregerit. In laudem crescit ex crimine, eo peritior quo turpior judicatur. Spectatur hic, pro nefas, & libenter. Quid non possit suadere qui talis est? Movet sensus, mulcet affectus, expugnat boni pectoris conscientiam fortiolem; nec deest probri blandientis auctoritas, ut auditu molliore perniciēs hominibus obrepāt. Exprimunt impudicam Venerem, adulterum Martem, Jovem illum suum, non magis regno quam vitiis principem, in terrenos amores cum ipsis suis fulminibus ardentem, nunc in plumas oloris albescere, nunc aureo imbre defluere, nunc in puerorum pubescentium raptus ministris avibus prosilire. Quære jam nunc, an possit esse qui spectat, integer vel pudicus. Deos suos, quos
vene-

venerantur, imitantur, fiunt miseris & religiosa delicta. O si possis in illa sublimi specula constitutus oculos tuos inferere secretis, recludere cubiculorum obductas fores, & ad conscientiam luminum penetralia occulta referare: aspicias ab impudicis geri, quod nec possit aspicere frons pudica, videas quod crimen sit & videre; videas quod vitiorum furore dementes gessisse se negant & gerere festinant. Libidinibus insanis in viros viri prouunt. Fiunt quæ nec illis possunt placere qui faciunt. Mentior nisi alios qui talis est increpat. Turpes turpis infamat, & evasisse se conscium credit, quasi conscientia satis non sit. Idem in publico accusatores, in occulto rei, in semetipsos censores pariter & nocentes. Damnant foris quod intus operantur. Admittunt libenter, quod cum admiserint, criminantur. Audacia prorsus cum vitiis faciens, & impudentia congruens impudicis. Nolo mireris quæ loquuntur huiusmodi. Ore illo quicquid jam voce delinquitur minus est. Sed tibi post insidiosas vias, post diversas orbe toto multiplices pugnas, post spectacula vel cruenta vel turpia, post libidinum probra vel lupanaribus prostituta vel domesticis parietibus oblecta, quorum quo secretior culpa, major audacia est, forum fortasse videatur immune, quod ab injuriis lacerantibus liberum, nullis malorum contactibus polluitur. Illuc aciem tuam flecte. Plura illic quæ detesteris invenies, magis oculos tuos inde divertes. Incisæ sint licet leges duodecim tabulis, & publice ære præfixo jura præscripta sint, inter leges ipsas delinquitur, inter jura peccatur. Innocentia nec illic ubi defenditur, reservatur. Sævit invicem discordantium rabies, & inter togas pace rupta forum litibus mugit insanum, hasta illic & gladius & carnifex præsto est, ungula effodiens, equuleus extendens, ignis exurens, ad hominis corpus unum supplicia plura quam membra.

bra. Quis inter hæc vero subveniat? Patronus? Se prævaricatur & decipit. Judex? Sed sententiam vendit. Qui sedet crimina vindicaturus, admittit; & reus innocens pereat, sit nocens judex. Flagra ubique delicta, & passim multiformi genere peccant per improbas mentes nocens virus operatur. Hæc testamentum subjicit, ille falsum capitali fraude conscribit, hic arcentur hereditatibus liberi, illic bonæ donantur alieni, inimicus insimulat, calumniator impugnat, testis infamat. Utrobique grassatur in mercedarium criminum prostitutæ vocis venalis audacia cum interim nocentes nec cum innocentibus pereunt. Nullus de legibus metus est, de quæsitore, de iudice pavor nullus. Quod potest redimi non timetur. Esse jam inter nocentes innoxium crimen est. Multos quisquis non imitatur, offendit. Consensere jupeccatis, & cœpit licitum esse quod publicum est. Quis illic rerum pudor, quæ esse possit integritas ubi qui damnant improbos, defunt, soli ibi qui damnantur occurrunt. Sed ne nos videamur eligere fortasse pejora, & studio destruendi per ea oculos trahere, quorum tristis atque aversandus aspectus oculis & vultus conscientiæ melioris offendat, jam tibi illud quæ ignorantia sæcularis bona opinatur, ostendam. Illic etiam fugienda conspicias. Quos honores putas esse? quos fasces? quam affluentiam in divitiis quam potentiam in castris? in magistratu purpuræ speciem? in principatu licentiæ potestatem? Malorum blandientium virus occultum est, & arridentis nequitie facies quidem læta, sed calamitatis abstrusæ illiæ cerebrosa fallacia; instar quoddam veneni, ubi in lethales succos dulcedine aspersa calliditate fallendi scopore medicato, poculum videtur esse quod fumitur ubi epota res est, pernicies hausta grassatur. Quippe illum vides qui amictu clariore conspicuus fulgere videtur in purpura. Quibus hoc sordibus emit
ful-

fulgeat? quos arrogantium fastus prius pertulit? quas superbas fores matutinus saluator obsedit? quot tumentium contumeliosa vestigia stipatus in clientium cuneos ante præcessit, ut ipsum etiam salutatum comes postmodum pompa præcederet, obnoxia non non homini, sed potestati? Neque enim coli moribus meruit ille, sed fascibus. Horum denique videas exitus turpes, cum auceps temporum, palpator abscessit, cum privati latus nudum desertor afflecla fodavit. Tunc laceratæ domus plagæ conscientiam feriunt, tunc rei familiaris exhaustæ damna noscuntur, quibus redemptus favor vulgi, & caducis atque inanibus votis popularis aura quæsitæ est. Stulta prorsus & vana jactura, frustrantis spectacula voluptate id parare voluisse, quod nec populus acciperet & perderet magistratus. Sed & quos divites opinari continuantes saltibus saltus, & de confinio pauperibus exclusis, infinita ac sine terminis rura latius porrigentes, quibus argenti & auri maximum pondus, & pecuniarum ingentium vel extructi aggeres vel defossæ strues, hos etiam inter divitias suas trepidos cogitationis incertæ sollicitudo discruciat, ne prædo vastet, ne percussor infestet, ne inimica cujusque locupletioris invidia calumniosis litibus inquietet. Non cibus securo somnusve contingit. Suspirat ille in convivio, bibat licet gemmas; & cum epulis marcidum corpus torus mollior alto sinu condiderit, vigilat in pluma; nec intelligit miser, speciosa sibi esse supplicia, auro se alligatum teneri, & possideri magis quam possidere divitias atque opes. Atque o detestabilis cæcitas mentium, & cupiditatis insanæ profunda caligo! Cum exonerare se possit & levare ponderibus, pergit magis fortunis angentibus incubare, pergit pœnalibus cumulis pertinaciter adhærere. Nulla in clientes inde largitio est, cum indigentibus nulla partitio; & pecuniam suam dicunt,

A 5

quam

quam velut alienam domi clausam sollicito labore custodiunt, ex qua non amicis, non liberis quicquam, non sibi depique impertiunt. Possident ad hoc tantum ne possidere liceat. Et o nominum quanta diversitas! Bona appellant, ex quibus nullus illis nisi ad res malas usus est. An tu vel illos putas tutos, illos saltem inter honorum infulas & opes largas stabili firmitate securos, quos regalis aulae splendore fulgentes armorum excubantium tutela circumstat? Major illis quam ceteris metus est. Tam ille timere cogitur quam timetur. Exigit poenas pariter de potentiore sublimitas, sit licet satellitum manu septus, & clausum ac protectum latus numerofo stipatore tueatur. Quam securos non sinit esse subiectos, tam necesse est non sit & ipse securus. Ante ipsos terret potestas sua, quos facit esse terribiles. Arridet ut saeviat, blanditur ut fallat, illicit ut occidat, extollit ut deprimat. Fœnore quodam nocendi quam fuerit amplior summa dignitatis & honorum, tam major exigitur usura poenarum. Una igitur placida & fida tranquillitas, una solida & firma & perpetua securitas, si quis ab his inquietantis sæculi turbinibus extractus, salutaris portus statione fundatus, ad cœlum oculos tollat a terris, & ad Domini munus admissus, ac Deo suo mente jam proximus, quicquid apud ceteros in rebus humanis sublime ac magnum videtur, infra suam jacere conscientiam gloriatur. Nihil appetere jam, nihil desiderare de sæculo potest qui sæculo major est. Quam stabilis, quam inconcussa tutela est, quam perennibus bonis cœleste præsidium, implicantis mundi laqueis solvi, in lucem immortalitatis æternæ de terrena fœce purgari. Viderit quæ in nos prius infestantis inimici pernicies infidiosa grassata sit. Plus amare compellimur, quod futuri sumus; dum & scire conceditur & damnare quod eramus. Nec ad hoc pretiis aut ambitu aut manu

manu opus est, ut hominis summa vel dignitas vel potestas elaborata mole pariat, sed gratuitum de Deo munus & facile est. Ut sponte sol radiat, dies luminat, fons rigat, imber irrorat, ita se spiritus cœlestis infundit. Postquam auctorem suum cœlum intuens anima cognovit, sole altior, & hac omni terrena potestate sublimior, id esse incipit quod esse se credit. Tu tantum, quem jam spiritualibus castris cœlestis militia signavit, tene incorruptam, tene sobriam religiosis virtutibus disciplinam. Sit tibi vel oratio assidua vel lectio. Nunc cum Deo loquere, nunc Deus tecum. Ille te præceptis suis instruat, ille disponat. Quem ille divitem fecerit, nemo pauperem faciet. Penuria esse nulla jam poterit, cui semel pectus cœlestis sagina saturavit. Jam tibi auro distincta laquearia & pretiosi marmoris crustis vestita domicilia fordebunt, cum scieris te excolendum magis, te potius ornandum, domum tibi hanc esse potiore, quam Dominus insedit templi vice, in qua spiritus sanctus cœpit habitare. Pingamus hanc domum pigmentis innocentiae, luminemus luce justitiae. Non hæc unquam procumbet in lapsum senio vetustatis, nec pigmento parietis aut auro exolescente fœdabitur. Caduca sunt quaecumque fucata sunt, nec fiduciam præbent possidentibus stabilem, quæ possessionis non habent veritatem. Hæc manet cultu jugiter vivido, honore integro, splendore diuturno, aboleri non potest nec extinguere, potest tantum in melius corpore redeunte formari. Hæc interim brevibus, Donate carissime. Nam etsi facilem de bonitate patientiam, mentem solidam, fidem tutam salutaris auditus oblectat, nihilque tam tuis auribus gratum est, quam quod in Deo gratum est, moderari tamen dicenda debemus simul juncti & sæpius collocuturi. Et quoniam feriata nunc quies ac tempus est otiosum, quicquid inclinato jam sole in vesperam

peram diei superest, ducamus hanc diem læti, nec sit vel hora convivii gratiæ cœlestis immunis. Sonet psalmos convivium sobrium, & ut tibi tenax memoria est, vox canora, aggredere hoc munus ex more. Magis carissimos pascas, si sit nobis spiritalis auditio, proleat aures religiosa mulcedo.

EPISTOLA II.

*Cleri Romani ad clerum Carthaginensem de secessu
Divi Cypriani.*

DIDICIMUS secessisse benedictum Papam Cyprianum a Crementio subdiacono, qui a vobis ad nos venit, certa ex causa, quod utique recte fecerit, propterea quod sit persona insignis. Et imminente agone quem permisit Deus in sæculo colluctandi causa cum adversario, simul cum servis suis, volens etiam angelis & hominibus certamen hoc manifestare, ut qui vicerit coronetur, victus vero reportaverit in se sententiam, quæ nobis manifestata est. Et cum incumbat nobis, qui videmur præpositi esse, & vice pastoris custodire gregem, si negligentes inveniamur, dicetur nobis quod & antecessoribus nostris dictum est, qui tam negligentes præpositi erant, quoniam perditum non requisivimus, & errantem non correximus, & claudum non colligavimus, & lac eorum edebamus, & lanis eorum operiebamur. Denique & ipse Dominus implens quæ erant scripta in lege & prophetis, docet dicens: *Ego sum pastor bonus, qui pono animam meam pro ovibus meis. Mercenarius autem & cujus non sunt propria oves, cum viderit lupum venientem, relinquit & fugit, & lupus dispergit eas.* Sed & Simoni dicit: *Diligis me?* Respondit, *Diligo.* Ait ei: *Pasce oves meas.* Hoc verbum factum ex actu ipso quo cessit cognoscimus,

mus, & ceteri discipuli similiter fecerunt. Nolumus ergo, fratres dilectissimi, vos mercenarios inveniri, sed bonos pastores, cum sciatis tum non minimum periculum incumbere, si non hortati fueritis fratres nostros stare in fide immobiles, ne in præceps euntium ad idololatriam funditus eradicetur fraternitas. Nec enim hoc solum verbis vos hortamur, sed discere poteritis a pluribus a nobis ad vos venientibus, quoniam ea omnia nos Deo adjuvante & fecimus & facimus cum omni sollicitudine & periculo sæculari, ante oculos plus habentes timorem Dei & pœnas perpetuas, quam timorem hominum & brevem injuriam, non deserentes fraternitatem, & hortantes eos stare in fide, & paratos esse ire cum Domino. Sed & ascendentes ad hoc quod compellebantur, revocavimus. Ecclesia stat in fide, licet quidam terrore ipso compulsi, sive quod essent insignes personæ, sive apprehensi timore hominum, vererentur: quos quidem separatos a nobis non dereliquimus, sed ipsos cohortati sumus & hortamur agere pœnitentiam, si quo modo indulgentiam poterunt recipere ab eo qui potest præstare; ne si relictæ fuerint a nobis, pejores efficiantur. Videtis ergo, fratres, quoniam & vos hoc facere debetis, ut etiam illi qui ceciderunt, hortatu vestro corrigentes animos eorum, si apprehensi fuerint iterato, confiteantur, ut possint priorem errorem corrigere, & alia quæ incumbunt vobis, quæ etiam & ipsa subdidimus, ut si qui in hanc tentationem inciderunt, cœperint apprehendi infirmitate, & agant pœnitentiam facti sui, & desiderant communionem, utique subveniri eis debet, si-ve viduæ, si-ve clinomeni, qui se exhibere non possunt, si-ve hi qui in carceribus sunt, si-ve exclusi de sedibus suis, utique habere debent qui eis ministrent. Sed & cateccumini apprehensi infirmitate, decepti esse non debebunt, ut eis subveniat. Et quod maximum

num est, corpora martyrum aut ceterorum si non sepeliantur, grande periculum imminet eis, quibus incumbit hoc opus. Cujuscumque ergo vestrum quacumque occasione fuerit effectum hoc opus, certissimum eum bonum servum æstimari, ut qui in minimo fidelis fuit, constituatur super decem civitates. Faciat autem Deus, qui omnia præstat sperantibus in se, ut omnes nos in his operibus inveniamur. Salutant vos fratres qui sunt in vinculis, & presbyteri & tota ecclesia, quæ & ipsa cum summa sollicitudine excubat pro omnibus, qui invocant nomen Domini. Sed & vos petimus mutua vice memores sitis nostri. Sciatis autem Bassianum pervenisse ad nos; & petimus vos, qui habetis zelum Dei, harum litterarum exemplum ad quoscumque poteritis, transmittere per idoneas occasiones, vel vestras faciatis, sive nuntium mittatis, ut stent fortes & immobiles in fide. Optamus vos, fratres carissimi, semper bene valere.

EPISTOLA III.

Ad presbyteros & diaconos Romæ consistentes.

CYPRIANUS presbyteris & diaconibus Romæ consistentibus fratribus salutem. Cum de excessu boni viri collegæ mei rumor apud nos incertus esset, fratres carissimi, & opinio dubia nutaret: accepi a vobis litteras ad me missas per Crementium hypodiaconum, quibus plenissime de glorioso ejus exitu instruerer; & exsultavi satis quod pro integritate administrationis ejus, consummatio quoque honesta processerit. In quo vobis quoque plurimum gratulor quod ejus memoriam tam celebri & illustri testimonio prosequamini, ut per vos innotesceret nobis quod & vobis esset circa præpositi memoriam gloriosum, & nobis

nobis quoque fidei ac virtutis exemplum. Nam quantum pernicioſa res eſt ad ſequentium lapſum ruina præpoſiti, in tantum contra utile & ſalutare, cum ſe epiſcopus per firmamentum fidei fratribus præbet imitandum. Legi etiam alias litteras in quibus nec quis ſcripſerit, nec ad quos ſcriptum ſit, ſignificanter expreſſum eſt. Et quoniam me in iſdem litteris & ſcriptura, & ſenſus, & chartæ ipſæ quoque moverunt, ne quid ex vero vel ſubtractum ſit vel immutatum: eandem ad vos epiſtolam authenticam remiſi, ut recognoſcatis an ipſa ſit quam Crementio hypo- diacono perferendam dediftis. Perquam etenim grave eſt, ſi epiſtolæ clericæ veritas mendacio aliquo & fraude corrupta eſt. Hoc igitur ut ſcire poſſimus, & ſcripturam & ſubſcriptionem an veſtra ſit recognoſcite, & nobis quid ſit in vero reſcribite. Opto vos, fratres cariffimi, ſemper bene valere.

EPISTOLA IV.

Ad preſbyteros & diaconos.

CYPRIANUS preſbyteris & diaconibus fratribus cariffimis ſalutem. Saluto vos incolumis per Dei gratiam, fratres cariffimi, lætus quod circa incolumitatem quoque veſtram omnia integra eſſe cognoverim. Et quoniam mihi intereſſe nunc non permittit loci conditio; peto vos pro fide & religione veſtra, fungamini illic & veſtris partibus & meis, ut nihil vel ad diſciplinam, vel ad diligentiam deſit. Quantum autem ad ſumptus ſuggerendos, ſive illis qui glorioſa voce Dominum confeſſi in carcere ſunt conſtituti, ſive iis qui pauperes & indigentes laborant, & tamen in Domino perfeverant, peto nihil deſit, cum ſumma omnis quæ redacta eſt, illic ſit apud clericos diſtributa propter ejuſmodi caſus; ut
habe-

haberent plures, unde ad necessitates & pressuras singulorum operari possint. Peto quoque ut ad procurandam quietem solertia & sollicitudo vestra non desit. Nam etsi fratres pro dilectione sua cupidi sunt ad conveniendum & visitandum confessores bonos, quos illustravit jam gloriosis initiis divina dignatio, tamen caute hoc, & non glomeratim, nec per multitudinem simul junctam puto esse faciendum, ne ex hoc ipso invidia concitetur, & introeundi aditus denegetur; & dum insatiabiles totum volumus, totum perdamus. Consulite ergo & providete, ut cum temperamento hoc agi tutius possit, ita ut presbyteri quoque, qui illic apud confessores offerunt, singuli cum singulis diaconis per vices alternent, quia & mutatio personarum, & vicissitudo convenientium minuit invidiam. Circa omnia enim mites & humiles, ut servis Dei congruit, temporibus servire & quieti prospicere & plebi providere debemus. Opto vos, fratres carissimi ac desideratissimi, semper bene valere & nostri meminisse. Fraternitatem universam salutate. Salutant vos diaconus, & qui mecum sunt. Valete.

EPISTOLA V.

Ad presbyteros & diaconos.

CYPRIANUS presbyteris & diaconis fratribus salutem. Optaveram quidem, fratres carissimi, ut universum clerum nostrum integrum & incolumem meis litteris salutarem: sed quoniam infesta tempestas, quæ plebem nostram ex maxima parte prostravit, hunc quoque addidit nostris doloribus cumulum, ut etiam cleri portionem sua strage perfringeret: oramus Dominum ut vos saltem, quos & in fide, & in virtute stare cognovimus, tutos quoque in posterum

sterum per divinam misericordiam salutemus. Et quamquam causa compelleret, ut ipse ad vos propere & venire deberem, primo cupiditate & desiderio vestri, quæ res in votis meis summa est, tum deinde ut ea quæ circa ecclesiæ gubernacula utilitas communis exposcit, tractare simul & plurimorum consilio examinata delimare possemus: tamen potius visum est adhuc interim latebram & quietem tenere respectu utilitatum aliarum, quæ ad pacem omnium nostrum pertinent & salutem, quatum vobis a Tertullo fratre nostro carissimo ratio reddetur: qui pro cetera sua cura quam impense divinis operibus imperit, etiam hujus consilii auctor fuit, ut cautus & moderatus existerem, nec me in conspectum publicum, & maxime ejus loci, ubi toties flagitatus & quaesitus fuisset, temere committerem. Fretus ergo & dilectione & religione vestra, quam satis novi, his litteris & hortor & mando, ut vos, quorum minime illic invidiosa & non adeo periculosa præsentia est, vice mea fungamini circa gerenda ea, quæ administratio religiosa deposcit. Habeatur interim quantum potest & quomodo potest pauperum cura, sed qui tamen inconcussa fide stantes gregem Christi non reliquerunt, ut his ad tolerandam penuriam sumptus per vestram diligentiam suggeratur, ne quod circa fidentes tempestas non fecit, circa laborantes necessitas faciat. Confessoribus etiam gloriosis impertiatur cura propensior. Et quamquam sciam plurimos ex his fratrum voto & dilectione susceptos, tamen si qui sunt qui vel vestitu vel sumptu indigeant, sicut etiam pridem vobis scripseram, cum adhuc essent in carcere constituti, subministrentur eis quæcumque sunt necessaria, modo ut sciant ex vobis, & instruantur & discant, quid secundum scripturarum magisterium ecclesiastica disciplina deposcat, humiles & modestos & quietos esse debere, ut honorem sui

nominis servant, & qui gloriosi voce fuerunt, sint
 & moribus gloriosi, faciant se dignos ut in omnibus
 Dominum promerentes, ad cælestem coronam laudis
 suæ consummatione perveniant. Plus enim superest
 quam quod transactum videtur, cum scriptum sit:
Ante mortem ne laudes hominem quemquam. Et iterum:
Esto fidelis usque ad mortem, & dabo tibi coronam vita.
 Et Dominus quoque dicat: *Qui toleraverit usque ad finem, hic salvabitur.* Imitentur Dominum, qui sub
 ipso tempore passionis non superbior, sed humilior
 fuit. Tunc enim discipulorum suorum pedes lavit
 dicens: *Si ego lavi pedes vestros magister & dominus, &*
vos debetis aliorum pedes lavare. *Exemplum enim dedi vo-*
bis, ut sicut ego feci & vos faciatis. Item Pauli apo-
 stoli documenta sectentur; qui post carcerem sæpe
 repetitum, post flagella, post bestias, circa omnia
 mitis & humilis perseveravit, nec post tertium cælum
 & paradysum quidquam sibi insolenter assumpsit di-
 cens: *Neque gratis panem manducavimus ab aliquo vest-*
rum, sed in labore & fatigatione nocte & die operantes,
ne quem vestrum gravaremus. Hæc singula, oro vos,
 insinuate fratribus nostris. Et quia is exaltabitur
 qui se humiliaverit; nunc est ut magis insidiantem ad-
 versarium metuant, qui fortiorem quemque magis
 aggreditur, & acrior factus hoc ipso quo victus est,
 superantem superare conatur. Dominus faciat ut & ego
 iterum illos mature videre; & salutari exhortatione
 componere mentes eorum ad servandam gloriam suam
 possim. Doleo enim quando audio quosdam improbe
 & insolenter discurrere, & ad ineptias vel ad discor-
 dias vacare, Christi membra & jam Christum confes-
 sa per concubitus illicitos inquinari, nec a diaconis
 aut presbyteris regi posse, sed id agere, ut per pau-
 corum pravos & malos mores multorum & bonorum
 confessorum gloria honesta maculetur; quos vereri
 debent, ne ipsorum testimonio & iudicio condem-
 nati,

nati, ab eorum societate priventur. Is enim demum confessor illustris & verus est, de quo postmodum non erubescit ecclesia, sed gloriatur. Ad id vero quod scripserunt mihi compresbyteri nostri Donatus & Fortunatus, Novatus & Gordius, solus rescribere nihil potui, quando a primordio episcopatus mei statuerim nihil sine consilio vestro & sine consensu plebis, mea privatim sententia gerere. Sed cum ad vos per Dei gratiam venero, tunc de iis quæ vel gesta sunt vel gerenda, sicut honor mutuus poscit, in commune tractabimus. Opto vos, fratres carissimi ac desideratissimi, semper bene valere & mei meminisse. Fraternitatem quæ vobiscum est multum a me salutate, & ut nostri meminerit admonete. Valete.

E P I S T O L A VI.

Ad Rogatianum presbyterum & ceteros confessores.

CYPRIANUS Rogatiano presbytero & ceteris confessoribus fratribus salutem. Et jampridem vobis, fratres carissimi ac fortissimi, litteras miseram, quibus fidei & virtuti vestræ verbis exsultantibus gratularer, & nunc non aliud in primis vox nostra complectitur, quam ut læto animo frequenter ac semper gloriam vestri nominis prædicemus. Quid enim vel majus in votis meis potest esse vel melius, quam cum video confessionis vestræ honore inluminatum gregem Christi? Nam cum gaudere in hoc omnes fratres oporteat, tum in gaudio communi major est episcopi portio. Ecclesiæ enim gloria præpositi gloria est. Quantum dolemus ex illis quos tempestas inimica prostravit; tantum lætamur ex vobis, quos diabolus superare non potuit. Hortamur tamen per communem fidem, per pectoris nostri veram circa vos & simplicem caritatem, ut qui adversarium pri-

ma hac congressione vicistis, gloriam vestram forti & perseveranti virtute teneatis. Adhuc in sæculo sumus, adhuc in acie constituti, de vita nostra quotidie dimicamus. Danda opera est, ut post hæc initia ad incrementa quoque veniatur, & consummetur in vobis, quod jam rudimentis felicibus esse cœpistis. Parum est adipisci aliquid potuisse. Plus est quod adeptus es posse servare; sicut & fides ipsa & natiuitas salutaris, non accepta, sed custodita vivificat. Nec statim consecutio, sed consummatio hominem Deo servat. Dominus hoc magisterio suo docuit dicens: *Ecce sanus factus es, jam noli peccare, ne quid tibi deterius fiat.* Puta hoc illum & confessori suo dicere: *Ecce confessor factus es, jam noli peccare, ne quid tibi deterius fiat.* Salomon denique & Saul & ceteri multi quamdiu in viis Domini ambulaverunt, datam sibi gratiam tenere potuerunt. Recedente ab iis disciplina dominica, recessit & gratia. Perseverandum nobis est in arcto & in angusto itinere laudis & gloriæ; & cum quies & humilitas & bonorum morum tranquillitas Christianis omnibus congruat secundum Domini vocem, qui neminem alium respicit, nisi humilem & quietum & trementem sermones suos, tum magis hoc observare & implere confessores oportet, qui exemplum facti estis ceteris fratribus, ad quorum mores omnium vita & actus debeat provocari. Nam sicut Judæi a Deo alienati sunt, propter quos nomen Dei blasphematur in gentibus: ita contra Deo cari sunt, per quorum disciplinam nomen Domini laudabili testimonio prædicatur, sicut scriptum est Domino præmonente & dicente: *Luceat lumen vestrum coram hominibus, ut videant opera vestra bona, & clarificent patrem vestrum qui in calis est.* Et Paulus Apostolus dicit: *Lucete sicut luminaria in mundo.* Et Petrus similiter hortatur: *Sicut hospites, inquit, & peregrini, abstinete vos a carnalibus desideriis,*
qua

qua militant adversus animam, conversationem habentes inter gentiles bonam, ut dum detrectant de vobis quasi de malignis, bona opera vestra aspicientes magnificent Dominum. Quod quidem maxima pars vestrum cum meo gaudio curat, & confessionis ipsius honore melior facta, tranquillis & bonis moribus gloriam suam custodit & servat. Sed quosdam audio inficere numerum vestrum, & laudem præcipui nominis prava sua conversatione destruere: quos etiam vos ipsi, utpote amatores & conservatores laudis vestræ, objurgare & comprimere & emendare debetis. Cum quanto enim nominis vestri pudore delinquitur, quando aliquis temulentus & lasciviens demoratur, alius in eam patriam unde extorris factus est, regreditur, ut apprehensus non jam quasi christianus sed quasi nocens pereat? Inflari aliquos & tumere audio, cum scriptum sit: *Noli altum sapere, sed time.* Si enim Dominus naturalibus ramis non pepercit, ne forte nec tibi parcat. Dominus postea sicut ovis ad victimam ductus est, & sicut agnus coram tondente se sine voce sic non aperuit os suum. *Non sum, inquit, contumax, neque contradico.* Dorsum meum posui ad flagella & maxillas meas ad palmas. *Faciem autem meam non averti a fæditate sputorum.* Et quisquam per ipsum nunc, atque in ipso vivens extollere se audet & superbire, immemor & factorum quæ ille gessit, & mandatorum quæ nobis vel per se vel per apostolos suos tradidit? Quod si non est major domino suo servus, qui Dominum sequuntur, humiles & quieti & taciturni vestigia ejus imitentur, quando quisque inferior fuerit, sublimior fiat, dicente Domino: *Qui minimus fuerit in vobis, hic erit magnus.* Quid deinde illud, quam vobis execrandum debet videri, quod cum summo animi nostri gemitu & dolore cognovimus, non deesse qui Dei templa & post confessionem sanctificata & illustrata membra turpi & infami concubitu suo plus

maculent, cubilia sua cum feminis promiscua jungentes, quando etsi stuprum conscientiae eorum desit, hoc ipso grande crimen est, quod illorum scandalo in aliorum ruinas exempla nascuntur. Contentiones quoque & æmulationes inter vos nullas esse oportet, cum pacem suam nobis dimiserit Dominus, & scriptum sit: *Diliges proximum tuum tamquam te. Si autem mordetis & incusatis invicem, videte ne consumamini ab invicem.* A conviciis etiam & maledictis quæso vos abstinete: quia neque maledici regnum Dei consequuntur, & lingua, quæ Christum confessa est, incolumis & pura cum suo honore servanda est. Nam qui pacifica & bona & iusta secundum præceptum Christi loquitur, Christum quotidie confitetur. Sæculo renuntiaveramus cum baptizati sumus. Sed nunc vere renuntiavimus sæculo, quando tentati & probati a Deo, nostra omnia relinquentes, Dominum secuti sumus, & fide ac timore ejus stamus & vivimus. Corrobores nos exhortationibus mutuis, & magis ac magis proficiamus in Domino; ut cum pro sua misericordia pacem fecerit, quam se facturum repromittit, novi & pæne mutati ad ecclesiam revertamur, & excipiant nos, sive fratres nostri, sive gentiles, circa omnia correctos atque in melius reformatos, & qui admirati fuerant prius in virtutibus gloriam, nunc admirentur in moribus disciplinam. Et quamquam clero nostro & nuper cum adhuc essetis in carcere constituti, sed nunc quoque denuo plenissime scripserim, ut, si quid vel ad vestitum vestrum, vel ad victum necessarium fuerit, suggeratur, tamen etiam ipse de sumptibus propriis, quos mecum ferebam, misi vobis ccl. sed & alia ccl. proxime miseram. Victor quoque ex lectore diaconus, qui mecum est, misit vobis clxxv. Gaudeo autem, quando cognosco plurimos fratres nostros pro sua dilectione certatim concurrere, & necessitates vestras suis

fuis conlationibus adjuvare. Opto vos, fratres carissimi, semper bene valere & nostri meminisse.

E P I S T O L A VII.

Ad clerum de precando Deo.

CYPRIANUS presbyteris & diaconibus fratribus salutem. Quamquam sciam, fratres carissimi, pro timore, quem singuli debemus Deo, vos quoque illic assiduis orationibus & enixis precibus instanter incumbere, admoneo tamen & ipse religiosam sollicitudinem vestram, ut ad placandum atque exorandum Dominum, non voce sola, sed & jejuniis, & lacrimis, & omni genere deprecationis ingemiscamus. Intelligendum est enim & confitendum, pressuræ istius tam turbidam vastitatem, quæ gregem nostrum maxima ex parte populata est & adhuc usque populatur, secundum peccata nostra venisse, dum viam Domini non tenemus, nec data nobis ad salutem cælestia mandata servamus. Fecit Dominus noster voluntatem patris, & nos non facimus Domini voluntatem, patrimonio & lucro studentes, superbiam sectantes, æmulationi & dissensionibus vacantes, simplicitatis & fidei negligentes, sæculo verbis solis & non factis renuntiantes, unusquisque sibi placentes, & omnibus displicentes. Vapulamur itaque ut mereamur, cum scriptum sit; *Servus autem ille, qui cognoscit voluntatem domini sui, & non paruerit voluntati ejus; vapulabit multis.* Quas autem plagas, quæ verbera non meremur, quando nec confessores, qui exemplo ceteris ad bonos mores esse debuerant, teneant disciplinam? Itaque dum quosdam insolenter extollit confessionis suæ tumida & invereconda jactatio, tormenta venerunt, & tormenta sine fine tortoris, sine exitu damnationis, sine solatio mortis, tormenta quæ ad co-

ronam non facile dimittant, sed tamdiu torqueant quamdiu dejiciant; nisi si aliquis divina dignatione sul tractus inter ipsa cruciamenta profecerit, adeptus glori-
 am non termino supplicii, sed velocitate moriendi. Hæc patimur delicto & merito nostro, sicut præmonuit divina censura dicens: *Si dereliquerint legem meam & iudiciis meis non ambula-verint, si justificationes meas præse-*
fanaverint & præcepta mea non observaverint: visitabo in virga facinora eorum & in flagellis delicta eorum. Vigas igitur & flagella sentimus, qui Deo nec bonis factis placemus, nec pro peccatis satisfacimus. Rogemus de intimo corde & de tota mente misericordiam Dei, quia & ipse addidit dicens: *Misericordia autem meam non dispergam ab eis.* Petamus, & accipimus; & si accipiendi mora & tarditas fuerit, quoniam graviter offendimus, pulsemus; quia & pulsanti aperitur, si modo pulsent ostium preces, gemitus, & lacrimæ nostræ, quibus insistere & immorari oportet, etsi si unanimes oratio. Nam quod magis suavit & compulsi ut has ad vos litteras scriberem, scire debetis (sic Dominus ostendere & revelare dignatus est) dictum esse in visione: *Petite, & impetratis*, tunc deinde præceptum plebi assistenti, ut pro quibusdam personis designatis sibi peterent, in petendo autem fuisse diversas voces & dispares voluntates, & vehemente hoc displicuisse illi qui dixerat: *Petite, & impetratis* quod plebis inæqualitas discreparet, nec esset fratrum consensus una & simplex & juncta concordia, eundem scriptum sit: *Deus qui inhabitare facit unanimes in domo* & in actis apostolorum legamus: *Turba autem eorum qui crediderant anima ac mente una agebant*, & Dominus sua voce mandaverit dicens: *Hec est mandatum meum, ut diligatis invicem.* Et iterum: *Dico autem vobis, quoniam si duobus ex vobis convenerit in terra, de omni re quamcumque petieritis, continget vobis a patre meo qui in caelis est.* Quod si duo unanimes tantum pos-
 sunt,

fuut, quid si unanimitas apud omnes esset? Quod si secundum pacem, quam nobis Dominus dedit universis fratribus conveniret: jampridem de divina misericordia impetrassemus quod petimus, nec tamdiu in hoc salutis & fidei nostræ periculo fluctuaremus. Imo vero nec venissent fratribus hæc mala, si in unum fraternitas fuisset animata. Nam & illud ostensum est, quod federet paterfamilias, sedente sibi ad dexteram juvene, qui juvenis anxius & cum quadam indignatione subtristis, maxillam manu tenens, mœsto vultu sedebat. Alius vero in sinistra parte consistens rete portabat, quod se mittere, ut circumstantem populum caperet, minabatur: et cum miraretur quid hoc esset, ille qui vidit, dictum est ei: juvenem qui ad dexteram sic federet, contristari & dolere, quod præcepta sua non observarentur; illum vero in sinistra exultare, quod sibi daretur occasio ut a patrefamilias potestatem sumeret sæviendi. Hoc prius longe ostensum est, quam tempestas vastitatis hujus oriretur. Et vidimus impletum quod fuerat ostensum, ut dum Domini præcepta contemnimus, dum datæ legis mandata salutaria non tenemus, facultatem nocendi inimicus acciperet, minus armatos & ad repugnandum minus cautos jactu retis operiret. Oremus instanter & assiduis precibus ingemiscamus. Nam & hoc nobis non olim per visionem, fratres carissimi, exprobratum sciatis, quod dormitemus in precibus, nec vigilanter oremus. Et Deus utique, qui quem corripit diligit, quando corripit, ad hoc corripit ut emendet, ad hoc emendat ut fervet. Excutiamus itaque & abruppamus sompi vincula, & instanter ac vigilanter oremus, sicut Paulus apostolus præcipit dicens: *Instate orationi vigilanter in ea*. Nam & apostoli orare diebus ac noctibus non destiterunt, & Dominus quoque ipse disciplinæ magister & exempli nostri via, frequenter & vigilanter oravit, sicut

in evangelio legimus: *Exiit in montem orare, & fuit pernoctans in oratione Dei.* Et utique quod orabat, orabat ille pro nobis, cum peccator ipse non esset, sed aliena peccata portaret. Adeo autem pro nobis ille deprecabatur, ut legamus alio loco: *Dixit autem Dominus ad Petrum: Ecce satanas postulat ut vos vexaret quomodo triticum: ego autem rogavi pro te, ne deficiat fides tua.* Quod si pro nobis ac pro delictis nostris ille & laborabat & vigilabat & precabatur, quanto nos magis insistere precibus & orare, & primo ipsum Dominum rogare, tum deinde per ipsum Deo patri satisfacere debemus? Habemus advocatum & deprecatorem pro peccatis nostris Jesum Christum Dominum & Deum nostrum, si modo nos in præteritum peccasse pœniteat, & confitentes atque intelligentes delicta nostra, quibus nunc Dominum offendimus, vel de cetero nos ambulare in viis ejus, & præcepta ejus metuere spondeamus. Pater nos corrigit & tuetur, stantes tamen in fide & pressuris atque angustiis, scilicet Christo ejus firmiter adhærentes, sicut scriptum est: *Quis nos separabit a dilectione Christi, pressura, an angustia, an persecutio, an fames, an nuditas, an periculum, an gladius?* Nihil horum potest separare credentes, nihil potest avellere corpori ejus & sanguini cohærentes. Persecutio ista examinatio est atque exploratio pectoris nostri. Excuti nos Deus voluit & probari, sicut suos semper probavit; nec tamen in probationibus ejus aliquando auxilium credentibus defuit. Denique ad minimum famulum suum & in delictis licet plurimis constitutum & dignatione ejus indignum, tamen ille pro sua circa nos bonitate mandare dignatus est. Dic illi, inquit, securus sit, quia pax ventura est, sed quod interim morula est, supersunt adhuc aliqui qui probentur. Sed & de victu parco & sobrio potu divinis dignationibus admonemur; scilicet ne vigore cœlesti sublime
jam

jam peccatus illecebra sæcularis enervet, vel ne largioribus epulis mens gravata minus ad preces orationis evigilet. Dissimulare hæc singula & apud conscientiam meam solus occultare non debui, quibus unusquisque nostrum & instrui & regi possit. Nec ipsi denique apud vos hanc epistolam teneatis occultam, sed legendam fratribus suggeratis. Intercipere enim quibus nos Dominus admonere & instruere dignatur, ejus est qui admoneri & instrui fratrem suum nolit. Probari nos a Domino nostro sciant, nec umquam a fide qua in eum semel credidimus, præsentis pressuræ conflictatione deficiant. Delicta sua singuli recognoscantes, vel modo conversationem veteris hominis exponant. Nemo enim retro attendens & superponens manum suam super aratrum, aptus est regno Dei. Denique & uxor Lot, quæ liberata contra præceptum retro respexit, quod evaserat perdidit. Attendamus non posteriora, quo diabolus revocat, sed priora, quo Christus vocat. Oculos erigamus ad cælum, ne oblectamentis & illecebris nos suis terra decipiat. Unusquisque oret Deum, non pro se tantum, sed pro omnibus fratribus, sicut Dominus orare nos docuit; ubi non singulis privatam precem mandat, sed oratione communi & concordi prece orantes pro omnibus jussit orare. Si nos Dominus humiles & quietos, si nobis invicem copulatos, si circa iram suam timidos, si præsentī tribulatione correctos emendatosque conspexerit, tutos ab inimici infestationibus exhibebit. Præcessit disciplina, sequetur & venia. Nos tantum sine cessatione poscendi, & cum fide accipiendi simplices & unanimes Dominum deprecemur, cum gemitu pariter & fletu deprecantes, sicut deprecari oportet eos qui sint positi inter plangentium ruinas, & timentium reliquias, inter numerosam languentium stragem, & exiguantium firmitatem. Rogemus pacem maturius reddi,

di, cito latebris nostris & periculis subveniri, impleri quæ famulis suis Dominus dignatur ostendere, redintegrationem ecclesiæ, securitatem salutis nostræ, post pluvias serenitatem, post tenebras lucem, post procellas & turbines placidam lenitatem, pia paternæ dilectionis auxilia, divinæ majestatis solita magnalia, quibus & persequentium blasphemia retundatur, & lapsorum pœnitentia reformetur, & fortis & stabilis perseverantium fiducia gloriatur. Opto vos, fratres carissimi, semper bene valere & nostri meminisse. Fraternitatem meo nomine salutate, & ut postri meminierint admonete. Valete.

EPISTOLA VIII.

Ad martyres & confessores.

CYPRIANUS martyribus & confessoribus in Christo Domino nostro & in Deo patre perpetuam salutem. Exsulto lætus & gratulor, fortissimi ac beatissimi fratres, cognita fide ac virtute vestra, in quibus mater ecclesia gloriatur. Gloriata est & nuper quidem, cum confessione perstante suscepta pœna est, quæ confessores Christi fecit extorres. Confessio tamen præsens quanto in passione fortior, tanto clarior & major in honore est. Crevit pugna, crevit & pugnantium gloria. Neo retardati estis ab acie tormentorum metu, sed ipsis tormentis magis ac magis estis ad aciem provocati, fortes & stabiles ad maximi certaminis prælium prompta devotione redistis. Ex quibus quosdam jam comperi coronatos, quosdam vero ad coronam victoriæ jam jamque proximos, universos autem, quos agmine glorioso carcer inclusit, pari ac simili calore virtutis ad gerendum certamen animatos, sicut esse oportet in divinis castris milites Christi, ut incorruptam fidei firmitatem non blan-

blanditiæ decipiant, non minæ terreant, non cruciatus ac tormenta devincant, quia major est qui in nobis est, quam qui est in hoc mundo, nec plus ad deijciendum potest terrena pœna quam ad erigendum tutela divina. Probata res est certamine fratrum glorioso, qui ad tormenta vincenda ceteris duces facti, exemplum virtutis ac fidei præbuerunt, congressi in acie, donec acies succumberet victa. Quibus ego vos laudibus prædicem, fortissimi fratres? Robur pectoris vestri & perseverantiam fidei quo præconio vocis exornem? Tolerastis usque ad consummationem gloriæ durissimam quæstionem, nec cessistis suppliciis, sed vobis potius supplicia cesserunt. Finem doloribus, quem tormenta non dabant, coronæ dederunt. Quæstio gravior ad hoc diu perseveravit, non ut stantem fidem dejiceret, sed ut homines Dei ad Dominum velocius mitteret. Vidit admirans præsentium multitudo cæleste certamen, certamen Dei, certamen spiritale, prælium Christi, stetisse servos ejus voce libera, mente incorrupta, virtute divina, telis quidem sæcularibus nudos, sed armis fidei credentes armatos. Steterunt torti torquentibus fortiores, & pulsantes ac laniantes ungulas pulsata ac laniata membra vicerunt. Inexpugnabilem fidem superare non potuit sæviens diu plaga repetita, quamvis rupta compage viscerum, torquerentur in servis Dei jam non membra, sed vulnera. Fluebat sanguis qui incendium persecutionis extingueret, qui flammæ & ignes gehennæ glorioso cruore sopiret. O quale illud fuit spectaculum Domino, quam sublime, quam magnum, quam Dei oculis sacramento ac devotione militis ejus acceptum, sicut scriptum est in psalmis spiritu sancto loquente ad nos pariter & monente: *Preiosa est in conspectu Domini mors iustorum ejus. Preiosa mors hæc est, quæ emit immortalitatem pretio sui sanguinis, quæ accepit coronam de consummatione*

tione virtutis. Quam lætus illic Christus fuit, quam
 libens in talibus servis suis & pugnavit & vicit pro-
 tector fidei, & dans credentibus tantum quantum se
 credit capere, qui sumit. Certamini suo adfuit, præ-
 liatores atque assertores sui nominis erexit, corrobo-
 ravit, animavit. Et qui pro nobis mortem semel vicit,
 semper vincit in nobis. *Cum vos, inquit, tradide int, no-
 lite cogitare quid loquamini: dabitur enim vobis in illa
 hora quid loquamini. Non enim vos estis qui loquimini,
 sed spiritus patris vestri qui loquitur in vobis.* Docu-
 mentum rei præsens prælium præbuit. Vox plena
 spiritu sancto de martyris ore prorupit, cum Mappa-
 licus beatissimus inter cruciatus suos Proconsuli dice-
 ret: *Videbis cras agonem.* Et quod ille cum virtutis
 ac fidei testimonio dixit, Dominus implevit. Agon
 cælestis exhibitus, & Dei servus in agonis promissi
 certamine coronatus est. Hic est agon quem pro-
 pheta Esaias ante prædixit dicens: *Non pusillum vobis
 certamen cum hominibus, quoniam Deus præstat agonem.*
 Et ut ostenderet quis hic agon futurus esset, addidit
 dicens: *Ecce virgo in uterum accipiet & pariet filium,
 & vocabitis nomen ejus Emmanuel.* Hic est agon fidei
 nostræ qua congregimur, qua vincimus, qua coro-
 namur. Hic est agon quem nobis ostendit beatus
 Paulus apostolus, in quo oportet nos currere, & ad
 coronam gloriæ pervenire. *Nescitis, inquit, quia
 qui in stadio currunt, omnes quidem currunt, unus tamen
 accipit palmam. Sic currite ut occupetis. Et illi quidem
 ut corruptibilem coronam accipiant, nos autem incorruptam.*
 Item suum certamen ostendens, & hostiam se Domi-
 ni cito futurum esse promittens, ait: *Ego jam libor,
 & tempus instat assumptionis meæ. Bonum agonem certa-
 vi, cursum perfeci, fidem servavi. Jam superest mihi
 corona justitiæ, quam mihi reddet Dominus in illa die, il-
 le justus judex, non solum autem mihi, sed & omnibus
 qui diligunt adventum ejus.* Hunc igitur agonem per
 pro-

prophetas ante prædictum, per Dominum commissum, per apostolos gestum Mappalicus suo & collegarum suorum nomine Proconsuli repromisit. Nec fefellit in promisso suo vox fidelis. Pugnam quam spondit, exhibuit, & palmam quam meruit, accepit. Istum nunc beatissimum martyrem & alios participes ejusdem congressionis, milites & comites in fide stabiles, in dolore patientes, in quæstione victores, ut ceteri quoque sectemini, & opto pariter & exhortor; ut quos vinculum confessionis & hospitium carceris simul junxit, jungat etiam consummatio virtutis & corona cælestis, ut lacrimas matris ecclesiæ, quæ plangit ruinas & funera plurimorum, vos vestra lætitia tergeatis, & ceterorum quoque stantium firmitatem vestri exempli provocatione solidetis. Si vos acies vocaverit, si certaminis vestri dies venerit, militate fortiter, dimiccate constanter, scientes vos sub oculis præsentis Domini dimicare, confessione nominis ejus ad ipsius gloriam pervenire; qui non sic est, ut servos suos tantum spectet, sed & ipse luctatur in nobis, ipse congruitur, ipse in certamine agonis nostri & coronat pariter, & coronatur. Quod si ante diem certaminis vestri de indulgentia Domini pax supervenerit, vobis tamen maneat voluntas integra & conscientia gloriosa. Nec contristetur aliquis ex vobis, quasi illis minor sit qui ante vos tormenta perpeSSI victo & calcato sæculo ad Dominum glorioso itinere venerunt. Dominus scrutator est renis, & cordis, arcana perspicit, & intuetur occulta. Ad coronam de eo promerendam sufficit ipsius testimonium solum, qui judicaturus est. Ergo utraque res, fratres carissimi, sublimis pariter & illustris. Illa securior, ad Dominum victoriæ consummatione properare; hæc lætior, accepto post gloriam comœatu in ecclesiæ laude florere. O beatam Ecclesiam nostram, quam sic honor divinæ dignationis illuminat, quam temporibus

ribus nostris gloriosus martyrum sanguis illustrat. Erat ante in operibus fratrum candida. Nunc facta est in martyrum cruore purpurea. Floribus ejus nec lilia nec rosæ defunt. Certent nunc singuli ad utriusque honoris amplissimam dignitatem. Accipiant coronas vel de opere candidas, vel de passione purpureas. In cælestibus castris & pax & acies habent flores suos, quibus miles Christi ob gloriam coronetur. Opto vos, fortissimi ac beatissimi fratres, semper in Domino bene valere & nostri meminisse. Valet.

EPISTOLA IX.

Ad clerum de quibusdam presbyteris qui temere pacem lapsi dederunt, necdum sedata persecutione, & citra conscientiam episcoporum.

CYPRIANUS presbyteris & diaconibus fratribus salutem. Diu patientiam meam tenui, fratres carissimi, quasi verecundum silentium nostrum proficeret ad quietem. Sed cum quorundam immoderata & abrupta præsumptio temeritate sua & honorem martyrum, & confessorum pudorem, & plebis universæ tranquillitatem turbare conetur, tacere ultra non oportet, ne ad periculum & plebis pariter & nostrum taciturnitas nimia procedat. Quod enim non periculum metuere debemus de offensa Domini, quando aliqui de presbyteris nec evangelii, nec loci sui memores, sed neque futurum Domini iudicium, neque nunc sibi præpositum episcopum cogitantes, quod numquam omnino sub antecessoribus factum est, cum contumelia & contemptu præpositi totum sibi vindicent? Atque utinam non prostrata fratrum nostrorum salute sibi omnia vindicarent! Contumeliam episcopatus nostri dissimulare & ferre possem, sicut dissimulavi semper & pertuli: sed dissimulandi nunc locus non

non est, quando decipitur fraternitas nostra a quibusdam vestrum; qui dum sine ratione restituendæ salutis plausibiles esse cupiunt, magis lapsis obsunt. Summum enim delictum esse quod persecutio committi coegit, sciunt ipsi etiam qui commiserunt; cum dixerit Dominus & iudex noster: *Qui me confessus fuerit coram hominibus, & ego illum confitebor coram patre meo qui in calis est. Qui autem me negaverit, & ego illum negabo.* Et iterum dixerit: *Omnia peccata remittentur filiis hominum & blasphemia.* *Qui autem blasphemaverit in spiritum sanctum, non habebit remissionem, sed reus est æterni peccati.* Item beatus apostolus dixerit: *Non potestis calicem Domini bibere, & calicem demoniorum. Non potestis mensam Domini communicare, & mensam demoniorum.* Hæc qui subtrahit fratribus nostris, decipit miseros; ut qui possunt, agentes pœnitentiam veram, Deo qua patri & misericordie precibus & operibus suis satisfacere, seducantur ut magis pereant, & qui erigere se possent, plus cadant. Nam cum in minoribus peccatis agant peccatores pœnitentiam iusto tempore, & secundum disciplinæ ordinem ad exomologesin veniant, & per manus impositionem episcopi & cleri jus communicationis accipiant: nunc crudo tempore, persecutione adhuc perseverante, nondum restituta ecclesiæ ipsius pace, ad communicationem admittuntur, & offertur nomen eorum, & nondum pœnitentia acta, nondum exomologesi facta, nondum manu eis ab episcopo & clero imposita, eucharistia illis datur, cum scriptum sit: *Qui ederit panem aut biberit calicem Domini indigne, reus erit corporis & sanguinis Domini.* Sed nunc illi rei non sunt, qui minus scripturæ legem tenent. Erunt autem rei qui præsumunt, & hæc fratribus non suggerunt, ut instructi a præpositis faciant omnia cum Dei timore, & cum data ab eo & præscripta observatione. Exponunt deinde invidiæ beatos martyres, & gloriosos

S. Cypriani Tom. I.

C

servos

fervos Dei cum Dei sacerdote committunt, ut, cum illi memores loci nostri, ad me litteras direxerint, & petierint tunc desideria sua examinari, & pacem dari, quando ipsa ante mater nostra ecclesia pacem de misericordia Domini prior sumpserit, & nos divina protectio reduces ad ecclesiam suam fecerit, hi sublato honore quem nobis beati martyres cum confessoribus servant, contempta Domini lege & observatione, quam iidem martyres & confessores tenendam mandant, ante extinctum persecutionis metum, ante reditum nostrum, ante ipsum pæne martyrum excessum, communicent cum lapsis & offerant, & eucharistiam tradant, quando etiam si martyres per calorem gloriæ scripturam minus contemplantes plus aliquid cuperent, a presbyteris & diaconis suggerentibus admoneri deberent, sicut semper in præteritum factum est. Castigare nos itaque divina censura nec noctibus desinit nec diebus. Præter nocturnas enim visiones, per dies quoque impletur apud nos spiritu sancto puerorum innocens ætas, quæ in ecstasi videt oculis, & audit, & loquitur ea, quibus nos Dominus monere & instruere dignatur. Et audietis omnia quando ad vos reducem me Dominus fecerit, qui ut secederem iussit. Interim temerarii & incauti & tumidi quidam inter vos, qui hominem non cogitant, vel Deum timeant, scientes quoniam si ultra in iisdem perseveraverint, utar ea admonitione qua me uti Dominus jubet; ut interim prohibeantur offerre, acturi & apud nos, & apud confessores ipsos, & apud plebem universam causam suam; cum Domino permittente in sinum matris ecclesiæ recolligi cæperimus. De hoc ad martyres & confessores & ad plebem litteras feci, quas utrasque vobis legi mandavi. Opto vos, fratres carissimi ac desideratissimi, in Domino semper bene valere & nostri meminisse. Valete.

EPI.

E P I S T O L A X.

Ad martyres & confessores qui lapsi petierunt pacem dari.

CYPRIANUS martyribus & confessoribus carissimis fratribus salutem. Sollicitudo loci nostri & timor Domini compellit, fortissimi ac beatissimi fratres, admonere vos litteris nostris, ut a quibus tam devote & fortiter servatur fides Domini, ab iisdem lex quoque & disciplina Domini reservetur. Nam cum omnes milites Christi custodire oporteat præcepta imperatoris sui, tum vos magis præceptis ejus obtemperare plus convenit, qui exemplum ceteris facti estis & virtutis & timoris Dei. Et credideram quidem presbyteros & diaconos qui illic præsentés sunt, monere vos & instruere plenissime circa evangelii legem, sicut in præteritum semper sub antecessoribus nostris factum est, ut diaconi ad carcerem commeantes martyrum desideria consiliis suis & scripturarum præceptis gubernarent: sed nunc cum maximo animi dolore cognosco non tantum illic vobis non suggeri divina præcepta, sed adhuc potius impediri, ut ea quæ a vobis ipsis & circa Deum caute, & circa sacerdotem Dei honorifice fiunt, a quibusdam presbyteris resolvantur, qui nec timorem Dei, nec episcopi honorem cogitantes, cum vos ad me litteras direxeritis, quibus examinari desideria vestra, & quibusdam lapsis pacem dari postulastis, cum persecutione finita convenire in unum cum clero & recolligi cœperimus; illi contra evangelii legem, contra vestram quoque honorificam petitionem, ante actam pœnitentiam, ante exomologesin gravissimi atque extremi delicti factam, ante manum ab episcopo & clero in pœnitentiam impositam, offerre pro illis & eucharistiam dare, id est, sanctum Domini corpus prophanare audeant, cum scriptum sit: *Qui ederit panem aut biberit*
C 2 *calicem*

calicem Domini indigne, reus erit corporis & sanguinis Domini. Et lapsis quidem potest in hoc venia concedi. Quis enim non mortuus vivificari properet? Quis non ad salutem suam venire festinet? Sed præpositorum est præceptum tenere, & vel properantes vel ignorantes instruere, ne qui ovium pastores esse debent, lanii fiant. Ea enim concedere quæ in perniciem vertant, decipere est; nec erigitur sic lapsus, sed per Dei offensam magis impellitur ad ruinam. Vel ex vobis itaque discant, quod docere debuerant. Petitiones & desideria vestra episcopo servant, & ad pacem vobis petentibus dandam maturum & pacatum tempus expectent. Ante est ut a Domino pacem mater prior sumat, tunc secundum vestra desideria de filiorum pace tractetur. Et quoniam audio, fortissimi & carissimi fratres, impudentia vos quorundam premi, & verecundiam vestram vim pati, oro vos quibus possum precibus, ut evangelii memores, & considerantes quæ & qualia in præteritum antecessores vestri martyres concesserint, quam solliciti in omnibus fuerint, vos quoque sollicite & caute petentium desideria ponderetis, utpote amici Domini; & cum illo postmodum iudicaturi inspicatis & actum, & opera, & merita singulorum, ipsorum quoque delictorum genera & qualitates cogitetis, ne si quid abrupte & indigne vel a vobis promissum, vel a nobis factum fuerit, apud gentiles quoque ipsos ecclesiæ nostræ erubescere incipiat. Visitatur enim & castigamur frequenter, & ut Domini mandata incorrupta & inviolata permaneant, admonemur. Quod quidem nec illic apud vos cessare cognosco, quo minus plurimos quoque ex vobis instruat ad ecclesiæ disciplinam divina censura. Hoc autem totum potest fieri, si ea quæ a vobis petuntur, religiosa contemplatione moderemini, intelligentes & comprimentes eos, qui personas accipientes, in beneficiis vestris aut gratificantur,

tur, aut illicitæ negotiationis nundinas aucupantur. De hoc & ad clerum & ad plebem litteras feci, quas utraque vobis legi mandavi. Sed & illud ad diligentiam vestram redigere & emendare debetis, ut nominatim designetis eos, quibus pacem dari desideratis. Audio enim quibusdam sic libellos fieri ut dicatur: *Communicet ille cum suis*, quod numquam omnino a martyribus factum est, ut incerta & cæca petitio invidiam nobis postmodum cumulet. Late enim patet quando dicitur, *ille cum suis*; & possunt nobis vicini, & triceni, & amplius offerri, qui propinqui & affines, & liberti ac domestici esse asseverentur ejus, qui accipit libellum. Et ideo peto ut eos quos ipsi videtis, quos nostis, quorum pœnitentiam satisfactioni proximam conspiciatis, designetis nominatim libello, & sic ad nos fidei ac disciplinæ congruentes litteras dirigatis. Opto vos, fortissimi ac dilectissimi fratres, in Domino semper bene valere & nostri meminisse. Valete.

E P I S T O L A XI.

Ad plebem.

CYPRIANUS fratribus in plebe consistentibus salutem. Ingemiscere vos & dolere ruinas fratrum nostrorum ex me scio, fratres carissimi, qui & ipse vobiscum pro singulis ingemisco pâr iter & doleo, & patior ac sentio, quod beatus apostolus dixit: *Quis infirmatur, inquit, & ego non infirmor? Quis scandalizatur, & ego non uror?* Et iterum posuit in epistola sua dicens: *Si patitur membrum unum, compatiuntur & cetera membra; & si latatur membrum unum, collatantur & cetera membra.* Compatior ergo & condoleo de fratribus nostris, qui lapsi & persecutionis infestatione prostrati, partem nostrorum viscerum secum tra-

trahentes, parem dolorem nobis suis vulneribus intulerunt; quibus potens est divina misericordia medelam dare. Properandum tamen non puto, nec incaute aliquid & festinanter gerendum; ne dum temere pax usurpatur, divinæ indignationis offensa gravius provocetur. Fecerunt ad nos de quibusdam beati martyres litteras petentes examinari desideria sua. Cum pace nobis omnibus a Domino prius data, ad ecclesiam regredi cœperimus, tunc examinabuntur singula præsentibus & iudicantibus vobis. Audio tamen quosdam de presbyteris nec evangelii memores, nec quid ad nos martyres scripserint cogitantes, nec episcopo honorem sacerdotii sui & cathedræ reservantes, jam cum lapsis communicare cœpisse, & offerre pro illis, & eucharistiam dare, quando oporteat ad hæc per ordinem perveniri. Nam cum in minoribus delictis quæ non in Deum committuntur, pœnitentia agatur justo tempore, & exomologesis fiat inspecta vita ejus, qui agit pœnitentiam, nec ad communicationem venire quis possit, nisi prius illi ab episcopo & clero manus fuerit imposita, quanto magis in his gravissimis & extremis delictis caute omnia & moderate secundum disciplinam Domini observari oportet. Quod quidem nostri presbyteri & diaconi monere debuerant, ut commendatas sibi oves foverent, & divino magisterio ad vitam deprecandæ salutis instruerent. Ego plebis nostræ & quietem novi pariter & timorem; qui in satisfactione Dei & deprecatione vigilarent, nisi illos quidam de presbyteris gratificantes decepissent. Vel vos itaque singulos regite, & consilio ac moderatione vestra secundum divina præcepta lapsorum animos temperate. Nemo adhuc importuno tempore acerba poma decerpit. Nemo navem suam quassatam & perforatam fluctibus priusquam diligenter refecerit, in altum denuo committat. Nemo tunicam

cam

cam scissam accipere & induere properet, nisi eam & ab artifice perito sartam viderit, & a fullone curatam receperit. Audiant quæso patienter consilium nostrum, expectent regressionem nostram; ut cum ad vos per Dei misericordiam venerimus, convocati coepiscopi plures, secundum Domini disciplinam & confessorum præsentiam & vestram quoque sententiam, beatorum martyrum litteras & desideria examinare possimus. De hoc ad clerum & ad martyres & confessores litteras feci, quas utrasque legi vobis mandavi. Opto vos, fratres carissimi ac desideratissimi, in Domino semper bene valere & nostri meminisse. Valete.

EPISTOLA XII.

Ad clerum de lapsis & catecuminis, ne vacui exeant.

CYPRIANUS presbyteris & diaconibus fratribus salutem. Miror vos, fratres carissimi, ad multas epistolas meas quas ad vos frequenter misi, nihil mihi rescripsisse, cum fraternitatis nostræ vel utilitas vel necessitas sic utique gubernetur; si a vobis instructi, rerum gerendarum consilium limare possimus. Quoniam tamen video facultatem veniendi ad vos nondum esse, & jam ætatem cœpisse, quod tempus infirmitatibus assiduis & gravibus infestatur, occurrendum puto fratribus nostris; ut qui libellos a martyribus acceperunt, & prærogativa eorum apud Deum adjuvari possunt, si incommodo aliquo & infirmitatis periculo occupati fuerint, non expectata præsentia nostra, apud presbyterum quemcumque præsentem, vel si presbyter repertus non fuerit, & urgere exitus cœperit, apud diaconum quoque exomologesin facere delicti sui possint; ut manu eis in pœnitentiam imposita, veniant ad Dominum cum pace, quam dari martyres litteris ad nos factis desideraverunt. Ceteram

quoque partem plebis quæ lapsa est, præsentia vestra fovete, & ut a fide & misericordia Domini non deficiant, vestro solatio focillate. Neque enim deferentur ab ope & auxilio Domini hi, qui mites & humiles & pænitentiam vere agentes in bonis operibus perseveraverint, quo minus illis quoque divino remedio consulatur. Audientibus etiam, si qui fuerint periculo præventi, & in exitu constituti, vigilantia vestra non desit, implorantibus divinam gratiam misericordia Domini non denegetur. Opto vos, fratres carissimi, semper bene valere & nostri meminisse. Fraternitatem universam meo nomine salutate, & ut nostri meminerit admonete, & rogate. Valete.

EPISTOLA XIII.

Ad clerum de his qui ad pacem festinant.

CYPRIANUS presbyteris & diaconibus fratribus salutem. Legi litteras vestras, fratres carissimi, quibus scripsistis salubre consilium vestrum non deesse fratribus nostris, ut temeraria festinatione deposita religiosam patientiam Deo præbeant, ut cum in unum per ejus misericordiam venerimus, de omnibus speciebus secundum ecclesiasticam disciplinam tractare possimus, maxime cum scriptum sit: *Memento unde cecideris, & age pænitentiam.* Pænitentiam autem ille agit, qui divini præcepti memor, mitis & patiens, & sacerdotibus Dei obtemperans, obsequiis suis & operibus justis Dominum promeretur. Quoniam tamen significastis quosdam immoderatos esse, & communicationem accipiendam festinanter urgere, & desiderastis in hac re formam a me vobis dari: satis plene scripsisse me ad hanc rem proximis litteris ad vos factis credo, ut qui libellum a martyribus acceperunt, & auxilio eorum adjuvari apud Dominum in
deli-

delictis suis possunt, si premi infirmitate aliqua, & periculo cœperint, exomologesi facta, & manu eis a vobis in pœnitentiam imposita, cum pace a martyribus sibi promissa, ad Dominum remittantur. Ceteri vero qui nullo libello a martyribus accepto invidiam faciunt, quoniam non paucorum, nec ecclesiæ unius, aut unius provinciæ, sed totius orbis hæc causa est, expectent de Domini protectione ecclesiæ ipsius publicam pacem. Hoc enim & verecundiæ & disciplinæ & vitæ ipsi omnium nostrum convenit, ut præpositi cum clero convenientes, præsentem etiam stantium plebem, quibus & ipsis pro fide & timore suo honor habendus est, disponere omnia consilii communis religione possimus. Ceterum quam irreligiosum est & ipsis quoque festinantibus perniciosum, ut cum extorres facti, & patria pulsi, ac bonis suis omnibus spoliati nondum ad ecclesiam redierint, quidam delapsis confessores ipsos prævenire, & ante eos ad ecclesiam introire festinent. Qui si nimium properant, habent in sua potestate quod postulant, tempore ipso sibi plus quam postulant largiente. Acies adhuc geritur, & agon quotidie celebratur. Si commissi vere & firmiter pœnitent, & fidei calor prævalet, qui differri non potest, potest coronari. Opto vos, fratres carissimi, semper bene valere & nostri meminisse. Fraternitatem universam meo nomine salutate, & ut nostri memores sint admonete. Valete.

E P I S T O L A XIV.

Ad presbyteros & diaconos Romæ consistentes.

CYPRIANUS presbyteris & diaconibus Romæ consistentibus fratribus salutem. Quoniam comperi, fratres carissimi, minus simpliciter & minus fideliter vobis renuntiari, quæ hic a nobis & gesta sunt

& geruntur, necessarium duxi has ad vos litteras facere, quibus vobis actus nostri, & disciplinæ, & diligentiae ratio redderetur. Nam sicut Domini mandata instruunt, orto statimurbationis impetu primo, cum me clamore violento frequenter populus flagitasset, non tam meam salutem, quam quietem fratrum publicam cogitans interim secessi, ne per inuerecundam praesentiam nostram seditio quae coeperat, plus provocaretur. Absens tamen corpore, nec spiritu nec actu nec monitis meis defui; quominus secundum Domini praecepta fratribus nostris in quibus possem, mea mediocritate consulerem. Et quid egerim, loquuntur vobis epistolae pro temporibus emissae numero tredecim, quas ad vos transmisi; in quibus nec clero consilium, nec confessoribus exhortatio, nec extorribus, quando oportuit, objuratio, nec universae fraternitati ad deprecandam Dei misericordiam allocutio & persuasio nostra defuit, quantum secundum legem fidei & timorem Dei Domino suggerente nostra mediocritas potuit eniti. Postea quam vero & tormenta venerunt, sive jam tortis fratribus nostris, sive adhuc ut torquerentur inclusis, ad corroborandos & confortandos eos noster sermo penetravit. Item cum comperissem, eos qui sacrilegis contractibus manus suas atque ora maculassent, vel nefandis libellis nihilominus conscientiam polluisent, exambire ad martyres passim, confessores quoque importuna & gratiosa deprecatione corrumpere, ut sine ullo discrimine atque examine singulorum darentur quotidie libellorum millia contra evangelii legem: litteras feci quibus martyres & confessores consilio meo quantum possem, ad dominica praecepta revocarem. Item presbyteris & diaconibus non defuit sacerdotii vigor, ut quidam minus disciplinae memores & temeraria festinatione praecipites, qui cum lapsis communicare jam coeperant, comprimeren-

merentur, intercedentibus nobis. Plebi quoque ipsi quantum potuimus animum composuimus, & ut ecclesiastica disciplina servaretur, instruximus. Postmodum vero cum quidam de lapsis, sive sua sponte, sive aliquo incitatore. audaci flagitatione proruerent, ut pacem sibi a martyribus & confessoribus promissam extorquere violento impetu niterentur, de hoc etiam bis ad clerum litteras feci, & legi eis mandavi, ut ad illorum violentiam interim quoquo genere mitigandam, si qui libello a martyribus accepto de sacculo excederent, exomologesi facta, & manu eis in pœnitentiam imposita, cum pace sibi a martyribus promissa ad Dominum remitterentur. Nec in hoc legem dedi, aut me auctorem temere constitui: sed cum videretur & honor martyribus habendus, & eorum qui omnia turbare cupiebant impetus comprimendus, & præterea vestra scripta legissem, quæ huc ad clerum nostrum per Crementium hypodiaconum nuper feceratis, ut iis qui post lapsum infirmitate apprehensi essent, & pœnitentes communicationem desiderarent, subveniretur: standum putavi & cum vestra sententia, ne actus noster, qui adunatus esse & consentire circa omnia debet, in aliquo discreparet. Plane ceterorum causas, quamvis libello a martyribus accepto, differri mandavi, & in nostram præsentiam reservari; ut cum, pace a Domino nobis data, plures præpositi convenire in unum cœperimus, communicato etiam vobiscum consilio, disponere singula & reformare possimus. Opto vos, fratres carissimi, semper bene valere.

Est.

EPISTOLA XV.

Ad Moysen & Maximum & ceteros confessores.

CYPRIANUS Moyſi & Maximo presbyteris & ceteris confessoribus fratribus salutem. Et cunctos vos pariter & singulos repræsentavit affectibus nostris, fratres carissimi, Celerinus adveniens, & fidei ac virtutis vestræ comes, & gloriosis congressionibus Dei miles. Universos vos in illo veniente conspeximus; & cum caritatem circa me vestram dulciter ac sæpe loqueretur, in ejus sermonibus vos audiebamus. Satis ac plurimum gaudeo, quando a vobis per tales talia perferuntur. Vobiscum illic in carcere quodam modo & nos sumus, divinæ dignationis ornamenta vobiscum sentire nos credimus, qui sic vestris cordibus adhæremus. Honori nos vestro caritas vestra individua connectit, separari dilectionem spiritus non finit. Vos illic confessio, me affectio includit. Et nos quidem vestri diebus ac noctibus memores, & quando in sacrificiis precem cum pluribus facimus, & cum in secessu privatis precibus oramus, coronis ac laudibus vestris plenam a Domino faventiam postulamus. Sed ad reddendam vobis vicem minor est nostra mediocritas. Plus vos datis quando nostri in oratione meministis, qui spirantes jam sola cælestia, & tantum divina meditantes, ad fastigia celsiora mora ipsa passionis ascenditis, longoque temporum ductu glorias vestras non trahitis, sed augetis. Beatum facit prima & una confessio. Vos toties confitemini, quoties rogati ut de carcere recedatis, carcerem fide & virtute præeligitis. Tot vestræ laudes quot dies; quot mensium curricula, tot incrementa meritorum. Semel vincit qui statim patitur. At qui manens semper in pœnis congre-
cum

cum dolore nec vincitur, quotidie coronatur. Eant nunc magistratus & consules sive proconsules, annuæ dignitatis insignibus, & duodecim fascibus gloriantur. Ecce dignitas cælestis in vobis honoris annui claritate signata est, & jam revertentis anni volubilem circum victricis gloriæ diuturnitate transgressa est. Illuminabat mundum sol oriens & luna decurrens. Sed vobis idem qui solem fecit & lunam, majus in carcere lumen fuit; & in corde ac mentibus vestris Christi claritudo resplendens, horribiles ceteris atque funestas pœnalis loci tenebras æterna illa & candida luce radiavit. Per vicissitudines mensium transmeavit hibernum; sed & vos inclusi tempora hiemis persecutionis hieme pensabatis. Successit hiemi verna temperies, rosis læta & floribus coronata: sed vobis rosæ & flores de paradisi deliciis aderant, & caput vestrum festa cælestia coronabant. Æstas ecce messium fertilitate fecunda est, & area frugibus plena est: sed vos, qui gloriam seminastis, frugem gloriæ metistis; atque in Domini area constituti, exuri paleas inextinguibili igne conspicitis; ipsi, ut tritici grana purgata & frumenta pretiosa, jam purgati & conditi, hospitium carceris horreum computatis. Nec deest autumno ad munera fungenda temporis gratia spiritalis. Vindemia foris premitur, & profutura poculis in torcularibus uva calcatur. Vos de Domini vinea pingues racemi, & jam maturis fructibus botri, pressuræ sæcularis infestatione calcati, torcular vestrum carcere torquente sentitis, & vini vice sanguinem funditis; ad passionis tolerantiam fortes, martyrii poculum libenter hauritis. Sic apud servos Dei annus evolvitur. Sic spiritalibus meritis & cælestibus præmiis temporum vicissitudo celebratur. Beati satis qui ex vobis per hæc gloriarum vestigia commeantes, jam de sæculo recesserunt, confectoque itinere virtutis ac fidei, ad complexum & osculum Domini, Domino ipso

ipſo gaudente, venerunt. Sed & veſtra non minor gloria, qui adhuc in certamine conſtituti, & comitum glorias ſecuturi, pugnam diu geritis, immotaque & inconcuſſa fide ſtabiles, quotidie ſpectaculum Deo veſtris virtutibus exhibetis. Quo longior veſtra pugna, hoc corona ſublimior. Agon unus, ſed multiplici prœliorum numeroſitate congeſtus. Famem vincitis, & ſitim ſpernitis, & ſqualorem carceris ac receptaculi pœnalis horrorem roboris vigore calcatis. Pœna illic ſubigitur, cruciatus obteritur, nec mors metuitur, ſed optatur; quæ ſcilicet immortalitatis præmio vincitur, ut vitæ æternitate, qui vicerit, coronetur. Qui nunc in vobis animus, quam ſublime quam capax pectus, ubi talia & tanta volvuntur, ubi non niſi Dei præcepta & Chriſti præmia cogitantur? Voluntas eſt illic tantum Dei; & in carne adhuc licet vobis poſitis, vita jam vivitur non præſentis ſæculi, ſed futuri. Nunc eſt, fratres cariffimi, ut memores mei ſitis, ut inter magnas atque divinas cogitationes veſtras nos quoque animo ac mente volvatis, ſimque in precibus & orationibus veſtris, cum vox illa purificatione confeſſionis illuſtris, & jugi honoris ſui tenore laudabilis ad Dei aures penetrat, & aperto ſibi cælo, de his ſubacti mundi partibus ad ſuperna tranſmiſſa, impetrat de Domini bonitate, quod poſtulat. Quid enim petitis de indulgentia Domini quod non impetrare mereamini, qui ſic Domini mandata ſervatiſtis, qui evangelicam diſciplinam ſincero fidei vigore tenuiſtis, qui incorrupto honore virtutis, cum præceptis Domini, & cum apoſtolis ejus fortiter ſtantes, nutantem multorum fidem martyrii veſtri veritate ſolidaviſtis? Vere evangelii teſtes, & vere martyres Chriſti radicibus ejus innixi, ſuper petram robuſta mole fundati, diſciplinam cum virtute junxiſtis, ad timorem Dei ceteros provocaviſtis, martyria veſtra
exempla

exempla fecistis. Opto vos fortissimi ac beatissimi fratres, semper bene valere & nostri meminisse.

E P I S T O L A XVI.

Confessorum ad Cyprianum.

UNIVERSI confessores Cypriano Papæ salutem. Scias nos universis de quibus apud te ratio constiterit, quid post commissum egerint, dedisse pacem, & hanc formam per te & aliis episcopis innotescere volumus. Optamus te cum sanctis martyribus pacem habere. Præsente de clero & exorcista & lectore Lucianus scripsit.

E P I S T O L A XVII.

Ad presbyteros & diaconos, de præcedenti & duabus sequentibus epistolis.

CYPRIANUS presbyteris & diaconibus fratribus salutem. Dominus loquitur & dicit: *Super quem respiciam nisi super humilem & quietum & trementem sermones meos?* Hoc cum debeamus omnes esse, tum modo hujusmodi illi esse debent, quibus laborandum est, ut post gravem lapsum vera pœnitentia & humilitate tota promereri Dominum possint. Legi autem & universorum confessorum litteras, quas voluerunt per me collegis omnibus innotescere, & ad eos pacem a se datam pervenire, de quibus apud nos ratio constiterit, quid post commissum egerint. Quæ res cum omnium nostrum consilium & sententiam expectet, præjudicare ego, & soli mihi rem communem vindicare non audeo. Et ideo instetur interim epistolis quas ad vos proxime facerem, quarum exemplum collegis quoque multis jam misi; qui rescripserunt

runt placere sibi quod statuimus, nec ab eo recedendum esse, donec pace nobis a Domino reddita in unum convenire, & singulorum causas examinare possimus. Sed & quid mihi Caldonius collega meus scripserit, quidque ego ei rescripserim ut sciretis; utriusque epistolæ exemplum litteris meis junxi. Quod totum peto fratribus nostris legatis, ut magis ac magis ad patientiam componantur, nec delicto proprio adjiciant adhuc aliud delictum, dum nec nobis nec evangelio volunt servire, nec secundum univerforum confessorum litteras causas suas examinari permittunt. Opto vos, fratres carissimi, semper bene valere & nostri meminisse. Fraternitatem universam salutate. Valete.

EPISTOLA XVIII.

Caldonii ad Cyprianum.

CYPRIANO & compresbyteris Carthagini consentibus Caldonius salutem. Necessitas temporum facit, ut non temere pacem demus. Sed oportebat vobis scribere, quoniam ii qui posteaquam sacrificaverunt, iterato tenti, extorres sunt facti. Videntur ergo mihi abluisse prius delictum, dum possessiones & domos dimittunt, & pœnitentiam agentes Christum sequuntur. Ergo Felix, qui presbyterium subministrabat sub Decimo, proximus mihi vinculis, (plenius cognovi eundem Felicem) Victoria conjunx ejus, & Lucius fideles extorres facti reliquerunt possessiones, quas nunc fiscus tenet. Sed & mulier nomine Bona, quæ tracta est a marito ad sacrificandum, quæ conscientia non commissi, sed quia tenentes manus ejus ipsi sacrificaverunt, cœpit dicere contra: Non feci, vos fecistis, sic & ipsa extorris facta est. Cum ergo universi pacem peterent dicentes: Recupera-

peravimus fidem quam amiseramus, pœnitentiam agentes, & Christum publice sumus confessi, quamvis mihi videantur debere pacem accipere, tamen ad consilium vestrum eos dimisi, ne videar aliquid temere præsumere. Si quid ergo ex communi consilio placuerit; scribite mihi. Salutate nostros. Vos nostri. Opto vos, fratres carissimi, semper bene valere.

E P I S T O L A XIX.

Respondet Caldonio.

CYPRIANUS Caldonio fratri salutem. Accepimus litteras tuas, frater carissime, satis sobrias & integritatis ac fidei plenas. Nec miramur si exercitatus, & in scripturis dominicis peritus caute omnia & consulte geras. Recte autem sensisti circa imperitiendam fratribus nostris pacem, quam sibi ipsi vera pœnitentia & dominicæ confessionis gloria reddiderunt, sermonibus suis justificati, quibus se ante damnaverant. Cum ergo abluerint omne delictum, & maculam pristinam assistente sibi Domino, potiore virtute deleverint, jacere ultra sub diabolo quasi prostrati non debent, qui extorres facti, & bonis suis omnibus spoliati erexerunt se, & cum Christo stare cœperunt. Atque utinam sic & ceteri post lapsum pœnitentes in statum pristinum reformentur, quos nunc urgentes, & pacem temere atque importune extorquentes, quomodo disposuerimus ut seires, librum tibi cum epistolis numero quinque misi, quas ad clerum & ad plebem & ad martyres quoque & confessores feci; quæ epistolæ jam plurimis collegis nostris missæ placuerunt, & rescripserunt se quoque nobiscum in eodem consilio secundum catholicam fidem stare. Quod ipsum etiam tu ad collegas nostros quæ-

S. Cypriani Tom. I.

D

potius

potueris, trans mitte, ut apud omnes unus actus & una consensus secundum Domini præcepta teneatur. Opto te, frater carissime, semper bene valere.

EPISTOLA XX.

Celerini ad Lucianum.

CELERINUS Luciano salutem. Hæc cum tibi scriberem, Domine frater, gaudens & tristis eram, gaudens eo quod audierim te pro nomine Domini nostri Jesu Christi salvatoris nostri tentum, & illius nomen penes magistratus hujus mundi confessum: tristis autem in eo quod ab eo ex quo te deduxi, nunquam litteras tuas accipere potui. Et nunc modo duplex mihi tristitia incubuit, quod cum Montanum fratrem nostrum communem abs te de carcere ad me esse venturum sciebas, de salute tua, vel quid penes te agatur mihi non significaveris. Sed hoc solet contingere servis Dei, maxime eis qui in confessione Christi sunt constituti. Scio enim quoniam unusquisque jam quæ sunt sæculi, non attendit, quoniam coronam cælestem sperat. Ego enim dixi, fortasse oblitum te esse mihi scribere. Nam, ut tibi quoque de infimo tuus vel frater dicar, si fuero dignus Celerinus audire: tamen cum essem & ego in tam florida confessione, fratres meos vetustissimos memorabam, & eos litteris meis memoravi, caritatem pristinam eorum penes me meosque nunc esse. Peto tamen, carissime, a Domino ut si ante cruore illo sancto laveris, si prius passus fueris pro nomine Domini nostri Jesu Christi quam litteræ meæ te in hoc mundo apprehendant, vel nunc si apprehenderint, mihi ad hæc rescribas. Sic coronet te, cujus nomen confessus es. Credo enim quoniam etsi in hoc mundo nos non viderimus, in futuro tamen

nos.

nos coram Christo complectemur. Pete ut sis dignus & ego coronari cum numero vestro. In magna tamen tribulatione me constitutum scias, & ac si sis mecum presens, sic caritatis pristinae reminiscor die ac nocte. Deus solus scit. Et ideo peto ut adnuas desiderio meo, & mecum doleas in morte sororis meae, quae cecidit in hac vastatione a Christo. Sacrificavit enim & exacerbavit Dominum nostrum, quod nobis manifestum videtur. Pro cuius factis ego in hac die lætitiæ Paschæ flens die ac nocte, in cilicio & cinere lacrimabundus dies exegi, & exigo usque in hodiernum, donec auxilium Domini nostri Jesu Christi (subveniat) & pietas per te vel per eos dominos meos, qui coronati fuerint, a quibus postulaturus es ut veniam habeant nefanda naufragia. Memoratus sum enim caritatis tuæ pristinae, quod cum omnibus doleas pro sororibus nostris, quas & tu bene nosti, id est, Numeria & Candida; pro quarum peccato, quia nos fratres habent, debemus excubare. Credo enim Christum secundum earum pœnitentiam & opera, quæ penes collegas nostros fecerunt extorres, qui a vobis venerunt, a quibus ipsis de operibus eorum audies, jam Christum eis, vobis martyribus suis petentibus, indulturum. Audivi enim te floridiorum ministerium percepisse. O te felicem! suscipere vota tua quæ semper desiderasti, vel in terra dormiens. Optasti pro nomine illius in carcerem mitti, quod nunc tibi contigit, sicut scriptum est: *Det tibi Dominus secundum cor tuum.* Et nunc super ipsos factus antistes Dei, recognovit idem minister. Rogo itaque; Domine, & peto per Dominum nostrum Jesum Christum, ut ceteris collegis tuis, fratribus tuis, meis dominis referas, & ab eis petas, ut quicumque prior vestrum coronatus fuerit, istis sororibus nostris Numeriæ & Candidæ tale peccatum remittant. Nam hanc ipsam Eteculam semper appel-

lavi, testis est nobis Deus, quia pro se dona numeravit, ne sacrificaret; sed tantum ascendisse videtur usque ad Tria fata, & inde descendisse. Hanc ergo non sacrificasse ego scio. Quarum jam causa audita, præceperunt eas præpositi tantisper sic esse, donec episcopus constituatur. Sed quatenus per vestras sanctas orationes & petitiones, in quas nos fidimus, quoniam estis amici sed & testes Christi, quod omnia indulgeatis. Peto ergo, Domine carissime Luciane, memor sis mei & petitioni meæ adnuas. Sic Christus coronam illam sanctam, quam tibi non tantum in confessione, sed & in sanctimonio tradidit, in qua semper cucurristi, exemplum sanctorum semper & testis fuisti, ut omnibus dominis meis fratribus tuis confessoribus referas de hoc facto, ut a vobis auxilium recipiant. Nam hoc, Domine frater, scire debes, me non solum hoc pro eis petere, sed & Statium & Severianum & omnes confessores qui inde huc a vobis venerunt, ad quos ipsæ in portum descenderunt, & in urbem levaverunt, quod sexaginta quinque ministraverunt, & usque in hodiernum in omnibus foverunt. Sunt enim peries illas omnes. Plus autem gravare cor illud sanctum tuum non debui, cum sciam te prona voluntate operari. Salutant te Macharius cum sororibus suis Cornelia & Emerita, quæ lætantur de confessione tua florida, sed & omnium fratrum, & Saturninus, qui & ipse luctatus est cum diabolo, qui & Christi nomen est fortiter confessus, qui & ibi in pœna unguarum fortiter est confessus, qui & hoc nimis rogat & petit. Salutant te fratres tui Calphurnius, & Maria, & omnes sancti fratres. Nam & hoc scire debes, me & dominis meis, fratribus tuis (litteras) scripsisse, quas peto illis eas legere digneris.

EPISTOLA XXI.

Lucianus respondet Celerina.

LUCIANUS Celerino domino, si dignus fuero vocari collega in Christo, salutem. Accepi litteras tuas, Domine frater dilectissime, in quibus me tantum gravasti, ut propter tuam gravationem tanto gaudio pæne exciderim, ut litteras quas & ego optabam post tantum temporis legere, in quibus mei dignatus es memorare, beneficio tantæ tuæ humilitatis legere exsultaverim, qui scribens mihi diceres. Si dignus fuero frater nominari tuus, hominis qui apud pusilliores nomen Dei cum timore confessus sum. Nam tu Deo volente ipsum anguem majorem, metatorem antichristi, non tantum confessus deterruisti vocibus illis & verbis deificis, quibus scio quasi amatores fidei & zelotypi disciplinæ Christi, in qua te novi vivacitate versari te gaudeo, vicisti. Nunc, carissime, jam inter martyres deputande, voluisti nos litteris tuis gravare, in quibus significasti de fororibus nostris; pro quibus utinam fieri posset, ut sine tanto scelere commisso memoriam faceremus. Non profecto tantis lacrimis incumberemus ut nunc. Scire debuisti quid circa nos actum sit. Cum benedictus martyr Paulus adhuc in corpore esset, vocavit me, & dixit mihi: Luciane, coram Christo tibi dico, ut si quis post arcessionem meam abs te pacem petierit, da in nomine meo; sed & omnes quos Dominus in tanta tribulatione arcessire dignatus est, universi litteras ex compacto universis pacem dimisimus. Vide ergo, frater, quoniam partim ejus quod mihi Paulus præcepit quam universis quod censuimus, ex quibus eramus in hac tribulatione, cum jussi sumus secundum præceptum Imperatoris fame & siti necari, & reclusi sumus in duabus cellis, ita ut nos afficerent fame & siti.

siti. Sed & ignis ab opere pressuræ nostræ tam intolerabilis erat quam nemo portare posset. Sed nunc ipsam claritatem sumus consecuti. Et ideo, frater carissime, saluta Numeriam & Candidam, quæ secundum Pauli præceptum & ceterorum martyrum, quorum nomina subjicio, Bassi in pejerario. Mappalio in quæstione, Fortunionis in carcere, Pauli a quæstione, Fortunatæ, Victorini, Victoris, Herennii, Credulæ, Herenæ, Donati, Firmi, Venusti, Fructi, Julæ, Martialis, & Aristonis, qui Deo volente in carcere fame necati sunt; quorum & nos socios futuros intra dies audietis. Jam enim ex quo iterato reclusi sumus sunt dies octo in die quo tibi litteras scripsi. Nam & ante dies octo per dies quinque medios modicum panis accepimus & aquam ad mensuram. Et ideo, frater, peto ut sicut hic cum Dominus cœperit ipsi Ecclesiæ pacem dare, secundum præceptum Pauli & nostrum tractatum, exposita causa apud episcopum, & facta exomologesi, habeant pacem, non tantum hæ; sed & quas scis ad animum nostrum pertinere. Salutant vos collegæ mei universi. Vos salutate confessores Domini qui ibi vobiscum sunt; quorum nomina significasti; inter quos & Saturninus cum comitibus suis, sed & collega meus, & Maris, Collecta, & Emerita, Calphurnius & Maria, Sabina, Spesina, & sorores, Januaria, Dativa, Donata. Salutamus cum suis Saturum, Bassianum, & universum clerum, Uranium, Alexium, Quintianum, Colonicam & universos; quorum nomina non scripsi, quia jam lassus eram. Ideo ignoscere debent. Opto vos bene valere, Alexium & Getulicum & argentarios & sorores. Salutant vos sorores meæ Januaria & Sophia, quas vobis commendo.

EPI-

EPISTOLA XXII.

Ad clerum Roma consistentem de multis confessoribus & de Luciani inverecundia & Celerini confessoris modestia.

CYPRIANUS presbyteris & diaconibus Romæ consistentibus fratribus salutem. Post factas ad vos litteras, fratres carissimi, quibus actus noster expositus & disciplinæ ac diligentiae quantulaquaque ratio declarata est, aliud accessit, quod nec ipsum latere vos debuit. Nam frater noster Lucianus, & ipse unus de confessoribus, fide quidem calidus & virtute robustus, sed minus dominica lectione fundatus, quædam conatus est, imperiti jampridem se vulgi auctorem constituens, ut manu ejus scripti libelli gregatim multis nomine Pauli darentur, cum Mappalicus martyr cautus & verecundus, legis ac disciplinæ memor, nullas contra evangelium litteras fecerit, sed tantum domestica pietate commotus matri suæ, quæ lapsa fuerat, mandaverit pacem dari, Saturninus quoque post tormenta adhuc in carcere constitutus, nullas ejusmodi litteras emisit. Lucianus vero non tantum Paulo adhuc in carcere posito nomine illius libellos manu sua scriptos passim dedit, sed & post ejus excessum eadem facere sub ejus nomine perseveravit, dicens hoc sibi ab illo mandatum, nesciens Domino magis quam conservo obtemperandum. Aurelii quoque adolescentis tormenta perpeffi nomine libelli multi dati sunt ejusdem Luciani manu scripti, quod litteras ille non nosset. Cui rei ut aliquatenus posset obfist, litteras ad eos feci, quas ad vos sub epistola priore transmisi, quibus petere & suadere non destiti ut dominicæ legis & evangelii ratio teneretur. Postquam vero ad eos litteras misi, ut quasi mode-

D 4

ratus

ratiſ aliquid & temperantiuſ fieret, univerſorum
 confeſſorum nomine idem Lucianuſ epistoſam ſcripſit,
 qua pæne omne vinculuſ fidei & timor Dei & man-
 datuſ Domini, & evangeliſ ſanctitaſ & firmitaſ ſol-
 veretur. Scripſit enim omnium nomine univerſiſ
 eoſ pacem dediffe, & hanc formam per me aliſ epif-
 copſ innotefcere velle, cujuſ epistolæ exempluſ ad
 voſ tranſmiſi. Addituſ eſt plane, de quibuſ ratio
 conſtiterit quid poſt commiſſuſ egerint. Quæ reſ
 majorem nobiſ conſtat invidiaſ, ut noſ cum ſingu-
 lorum cauſaſ audire & excutere cœperimuſ, videamur
 multis negare, quod ſe nunc omneſ jaçant a
 martyribuſ & confeſſoribuſ accepiſſe. Denique hu-
 juſ ſeditioniſ origo jam cœpit. Namque in provin-
 cia noſtra per aliquot civitateſ in præpoſitoſ impetuſ
 per multitudinem factuſ eſt, & pacem quam ſemel
 cuncti a martyribuſ & confeſſoribuſ datam clami-
 tabant, conſeſtim ſibi repræſentari cœgerunt, territiſ
 & ſubaſtiſ præpoſitiſ ſuiſ, qui ad reſiſtendum minuſ
 virtute animi, & robore fidei prævalebant. Apud noſ
 etiam quidaſ turbulenti, qui vix a nobiſ in præte-
 rituſ regebantur, & in noſtram præſentiam differe-
 bantur, per hanc epistolam velut quibuſdam facibuſ
 accenſi, pluſ exardeſcere, & pacem ſibi datam ex-
 torquere cœperunt. De quibuſ qualeſ ad cleruſ
 noſtruſ litteraſ fecerim, exemplum vobiſ miſi. Sed
 & quid mihi Caldoniuſ collega pro integritate & fide
 ſua ſcripſerit, quidque ego ei reſcripſerim, utruſque
 ad voſ legenduſ tranſmiſi. Exempla quoque episto-
 læ Celerini boni & robuſti confeſſoriſ, quam ad Lu-
 cianuſ eundem confeſſoreſ ſcripſerit, item quid
 Lucianuſ ei reſcripſerit, miſi vobiſ, ut ſciſetis & la-
 boreſ circa omnia & diligentiam noſtram, & verita-
 tem ipſam diſceretiſ. Celerinuſ confeſſor quam ſit
 moderatuſ & cauſuſ & humilitate ac timore ſectæ no-
 ſtræ verecunduſ, Lucianuſ vero circa intolligentiã
 domi-

dominicæ lectionis, ut dixi, minus peritus, & circa invidiam verecundiæ nostræ relinquendam facilitate sua molestus. Nam cum Dominus dixerit, in nomine patris & filii & spiritus sancti gentes tingui, & in baptismo præterita peccata dimitti: hic præcepti & legis ignarus, mandat pacem dari, & peccata dimitti in Pauli nomine, & hoc sibi dicit ab illo esse mandatum, sicut in litteris ejusdem Luciani ad Celerinum factis animadvertetis, quibus minime consideravit, quod non martyres evangelium faciant, sed per evangelium martyres fiant; quando & Paulus apostolus, quem Dominus vas electionis suæ dixit, posuerit in epistola sua dicens: *Miror quod sic tam cito demutamini ab eo, qui vos vocavit in gratiam ad aliud evangelium; quod non est aliud: nisi si sunt aliqui qui vos turbant, & volunt convertere evangelium Christi. Sed licet nos aut angelus de calo aliter adnuntiet præterquam quod adnuntiavimus vobis, anathema sit, sicut prædiximus, & nunc iterum dico; si quis vobis adnuntiaverit præterquam quod accepistis, anathema sit.* Opportune vero supervenerunt litteræ vestræ, quas accepi ad clerum factas, item quas beati confessores Moyses & Maximus, Nicostratus, & ceteri Saturnino & Aurelio & ceteris miserunt, in quibus evangelii plenus vigor & disciplina robusta legis dominicæ continentur. Laborantes hic nos, & contra invidiæ impetum totis fidei viribus resistentes multum sermo vester adjuvit, ut divinitus compendium fieret, & priusquam venirent ad vos litteræ quas vobis proxime misi, ut declararetis nobis, quod secundum evangelii legem nobiscum fortiter atque unanimiter etiam vestra sententia concurrat. Opto vos, fratres carissimi ac desiderantissimi, semper bene valere.

EPISTOLA XXIII alias ob sphalma
priorum editionum XXIV.

*Ad clerum de litteris Romam missis & de Saturo lectore
& Optato hypodiascono factis.*

CYPRIANUS presbyteris & diaconibus fratribus salutem. Ne quid conscientiam vestram lateret, fratres carissimi, quid mihi scriptum sit, quidque ego rescripserim, utriusque epistolæ vobis exemplum misi; & credo vobis id quod rescripsi, non displicere. Sed & illud ad vos perferre litteris meis debui, urgente causa clero in urbe consistenti litteras me misisse. Et quoniam oportuit me per clericos scribere, scio autem nostros plurimos absentes esse, paucos vero qui illic sunt, vix ad ministerium quotidiani operis sufficere: necesse fuit novos aliquos constituere qui mitterentur. Fecisse me autem sciatis lectorem Satutum, & hypodiasconum Optatum confessorem, quos jampridem communi consilio clero proximos feceramus; quando aut Saturo die Paschæ semel atque iterum lectionem dedimus, aut quando cum presbyteris, doctoribus lectores diligenter probaremus, Optatum inter lectores doctorem audientium constituimus, examinautes an congruerent illis omnia quæ esse debent in iis, qui ad clerum parabantur. Nihil ergo a me absentibus vobis novum factum est; sed quod jampridem communi consilio omnium nostrum cœperat, necessitate urgente promotum est. Opto vos, fratres carissimi, semper bene valere & nostri meminisse. Fratritatem salutate. Valete.

EPI.

EPISTOLA XXV.

Ad Moysen & Maximum & ceteros confessores.

CYPRIANUS Moyfi & Maximo presbyteris, & ceteris confessoribus dilectissimis fratribus salutem. Gloriam fidei & virtutis vestræ, fortissimi ac beatissimi fratres, jampridem de opinione cognoveram, lætatus satis & plurimum gratulatus, quod vos confessione sui nominis paraverit ad coronam Domini nostri Jesu Christi præcipua dignatio. Vos enim primores & duces ad nostri temporis prælium facti, cælestis militiæ signa movistis. Vos spiritale certamen quod nunc geri Deus voluit, vestris virtutibus imbuistis. Vos surgentis belli impetus primos immobili robore atque inconcussa stabilitate fregistis. Inde initia felicia pugnandi orta sunt. Inde vincendi auspicia cœperunt. Contigit hic per tormenta consummari martyria. Sed qui in congressione præcedens, exemplum virtutis fratribus factus est, cum martyribus in honore communis est. Coronas vestra manu fertas inde huc tradidistis, & de poculo salutari fratribus propinastis. Accessit ad confessionis exordia gloriosa & militiæ victricis auspicia disciplinæ tenor, quem de epistolæ vestræ vigore perspeximus, quam modo ad collegas vestros in confessione vobiscum Domino copulatos, sollicita admonitione misistis; ut evangelii sancta præcepta, & tradita nobis semel mandata vitalia forti & stabili observatione teneantur. Ecce alius gloriæ vestræ sublimis gradus, ecce iterum cum confessione geminatus promerendi Dei titulus, stare firmo gradu, & in hac acie qui evangelium conantur irrumpere, & præceptis Domini subruendis manus impias inferentes, fidei robore submovere; præbuisse ante initia virtutum, nunc & morum magisteria præbere. Dominus post resurrectionem mit-

tens

tens apostolos mandat & dicit: *Data est mihi omnis potestas in celo & in terra. Ite ergo & docete gentes omnes, tingentes eos in nomine patris & filii & spiritus sancti, docentes eos observare omnia, quaecumque praecepi vobis.* Et Joannes apostolus mandati memor, in epistola sua postmodum ponit: *In hoc, inquit, intelligimus quia cognovimus eum, si praecepta ejus custodiamus. Qui dicit quoniam cognovit eum, & mandata ejus non servat, mendax est, & veritas in illo non est.* Hæc praecepta custodienda suggeritis, divina & cælestia mandata servatis. Hoc est esse confessorem Domini, hoc est esse martyrem Christi, servare vocis suæ inviolatam circa omnia & solidam firmitatem. Nam velle præter Dominum martyrem fieri & praecepta Domini destruere conari, uti adversus illum dignatione quam tibi dederit, armis ab illo acceptis rebellem quodammodo fieri, hoc est Christum confiteri velle & evangelium Christi negare. Lætor igitur ex vobis, fortissimi ac fidelissimi fratres; & quantum gratulor martyribus istis honoratis ob virium gloriam, tantum gratulor pariter & vobis ob dominicæ etiam disciplinæ coronam. Dignationem suam Dominus multiplici genere largitatis infudit, bonorum militum laudes & glorias spirituales copiosa varietate distribuit. Honoris vestri participes & nos sumus, gloriam vestram nostram gloriam computamus, quorum tempora illustravit tanta felicitas, ut ætatem nostram videre contingeret probatos servos Dei, & Christi milites coronatos. Opto vos, fortissimi ac beatissimi fratres, semper bene valere & nostri meminisse.

E P I S T O L A XXVI.

Moyſes, Maximus, Nicoſtratus, & alii confeſſores reſpondent præcedenti epiſtola.

CÆCILIO Cypriano epiſcopo eccleſiæ Carthagi-
nenſium Moyſes & Maximus preſbyteri, & Ni-
coſtratus & Rufinus diaconi, & ceteri confeſſores in
fide veritatis perfeverantes in Deo patre & in filio
ejus Jeſu Chriſto Domino noſtro & in ſpiritu ſancto
ſalutem. Inter varios & multipliçes, frater, dolo-
res nobis conſtitutis propter præſentes multorum fra-
trum per totum pæne orbem ruinas, hoc præcipuum
nobis ſolacium ſupervenit, quod acceptis litteris tuis
erecti ſumus, & dolentis animi mœroribus fomenta
ſuſcepimus. Unde intelligere jam poſſumus gratiam
divinæ providentiæ forſitan non ob aliam cauſam nos
tam diu clauſos vinculis carceris reſervare voluiſſe,
niſi ut inſtructi & robuſtius animati litteris tuis, voto
præſentiore ad coronam deſtinatam poſſemus pervenire.
Illuxerunt enim nobis litteræ tuæ ut in tempeſtate
quadam ſerenitas, & in turbido mari exoptata tran-
quillitas, & in laboribus requies, ut in periculis &
doloribus ſanitas, ut in denſiſſimis tenebris candida
lux & refulgens. Ita illas animo ſitiente perbibimus,
& voto eſuriante ſuſcepimus, ut ad certamen inimici,
ex illis nos ſatis paſtos & ſaginos gaudeamus. Red-
det tibi Dominus pro iſta tua caritate mercedem, &
hujus tam boni operis repræſentabit debitam frugem.
Non minus enim coronæ mercede condignus eſt qui
hortatus eſt, quam qui & paſſus eſt, non minus lau-
de condignus qui docuit, quam qui & fecit. Non
minus honorandus eſt qui monuit, quam qui dimica-
vit, niſi quoniã nonnumquam magis gloriæ cumu-
lus redundat ad eum qui inſtituit, quam ad eum qui
ſe docibilem diſcipulum ſubminiſtravit. Hic enim for-
taſſis

tassis hoc quod exercuit non habuisset, nisi ille docuisset. Percepimus igitur, iterum dicimus, frater Cypriane, magna gaudia, magna solatia, magna fomenta, maxime quod & gloriosas martyrum, non dicam mortes, sed immortalitates gloriosis & condignis laudibus profectus es. Tales enim excessus talibus vocibus prosequendi fuerunt, ut quæ referantur, sic dicerentur qualiter facta sunt. Ex tui ergo litteris vidimus gloriosos illos martyrum triumphos, & oculis nostris quodammodo cælum illos petentes profecti sumus, & inter angelos ac potestates dominationesque cælestes constitutos contemplati sumus. Sed & Dominum apud patrem testimonium suum illis promissum perhibentem, auribus nostri quodam modo sensimus. Hoc est ergo quod & nobis animum in dies erigit, & ad consequendos gradus tantæ dignationis incendit. Quid enim gloriosius quidve felicius ulli hominum poterit ex divina dignatione contingere, quam inter ipsos carnifices in ipso interitu confiteri Dominum Deum, quam inter severientia secularis potestatis varia & exquisita tormenta, etiam extorto, & excruciato, & excarnificato corpore, Christum Dei filium, etsi recedentem sed tamen libero spiritu, confiteri, quam relicto mundo cælum petisse, quam desertis hominibus inter angelos stare, quam impedimentis omnibus secularibus ruptis, in conspectu Dei jam se liberum sistere, quam cæleste regnum sine ulla cunctatione tenere, quam collegam passionis cum Christo in Christi nomine factum fuisse, quam iudicis sui divina dignatione iudicem factum fuisse, quam immaculatam conscientiam de confessione nominis reportasse, quam humani & sacrilegis legibus contra fidem non obedisse, quam veritatem voce publica contestatum fuisse, quam ipsam quæ ab omnibus metuatur, moriendo mortem subegisse, quam per ipsam mortem immortalitatem consequi.

consecutum fuisse, quam omnibus sævitiae instrumentis excarnificatum & extortum, ipsis tormentis tormenta superasse, quam omnibus dilaniati corporis doloribus robore animi reluctatum fuisse, quam sanguinem suum profluentem non horruisse, quam supplicia sua post fidem amare cœpisse, quam detrimentum vitæ suæ putare non exisse? Ad hoc enim prælium quasi quadam tuba evangelii sui nos excitat Dominus dicens: *Qui plus diligit patrem aut matrem, quam me, non est me dignus, & qui plus diligit animam suam quam me, non est me dignus, & qui non tollit crucem suam & sequitur me, non est me dignus.* Et iterum: *Beati qui persecutionem passi fuerint propter justitiam; ipsorum enim est regnum celorum. Beati eritis cum vos persecuti fuerint & odio habuerint. Gaudete & exsultate; sic enim & prophetas persecuti sunt, qui ante vos fuerunt, patres eorum.* Et iterum: *Quoniam ante Reges & potestates stabitis, & tradet frater fratrem ad mortem, & pater filium, & qui perseveraverit usque ad finem, hic salvus erit.* Et: *Vincenti dabo sedere super thronum meum, sicut & ego vici & sedi super thronum patris mei.* Sed & apostolus: *Quis nos separabit a caritate Christi? Pressura, an angustia, an persecutio, an fames, an nuditas, an periculum, an gladius, sicut scriptum est; quia propter te interficimur tota die, aestimati sumus velut oves victimæ, sed in iis omnibus supervincimus pro eo, qui nos dilexit.* Hæc & hujusmodi cum in evangelio collata perlegamus, & quasi faces quasdam, ad inflammandam fidem dominicis vocibus suppositas nobis sentiamus, hostes veritatis jam non tantum non perhorrescimus, sed & provocamus, & inimicos Dei jam hoc ipso quod non cessamus, vicimus, & nefarias contra veritatem leges subegimus. Et si nondum nostrum sanguinem fudimus, sed fundere parati sumus, nemo hanc dilationis nostræ moram clementiam judicet, quæ nobis officit, quæ impedimentum gloriæ facit, quæ cal-
lum

lum differt, quæ gloriosum Dei conspectum inhi-
 bet. In hujusmodi enim certamine, & in hujusmodi, ubi
 decertat fides, p̄telio mora martyres non distulisse,
 vera clementia est. Pete ergo, Cypriane carissime,
 ut nos gratia sua Dominus magis ac magis in dies sin-
 gulos quosque uberius, atque propensius & armet,
 & illustret, & viribus p̄otentiae suæ firmet ac robo-
 ret, & quasi optimus imperator milites suos, quos
 • usque adhuc in castris carceris exercuit, & probavit,
 producat jam ad propositi certaminis campum. Por-
 rigat nobis arma divina, illa tela quæ nesciunt vinci,
 lorica justitiæ, quæ numquam solet rumpi, clipeum
 fidei, qui non potest perforari, galeam salutis, quæ
 non potest frangi, & gladium spiritus, qui non con-
 suevit vulnerari. Cui enim magis hæc, ut p̄o no-
 bis petat, mandare debemus, quam tam glorioso
 episcopo, ut hostiæ destinati petant auxilium de sa-
 cerdote? Ecce aliud gaudium nostrum, quod in offi-
 cio episcopatus tui, licet interim a fratribus pro
 temporis conditione distractus es, tamen non defuisti,
 quod litteris confessores frequenter corroborasti,
 quod etiam sumptus necessarios de tuis laboribus ju-
 stis præbuiisti, quod in omnibus te præsentem quo-
 dammodo semper exhibuisti, quod in nulla officii tui
 parte quasi aliquis desertor claudicasti. Sed quod
 nos ad majorem lætitiā robustius provocavit, ta-
 cere non possumus, quin omni vocis nostræ testi-
 monio prosequamur. Animadvertimus enim te con-
 gruente censure, & eos digne objurgasse, qui im-
 memores delictorum suorum, pacem a presbyteris
 p̄et absentiam tuam festinata & præcipiti cupiditate
 extorsissent, & illos qui sine respectu evangeliū san-
 ctum Domini canibus, & margaritas porcis proph-
 eta facilitate donassent, cum grande delictum, & per
 totum p̄ene orbem incredibili vastatione grassatum
 non oporteat nisi, ut ipse scribis, caute moderato-
 que

que tractari, consultis omnibus episcopis, presbyteris, diaconibus, confessoribus, & ipsis stantibus laicis, ut in tuis litteris & ipse testaris; ne dum volumus importune ruinis subvenire, alias majores ruinas videamur parare. Ubi enim divinus sermo relinquitur, si tam facile peccantibus venia præstetur? Fovendi sunt sane ipsorum animi, & ad maturitatis suæ tempus nutriendi, & de scripturis sanctis, quam ingens & supra omnia peccatum commiserint, instruendi. Nec hoc animentur quia multi sunt; sed hoc ipso magis reprimantur, quia non pauci sunt. Nihil ad extenuationem delicti numerus impudens valere consuevit, sed pudor, sed modestia, sed patientia, sed disciplina, sed humilitas, atque subiectio, sed alienum de se expectasse iudicium, sed alienam de suo sustinuisse sententiam. Hoc est quod pœnitentiam probat. Hoc est quod impresso vulnere inducit cicatricem. Hoc est quod dejectæ mentis ruinas erigit & attollit, quod ardentem delictorum æstuantium vaporem restinguit & finit. Non enim quæ sanorum sunt corporum, medicus ægris dabit, ne importunus cibus tempestatem valetudinis sævientis non reprimat, sed accendat; scilicet ne quod potuisset maturius jejunio extenuari per impatientiam longius pasta cruditate producat. Eluendæ sunt igitur impio sacrificio manus inquinatæ operibus bonis, & nefario cibo ora misera polluta pœnitentiæ sunt veræ sermonibus expianda, & in secretis cordis fidelis novellendus & consecrandus est animus. Crebri pœnitentium gemitus audiantur. Non semel tantum, sed iterum fideles ex oculis lacrimæ profundantur; ut illi ipsi oculi qui male simulacra conspexerunt, quæ illicita commiserant, satisfaciuntibus Deo fletibus deleant. Non est nisi patientia morbis necessaria. Luctantur cum suo dolore qui languent, & ita demum sperant sanitatem, si tolerantia superarint dolorem. Infidelis enim

cicatrix, quam cito festinans medicus induxit, & ac
 quemlibet casum medela rescinditur, si non fideliter
 de ipsa tarditate remedia præstentur. Cito rursus in
 incendium flamma revocatur, nisi totius ignis etiam
 usque ad extremam scintillam materia restinguatur
 ut merito hujusmodi homines sciant sibi etiam de ip
 sa mora magis consuli, & fideliora necessariis dila
 tionibus remedia præstari. Ceterum ubi erit quor
 custodia squalidi carceris includuntur, qui Christum
 confitentur, si sine periculo fidei sunt qui negave
 runt? Ubi quod in nomine Dei catenarum ambitu
 vinciuntur, si sine communicatione non sunt, qu
 confessionem Dei non retinuerunt? Ubi quod detent
 martyres gloriosas animas ponunt, si qui dereliqu
 runt fidem, periculorum & delictorum suorum no
 sentiunt magnitudinem? Quod si nimiam impatien
 tiam præferunt & intolerabili festinatione commun
 cationem exposcunt, frustra querula ista & invidiosa
 ac nihil adversus veritatem valentia jactant petulant
 & infreno ore convicia, quandoquidem licuerit ill
 suo jure retinere, quod nunc sua sponte quæsitæ ne
 cessitate coguntur postulare. Fides enim quæ potuit
 Christum confiteri, potuit & a Christo in commun
 catione retineri. Optamus te, beatissime ac glori
 fissime Papa, in Domino semper bene valere & nos
 meminisse.

EPISTOLA XXVII.

Cyprianus lapsus.

DOMINUS noster, cujus præcepta & monita o
 servare debemus, episcopi honorem, & ecc
 siæ suæ rationem disponens in evangelio loquitur,
 dicit Petro: *Ego tibi dico quia tu es Petrus, & sup
 istam petram ædificabo ecclesiam meam, & porta inferi*

non vincunt eam, & tibi dabo claves regni calorum, & quæ ligaveris super terram, erunt ligata & in calis, & quæcumque solveris super terram, erunt soluta & in calis. Inde per temporum & successionum vices episcoporum ordinatio, & ecclesiæ ratio decurrit, ut ecclesia super episcopos constituatur & omnis actus ecclesiæ per eosdem præpositos gubernetur. Cum hoc itaque divina lege fundatum sit, miror quosdam audaci temeritate sic mihi scribere voluisse, ut ecclesiæ nomine litteras facerent, quando ecclesia in episcopo, & clero, & in omnibus stantibus sit constituta. Absit enim, nec Domini misericordia & potestas ejus invicta patiatur, ut ecclesia esse dicatur lapsorum numerus, cum scriptum sit: *Deus non est mortuorum, sed vivorum.* Omnes quidem vivificari optamus; & ut in statum pristinum restituantur precibus nostris & gemitibus oramus. Si autem quidam lapsi ecclesiam se volunt esse, & si apud illos atque in illis est ecclesia, quid superest quam ut ipsi rogentur a nobis, ut nos ad ecclesiam dignentur admittere? Summissos ergo & quietos & verecundos esse oportet eos, qui delicti sui memores satisfacere Deo debent, nec ecclesiæ nomine litteras facere, cum se magis sciant ecclesiæ scribere. Scripserunt autem mihi nuper quidam de lapsis humiles, & mites, & trementes, & metuentes Deum, & qui in ecclesia semper gloriose & granditer operati sunt, & opus suum numquam Domino imputaverunt, scientes illum dixisse: *Et cum hæc omnia feceritis, dicite: Servi supervacui sumus, quod debuimus facere, fecimus.* Quæ illi cogitantes, & quamvis libello a martyribus accepto, ut tamen a Domino satisfactio sua admitti possit, orantes scripserunt mihi, se delictum suum cognoscere, & poenitentiam veram agere, nec ad pacem temere aut importune properare, sed expectare præsentiam nostram, dicentes pacem quoque ipsam, si eam nobis præsentibus

bus acceperint, dulciorem sibi futuram. Quibus quantum gratulatus sim, Dominus testis est, qui dignatus est ostendere, quid ejusmodi & tales servi de ejus benignitate mereantur. Quas litteras cum nuper acceperim, & nunc aliud scripsisse vos legerim, peto discernatis desideria vestra, & quicumque estis qui has litteras nunc misistis, nomina vestra libello subjiciatis, & libellum cum singulorum nominibus ad me transmittatis. Ante est enim scire, quibus rescribere habeam: tunc ad singula quæ scripsistis, pro loci & actus nostri mediocritate rescribam. Opto vos, fratres carissimi, semper bene valere, & secundum Domini disciplinam quiete & tranquille agere. Valete.

EPISTOLA XXVIII.

Ad presbyteros & diaconos.

CYPRIANUS presbyteris & diaconibus fratribus salutem. Integre & cum disciplina fecistis, fratres carissimi, quod consilio collegarum meorum qui præsentibus erant, Gajo Diddensi presbytero, & diacono ejus censuistis non communicandum, qui communicando cum lapsis, & offerendo oblationes eorum, in pravis erroribus suis frequenter deprehensus & semel atque iterum, secundum quod mihi scriptum est, a collegis meis moniti ne hoc facerent, in præsumptione & audacia sua pertinaciter persistenter decipientes quosdam fratres ex plebe nostra; quibus nos omni humilitate consultum cupimus, & quorum saluti non adulatione composita, sed sincera fide prospicimus, ut vera pœnitentia, & gemitu & dolore pleno Dominum deprecantur, quia scriptum est: *Memento unde cecideris, & age pœnitentiam.* & iterum loquitur scriptura divina: *Sic dicit Dominus: Cum converteris*

versus gemueris, tunc saluaberis, & scies ubi fueris. Ingemiscere autem & agere poenitentiam quomodo possunt; quorum gemitibus & lacrimis intercedunt quidam de presbyteris, ut communicandum cum illis temere existiment, nescientes quia scriptum est? *Qui vos felices dicunt, in errorem vos mittunt, & semitam pedum vestrorum turbant.* Merito salubria nostra & vera consilia nihil promovent, dum blanditiis & palpationibus perniciosis salutaris veritas impeditur, & patitur lapsorum faucia & ægra mens, quod corpora- liter quoque ægri & infirmi sæpe patiuntur, ut dum salubres cibos, & utiles potus, quasi amaros & abhorrentes respuunt, & illa quæ oblectare, & ad præsens suavia videntur esse, appetunt, perniciem sibi & mortem per inaudientiam & intemperantiam provocent, nec proficiat ad salutem artificis medela vera, dum blandimentis decipit, dulcis illecebra. Vos itaque secundum litteras meas fideliter & salubriter consulentes, a consiliis melioribus ne recedatis. Legite vero has easdem litteras & collegis meis, si qui aut præsentis fuerint, aut supervenerint, ut unanimes & concordēs ad fovenda & sananda lapsorum vulnera consilium salubre teneamus, tractaturi plenissime de omnibus, cum convenire in unum per Domini misericordiam cœperimus. Interea si quis immoderatus & præceps, sive de nostris presbyteris vel diaconibus, sive de peregrinis, ausus fuerit ante sententiam nostram communicare cum lapsis, a communicatione nostra arceatur, apud omnes nos causam dicturus temeritatis suæ, quando in unum permittente Domino convenerimus. Desiderastis quoque ut de Philumeno, & Fortunato hypodiaconis, & Favorino acolytho, qui medio tempore recesserunt, & nunc venerunt, quid mihi videatur rescribam. Cui rei non potui me solum iudicem dare, cum multi adhuc de clero absentes sint, nec locum suum vel

fero repetendum putaverunt, & hæc singulorum tractanda sit & limanda plenius ratio, non tantum cum collegis meis, sed & cum plebe ipsa universa: expensa enim moderatione libranda & pronuntianda res est, quæ in posterum circa ministros ecclesiæ constituat exemplum. Interim se a divisione mensurna tantum contineant, non quasi a ministerio ecclesiastico privati esse videantur, sed ut integris omnibus ad nostram præsentiam differantur. Opto vos, fratres carissimi, semper bene valere. Fraternitatem universam salutate, & valete.

EPISTOLA XXIX.

Ad presbyteros & diaconos Romæ consistentes.

CYPRIANUS presbyteris & diaconibus Romæ consistentibus fratribus salutem. Et dilectio communis & ratio exposcit, fratres carissimi, nihil conscientiae vestrae subtrahere de his quæ apud nos geruntur, ut sit nobis circa utilitatem ecclesiasticæ administrationis commune consilium. Nam posteaquam ad vos litteras feci, quas misi per Saturum lectorem, & Optatum hypodiamonum, quorundam lapsorum conspirata temeritas, qui pœnitentiam agere & Deo satisfacere detrectant, litteras ad me fecerunt, pacem non dandam sibi postulantes, sed quasi jam datam sibi vindicantes, quod dicant Paulum omnibus pacem dedisse, sicut in litteris eorum, quarum exemplum ad vos transmissi, legetis, simulque quid ego eis breviter interim rescripserim, sed & quales postea ad clerum litteras fecerim ut scire possitis, huius quoque rei exemplum vobis misi. Quod si ultra temeritas eorum nec meis nec vestris litteris compressa fuerit, nec consiliis salubribus obtemperaverit, agemus ea quæ secundum evangelium Dominus agere præ-

præsentis. Opto vos, fratres carissimi, sospites bene
valere. Valete.

P I S T O L A . X X X

Præsentis ad diaconos Romæ consistentes ad Cyprianum.

Cyprianus Papa presbyteri & diacones Romæ
consistentes salutem. Cum perlegissemus, fra-
ter carissime, litteras tuas, quas per Fortunatum
hypocritarum miseris, gemino sumus dolore per-
cussus duplici mœrore confusi, quod neque tibi
requies in tantis persecutionis necessitatibus tra-
deretur, & presbyterorum fratrum immoderata petulan-
tia ad periculosam verborum temeritatem pro-
ducere videretur. Sed quamquam nos atque ani-
mum tuum ista quæ diximus, graviter affligerent,
tamen tuus nostri tam gravem farcinam vigor tuus,
& sanctæ evangelicæ disciplinæ adhibita severi-
tas, dum & quorundam improbitatem ju-
stas, & cohortando ad pœnitentiam, viam
legis tibi ostendis. Quos quidem satis mirati
sumus, quodque proflire voluisse, ut tam urgen-
ter, & in immenso crimine atque delicto, pacem si-
bi petere, quam vindicare, immo jam
& habere se dicerent. Qui si habent, quid
petunt, quod tenent? Si autem non habere illos
probat, hoc ipso quod petunt, cur non iudicium
eorum sustinent, a quibus petendam pacem, quam
uti habent, putaverunt? Quod si aliunde præ-
rogative communicationis habere se credunt, cum
evangelicam conferre conentur; ut ita demum fir-
miter, si ab evangelica lege non dissonat. Ce-
terum quo pacto evangelicam poterit præstare com-
munionem, quod contra evangelicam decretum

videtur veritatem? Nam cum omnis prærogativa ita demum ad indulgentiæ privilegium spectet, si ab eo cui sociari quærit, non discrepet, quia ab eo cui sociari quærit discrepat, necesse est indulgentiam & privilegium societatis amittat. Videant igitur quid in hoc negotio agere conentur. Nam si aliud quidem evangelium, aliud autem martyres dicunt posuisse decretum, collidentes contra evangelium martyres utrobique periclitabuntur. Nam & evangelii fracta jam & jacens videbitur esse majestas, si potuit alterius decreti novitate superari, & de martyrum capite gloriosa confessionis corona detracta, si non illam de evangelii conservatione inveniantur consecuti, unde martyres fiunt; ut merito nulli magis sit competens nihil contra evangelium decernere, quam qui martyris nomen ex evangelio laborat accipere. Illud præterea vellemus addiscere, si martyres non propter aliud martyres fiunt, nisi ut non sacrificantes teneant ecclesiæ usque ad effusionem sanguinis sui pacem, ne cruciatus dolore superati, perdendo pacem, perdant salutem, quo pacto salutem quam, si sacrificassent, se habituros non putaverunt, illis existimant donandam qui sacrificasse dicantur, cum legem hanc debeant in aliis tenere, quam ipsi videbantur sibi ante posuisse? In quo negotio hoc ipsum, quod pro se ipsis facere putaverunt, animadvertimus contra se ipsos protulisse. Nam si dandam illis pacem martyres putaverunt, cur ipsi non dederunt? Cur illos ad episcopum, ut ipsi dicunt, remittendos censuerunt? Is enim qui jubet fieri, potest utique facere, quod fieri jubet. Sed ut intelligimus, immo, ut res ipsa loquitur & clamat, sanctissimi martyres utrobique adhibendum putaverunt temperamentum & pudoris & veritatis. Nam quia e multis urgebantur, dum ad episcopum illos remittunt, verecundiæ propriæ, ne ulterius inquietarentur, consulendum putaverunt; & dum
illis

illis non ipsi communicant, evangelicæ legis illibatam sinceritatem custodiendam judicaverunt. Tu tamen, frater, numquam pro tua caritate desistas lapsorum animos temperare, & errantibus veritatis præstare medicinam, licet animus ægrorum medentium respuere soleat industriam. Recens est lapsorum nuper hoc vulnus, & adhuc in tumorem plaga consurgens. Et iccirco certi sumus quod, spatio productionis temporis impetu isto consenescente, amabunt hoc ipsum, ad fidelem se dilatos esse medicinam, si tamen desint, qui illos arment ad periculum proprium, & in perversum instruentes pro salutaribus dilationum remediis, exitiosa deposcant illis properatæ communicationis venena. Neque enim credimus sine instinctu quorundam ausuros fuisse omnes tam petulanter sibi pacem vindicare. Novimus Carthaginensis ecclesiæ fidem, novimus institutionem, novimus humilitatem. Unde etiam mirati sumus, quod quædam in te per epistolam injecta durius notaremus, cum amorem vestrum mutuum, & caritatem exemplis multis reciprocæ adfectionis in vos invicem sæpe comperissemus. Tempus est igitur ut agant delicti pœnitentiam, ut probent lapsus sui dolorem, ut ostendant verecundiam, ut monstrent humilitatem, ut exhibeant modestiam, ut de submissione provocent in se Dei clementiam, & de honore debito in Dei sacerdotem, eliciant in se divinam misericordiam. Quanto meliores ipsorum litteræ fuissent, si pro ipsis preces stantium humilitate ipsorum adjutæ fuissent, quoniam & facilius impetratur quod petitur, quando is pro quo petitur, condignus est ut quod petitur, impetretur. Quod autem pertinet ad Privatum Lambesitanum, pro tuo more fecisti, qui rem nobis tamquam sollicitam nuntiare voluisti. Omnes enim nos decet pro corpore totius ecclesiæ, cujus per varias quasque provincias membra digesta sunt, excubare. Sed nos

E 5.

etiam

etiam ante litteras tuas fraus callidi hominis later non potuit. Nam cum antehac quidam ex ipsius nequitiae cohorte venisset vexillarius privati Futurus & fraudulentur litteras a nobis elicere curaret, ne quis esset, latuit, nec litteras quas volebat, accepit. Optamus te in Domino bene valere.

EPISTOLA XXXI.

Cleri Romani ad Cyprianum.

CYPRIANO Papæ presbyteri & diaconi Romæ consistentes salutem. Quamquam bene sibi conficius animus, & evangelicæ disciplinæ vigore subnixus, & verus sibi in decretis cælestibus testis effectus soleat solo Deo iudice esse contentus, nec alterius aut laudes petere aut accusationes pertimescere: tamen geminata sunt laude condigni, qui cum conscientiam sciant Deo soli debere se iudici, actus tamen suos desiderant etiam ab ipsis suis fratribus comprobari. Quod te, frater Cypriane, facere non mirum est, qui pro tua verecundia, & ingenita industria consiliorum tuorum nos non tam iudices voluisti, quam participes inveniri, ut in tuis rebus gestis laudem tecum, dum illas probamus, inveniremus, & tuorum consiliorum bonorum coheredes, quia & affirmatores, esse possimus. Idem enim omnes credimur operati, in quo deprehendimur eadem omnes censure & disciplinæ consensione sociati. Quid enim magis aut in pace tam aptum, aut in bello persecutionis tam necessarium, quam debitam severitatem divini vigoris tenere? quam qui remiserit, instabili rerum cursu erret semper necesse est, & huc atque illuc variis & incertis negotiorum tempestatibus dissipetur, & quasi extorto de manibus consiliorum gubernaculo, navim ecclesiasticæ salutis illidat in scopulos; ut appareat

pareat non aliter salutis ecclesiasticæ consuli posse, nisi si qui & contra ipsam faciunt, quasi quidam adversi fluctus repellantur, & disciplinæ ipsius semper custodita ratio quasi salutare aliquod gubernaculum in tempestate servetur. Nec hoc nobis nunc nuper consilium cogitatum est, nec hæc apud nos adversus improbos modo supervenerunt repentina subsidia; sed antiqua hæc apud nos severitas, antiqua fides, disciplina legitur antiqua: quoniam nec tantas de nobis laudes apostolus protulisset dicendo: *Quia fides vestra prædicatur in toto mundo*, nisi jam exinde vigor iste radices fidei de temporibus illis mutuatus fuisset; quarum laudum & gloriæ degenerem fuisse maximum crimen est. Minus est enim dedecoris numquam ad præconium laudis accessisse, quam de fastigio laudis ruisse. Minus est criminis honoratum bono testimonio non fuisse, quam honorem bonorum testimoniorum perdidisse. Minus est sine prædicatione virtutum ignobilem sine laude jacuisse, quam exheredem fidei factum laudes proprias perdidisse. Ea enim quæ in aliqujus gloriam proferuntur, nisi anxio & sollicito labore servantur, in invidiam maximi criminis intumescunt. Hoc nos non falso dicere superiores nostræ litteræ probaverunt, in quibus vobis sententiam nostram dilucida expositione protulimus, & adversus eos, qui se ipsos infideles illicita nefariorum libellorum professione prodiderant, quasi evasuri irretientes illos diaboli laqueos viderentur, quo non minus quam si ad nefarias aras accessissent, hoc ipso quod ipsum contestati fuerant, tenerentur; sed etiam adversus illos qui acta fecissent, licet præsentem cum fierent non affuissent, cum præsentiam suam utique ut sic scriberentur mandando fecissent. Non est enim immunis a scelere qui ut fieret imperavit; nec est alienus a crimine, cuius consensu, licet non a se admissum crimen, tamen publice

lice legitur; & cum totum fidei sacramentum in confessione Christi nominis intelligatur esse digestum, qui fallaces in excusatione præstigias quærit, negavit, & qui vult videri propositis adversus evangelium vel edictis vel legibus satisfecisse, hoc ipso jam paruit, quod videri paruisse se voluit. Necnon etiam contra illos quoque, qui illicitis sacrificiis manus suas atque ora polluerant, pollutis ante mentibus propriis, unde etiam sunt ipsæ manus atque ora polluta, fidem nostram consensumque monstravimus. Absit enim ab ecclesia Romana vigorem suum tam prophana facilitate dimittere, & nervos severitatis everfa fidei maiestate dissolvere; ut cum adhuc non tantum jaceant, sed & cadant everforum fratrum ruinæ, properata nimis remedia communicationum utique non profutura præstentur, & nova per misericordiam falsam vulnera veteribus transgressionis vulneribus imprimantur, ut miseris ad everfionem majorem eripiatur & pœnitentia. Ubi enim poterit indulgentiæ medicina proficere, si etiam ipsæ medicus intercepta pœnitentia indulget periculis, si tantum modo operit vulnus, nec finit necessaria temporis remedia obducere cicatricem? Hoc non est curare, sed, si dicere verum volumus, occidere. Quamquam confessorum quoque, quos hic adhuc in carcerem dignitas suæ confessionis inclusit, & ad certamen evangelicum sua fides in confessione jam gloriosa semel coronavit, litteras habeas conspirantes cum litteris nostris, quibus severitatem evangelicæ disciplinæ protulerunt, & illicitas petitiones ab ecclesiæ pudore revocarunt. Nisi hoc fecissent, disciplinæ evangelicæ ruinæ non facile sarcirentur, præsertim cum nulli magis tam congruens esset tenorem evangelici vigoris illibatum dignitatemque servare, quam qui se excrucianos & excarnificandos pro evangelio furentibus tradidissent, ne martyrii honorem merito perderent, si in occasione martyrii

tyrii prævaricatores evangelii esse voluissent. Nam qui id quod habet, non custodit in eo ex quo illud possidet, dum id ex quo possidet, violat, amittit illud quod possidebat. In quo loco maximas tibi atque uberes gratias referre debemus & reddimus, quod illorum carceris tenebras litteris tuis illuminasti, quod ad illos venisti quomodo introire potuisti, quod illorum animos sua fide & confessione robustos, tuis allocutionibus litterisque recreasti, quod felicitates eorum condignis laudibus profecutus, accendisti ad multo ardentiorē cælestis gloriæ cupiditatem, quod pronos impulisti, quod, ut credimus & optamus, victores futuros viribus tui sermonis animasti; ut quamquam hoc totum de fide confitentium & de divina indulgentia venire videatur, tamen in martyrio suo tibi ex aliquo debitores facti esse videantur. Sed ut ad id, unde digressus sermo videbatur esse, rursus revertatur, quales litteras in Siciliam quoque miserimus, subjectas habebis. Quamquam nobis differendæ huius rei necessitas major incumbat, quibus post excessum nobilissimæ memoriæ viri Fabiani, nondum est episcopus propter rerum & temporum difficultates constitutus, qui omnia ista moderetur, & eorum qui lapsi sunt, possit cum auctoritate & consilio habere rationem. Quamquam nobis in tam ingenti negotio placeat, quod & tu ipse tractasti, prius ecclesiæ pacem sustinendam, deinde sic collatione consiliorum cum episcopis, presbyteris, diaconis, confessoribus pariter ac stantibus laicis facta, lapsorum tractare rationem. Perquam enim nobis & invidiosum & onerosum videtur, non per multos examinare, quod per multos commissum videatur fuisse, & unum sententiam dicere, cum tam grande crimen per multos diffusum notetur exisse; quoniam nec firmum decretum potest esse, quod non plurimorum videbitur habuisse consensum. Aspice totum orbem pace factum,

tum, & ubique jacere dejectorum reliquias & ruinas, & iccirco tam grande expeti consilium, quam late propagatum videtur esse delictum. Non sit minor medicina quam vulnus, non sint minora remedia quam funera; ut quomodo qui ruerunt, ob hoc ruerunt, quod cæca temeritate nimis incauti fuerunt: ita qui hoc disponere nituntur, omni consiliorum moderamine utantur, ne quid non ut oportet factum tamquam irritum ab omnibus iudicetur. Uno igitur eodemque consilio, iisdem precibus & fletibus tam nos, qui usque adhuc videmur temporis istius ruinas subterfugisse, quam illi qui in has temporis videntur clades incidisse, divinam majestatem deprecantes, pacem ecclesiastico nomini postulemus. Mutuis votis nos invicem foveamus, custodiamus, armemus. Oremus pro lapsis ut erigantur, oremus pro stantibus ut non ad ruinas usque tententur, oremus ut qui cecidisse referentur, delicti sui magnitudinem agnoscentes, intelligant non momentaneam neque præproperam desiderare medicinam. Oremus ut effectus indulgentiæ lapsorum subsequatur & poenitentia, ut intellecto suo crimine velint nobis interim præstare patientiam, nec adhuc fluctuantem turbent ecclesiæ statum, ne interiorém nobis persecutionem ipsi incendisse videantur, & accedat ad criminum cumulum, quod etiam inquieti fuerunt. Maxime enim illis congruit verecundia, quorum in delictis damnatur mens inverecunda. Pulsent sane fores, sed non utique confringant. Adeant ad limen ecclesiæ, sed non utique transiliant. Castorum cælestium excubent portis, sed armati modestia, qua intelligant se desertores fuisse. Resumant precum suarum tubam, sed qua non bellicum clangant. Arment se quidem modestiæ telis, & quem negando mortis metu fidei dimiserant clipeum, resumant, sed ut contra hostem diabolum vel nunc armati, non contra ecclesiam, quæ illorum dolet casus,

sus, armatos esse se credant. Multum illis proficiet petitio modesta, postulatio verecunda, humilitas necessaria, patientia non otiosa. Mittant legatos pro suis doloribus lacrimas, advocacy fungantur ex intimo pectore prolati gemitus, dolorem probantes commissi criminis & pudorem. Immo si dedecoris admissi magnitudinem perhorrescunt, si pectoris & conscientiae suae letalem plagam, & sinuosi vulneris altos recessus vere medica manu tractant, erubescant & petere; nisi quia majoris est rursum & periculi & pudoris, auxilium pacis non petisse. Sed hoc totum in sacramento, sed in ipsius postulationis lege temporis facto temperamento, sed postulatione demissa, sed prece subdita; quoniam & qui petitur flecti debet, non incitari; & sicut respici debet divina clementia, sic respici debet & divina censura; & sicut scriptum est: *Donavi tibi omne debitum, quia me rogasti*, sic scriptum est: *Qui me negaverit coram hominibus, negabo & ego eum coram patre meo, & coram angelis ejus*. Deus enim ut est indulgens, ita est praeceptorum suorum exactor, & quidem diligens; & sicut ad convivium vocat, sic habitum nuptiarum non habentem ligatis manibus & pedibus extra sanctorum cœtum foras jactat. Paravit cælum, sed paravit & tartarum. Paravit refrigeria, sed paravit etiam æterna supplicia. Paravit inaccessibilem lucem, sed paravit etiam perpetuæ noctis vastam æternamque caliginem. Cujus temperamenti moderamen nos hic tenere quærentes diu, & quidem multi, & quidem cum quibusdam episcopis vicinis nobis & appropinquantibus, & quos ex aliis provinciis longe positis persecutionis istius ardor ejecerat, ante constitutionem episcopi nihil innovandum putavimus, sed lapsorum curam mediocriter temperandam esse credimus; ut interim dum episcopus dari a Deo nobis sustinetur, in suspenso eorum qui moras possunt dilationis sustinere, causa

teneat-

teneatur: eorum autem quorum vitæ suæ finem urgens exitus dilationem non potest ferre, acta pœnitentia & professâ frequenter suorum detestatione factorum, si lacrimis, si gemitibus, si fletibus dolentis ac vere pœnitentis animi signa prodiderint, cum spes vivendi secundum hominem nulla subsisterit, ita demum caute & sollicitè subveniri, Deo ipso sciente quid de talibus faciat, & qualiter iudicii sui examinet pondera, nobis tamen anxie curantibus, ut nec pro nam nostram improbi homines laudent facilitatem, nec vere pœnitentes accusent nostram quasi duram crudelitatem. Optamus te, beatissime ac gloriosissime Papa, in Domino semper bene valere, & nostri meminisse.

EPISTOLA XXXII.

Ad clerum Carthaginensem de missis Romam & acceptis inde litteris.

CYPRIANUS presbyteris & diaconibus fratribus salutem. Quales litteras ad clerum Romæ agentem fecerim, quidque illi mihi rescripserint, quid etiam Moyses & Maximus presbyteri, & Nicostriatus & Rufinus diaconi, & ceteri cum eis confessores in custodia constituti, æque ad litteras meas rescripserint, ut scire possetis, fratres carissimi, exempla vobis legenda transmissi. Vos curate quantum potestis pro diligentia vestra, ut scripta nostra, & illorum rescripta fratribus nostris innotescant. Sed & si qui de peregrinis episcopi collegæ mei, vel presbyteri, vel diacones præsentés fuerint, vel supervenerint, hæc omnia de vobis audiant. Et si exempla epistolarum transcribere, & ad suos perferre voluerint, facultatem transcriptionis accipiant. Quamvis & Saturo lectori fratri nostro mandaverim, ut singulis desideranti-

antibus describendi faciat potestatem, ut in ecclesiarum statu quoquo modo interim componendo servetur ab omnibus una & fida consensus. De ceteris vero quæ agenda erunt, sicut & collegis meis plurimis scripsi, plenius consilio communi tractabimus, quando convenire in unum permittente Domino cœperimus. Opto vos, fratres carissimi ac desiderantissimi, semper bene valere. Fraternitatem salutate. Valete.

E P I S T O L A XXXIII.

Ad clerum & plebem de Aurelio lectore ordinato.

CYPRIANUS presbyteris, & diaconibus, & plebi universæ salutem. In ordinationibus clericis, fratres carissimi, solemus vos ante consulere, & mores ac merita singulorum communi consilio ponderare. Sed expectanda non sunt testimonia humana, cum præcedunt divina suffragia. Aurelius frater noster, illustris adolescens, a Domino jam probatus & Deo carus, in annis adhuc novellus, sed in virtutis ac fidei laude profectus; minor in ætatis suæ indole, sed major in honore, gemino hic agone certavit, bis confessus, & bis confessionis suæ victoria gloriosus, & quando vicit in cursu factus extorris, & cum de novo certamine fortiore pugnavit, triumphator & victor in prælio passionis. Quoties adversarius provocare servos Dei voluit, toties promptissimus ac fortissimus miles & pugnavit & vicit. Parum fuerat sub oculis ante paucorum, quando extorris fiebat, congressum fuisse; meruit & in foro congregi clariore virtute, ut post magistratus etiam proconsulem vinceret, & post exilium tormenta superaret. Nec invenio, quid in eo prædicare plus debeam, gloriam vulnerum, an verecundiam morum, quod honore

S. Cypriani Tom. I. F virtu-

virtutis insignis est, an quod pudoris admiratione laudabilis? Ita & dignitate excelsus est, & humilitate submissus, ut appareat illum divinitus reservatum, qui ad ecclesiasticam disciplinam ceteris esset exemplo, quomodo servi Dei in confessione virtutibus vincerent, post confessionem moribus emerent. Merebatur talis clericæ ordinationis posteriores gradus & incrementa majora, non de annis suis, sed de meritis æstimandus. Sed interim placuit ut ab officio lectionis incipiat. Quia & nihil magis congruit voci, quæ Dominum gloriosa prædicatione confessa est, quam celebrandis divinis lectionibus personare, post verba sublimia quæ Christi martyrium prolocuta sunt, evangelium Christi legere, unde Martyres fiunt; ad pulpitem post catastam venire; illic fuisse conspicuum gentilium multitudini, hic a fratribus conspici; illic auditum esse cum miraculo circumstantis populi, hic cum gaudio fraternitatis audiri. Hunc igitur, fratres dilectissimi, a me & a collegis qui præsentibus aderant, ordinatum sciatis. Quod vos scio & libenter amplecti, & optare tales in ecclesia nostra quamplurimos ordinari. Et quoniam semper gaudium properat, nec potest moras ferre lætitia, dominico legit interim nobis, id est, auspicatus est pacem, dum dedicat lectionem. Vos orationibus frequenter insistite, & preces nostras vestris precibus adjuvate, ut Domini misericordia favens nobis, cito plebi suæ & sacerdotem reddat incolumem, & martyrem cum sacerdote lectorem. Opto vos, fratres carissimi, in Deo patre & Christo Jesu semper bene valere.

EPISTOLA XXXIV.

Ad clerum & plebem de Celerino lectore ordinato.

CYPRIANUS presbyteris, & diaconibus, & plebi universæ, fratribus in Domino salutem. Agnoscenda & amplectenda sunt, fratres dilectissimi, beneficia divina, quibus ecclesiam suam Dominus illustrare temporibus nostris & honestare dignatus est, commeatum dando bonis confessoribus suis & martyribus gloriosis, ut qui sublimiter Christum confessi essent, clerum postmodum Christi ministeriis ecclesiasticis adornarent. Exultate itaque & gaudete nobiscum lectis litteris nostris, quibus ego & collegæ mei, qui præsentibus aderant, referimus ad vos, Celerinum fratrem nostrum virtutibus pariter & moribus gloriosum clero nostro, non humana suffragatione, sed divina dignatione conjunctum. Qui cum consentire dubitaret ecclesiæ, ipsius admonitu & hortatu, in visione per noctem compulsus est ne negaret, nobis suadentibus. Cui plus licuit, & coegit; quia nec fas fuerat nec decebat sine honore ecclesiastico esse, quem sic Dominus honoravit cælestis gloriæ dignitate. Hic ad temporis nostri prælium primus, hic inter Christi milites antesignanus, hic inter persecutionis initia ferventia cum ipso infestationis principe & auctore congressus, dum inexpugnabili firmitate certaminis sui adversarium vincit, vincendi ceteris viam fecit, non brevi compendio vulnere victor, sed adhærentibus diu & permanentibus pœnis longæ colluctationis miraculo triumphator. Per decem & novem dies custodia carceris septus, in nervo ac ferro fuit. Sed posito in vinculis corpore, solutus ac liber spiritus mansit. Caro famis ac fitis diuturnitate contabuit; sed animam fide & virtute viventem nutrimentis spiritalibus Deus pavit. Jacuit inter pœ-

nas pœnis suis fortior, inclusus includentibus major, jacens stantibus celsior, vincientibus firmior victus, sublimior judicantibus judicatus; & quamvis ligati nervo pedes essent, calcatus serpens & obtritus & victus est. Lucent in corpore glorioso clara vulnorum signa, eminent & apparent in nervis hominis, ac membris longa tabe consumptis expressa vestigia. Sunt magna, sunt mira quæ de virtutibus ejus ac laudibus fraternitas audiat. Et si aliquis Thomæ similis exstiterit qui minus auribus credat, nec oculorum fides deest, ut quis quod audit, & videat. In servo Dei victoriam gloria vulnorum fecit, gloriam cicatricum memoria custodit. Nec rudis iste aut novus est in Celerino carissimo nostro titulus gloriarum. Per vestigia cognationis suæ graditur, parentibus ac propinquis suis honore consimili divinæ dignationis æquatur. Avia ejus Celerina jampridem martyrio coronata est. Item patruus ejus & avunculus Laurentius & Engnatius, in castris & ipsi quondam sæcularibus militantes, sed veri & spiritales Dei milites, dum diabolum Christi confessione prosternunt, palmas a Domino & coronas illustri passione meruerunt. Sacrificia pro eis semper, ut meministis, offerimus, quoties martyrum passiones & dies anniversaria commemoratione celebramus. Nec degener ergo esse nec minor poterat, quem sic domesticis exemplis virtutis ac fidei provocabat familiæ dignitas & generosa nobilitas. Quod si in familia sæculari prædicationis & laudis est, esse patricium, quanto majoris laudis & honoris est, fieri in cælesti prædicatione generosum? Non invenio quem beatiorem magis dicam, utrumne illos de posteritate tam clara, an hunc de origine gloriosa. Ita æqualiter apud eos recurrit & commeat divina dignatio, ut & illorum coronam dignitas sobolis illustret, & hujus gloriam sublimitas generis illuminet. Hunc ad nos, fratres dilectissimi, cum
tan-

tanta Domini dignatione venientem, testimonio & miraculo ejus ipsius qui se persecutus fuerat, illustrem, quid aliud quam super pulpitem, id est super tribunal ecclesiæ, oportebat imponi, ut loci altioris celsitate subnixus, & plebi universæ pro honoris sui claritate conspicuus, legat præcepta & evangelium Domini, quæ fortiter ac fideliter sequitur? Vox Domini confessi in his quotidie quæ Dominus locutus est, audiat. Viderit an sit ulterior gradus, ad quem profici in ecclesia possit. Nihil est in quo magis confessor fratribus profit, quam ut dum evangelica lectio de ore ejus auditur, lectoris fidem quisquis audierit, imitetur. Jungendus in lectione Aurelio fuerat, cum quo & divini honoris societate conjunctus est, cum quo omnibus virtutis & laudis insignibus copulatus est. Pares ambo, & uterque consimiles, in quantum gloria sublimes, in tantum verecundia humiles, quantum divina dignatione promoti, tantum sua quiete & tranquillitate summissi, & virtutum pariter & morum singulis exempla præbentes, & confessioni & paci congruentes, illic robore, hic pudore laudabiles. In talibus servis lætatur Dominus. In ejusmodi confessoribus gloriatur, quorum secta & conversatio sic proficit ad præconium gloriæ, ut magisterium ceteris præbeat disciplinæ. Ad hoc eos Christus esse hic in ecclesia diu voluit, ad hoc de media morte subtractos, quadam, ut ita dixerim, resurrectione circa eos facta, incolumes reservavit; ut dum nihil in honore sublimius, nihil in humilitate summissius a fratribus cernitur, hos eosdem fraternitatis secta comitetur. Hos tamen lectores interim constitutos sciatis, quia oportebat lucernam super candelabrum poni, unde omnibus luceat, & gloriosus vultus in loco altiore constitui, ubi ab omni fraternitate circumstante conspecti, incitamentum gloriæ videntibus præbeant. Ceterum presbyterii ho-

norem designasse nos illis jam sciatis, ut & sportuli iisdem cum presbyteris honorentur, & divisione menfurnas æquatis quantitatibus partiantur, sessur nobiscum provectis & corroboratis annis suis; quam vis in nullo minor possit videri ætatis indole, quæ consummavit ætatem gloriæ dignitate. Opto vos fratres carissimi & desiderantissimi, semper bene valere.

E P I S T O L A XXXV.

Ad eosdem de Numidico ordinato presbytero.

CYPRIANUS presbyteris, & diaconibus, & plebæ universæ, carissimis ac desiderantissimis fratribus salutem. Nuntiandum vobis fuit, fratres carissimi quod pertineat & ad communem lætitiā & ad ecclesiæ nostræ maximam gloriam. Nam admonitiones & instructos sciatis dignatione divina, ut Numidicus presbyter adscribatur presbyterorum Carthaginiensium numero, & nobiscum sedeat in clero, luculentissima confessionis illustris, & virtutis ac fidei honore sublimis; qui hortatu suo copiosum martyrum numerum lapidibus & flammis necatum ante se misit quique uxorem adhærentem lateri suo concrematam simul cum ceteris, conservatam magis dixerim, lætus aspexit. Ipse semiustulatus, & lapidibus obrutus & pro mortuo derelictus, dum postmodum filia sollicito pietatis obsequio cadaver patris inquit, semianimis inventus, & extractus, & refocillatus, comitibus quos ipse præmiserat, remansit invictus. Sed remanendi, ut videmus, hæc fuit causa, ut eum clero nostro Dominus adjungeret, & desolatam per lapsum quorundam presbyterorum nostrorum ecclesiam gloriosis sacerdotibus adornaret. Et promovetur quidem, cum Deus permiserit, ad ampliores locum

locum regionis suæ, quando in præsentiam protegente Domino venerimus. Interim quod ostenditur fiat, ut cum gratiarum actione suscipiamus hoc Dei munus, sperantes de misericordia Domini ejusmodi ornamenta complura, ut redintegrato ecclesiæ suæ robore, tam mites & humiles faciat in confessus nostri honore florere. Opto vos, fratres carissimi ac desiderantissimi, semper bene valere.

E P I S T O L A XXXVI.

Ad clerum de cura pauperum & peregrinorum.

CYPRIANUS presbyteris, & diaconibus fratribus carissimis salutem. Saluto vos, fratres carissimi, per Dei gratiam incolumis, optans cito ad vos venire, ut desiderio tam meo quam vestro & omnium fratrum satisfiat. Oportet nos tamen paci communi consulere, & interdum, quamvis cum tædio animi nostri, deesse vobis, ne præsentia nostra invidiam & violentiam gentilium provocet, & simus auctores rumpendæ pacis, qui magis quieti omnium consulere debemus. Quando ergo vos scripseritis rebus compositis me venire debere, aut si ante dignatus fuerit Dominus ostendere, tunc ad vos veniam. Ubi enim mihi aut melius possit esse aut lætius, quam illic, ubi me Deus & credere voluit & crescere? Viduarum, & infirmorum & omnium pauperum curam peto diligenter habeatis. Sed & peregrinis, si qui indigentes fuerint, sumptus suggeratis de quantitate mea propria, quam apud Rogatianum compresbyterum nostrum dimisi. Quæ quantitas ne forte jam universa erogata sit, nisi eidem per Naricum acolythum aliam portionem, ut largius & promptius circa laborantes fiat operatio. Opto vos, fratres carissimi, semper bene valere & nosci meminisse. Fraternitatem ve-

stram meo nomine salutate, & ut nostri memores sint admonete.

E P I S T O L A XXXVII.

Ad clerum, ut confessoribus in carcere constitutis omnis humanitas præbeatur.

CYPRIANUS presbyteris, & diaconibus fratribus salutem. Quamquam sciam vos, fratres carissimi, litteris meis frequenter admonitos esse, ut gloriosa voce Dominum confessis, & in carcere constitutis omnis diligentia præbeatur: tamen idemtidem vobis incumbo, ne quid ad curam desit iis, quibus ad gloriam nihil deest. Atque utinam loci & gradus mei conditio permetteret, ut ipse nunc præsens esse possem. Promptus & libens solemni ministerio cuncta circa fortissimos fratres nostros dilectionis obsequia complerem. Sed officium meum vestra quæso diligentia repræsentet, & faciat omnia quæ fieri oportet circa eos, quos in talibus meritis fidei ac virtutis suæ illustravit divina dignatio. Corporibus etiam omnium qui etsi torti non sunt in carcere, tamen glorioso exitu mortis excedunt, impertiatur & vigilantia & cura propensior. Neque enim virtus eorum aut honor minor est, quo minus ipsi quoque inter beatos martyres aggregentur. Quod in illis est, toleraverunt quidquid tolerare parati & prompti fuerunt. Qui se tormentis & morti sub oculis Dei obtulit, passus est quidquid pati voluit. Non enim ipse tormentis, sed tormenta ipsi defuerunt. *Qui in me confessus fuerit coram hominibus, & ego in illo confitebor coram patre meo qui in calis est, dicit Dominus.* Confessi sunt. *Qui toleraverit usque ad finem, hic salvus erit, dicit Dominus.* Toleraverunt, & ad finem usque incorrupta & immaculata virtutum suarum merita pertulerunt.

Et

Et iterum scriptum est: *Eſto fidelis uſque ad mortem, & dabo tibi coronam vitæ.* Uſque ad mortem fideles, & ſtabiles, & inexpugnabiles perſeueraverunt. Cum voluntati & confeſſioni nominis in carcere & in vinculis accedit & moriendi terminus, conſummata martyris gloria eſt. Denique & dies eorum quibus excedunt annotate, ut commemorationes eorum inter memorias martyrum celebrare poſſimus. Quamquam Tertullus fideliffimus & devotiſſimus frater noſter pro cetera ſollicitudine & cura ſua, quam fratribus in omni obſequio operationis impertit, qui nec illic circa curam corporum deeſt, ſcripſerit, & ſcribat ac ſignificet mihi dies, quibus in carcere beati fratres noſtri ad immortalitatem glorioſæ mortis exitu tranſeunt, & celebrentur hic a nobis oblationes & ſacrificia ob commemorationes eorum, quæ cito vobiſcum Domino protegente celebrabimus. Pauperibus quoque, ut ſæpe jam ſcripſi, cura ac diligentia veſtra non deſit, iis tamen qui in fide ſtantes, & nobiſcum fortiter militantes Chriſti caſtra non reliquerunt; quibus quidem nunc major a nobis & dilectio, & cura præſtanda eſt, quod nec paupertate adaſti, nec perſecutionis tempeſtate proſtrati, cum Domino fideliter ſerviunt, ceteris quoque pauperibus exemplum fidei præbuerunt. Opto vos, fratres cariſſimi ac deſiderantiſſimi, ſemper bene valere & noſtri meminiffe. Fraternitatem meo nomine ſalutate. Valete.

E P I S T O L A XXXVIII.

Ad Caldonium, Herculanium, & ceteros de abſtinendo Feliciſſimo.

CYPRIANUS Caldonio & Herculano collegis, item Rogatiano & Numidico compresbyteris ſalutem,

F 5

Vehe-

Vehementer contristatus sum, fratres carissimi, acceptis litteris vestris, ut cum mihi propositum semper & votum sit universam fraternitatem nostram incolumem continere, & illibatum gregem, secundum quod caritas exigit, reservare; nunc nuntietis Felicissimum multa improbe & insidiosè esse molitum; ut præter fraudes veteres & rapinas, de quibus jampridem multa cognoveram, nunc quoque cum episcopo portionem plebis dividere, id est, a pastore oves, & filios a parente separare, & Christi membra dissipare tentaverit. Cumque ego vos pro me vicarios miserim, ut expungeretis necessitates fratrum nostrorum sumptibus, si qui etiam vellent suas artes exercere, additamento quantum satis esset, desideria eorum juvaretis, simul etiam & ætates eorum, & conditiones, & merita discerneretis, ut etiam nunc ego, cui cura incumbit omnes optime nosse, & dignos quosque, & humiles, & mites ad ecclesiasticæ administrationis officia promoverem: ille intercesserit ne quis posset expungi, neve ea quæ desideraveram, possent diligenti examinatione discerni; comminatus sit etiam fratribus nostris qui primi expungi accesserant, potentatu improbo & terrore violento, quod secum in morte non communicarent qui nobis obtemperare voluissent. Cumque post hæc omnia, nec loci mei honore motus, nec vestra auctoritate & præsentia fractus, instinctu suo quietem fratrum turbans, propriuerit se cum plurimis, ducem se factionis & seditionis principem temerario furore contestans; in quo quidem gratulor plurimos fratres ab hac audacia recessisse, & vobis acquiescere maluisse; ut cum ecclesia matre remanerent, & stipendia ejus episcopo dispensante perciperent, quod quidem & ceteros pro certo scio cum pace facturos, & cito ab errore temerario recessuros. Interim cum Felicissimus comminatus sit, non communicaturos in morte secum,
qui

qui nobis obtemperassent, id est, qui nobis communicarent, accipiat sententiam quam prior dixit, ut abstentum se a nobis sciat; quando ad fraudes ejus & rapinas, quas dilucida veritate cognovimus, adulterii etiam crimen accedit, quod fratres nostri graves viri deprehendisse se nuntiaverunt, & probaturos se asseverarunt. Quæ omnia tunc cognoscemus, quando in unum cum collegis pluribus permittente Domino convenerimus. Sed & Augendus, qui nec episcopum, nec ecclesiam cogitans, pariter se cum illo conspiratione & factione sociavit, si ultra cum eo perseveraverit, sententiam ferat, quam ille in se factiosus & temerarius provocavit. Sed & quisquis se conspirationi & factioni ejus adjunxerit, sciat se in ecclesia nobiscum non esse communicaturum, qui sponte maluit ab ecclesia separari. Has litteras meas fratribus nostris legite, & Carthaginem ad clerum quoque transmittite, additis nominibus eorum, qui cum Felicissimo se junxerunt. Opto vos, fratres carissimi, semper bene valere & nostri meminisse. Valete.

E P I S T O L A XXXIX.

Caldonii, Herculani, & ceterorum epistola ad Cyprianum de abstento Felicissimo cum suis.

CALDONIUS cum Herculano & Victore collegis, item Rogatiano cum Numidico presbyteris. Abstinuimus a communicatione Felicissimum & Augendum, item Repostum de extorribus, & Irenem Rutilorum, & Paulam sarcinatricem, quod ex annotatione mea scire debuisti. Item abstinuimus Sophronium, & ipsum de extorribus, Soliaffum budinarium.

EPISTOLA XL.

*Ad plebem de quinque presbyteris schismaticis factionis
Felicissimi.*

CYPRIANUS plebi universæ salutem. Quamquam, fratres carissimi, Virtius fidelissimus atque integerrimus presbyter, item Rogatianus & Numidicus presbyteri, confessores, & gloria divinæ dignationis illustres, sed & diaconi boni viri & ecclesiasticæ administrationi per omnia obsequia devoti, cum ceteris ministris plenam vobis præsentiae suæ diligentiam præbeant, & exortationibus assiduis singulos corroborare, sed & lapsorum mentes consiliis salubribus regere & reformare non desinant: tamen ego quantum possum admoneo & quomodo possum visito vos litteris meis. Litteris, inquam, fratres carissimi. Hoc enim quorundam presbyterorum malignitas & perfidia perfecit, ne ad vos ante diem Paschæ venire licuisset, dum conjurationis suæ memores, & antiqua illa contra episcopatum meum, immo contra suffragium vestrum & Dei iudicium venena retinentes, instaurant veterem contra nos impugnationem suam, & sacrilegas machinationes insidiis solitis denuo renovant. Et quidem de Dei providentiâ, nobis hoc nec volentibus nec optantibus, immo & ignoscentibus & tacentibus, pœnas quas meruerant pependerunt, ut a nobis non ejecti ultro se ejicerent, ipsi in se pro conscientia sua sententiam darent, secundum vestra & divina suffragia conjurati & scelerati de ecclesia sponte se pellerent. Nunc apparuit, Felicissimi factio unde venisset, quibus radicibus & quibus viribus staret. Hi fomenta olim quibusdam confessoribus & hortamenta tribuebant, ne concordarent cum episcopo suo, ne ecclesiasticam disciplinam cum fide & quiete juxta præcepta dominica

nica continerent, ne confessionis suæ gloriam incorrupta & immaculata conversatione servarent. Ac ne parum fuisset corrupisse quorundam confessorum mentes, & contra sacerdotium Dei portionem ruptæ fraternitatis armare voluisse: nunc se ad lapsum perniciem venenata sua deceptione verterunt, ut ægros, & faucios, & ad capienda fortiora consilia per calamitatem ruinæ suæ minus idoneos, & minus solidos a medela vulneris sui avocent, & intermissis precibus & orationibus, quibus Dominus longa & continua satisfactione placandus est, ad exitiosam temeritatem mendacio captiosæ pacis invitent. Sed oro vos, fratres, vigilate contra insidias diaboli, & pro vestra salute solliciti, contra mortiferam fallaciam diligentius excubate. Persecutio est hæc alia & alia tentatio. Quinque isti presbyteri nihil aliud sunt quam quinque primores illi, qui edicto nuper magistratibus fuerant copulati, ut fidem nostram subruerent, ut gracilia fratrum corda ad letales laqueos prævaricatione veritatis averterent. Eadem nunc ratio, eadem rursus everfio per quinque presbyteros Felicissimo copulatos ad ruinam salutis inducitur, ut non rogetur Deus, nec qui negavit Christum, eundem Christum quem negaverat, deprecetur, post culpam criminis tollatur & pœnitentia, nec per episcopos & sacerdotes Domino satisfiat, sed relictis Domini sacerdotibus, contra evangelicam disciplinam nova traditio sacrilegæ institutionis exsurgat; cumque semel placuerit tam nobis quam confessoribus & clericis urbis, item universis episcopis vel in nostra provincia, vel trans mare constitutis, ut nihil innovetur circa lapsum causam, nisi omnes in unum convenimus, & collatis consiliis cum disciplina pariter & misericordia temperatam sententiam fixerimus; contra hoc consilium nostrum rebelletur, & omnis sacerdotalis auctoritas & potestas factiosis conspirationi-

tionibus destruat. Quas nunc pœnas patior, fratres carissimi, quod ipse ad vos in præsentiarum venire non possum, ipse singulos aggredi, ipse vos secundum Domini & evangelii ejus magisterium cohortari. Non suffecerat exsilium jam biennii, & a vultibus atque ab oculis vestris lugubris separatio, dolor jugis & gemitus, qui me solum sine vobis continua lamentatione discruciat, lacrimæ diebus ac noctibus profluentes, quod sacerdoti, quem tanto amore & ardore fecistis, necdum vos salutare, necdum complexibus vestris inhærere contingat. Accessit hic tabescenti animo nostro dolor major, quod in tanta sollicitudine ac necessitate excurrere ad vos ipse non possum, dum per minas & per insidias perfidorum cavemus, ne advenientibus nobis tumultus illic major oriatur, & cum paci & tranquillitati episcopus providere in omnibus debeat, ipse materiam seditioni dedisse, & persecutionem denuo exacerbasse videatur. Hinc tamen, fratres dilectissimi, hinc admoneo pariter & consulo, ne perniciosis vocibus temere credatis, ne fallacibus verbis consensum facile commodetis, ne pro luce tenebras, pro diæ noctem, pro cibo famem, pro potu sitim, venenum pro remedio, mortem pro salute sumatis. Ne ætas vos eorum nec auctoritas fallat, qui ad duorum presbyterorum veterem nequitiam respondentes, sicut illi Susannam pudicam corrumpere & violare conati sunt, sic & hi adulterinis doctrinis ecclesiæ pudicitiam corrumpere, & veritatem evangelicam violare conantur. Clamat & dicit Dominus: *Nolite audire sermones pseudoprophetarum, quoniam visiones cordis eorum frustrantur eos. Loquuntur, sed non ab ore Domini. Dicunt eis qui abjiciunt verbum Domini: Pax erit vobis. Pacem nunc offerunt, qui ipsi non habent pacem. In ecclesiam lapsos reducere & revocare promittunt, qui de ecclesia recesserunt. Deus unus est, & Christus*

stus unus, & una ecclesia, & cathedra una super
 petram Domini voce fundata. Aliud altare constitui,
 aut sacerdotium novum fieri præter unum altare,
 & unum sacerdotium non potest. Quisquis alibi col-
 legerit, spargit. Adulterum est, impium est, sacri-
 legum est quodcumque humano furore instituitur, ut
 dispositio divina violetur. Procul ab hujusmodi ho-
 minum contagione discedite, & sermones eorum ve-
 lut cancer & pestem fugiendo vitate, præmonente
 Domino & dicente: *Caci sunt ducēs cecorum. Cacus
 autem cacum ducens simul in foveam cadent.* Intercedunt
 precibus vestris, quas nobiscum diebus ac noctibus
 Deo funditis, ut eum iusta satisfactione placetis. In-
 tercedunt lacrimis vestris, quibus commissi delicti cri-
 men abluitis. Intercedunt paci, quam vere & fide-
 liter de Domini misericordia postulatis, nec sciunt
 scriptum esse: *Et propheta ille aut somnium somnians,
 ille qui locutus est, ut errare te faceret a Domina Deo
 tuo, interficietur.* Nemo vos, fratres carissimi, er-
 rare a Domini viis faciat. Nemo vos Christianos ab
 evangelio Christi rapiat. Nemo filios ecclesiæ de
 ecclesia tollat. Pereant sibi soli, qui perire volue-
 runt. Extra ecclesiam soli remaneant, qui de eccle-
 sia recesserunt. Soli cum episcopis non sint, qui
 contra episcopos rebellarunt. Conjuracionis suæ pœ-
 nas soli subeant, qui olim secundum vestra suffragia,
 nunc secundum Dei judicia, sententiam conjurationis
 & malignitatis suæ subire meruerunt. Monet nos
 Dominus in evangelio suo dicens: *Rejicitis mandatum
 Dei ut traditionem vestram statuatis.* Qui mandatum
 Dei rejiciunt, & traditionem suam statuere conantur,
 fortiter a vobis & firmiter respuantur. Sufficiat lap-
 sis ruina una. Nemo volentes surgere sua circum-
 ventione præcipitet. Nemo jacentes, pro quibus
 nos rogamus ut Dei manu & brachio sublevantur,
 prosternat gravius & deprimat. Nemo semianimes,
 &

& ut salutem suam pristinam recipiant deprecantes, ab omni spe salutis avertat. Nemo nutantibus lapsus fui caligine omne itineris salutaris lumen exstinguat. Instruit apostolus dicens: *Si quis aliter docet, & non acquiescit sanis verbis Domini nostri Jesu Christi & doctrinae ejus, stupore elatus, discede ab hujusmodi.* Et iterum dicit ipse: *Nemo vos decipiat inanibus verbis. Propterea enim venit ira Dei super filios contumaciae. Nolite ergo esse participes eorum.* Non est quod, decepti inanibus verbis, pravitatis eorum incipiatis esse participes. Discedite a talibus, quaeso vos, & acquiescite consiliis nostris, qui pro vobis quotidie continuas Domino preces fundimus, qui vos ad ecclesiam revocari per Domini clementiam cupimus, qui de Deo pacem plenissimam prius matri, tum & filiis ejus oramus. Cum precibus atque orationibus nostris vestras quoque orationes & preces jungite, cum fletibus nostris vestras lacrimas copulate. Vitae lupos, qui oves a pastore fecernunt. Vitae linguam diaboli venenatam, qui ab initio mundi fallax semper & mendax mentitur ut fallat, blanditur ut noceat, bona promittit ut malum tribuat, vitam pollicetur ut perimat. Lucent nunc quoque verba ejus, & venena manifesta sunt. Pacem pollicetur, ne perveniri possit ad pacem. Salutem promittit, ne qui deliquit, veniat ad salutem. Ecclesiam spondet, quando id agat, ut qui illi credit, in totum ab ecclesia pereat. Nunc est, fratres dilectissimi, ut & qui statis fortiter perseveretis, & stabilitatem vestram gloriosam, quam in persecutione tenuistis, perpetua firmitate servetis, & si qui circumveniente adversario lapsi estis, in secunda hac tentatione spei & paci vestrae fideliter consulatis, & ut vobis Dominus ignoscat, a sacerdotibus Domini non recedatis, cum scriptum sit: *Et homo quicumque fecerit in superbia, ut non exaudiat sacerdotem, aut judicem quicumque fuerit in diebus illis, morietur*

rietur homo ille. Persecutionis istius novissima hæc est, & extrema tentatio, quæ & ipsa cito Domino protegente transibit, ut repræsentet vobis post Paschæ diem cum collegis meis; quibus præsentibus, secundum arbitrium quoque vestrum, & omnium nostrum commune consilium, sicut semel placuit, ea quæ agenda sunt, disponere pariter & limare poterimus. Si quis autem pœnitentiam agere, & Deo satisfacere detrectans ad Felicissimi & satellitum ejus partes concesserit, & se hæreticæ factioni conjunxerit, sciat se postea ad ecclesiam redire, & cum episcopis & plebe Christi communicare non posse. Opto vos, fratres carissimi, semper bene valere, & circa Domini misericordiam exorandam continuis nobiscum precibus insistere.

E P I S T O L A XLI.

Ad Cornelium, quod ordinationem Novatiani non receperit.

CYPRIANUS Cornelio fratri salutem. Venerunt ad nos, frater carissime, missi a Novatiano Maximus presbyter & Augendus diaconus, & Machæus quidam, & Longinus. Sed enim cum ex litteris quas secum ferebant, & ex eorum sermone atque asseveratione Novatianum episcopum factum comperissemus, illicitæ & contra ecclesiam catholicam factæ ordinationis pravitate commoti, a communicatione eos nostra statim cohibendos esse censuimus, refutatis interim ac retusis, quæ obstinate ac pertinaciter asserere tentabant. Nam & ego & collegæ plurimi qui ad me convenerant, expectavimus adventum collegarum nostrorum Caldonii & Fortunati, quos ad te nuper & ad coepiscopos nostros, qui ordinationi tuæ affuerant legatos miseramus, ut eis adventantibus,

S. Cypriani Tom. I.

G

, &

& rei gestæ veritatem reportantibus, majore auctoritate & lucida per eos probatione partis adversæ improbitas frangeretur. Supervenerunt vero Pompejus & Stephanus collegæ nostri, qui & ipsi quoque ad instruendos istinc nos manifesta secundum gravitatem ac fidem suam indicia ac testimonia protulerunt, ut nec necesse fuerit audiri ultra eos, qui a Novatiano venerant missi. Qui cum in statione invidiosis quoque conviciis & clamoribus turbulentis protuerent, & flagitarent, ut crimina quæ se afferre ac probare dicebant, publice a nobis, & a plebe cognoscerentur, gravitati nostræ negavimus convenire, ut collegæ nostri jam delecti & ordinati, & laudabili multorum sententia comprobati ventilandam ultra famam ore maledico & æmulantium voce pateremur. Et quia quibus refutati & compressi sunt, & illicitis conatibus hæresim fecisse nudati sunt, in epistolam congerere longum fuit; ex Primitivo compresbytero nostro plenissime singula, quando ad vos venerit, audietis. Ac ne eorum furens audacia umquam desisteret, hic quoque in schismatis partes Christi membra distrahere, & catholicæ ecclesiæ corpus scindere ac laniare nituntur, ut ostiatim per multorum domos, vel oppidatim per quasdam civitates discurrentes, obstinationis suæ & erroris sui sibi quærant comites. Quibus semel responsum dedimus, nec mandare desistimus, ut perniciofa dissensione & concertatione deposita, impietatem esse sciant matrem deferere, agnoscant atque intelligant episcopo semel facto, collegarum ac plebis testimonio & judicio comprobato, alium constitui nullo modo posse; proinde pacifice sibi ac fideliter consulunt, si se assertores evangelii Christi esse confitentur, prius ad ecclesiam revertantur. Opto te, frater carissime, semper bene valere.

E P I S T O L A XLII.

Ad Cornelium de ordinatione ejus a se comprobata & de Felicissimo.

CYPRIANUS Cornelio fratri salutem. Quod servus Dei maxime sacerdotibus justis & pacificis congruebat, frater carissime, miseramus nuper collegas nostros Caldonium & Fortunatum, ut non tantum persuasione litterarum nostrarum, sed præsentia sua & consilio omnium vestrum eniterentur quantum possent, & elaborarent, ut ad catholicæ ecclesiæ unitatem scissi corporis membra componerent, & Christianæ caritatis vinculo copularent. Sed quoniam diversæ partis obstinata & inflexibilis pertinacia non tantum radicis & matris sinum atque complexum recusavit, sed etiam gliscente & in pejus recrudescente discordia episcopum sibi constituit, & contra sacramentum semel traditum divinæ dispositionis & catholicæ unitatis, adulterum & contrarium caput extra ecclesiam fecit, acceptis litteris tam tuis, quam collegarum nostrorum, item adventantibus bonis viris, & nobis carissimis collegis nostris Pompejo & Stephano, a quibus hæc omnia cum lætitia communi adserta sunt firmiter & probata, secundum quod divinæ traditionis & ecclesiasticæ institutionis sanctitas pariter ac veritas exigebat, litteras nostras ad te direximus. Sed & per provinciam nostram hæc eadem collegiis singulis in notitiam perferentes, ab his quoque fratres nostros cum litteris dirigendos esse mandavimus. Quamquam mens nostra & propositum jam tunc fratribus & plebi istic universæ manifestatum fuisset, quando litteris nuper ab utraque parte susceptis tuas litteras legimus, & episcopatus tui ordinationem singulorum auribus intimavimus. Honoris etiam communis memores, & gravitatis sacerdotalis ac sancti-

tatis respectum tenentes, ea quæ ex diverso in librum ad nos transmissum congesta fuerant acerbationibus criminosis, respuimus, considerantes pariter & ponderantes, quod in tanto fratrum numero religiosoque conventu, confidentibus Dei sacerdotibus, & altari posito, nec legi debeant nec audiri. Neque enim facile promenda sunt, & incaute ac temere publicanda, quæ discordioso stilo scripta audientibus scandalum moveant, & fratres longe positos ac trans mare constitutos incerta opinione confundant. Viderint qui vel furori suo vel libidini servientes, & divinæ legis ac sanctitatis immemores, vel jactitare interim gestiunt quæ probare non possunt, & cum innocentiam destruere atque expugnare non valeant, satis habent fama mendaci & falso rumore maculas inspergere. Certe, quod præpositis & sacerdotibus congruit, danda opera est ut talia, cum a quibusdam scribuntur, per nos respuantur. Ubi enim erit, quod discimus, ac docemus scriptum esse: *Contine linguam tuam a malo, & labia tua ne loquantur infidiose?* Item alibi: *Os tuum abundavit malitia, & lingua tua completebatur insidias. Sedens adversus fratrem tuum detrahebas, & adversus filium matris tuæ ponebas scandalum.* Item quod apostolus dicit: *Omnis sermo malus de ore vestro non procedat, sed bonus ad ædificationem fidei, ut det gratiam audientibus.* Porro hæc fieri debere ostendimus, si, quando talia quorundam calumniosa temeritate conscripta sunt, legi apud nos non patimur. Et iccirco, frater carissime, cum ad me talia de te & compresbyteris tecum confidentibus scripta venissent, quæ religiosam simplicitatem sonabant, nec ullis maledictorum & conviciorum latratibus perstrepebant, clero & plebi legi præcepi. Quod autem scripta collegarum nostrorum qui illic ordinationi tuæ affuerant desideravimus, non veteris moris oblit, novum aliquid quærebar, nam satis erat, ut tu

te

te episcopum factum litteris nuntiaries, nisi esset ex diverso discrepans factio, quæ criminosis & calumniosis commentis suis collegarum pariter ac fratrum plurimorum turbaret mentes, et corda confunderet. Cui rei sopiendæ necessarium duximus, ut scribentium nobis inde collegarum nostrorum firma et solida auctoritas pareretur: qui moribus ac vitæ et disciplinæ tuæ condigna litterarum suarum testimonia prædicantes, æmulis quoque et rerum vel novitate, vel pravitate gaudentibus, omnem ambigendi & discrepandi scrupulum sustulerunt, et secundum consilium nostrum sabubri ratione libratum in hoc fluctu æstuantium fratrum mentes sincere ac firmiter tuum sacerdotium probaverunt. Hoc enim vel maxime, frater, et laboramus, et laborare debemus, ut unitatem a Domino et per apostolos nobis successoribus traditam, quantum possumus, obtinere curemus, & quod in nobis est palabundas & errantes oves, quas quorundam pervicax factio & hæretica tentatio a matre secernit, in ecclesiam colligamus; illis solis foris remanentibus, qui in obstinatione sua vel furore superfederunt & ad nos redire noluerunt, discretionis & separationis a se factæ, & ecclesiæ derelictæ ipsi rationem Domino reddituri. Quantum vero hic ad presbyterorum quorundam, & Felicissimi causam pertinet, quid hic actum sit ut scire posses, litteras ad te collegæ nostri manu sua subscriptas miserunt, qui, auditis eis, quid senserint, & quid pronuntiaverint, ex eorum litteris disces. Melius autem, frater, faciès, si etiam exempla litterarum, quæ ad te legenda pro dilectione communi per Caldonium & Fortunatum collegas nostros proxime miseram, quæ de eodem Felicissimo & de presbyterio ejusdem ad clerum istic necnon & ad plebem scripseram, legi illic fratribus jubeas, quæ & ordinationem & rationem rei gestæ loquantur, ut tam istic quam illic circa omnia per nos fraternitas in-

struatur. Exemplaria autem eadem nunc quoque per Mettium hypodiaconum a me missum & Nicephorum acolythum transmissi. Opto te, frater carissime, semper bene valere.

E P I S T O L A XLIII.

Ad eundem, quod ad confessores a Novatiano seductos litteras fecerit.

CYPRIANUS Cornelio fratri salutem. Et religiosum nobis & necessarium existimavi, frater carissime, ad confessores qui illic sunt, & Novatiani ac Novati obstinatione & pravitate seducti de ecclesia recesserunt, litteras breves facere, quibus eos pro affectione mutua convenirem, ut ad matrem suam id est ecclesiam catholicam revertantur. Quas litteras tibi a Mettio hypodiacono legi prius mandavi, ne quis aliud me scripsisse fingeret, quam quod meis litteris continetur. Mandavi tamen eidem Mettio a me ad vos misso, ut de tuo arbitrio rem gerat, & si easdem litteras confessoribus putaveris esse reddendas, tunc eas tradat. Opto te, frater carissime, semper bene valere.

E P I S T O L A XLIV.

Ad confessores Romanos, ut ad unitatem redeant.

CYPRIANUS Maximo & Nicostrato, & ceteris confessoribus salutem. Cum frequenter, carissimi, cognoveritis ex litteris meis, quem & confessioni vestræ honorem, & fraternitati connexæ dilectionem meo sermone servaverim, credatis quæso & acquiescatis his litteris meis, quibus vobis & actui ac laudibus vestris & scribo, & simpliciter ac fideliter consulo.

consulo. Gravatus enim me atque contristatus, & intolerabilis percussus pectore prostratus pectoris molestia perfringit, cum vos illic comperissem contra ecclesiasticam dispositionem, contra evangelicam legem, contra institutionis catholicæ unitatem alium episcopum fieri consensisse, id est, quod nec fas est nec licet fieri, ecclesiam aliam constitui, Christi membra discerpi, dominici gregis animum & corpus unum discissa æmulatione lacerari. Quod quæso ut in vobis saltem illicitum istud fraternitatis nostræ discidium non perseveret, sed & confessionis vestræ & divinæ traditionis memores, ad matrem revertamini unde prodiiistis, unde ad confessionis gloriam cum ejusdem matris exultatione venistis. Nec putetis sic vos evangelium Christi asserere, dum vosmetipsos a Christi grege & ab ejus pace & concordia separatis, cum magis militibus gloriosis & bonis congruat intra domestica castra consistere, & intus positos ea quæ in commune tractanda sunt, agere ac providere. Nam cum unanimitas & concordia nostra scindi omnino non debeat, quia nos ecclesia derelicta foras exire, & ad vos venire non possumus, ut vos magis ad ecclesiam matrem & ad nostram fraternitatem revertamini, quibus possumus hortamentis petimus et rogamus. Opto vos, fratres carissimi, semper bene valere.

EPISTOLA XLV.

Ad Cornelium de Polycarpo Hadrumentino.

CYPRIANUS Cornelio fratri salutem. Legi litteras tuas, frater carissime, quas per Primitivum compresbyterum nostrum misisti, in quibus te comperi motum, quod cum de Hadrumentina colonia Polycarpi nomine ad te litteræ dirigerentur, posteaquam nos, ego & Liberalis in eundem locum venissemus,

cœpissent illuc ad presbyteros & diaconos litteræ d
 rigi. Quod scire te volumus & pro certo credere
 nulla id levitate aut contumeliâ factum. Sed cum st
 tuissemus collegæ complures, qui in unum conven
 ramus, ut legatis ad vos coepiscopis nostris Calde
 nio & Fortunato missis, omnia interim integra susper
 derentur, donec ad nos iidem collegæ nostri, rebu
 illic aut ad pacem redactis, aut pro veritate compen
 tis redirent, presbyteri & diaconi in Hadrumetin
 consistentes, Polycarpo coepiscopo nostro absente
 ignorabant quid nobis in commune placuisset. A
 ubi nos in præsentî venimus, comperto consilio no
 stro, ipsi quoque id quod & ceteri observare cœpe
 runt, ut in nullo ecclesiarum istic consistentium con
 sensio discreparet. Quidam tamen mentes nonnum
 quam & animos sermonibus suis turbant, dum alite
 quædam quam se habet veritas, nuntiant. Nos eni
 singulis navigantibus, ne cum scandalo ullo naviga
 rent, rationem reddentes, scimus nos hortatos eo
 esse, ut ecclesiæ catholicæ radicem & matricem ag
 noscerent ac tenerent. Sed quoniam latius fusa est
 nostra provincia, habet enim Numidiam & Maurita
 niam sibi cohærentes, ne in Urbe schisma factum ab
 sentium animos incerta opinione confunderet, pla
 cuit ut per episcopos, retenta a nobis rei veritate
 & ad comprobendam ordinationem tuam facta aucto
 ritate majore, tunc demum scrupulo omni de singu
 lorum pectoribus excusso, per omnes omnino in pro
 vincia ista positos litteræ fierent, sicuti fiunt, ut t
 universi collegæ nostri & communicationem tuam
 id est, catholicæ ecclesiæ unitatem pariter & carita
 tem probarent firmiter ac tenerent. Quod divinitu
 evenisse, & consilium nostrum providenter processis
 se gaudemus. Sic enim nunc episcopatus tui & veri
 tas pariter & dignitas apertissima luce & manifestis
 sima, & firmissima comprobatione fundata est, ut ex
 rescrip.

rescriptis collegarum nostrorum, qui ad nos litteras inde fecerunt, & ex relatione ac testimoniis coepiscoporum Pompeii, & Stephani, & Caldonii ac Fortunati ordinationis tuæ & origo necessaria, & ratio iusta, & gloriosa quoque innocentia ab omnibus nosceretur. Quod ut simul cum ceteris quoque collegis nostris stabiliter ac firmiter administremus, atque ut catholicæ ecclesiæ pacem concordiæ unanimitate teneamus, perficiet divina dignatio; ut Dominus, qui sacerdotes sibi in ecclesia sua eligere & constituere dignatur, electos quoque & constitutos sua voluntate atque opitulatione tueatur, gubernantes inspirans, ac subministrans & ad improborum contumaciam frenandam vigorem, & ad lapsorum fovendam pœnitentiam lenitatem. Opto te, frater carissime, semper bene valere.

E P I S T O L A XLVI.

Cornelii ad Cyprianum de confessoribus ad unitatem reversis.

CORNELIUS Cypriano fratri salutem. Quantam sollicitudinem & anxietatem sustinuimus de iis confessoribus, qui dolo, & malitia hominis callidi & veteratoris fuerant circumventi, & pæne decepti, & ab ecclesia alienati, tanta lætitia adfecti sumus, & Deo omnipotenti, & Christo Domino nostro gratias egimus cum ii, cognito suo errore, & intellecta hominis maligni, velut serpentis astutia venenata, ad ecclesiam unde exierant, sicuti ipsi ex suo corde profitentur, simplici voluntate venerunt. Et primo quidem fratres nostri probatæ fidei, amantes pacem, unitatem optantes, tumorem illorum, horum molliam nuntiabant, fide tamen non idonea, ut facile nobis credere daretur illos penitus esse mutatos. Po-

stea vero quam Urbanus & Sidonius confessores ad compresbyteros nostros venerunt, affirmantes Maximum confesorem, & presbyterum secum pariter cupere in ecclesiam redire, sed quoniam multa præcesserant ab eis designata, quæ tu quoque a coepiscopis nostris & ex litteris meis cognovisti, ut non temere eis fides haberetur, ex ipsorum ore, & confessione, ista quæ per legationem mandaverant, placuit audiri. Qui cum venissent, & a presbyteris quæ gesserant, exigerentur, novissime quod per omnes ecclesias litteræ calumniis & maledictis plenæ, eorum nomine frequenter misæ fuissent, & pæne omnes ecclesias perturbassent: circumventos se esse affirmaverunt; nec quid in istis litteris inesset se scisse, tantummodo circumductos commisisse se quoque schismatica, & hæreticis auctores fuisse, ut paterentur ei manus quasi in episcopatum imponi. Qui, cum hæc & cetera eis fuissent exprobrata, ut abolerentur & de memoria tollerentur, deprecati sunt. Omni igitur actu ad me perlato, placuit contrahi presbyterium. Adfuerunt etiam episcopi quinque, qui & hodie præsentés fuerunt, ut firmato consilio, quid circa personam eorum observari deberet, consensu omnium statueretur. Et ut motum omnium et consilium singulorum dignosceres, etiam sententias nostras placuit in notitiam vestram perferri; quas et subjectas leges. His ita gestis, in presbyterium venerunt Maximus, Urbanus, Sidonius, & Macharius, & plerique fratres qui se eis adjunxerant, summis precibus desiderantes; ut ea quæ ante fuerant gesta, in oblivionem caderent, nullaque eorum mentio haberetur, proinde atque si nihil esset vel commissum vel dictum, invicem omnibus remissis, cor mundum & purum jam Deo exhiberent, sequentes evangelicam vocem dicentem beatos esse puros corde, quoniam ipsi Deum vident. Quod erat consequens, omnis hic actus populo

nlo fuerat insinuandus, ut & ipsos viderent in ecclesia constitutos, quos errantes & palabundos tamdiu viderant & dolebant. Quorum voluntate cognita, magnus fraternitatis concursus factus est. Una vox erat omnium gratias Deo agentium, gaudium pectoris lacrimis exprimentes, complectentes eos, quasi odie pœna carceris fuissent liberati. Et ut ipsorum propria verba designem: Nos, inquit, Cornelium piscopum sanctissimæ cathollicæ Ecclesiæ, electum a Deo omnipotente & Christo Domino nostro scimus. Nos errorem nostrum confitemur. Imposturam passi sumus. Circumventi sumus perfidiæ loquacitate captiosa. Nam etsi videbamur quasi quamdam communicationem cum schismatico & hæretico homine habuisse: sincera tamen mens nostra semper in ecclesia fuit. Nec enim ignoramus unum Deum esse, & unum Christum esse Dominum, quem confessi sumus, unum spiritum sanctum, unum episcopum in catholica ecclesia esse debere. Quis ista eorum professione non moveretur, ut quod apud potestatem sæculi erant confessi, in ecclesia constituti comprobarent? Quapropter Maximum presbyterum locum suum agnoscere iussimus. Ceteros cum ingenti populi suffragio recepimus. Omnia autem remisimus Deo omnipotenti, in cuius potestate sunt omnia reservata. Hæc igitur, frater carissime, eadem hora, eodem momento ad te per scripta transmisi, & Nicephorum acolythum descendere ad navigandum destinantem, ad vos statim dimisi, ut nulla procrastinatione habitata velut præsens in isto clero, & in isto populi cœtu Deo omnipotenti & Christo Domino nostro gratias ageres. Credimus autem fore, quinimmo pro certo jam confidimus, ceteros quoque qui in hoc errore sunt constituti, in ecclesiam brevi reversuros, cum auctores suos viderint nobiscum agere. Has litteras puto te debere, frater carissime, & ad ceteras ecclesias

mitte

mittere, ut omnes sciant schismatici hujus & hæretici dolum & prævaricationem de die in diem evacuari. Bene vale, frater carissime.

EPISTOLA XLVII.

Cypriani ad Cornelium, responsum congratulatorium de illorum reditu ex schismate.

CYPRIANUS Cornelio fratri salutem. Et egisse nos & agere, frater carissime, maximas gratias sine cessatione profitemur Deo patri omnipotenti, & Christo ejus Domino & Deo nostro salvatori, quod sic ecclesia divinitus protegatur, ut unitas ejus & sanctitas non jugiter nec in totum perfidiæ & hæreticæ pravitatis obstinatione vitietur. Legimus enim litteras vestras, & voti communis amplissimum gaudium exultanter excepimus, Maximum presbyterum & Urbanum confessores cum Sidonio & Machario ad ecclesiam catholicam regressos esse, id est, errore deposito, & schismatico, immo hæretico furore deserto, unitatis ac veritatis domicilium fideli sanitate repetiisse; ut unde ad gloriam processerant, illuc gloriosi redirent; ne qui Christum confessi essent, Christi postmodum castra desererent, nec tentarent caritatis atque unitatis fidem, qui victi robore & virtute non fuerant. Ecce incolumis & immaculata laudis integritas, ecce incorrupta & solida confitentium dignitas, a desertoribus & profugis recessisse, proditores fidei & ecclesiæ catholicæ impugnatores reliquisse. Merito illos revertentes summo, ut scribitis, gaudio & clerus & plebs, & fraternitas omnis excepit, quoniam in confessoribus gloriam suam conservantibus, & ad unitatem revertentibus nemo non socium se & participem eorum gloriæ computat. Hujus rei lætitiā de nostris possumus sensibus æstimare:
nam

am cum istic ad litteras vestras, quas de eorum confessione misistis, lætatus sit omnis fratrum numerus, & summa alacritate hunc nuntium communis gratulationis exceperit; quid illic ubi res ipsa & præsens lætitia sub oculis omnium gerebatur? Cum enim Dominus in evangelio suo dicat esse summum gaudium in cælo super uno peccatore pœnitentiam agente, quanto majus est gaudium & in terris pariter & in cælo, super confessoribus ad ecclesiam Dei cum gloria sua & cum laude redeuntibus, & redeundi viam ceteris exempli sui fide & probatione facientibus? Hic enim quosdam fratres nostros error induxerat, quod sibi communicationem confessorum sequi viderentur. Quo errore sublato, lux omnium pectoribus infusa est, & ecclesia catholica una esse, nec scindi nec dividi posse monstrata est. Nec quisquam jam facile poterit schismatici furentis verbis loquacibus decipi, quando probatum sit bonos & gloriosos Christi milites non potuisse diu aliena fallacia & perfidia extra ecclesiam detineri. Opto te, frater carissime, semper bene valere.

E P I S T O L A XLVIII.

Cornelii ad Cyprianum de factione Novatiani cum suis.

CORNELIUS Cypriano fratri salutem. Ne quid minus ad pœnam futuram hujus scelerati hominis deesset, prostratus virtutibus Dei, cum Maximus & Longinus & Machæus inde fuissent expulsi, denuo surrexit; & sicut prioribus litteris tibi quas per Augendum confessorem misi, significavi, puto Nicostratum, & Novatum, & Evaristum, & Primum, & Dionysium illo jam pervenisse. Invigiletur ergo ut omnibus coepiscopis nostris & fratribus innotescat. Nicostratum multorum criminum reum, & non solum patronæ

patronæ suæ carnali, cujus rationes gessit, fraudes & rapinas fecisse, verum etiam, quod est illi ad perpetuam pœnam reservatum, ecclesiæ deposita non modica abstulisse; Evaristum vero auctorem schismatis fuisse, & successorem plebi cui ante præfuerat, Zetum in locum ejus episcopum esse constitutum. Majora vero & graviora hic designavit malitia & inexplabili pravitate sua, quam quæ illic apud suos semper exercuit, ut scias quales duces & protectores iste schismaticus & hæreticus lateri suo semper junctos habeat. Opto te, frater carissime, semper bene valere.

E P I S T O L A XLIX.

Cypriani responsum ad Cornelium de Novati sceleribus.

CYPRIANUS Cornelio fratri salutem. Et cum diligentia & cum dilectione fecisti, frater carissime, festinato ad nos mittendo Nicephorum acolythum, qui nobis & de confessoribus regressis gloriosam lætitiā nuntiaret, & adversus Novatiani & Novati novas & perniciosas ad impugnandam Christi ecclesiam machinas plenissime instrueret. Nam cum pridie istic venisset hæreticæ pravitatis nocens factio ipsa jam perdita, & alios qui sibi consenserint perditura, postero die Nicephorus cum vestris litteris supervenit; quibus & didicimus, & docere atque instruere ceteros cœpimus, Evaristum de episcopo jam nec laicum remansisse, cathedræ & plebis extorrem, & de ecclesia Christi exsulem, per alias longe provincias oberrare, & ipsum veritatis ac fidei naufragum factum, circa quosdam sui similes paria naufragia concitare, Nicostratum vero diaconio sanctæ administrationis amisso, ecclesiasticis pecuniis sacrilega fraude subtractis, & viduarum ac pupillorum depositis denegatis, non tam in Africam venire voluisse, quam

quam conscientia rapinarum & criminum nefandorum illic ab Urbe fugisse. Et nunc Ecclesiæ desertor ac profugus, quasi mutasse sit hominem mutare regionem, confessorem se ultra jactat & prædicat, cum Christi confessor nec dici, nec esse jam possit, qui ecclesiam Christi negavit. Nam cum Paulus apostolus dicat: *Propter hoc relinquet homo patrem & matrem, & adhærebit uxori suæ, & erunt duo in unam carnem. Sacramentum istud magnum est, ego autem dico in Christum & in ecclesiam.* Cum hoc, inquam, beatus apostolus dicat, & Christi pariter atque ecclesiæ unitatem individuis nexibus cohærentem sancta sua voce testetur, quomodo potest esse cum Christo, qui cum sponsa Christi atque in ejus ecclesia non est? Aut quomodo assumit sibi regendæ aut gubernandæ ecclesiæ curam, qui spoliavit & fraudavit ecclesiam Christi? Nam de Novato nihil inde ad nos fuerat nuntiandum, cum magis per nos vobis debeat Novatus ostendi, rerum novarum semper cupidus, avaritiæ inexplibilis rapacitate furibundus, arrogantia & stupore superbi tumoris inflatus, semper istic episcopis male cognitus, quasi hæreticus semper & perfidus omnium sacerdotum voce damnatus, curiosus semper ut prodatur, ad hoc adulatur ut fallat, numquam fidelis ut diligat, fax & ignis ad conflanda seditionis incendia, turbo & tempestas ad fidei facienda naufragia, hostis quietis, tranquillitatis adversarius, pacis inimicus. Denique Novato illic a vobis recedente, id est, procella & turbine recedente, ex parte illic quies facta est, & gloriosi ac boni confessores, qui de ecclesia illo incitante discesserant, posteaquam ab Urbe ille discessit, ad ecclesiam reverterunt. Idem est Novatus, qui apud nos primum discordiæ & schismatis incendium seminauit, qui quosdam istic ex fratribus ab episcopo segregavit, qui in ipsa persecutione ad evertendas fratrum mentes alia quædam persecutio nostris fuit. Ipse est

est qui Felicissimum satellitem suum diaconum, nec permittente me nec sciente, sua factione & ambitione constituit, & cum sua tempestate Romam quoque ad evertendam ecclesiam navigans, similia illic & paria moliens est, a clero portionem plebis avellens, fraternitatis bene sibi cohærentis & se invicem diligentis concordiam scindens. Plane quoniam pro magnitudine sua debeat Carthaginem Roma præcedere, illic majora & graviora commisit. Qui istic adversus ecclesiam diaconum fecerat, illic episcopum fecit. Nec hoc quispiam miretur in talibus. Feruntur semper mali suo furore dementes, & posteaquam scelera fecerint, conscientia ipsa sceleratæ mentis agitantur. Nec remanere in ecclesia Dei possunt, qui deificam & ecclesiasticam disciplinam nec actus sui conversatione, nec morum pace tenuerunt. Spoliati ab illo pupilli, fraudatæ viduæ, pecuniæ quoque ecclesiæ denegatæ has de illo exigunt pœnas, quas in ejus furore conspiciamus. Pater etiam ejus in vico fame mortuus, & ab eo in morte postmodum nec sepultus. Uterus uxoris calce percussus, & abortione properante in parricidium partus expressus. Et damnare nunc audet sacrificantium manus, cum sit ipse nocentior pedibus, quibus filius, qui nascebatur, occisus est. Hanc conscientiam criminum jam pridem timebat. Propter hoc se non de presbyterio excitari tantum, sed & communicatione prohiberi pro certo tenebat; & urgentibus fratribus imminabat cognitionis dies, quo apud nos causa ejus ageretur, nisi persecutio ante venisset, quam iste voto quodam evadendæ & lucrandæ damnationis excipiens, hæc omnia commisit & miscuit; ut qui ejici de ecclesia & excludi habebat, judicium sacerdotum voluntaria discessione præcederet, quasi evasisse sit pœnam, prævenisse sententiam. Circa ceteros autem fratres elaboramus, quos ab eo circumventos dolemus, ut vetera.

teratoris perniciosum latus fugiant, ut letales laqueos sollicitantis evadant, ut de qua ille pelli divinitus meruit, ecclesiam repetant; quos quidem, Domino adjuvante, per ejus misericordiam regredi posse confidimus: neque enim potest perire nisi quem constat esse periturum, cum Dominus in evangelio suo dicat: *Omnis plantatio quam non plantavit pater meus celestis, eradicabitur.* Qui plantatus non est in præceptis Dei patris & monitis, solus poterit de ecclesia ille discedere, solus episcopis derelictis, cum schismaticis & hæreticis in furore remanere. Ceteros vero nobiscum adunabit Dei patris misericordia, & Christi Domini nostri indulgentia, & nostra patientia. Opto te, frater carissime, semper bene valere.

E P I S T O L A L.

Maximi & ceterorum confessorum ad Cyprianum de suo reditu ex schismate.

CYPRIANO fratri Maximus, Urbanus, Sidonius, & Macharius salutem. Certi sumus, frater carissime, te quoque nobiscum pari voto congaudere, nos habito consilio, utilitatibus ecclesiæ & paci magis consulentes, omnibus rebus prætermiſſis & iudicio Dei servatis, cum Cornelio episcopo nostro pariter & cum universo clero pacem fecisse. Cum gaudio etiam universæ ecclesiæ, prona etiam omnium caritate, hoc factum his litteris nostris scire certissime debuisti. Oramus te, frater carissime, multis annis bene valere.

EPISTOLA LI.

*Cypriani ad confessores de reditu ex schismate
congratulatoria.*

CYPRIANUS Maximo presbytero, item Urbano, & Sidonio, & Machario fratribus salutem. Lectis litteris vestris, fratres carissimi, quas ad me de vestra regressione, & de ecclesiastica pace, ac fraterna redintegratione fecistis, in tantum me lætatum esse confiteor, in quantum fueram & ante lætatus; quando confessionis vestræ gloriam comperi, & militiæ vestræ cælestem ac spiritalem laudem gratulabundus excepi. Nam & hæc fidei & laudis vestræ alia confessio est, unam esse ecclesiam confiteri, nec alieni erroris, vel potius pravitatis participem fieri, repetere eadem castra unde prodistis, unde ad gerendum prælium & adversarium subigendum fortissimis viribus profulistis. Illuc enim erant de acie tropæa referenda, unde ad aciem fuerant arma suscepta; ne quos ad gloriam Christus parasset, eosdem gloriosos Christi ecclesia non haberet. Nunc vero & vos congruentem fidei vestræ tenorem, atque individuae caritatis & concordiae legem dominica pace tenuistis, & exemplum ceteris dilectionis & pacis vestro itinere fecistis, ut ecclesiæ veritas & evangelici sacramenti unitas quæ a nobis tenebatur, vestro etiam consensu ac vinculo neceretur, nec confessores Christi erroris duces fierent, qui virtutis & honoris auctores laudabiles existissent. Viderint quantum vobis ceteri gratulentur, vel quantum apud se ipsos singuli gloriantur. Ego me & gratulari magis vobis, & plus ceteris gloriar in hac vestra pacifica regressione & caritate confiteor. Simpliciter enim quid in meo corde fuerit, debetis audire. Dolebam vehementer, & graviter angebar, quod eis communicare non possem quos semel dili-

gere

gere cœpisssem. Posteaquam vos de carcere prodeuntes schismaticus & hæreticus error excepit, sic res erat, quasi vestra gloria in carcere remansisset. Illic enim resedisse vestri nominis dignitas videbatur, quando milites Christi non ad ecclesiam de carcere redirent, in quem prius cum ecclesiæ laude & gratulatione venissent. Nam etsi videntur in ecclesia esse zizania, non tamen impediri debet aut fides aut caritas nostra, ut quoniam zizania esse in ecclesia cernimus, ipsi de ecclesia recedamus. Nobis tantummodo laborandum est, ut frumentum esse possimus, ut cum cœperit frumentum dominicis horreis condi, fructum pro opere nostro & labore capiamus. Apostolus in epistola sua dicit: *In domo autem magna non solum vasa sunt aurea & argentea, sed & lignea & fictilia, & quædam quidem honorata, quædam vero inhonorata.* Nos operam demus, fratres carissimi, & quantum possumus laboremus, ut vasa aurea vel argentea simus. Ceterum fictilia vasa confringere Domino soli concessum est, cui & virga ferrea data est. Esse non potest major domino suo servus. Nec quisquam sibi quod soli filio pater tribuit, vindicare potest, ut putet aut ad aream ventilandam & purgandam palam ferre posse, aut a frumento universa zizania humano iudicio separare. Superba est ista obstinatio & sacrilega præsumptio, quam sibi furor pravus assumit. Et dum dominium sibi semper quidam plusquam mitis iustitia deposcit, assumunt, de ecclesia pereunt; & dum se insolenter extollunt, ipso suo tumore cæcati veritatis lumen amittunt. Propter quod & nos temperamentum tenentes, & libram Domini contemplant, & Dei patris pietatem ac misericordiam cogitantes, diu multumque tractatu inter nos habito iusta moderatione quæ sunt agenda, libravimus. Quæ omnia penitus potestis inspicere lectis libellis, quos hic nuper legeram, & ad vos quoque legendos pro

communi dilectione transmiseram; ubi lapsis nec censura deest quæ increpet, nec medicina quæ sanet. Sed & catholicæ ecclesiæ unitatem quantum potuit, expressit nostra mediocritas. Quem libellum magis ac magis nunc vobis placere confido, quando eum jam sic legitis, ut & probetis & ametis. Siquidem quod nos verbis conscripsimus, vos factis impletis, quando ad ecclesiam caritatis ac pacis unitate remeatis. Opto vos, fratres carissimi ac desiderantissimi, semper bene valere.

EPISTOLA LII.

Ad Antonianum de Cornelio & Novatiano.

CYPRIANUS Antoniano fratri salutem. Accepi primas litteras tuas, frater carissime, concordiam collegii sacerdotalis firmiter obtinentes, & catholicæ ecclesiæ cohærentes, quibus significasti cum Novatiano te non communicare, sed sequi consilium nostrum, & cum Cornelio coepiscopo nostro unum tenere consensum. Scripsisti etiam ut exemplum earumdem litterarum ad Cornelium collegam nostrum transmitterem, ut deposita omni sollicitudine jam sciret, te secum, hoc est, cum catholica ecclesia, communicare. Sed enim supervenerunt postmodum aliæ litteræ tuæ per Quintum compresbyterum missæ, in quibus animadverti animum tuum Novatiani litteris motum nutare cœpisse. Nam cum & consilium & consensum tuum firmiter ante fixisses, desiderasti in his litteris, ut rescriberem tibi, quam hæresim Novatianus introduxisset, vel Cornelius qua ratione Trophimo & turificatis communicet. Quod quidem si pro sollicitudine fidei anxie curas, & rei dubiæ veritatem sollicitus exploras; reprehendenda non est in timore divino æstuantis animi sollicitudo suspensa.

Quo-

Quoniam tamen video, post primam sententiam epistolæ tuæ, Novatiani litteris postmodum te esse commotum, illud, frater carissime, primo in loco pono, graves viros, & semel super petram solida stabilitate fundatos, non dico aura levi, sed nec vento aut turbine commoveri, ne animus dubius & incertus variis opinionibus, velut quibusdam ventorum incursantium flatibus, frequenter agitetur, & a proposito suo cum quadam levitatis reprehensione mutetur. Quod ne vel apud te, vel apud quemquam Novatiani litteræ faciant, ut desiderasti, frater carissime, rationem rei tibi breviter exponam. Et quidem primum, quoniam de meo quoque actu motus videris, mea apud te & persona, & causa purganda est, ne me aliquis existimet a proposito meo leviter recessisse; & cum evangelicum vigorem primo & inter initia defenderim, postmodum videar animum meum a disciplina & censura priore flexisse, ut his qui libellis conscientiam suam maculaverint, vel nefanda sacrificia commiserint, laxandam pacem putaverim. Quod utrumque non sine librata diu & ponderata ratione a me factum est. Nam cum acies adhuc inter manus esset, & praelium gloriosi certaminis in persecutione ferveret, toto hortatu & pleno impetu militum vires fuerant excitandæ, & maxime lapsorum mentes classico quodam nostræ vocis fortiter animandæ; ut pœnitentiæ viam non solum precibus & lamentationibus sequerentur, sed quoniam repetendi certaminis & reparandæ salutis dabatur occasio, ad confessionis potius ardorem, & martyrii gloriam nostris increpiti vocibus provocarentur. Denique cum de quibusdam ad me presbyteri & diaconi scripsissent, eos immoderatos esse, & ad communicationem accipiendam festinanter urgere, rescribens eis in epistola mea, quæ exstat, & hoc addidi; *Qui si nimium properant, habent in sua potestate quod postulant, tempore ipso*

*sibi plus quam quod postulant, largiente. Acies adhuc geritur, & agon quotidie celebratur. Si commissi vere & firmiter pœnitent, & fidei calor pravalet, qui differri non potest, potest coronari. De eo tamen quod statuendum esset circa causam lapsorum, distuli; ut cum quies & tranquillitas data esset, & episcopis in unum convenire indulgentia divina permetteret, tunc communicato & librato de omnium collatione consilio statueremus, quid fieri oporteret; si quis vero ante consilium nostrum, & ante sententiam de omnium consilio statutam lapsis temere communicare voluisset, ipse a communicatione abstineretur. Quod etiam Romanam ad clerum tunc adhuc sine episcopo agentem, & ad confessorem Maximum presbyterum, & ceteros in custodia constitutos, nunc in ecclesia cum Cornelio junctos, plenissime scripsi, quod me scripssisse de eorum rescriptis poteris noscere. Nam in epistola sua ita posuerunt: *Quamquam nobis in tam ingenti negotio placeat, quod & tu ipse tractasti, prius esse ecclesiæ pacem sustinendam, deinde sic collatione consiliorum cum episcopis, presbyteris, diaconibus, confessoribus pariter ac stantibus laicis facta, lapsorum tractare rationem.* Additum est etiam Novatiano tunc scribente, & quod scripserat sua voce recitante, & presbytero Moyse, tunc adhuc confessore, nunc jam martyre, subscribente, ut lapsis infirmis, & in exitu constitutis pax daretur. Quæ litteræ per totum mundum missæ sunt, & in notitiam ecclesiis omnibus & universis fratribus perlatae sunt. Secundum quod tamen ante fuerat destinatum, persecutione sopita, cum data esset facultas in unum conveniendi, copiosus episcoporum numerus, quos integros & incolumes fides sua & Domini tutela protexit, in unum convenimus, & scripturis divinis ex utraque parte prolatis, temperamentum salubri moderatione libravimus, ut nec in totum spes communicationis & pacis lapsis denegaretur, ne plus desperatione*

tione deficerent, & eo quod sibi ecclesia clauderetur, secuti sæculum gentiliter viverent; nec tamen rursus censura evangelica solveretur, ut ad communicationem temere proflirent; sed traheretur diu poenitentia, & rogaretur dolenter paterna clementia, & examinarentur causæ, & voluntates, & necessitates singulorum, secundum quod libello continetur, quem ad te pervenisse confido, ubi singula placitorum capita conscripta sunt. Ac si minus sufficiens episcoporum in Africa numerus videbitur, etiam Romam super hac re scripsimus ad Cornelium collegam nostrum; qui & ipse cum plurimis coepiscopis habito concilio, in eandem nobiscum sententiam pari gravitate & salubri moderatione consensit. De quo tibi necesse nunc fuit scribere, ut scias me nihil leviter egisse, sed secundum quod litteris meis fueram ante complexus, omnia ad commune concilii nostri consilium distulisse, & nemini quidem ex lapsis prius communicasse, quando adhuc erat, unde non tantum indulgentiam, sed & coronam lapsus acciperet: postea tamen, sicut collegii concordia, & colligendæ fraternitatis ac medendi vulneris utilitas exigebat, necessitati temporum succubuisse, & salutem multorum providendum putasse, & nunc ab his non recedere, quæ semel in concilio nostro de communi collatione placuerunt, quamvis multa multorum vocibus ventilentur, & mendacia adversus sacerdotes Dei de diaboli ore prolata, ad rumpendam catholicæ unitatis concordiam ubique jactentur. Sed te oportet ut bonum fratrem atque unanimem confacerdotem, non quid maligni atque apostatæ dicant facile suscipere, sed quid collegæ tui modesti & graves viri faciant, de vitæ & disciplinæ nostræ exploratione perpendere. Venio jam nunc, frater carissime, ad personam Cornelii collegæ nostri, ut Cornelium nobiscum verius noveris, non de malignorum & detrahentium menda-

cio, sed de Domini Dei judicio, qui eum episcopum fecit, & coepiscoporum testimonio, quorum numerus universus per totum mundum concordī unanimi-
tate consensit. Nam quod Cornelium carissimum nostrum Deo, & Christo & ecclesiæ ejus, item confacer-
dotibus cunctis laudabili prædicatione commendat; non iste ad episcopatum subito pervenit, sed per omnia
ecclesiastica officia promotus, & in divinis admini-
strationibus Dominum sæpe promeritus, ad sacerdo-
tii sublimis fastigium cunctis religionis gradibus ascen-
dit. Tum deinde episcopatum ipsum nec postulavit,
nec voluit; nec ut ceteri, quos arrogantiae & super-
biæ suæ tumor inflat, invasit; sed quietus alias & mo-
destus, & quales esse consueverunt, qui ad hunc lo-
cum divinitus eliguntur, pro pudore virginalis con-
tinentiæ suæ, & pro humilitate ingentis sibi & custo-
ditæ verecundiæ, non ut quidam vim fecit ut episco-
pus fieret, sed ipse vim passus est, ut episcopatum
coactus exciperet. Et factus est episcopus a plurimis
collegis nostris, qui tunc in urbe Roma aderant, qui
ad nos litteras honorificas & laudabiles, & testimo-
nio suæ prædicationis illustres de ejus ordinatione mi-
serunt. Factus est autem Cornelius episcopus de Dei
& Christi ejus judicio, de clericorum pæne omnium
testimonio, de plebis quæ tunc affuit, suffragio, & de
sacerdotum antiquorum & bonorum virorum colle-
gio, cum nemo ante se factus esset, cum Fabiani
locus, id est, cum locus Petri & gradus cathedræ
sacerdotalis vacaret; quo occupato de Dei volun-
tate, atque omnium nostrum consensione firmato,
quisquis jam episcopus fieri voluerit, foris fiat ne-
cesse est, nec habeat ecclesiasticam ordinationem,
qui ecclesiæ non tenet unitatem. Quisquis ille fue-
rit, multum de se licet jactans, & sibi plurimum vindi-
cans, prophanus est, alienus est, foris est. Et cum post
primum secundus esse non possit, quisquis post unum,
qui

qui solus esse debeat, factus est, non jam secundus ille, sed nullus est. Tum deinde post episcopatum non exambitum nec extortum, sed de Dei, qui sacerdos facit, voluntate susceptum, quanta in ipso suscepto episcopatu suo virtus, quantum robur animi, qualis firmitas fidei? (quod nos simplici corde & perspicere penitus, & laudare debemus) sedisse intrepidum Romæ in sacerdotali cathedra eo tempore, cum tyrannus infestus sacerdotibus Dei fanda atque infanda comminaretur, cum multo patientius & tolerabilius audiret levare adversus se æmulum principem, quam constitui Romæ Dei sacerdotem. Nonne hic, frater carissime, summo virtutis & fidei testimonio prædicandus est, nonne inter gloriosos confessores & martyres deputandus, qui tantum temporis sedit expectans corpori sui carnifices, & tyranni ferocientis ultores, qui Cornelium adversus edicta feralia resistentem, & minas & cruciatus & tormenta fidei vigore calcantem vel gladio invaderent, vel crucifigerent, vel igne torrerent, vel quolibet inaudito genere pœnarum viscera ejus & membra laniarent? Etiam si majestas Domini protegentis & bonitas sacerdotem quem fieri voluit, factum quoque protexit; tamen Cornelius, quantum ad ejus devotionem pertinet & timorem, passus est quidquid pati potuit, & tyrannum armis & bello postmodum victum prior sacerdotio suo vicit. Quod autem quædam de illa inhonesta & maligna jactantur, nolo mireris, cum scias hoc esse opus semper diaboli, ut servos Dei mendacio laceret, & opinionibus falsis gloriosum nomen infamet, ut qui conscientie suæ luce clarescunt, alienis rumoribus sordidentur. Explorasse autem collegas nostros scias, & verissime comperisse nulla illum libelli, ut quidam jactitant, labe maculatum esse, sed neque cum episcopis qui sacrificaverunt, communicationem sacrilegam miscuisse, sed eos demum quo-

H 5

rum

rum causa audita, & innocentia comprobata sit, conjunxisse nobiscum. Nam & de Trophimo, de quo tibi scribi desiderasti, non ita res est ut ad te pertulit rumor, & mendacium malignorum. Nam, sicut antecessores nostri sæpe fecerunt, colligendis fratribus nostris carissimus frater noster necessitati succubuit. Et quoniam cum Trophimo pars maxima plebis abscefferat, redeunte nunc ad ecclesiam Trophimo, & satisfaciente & poenitentia deprecationis errorem pristinum confitente, & fraternitatem quam nuper abstraxerat, cum plena humilitate & satisfactione revocante, auditæ sunt ejus preces; & in ecclesiam Domini non tam Trophimus, quam maximus fratrum numerus qui cum Trophimo fuerat, admisus est; qui omnes regressuri ad ecclesiam non essent, nisi cum Trophimo comitante venissent. Tractatu ergo illic cum collegis plurimis habito susceptus est Trophimus; pro quo satisfaciebat fratrum reditus, & restituta multorum salus. Sic tamen admissus est Trophimus, ut laicus communicet, non, secundum quod ad te malignorum litteræ pertulerunt, quasi locum sacerdotis usurpet. Sed & quod passim communicare sacrificatis Cornelius tibi nuntiatus, hoc etiam de apostatarum fictis rumoribus nascitur. Neque enim possunt laudare nos qui recedunt a nobis, aut expectare debemus; ut placeamus illis, qui nobis displicentes & contra ecclesiam rebelles sollicitandis de ecclesia fratribus violenter insistant. Quare & de Cornelio & de nobis quæcumque jactantur, nec audias facile, nec credas, frater carissime. Si qui enim infirmitatibus occupantur, illis, sicut placuit, in periculo subvenitur. Postea tamen quam subventum est, & periclitantibus pax data est, offocari a nobis non possunt aut opprimi, aut vi & manu nostra in exitum mortis urgeri, ut quoniam morientibus pax datur, necesse sit mori eos, qui acceperint pacem,

cum

cum magis in hoc indicium divinæ pietatis & paternæ lenitatis appareat, quod qui pignus vitæ in data pace percipiunt, hic quoque ad vitam percepta pace teneantur. Et iccirco si accepta pace commeatus a Deo datur, nemo hoc debet in sacerdotibus criminari, cum semel placuerit fratribus in periculo subveniri. Nec tu existimes, frater carissime, sicut quibusdam videtur, libellaticos cum sacrificatis æquari oportere, quando inter ipsos etiam qui sacrificaverunt, & conditio frequenter & causa diversa sit. Neque enim æquandi sunt, ille qui ad sacrificium nefandum statim voluntate profilivit, & qui luctatus & congressus diu ad hoc funestum opus necessitate pervenit, ille qui & se & omnes suos prodidit, & qui ipse pro cunctis ad discrimen accedens, uxorem & liberos & domum totam periculi sui perfunçãoe protexit, ille qui inquilinos vel amicos suos ad facinus compulit, & qui inquilinis & colonis pepercit, fratres etiam plurimos, qui extorres & profugi recedebant, in sua tecta & hospitia recepit, ostendens & offerens Domino multas animas viventes & incolumes, quæ pro una faucia deprecentur. Cum ergo inter ipsos qui sacrificaverunt, multa sit diversitas, quæ inclementia est & quam acerba duritia, libellaticos cum iis qui sacrificaverunt jungere? quando is cui libellus acceptus est dicat: Ego prius legeram, & episcopo tractante cognoveram non sacrificandum idolis, nec simulacra servum Dei adorare debere; & iccirco, ne hoc facerem quod non licebat, cum occasio libelli fuisset oblata, quem nec ipsum acciperem, nisi ostensa fuisset occasio, ad magistratum vel veni, vel alio eunte mandavi, Christianum me esse, sacrificare mihi non licere, ad aras diaboli me venire non posse, dare me ob hoc præmium, ne quod non licet, faciam. Nunc tamen etiam iste qui libello maculatus est, posteaquam nobis admonentibus didicit
nec

nec hoc se facere debuisse, etsi manus pura sit, & os ejus feralis cibi contagia nulla polluerint, conscientiam tamen ejus esse pollutam, flet auditis nobis & lamentatur & quod deliquerit nunc admonetur, & non tam crimine quam errore deceptus, quod jam de cetero instructus, & paratus sit, contestatur. Quorum si poenitentiam respuamus, habentium aliquam fiduciam tolerabilis conscientiae, statim cum uxore, cum liberis, quos incolumes reservaverant, in haeresim vel schisma diabolo invitante rapiuntur; & adscribetur nobis in die judicii, nec ovem sauciam curasse, & propter unam sauciam multas integras perdidisse, & cum Dominus relictis nonaginta novem sanis unam errantem & lassam quaesierit, & inventam humeris suis ipse portaverit, nos non tantum non quaeramus lapsos, sed & venientes arceamus, & cum pseudoprophetae gregem Christi nunc vastare & lacerare non desinant, occasionem canibus & lupis demus, ut quos persecutio infesta non perdidit, eos nos duritia nostra & inhumanitate perdamus. Et ubi erit, frater carissime, quod apostolus dicit: *Omnes per omnia placeo, non quaerens quod mihi utile est, sed quod multis, ut salventur. Imitatores mei estote, sicut & ego Christi.* Et iterum: *Factus sum infirmus infirmis, ut infirmos lucraver.* Et iterum: *Si patitur membrum unum, compatiuntur & cetera membra; & si laetatur unum membrum, collaetantur & cetera membra.* Alia est philosophorum & Stoicorum ratio, frater carissime, qui dicunt omnia peccata paria esse, & virum gravem non facile flecti oportere. Inter Christianos autem & philosophos plurimum distat. Et cum apostolus dicat: *Videte ne quis vos depraedetur per philosophiam & inanem fallaciam,* vitanda sunt a nobis, quae non de Dei clementia veniunt, sed de philosophiae durioris praesumptione descendunt. De Moyse autem legimus in scripturis dictum: *Et fuit Moyses homo lenis nimis.* Et
Domi-

Domīnus in evangelio suo dicit: *Estate misericordes, sicut & pater vester misertus est vestri.* Et iterum: *Non est opus sanis medicus, sed male habentibus.* Quam potest exercere medicinam, qui dicit: Ego solus sanos curo, quibus medicus necessarius non est. Opem nostram, medelam nostram vulneratis exhibere debemus. Nec putemus mortuos esse, sed magis semianimes jacere eos, quos persecutione funesta sauciatos videmus: qui si in totum mortui essent, numquam de eisdem postmodum & confessores & martyres fierent. Sed quoniam est in illis, quod pœnitentia sequente revalescat, ad fidem, & ad virtutem de pœnitentia robur armatur, quod armari non poterit, si quis desperatione deficiat, si ab ecclesia dure & crudeliter segregatus, ad gentiles se vias & sæcularia opera convertat, vel ad hæreticos & schismaticos rejectus ab ecclesia transeat; ubi etsi occisus propter nomen postmodum fuerit extra ecclesiam constitutus, & ab unitate atque a caritate divisus, coronari in morte non poterit. Et ideo placuit, frater carissime, examinatis causis singulorum, libellaticos interim admitti, sacrificatis in exitu subveniri: quia exomologesis apud inferos non est, nec ad pœnitentiam quis a nobis compelli potest, si fructus pœnitentiæ subtrahatur. Si prœlium prius venerit, corroboratus a nobis invenietur armatus ad prœlium. Si vero ante prœlium infirmitas urserit, cum solatio pacis & communicationis abscedit. Neque enim præjudicamus Domino iudicaturus, quo minus si pœnitentiam plenam & justam peccatoris invenerit, tunc ratum faciat, quod a nobis fuerit hic statutum. Si vero nos aliquis pœnitentiæ simulatione deluserit, Deus, qui non deridetur, & qui cor hominis intuetur, de his quæ nos minus perspeximus, judicet, & servorum suorum sententiam Dominus emendet; dum tamen nos meminisse, frater carissime, debeamus scriptum esse: *Frater fratrem*

*trem adjuvans exaltabitur, & apostolum quoque dixit
In contemplatione habentes unusquisque, ne & vos teni
mini, alterutrum onera sustinete, & sic adimplebitis lege
Christi, item quod superbos redarguens & arrogantia
frangens in epistola sua ponat: & qui se putat stare, v
deat ne cadat, & alio in loco dicat: Tu quis es qui ju
dicas alienum servum? Domino suo stat aut cadit. Stab
autem. Potens est enim Deus statuere eum. Joanne
quoque Jesum Christum Dominum nostrum advoca
tum & deprecatorem pro peccatis nostris probat d
cens: *Filioli mei, ista scribo vobis ne delinquatis; &
quis deliquerit, advocatum habemus apud patrem Jesum Chri
stum suffragatorem, & ipse est deprecatio pro delictis nostris.*
Et Paulus quoque apostolus in epistola sua posuit: *S
cum adhuc peccatores essemus, Christus pro nobis mortuus est
multo magis nunc justificati in sanguine illius, liberabimur
per illum ab ira.* Cujus pietatem & clementiam co
gitantes, non acerbi adeo nec duri, nec in fovendi
fratribus inhumani esse debemus, sed dolere cum do
lentibus, & flere cum flentibus, & eos quantum pos
sumus, auxilio & solatio nostræ dilectionis erigere.
nec adeo immites & pertinaces ad eorum pœnitentiam
retundendam, nec iterum soluti & faciles ad com
municationem temere laxandam. Jacet ecce saucius
frater ab adversario in acie vulneratus. Inde diabo
lus conatur occidere, quem vulneravit, hinc Chri
stus hortatur ne in totum pereat, quem redemit.
Cui de duobus assistimus, in cujus partibus stamus?
Utrum ne diabolo favemus ut perimat, & semianimem
fratrem jacentem, sicut in evangelio sacerdos & le
vites, præterimus? An vero ut sacerdotes Dei &
Christi, quod Christus & docuit, & fecit imitantes,
vulneratum de adversarii faucibus rapimus, ut cura
tum Deo judici reservemus? Nec putes, frater caris
sime, hinc aut virtutem fratrum minui, aut marty
ria deficere, quod lapsis laxata sit pœnitentia, &
quod*

quod pœnitentibus spes pacis oblata. Manet vere fidentium robur immobile, & apud timentes ac diligentes corde toto Deum stabilis & fortis perseverat integritas. Nam & mœchis a nobis pœnitentiæ tempus conceditur, & pax datur. Non tamen iccirco virginitas in ecclesia deficit, aut continentiae propositum gloriosum per aliena peccata languescit. Floret ecclesia tot virginibus coronata, & castitas ac pudicitia tenorem gloriæ suæ servat, nec quia adultero pœnitentia & venia laxatur, continentiae vigor frangitur. Aliud est ad veniam stare, aliud ad gloriam pervenire, aliud missum in carcerem non exire inde, donec solvat novissimum quadrantem, aliud statim fidei & virtutis accipere mercedem, aliud pro peccatis longo dolore cruciatum emundari & purgari diu igne, aliud peccata omnia passione purgasse, aliud denique pendere in diem iudicii ad sententiam Domini, aliud statim a Domino coronari. Et quidem apud antecessores nostros quidam de episcopis istic in provincia nostra dandam pacem mœchis non putaverunt, & in totum pœnitentiæ locum contra adulteria clauserunt, non tamen a coepiscoporum suorum collegio recesserunt, aut catholicæ ecclesiæ unitatem vel duritiæ, vel censuræ suæ obstinatione ruperunt; ut quia apud alios adulteris pax dabatur, qui non dabat, de ecclesia separaretur. Manente concordiae vinculo & perseverante catholicæ ecclesiæ individuo sacramento, actum suum disponit & dirigit unusquisque episcopus, rationem propositi sui Domino redditurus. Miror autem quosdam sic obstinatos esse, ut dandam non putent lapsis pœnitentiam, aut pœnitentibus existiment veniam denegandam, cum scriptum sit: *Memento unde cecideris, & age pœnitentiam, & fac priora opera.* Quod utique ei dicitur, quem constat cecidisse, & quem Dominus hortatur per opera rursus exurgere, quia scriptum est: *Elemosyna a morte liberat; & non utique*
ab

ab illa morte, quam semel Christi sanguis exstinxit, & qua nos salutaris baptismi & redemptoris nostri gratia liberavit, sed & ab ea quæ per delicta postmodum serpi. Alio item loco pœnitentiæ tempus datur, & pœnitentiam non agenti Dominus comminatur: *Habeo inquit adversus te multa, quod uxorem tuam Jezabel, quæ se dicit prophetem, finis docere & seducere servos meos, fornicari & manducare de sacrificiis, & dedi illi tempus ut pœnitentiam ageret, & pœnitere non vult a fornicatione sua. Ecce mitto eam in lectum, & qui cum ea fornicati sunt in maximam tribulationem, nisi pœnitentiam gesserint ab operibus suis.* Quos utique ad pœnitentiam Dominus non hortaretur, nisi quia pœnitentibus indulgentia pollicetur. Et in evangelio: *Dico, inquit, vobis, sic erit gaudium in calo super uno peccatore pœnitentiam agente quam super nonaginta novem justis, quibus non est opus pœnitentia.* Nam cum scriptum sit, *Deus mortem non facit nec delectatur in perditione vivorum*, utique qui neminem vult perire, cupit peccatores pœnitentiam agere & per pœnitentiam denuo ad vitam redire. Ideo & per Johel prophetam clamat & dicit: *Et nunc hac dicit Dominus Deus vester: Revertimini ad me ex toto corde vestro, simulque & jejuniis & fletu & planctu, & discindite corda vestra, & non vestimenta vestra, & revertimini ad Dominum Deum vestrum, quia misericors & pius est, & patiens & multa miserationis, & qui sententiam flectat adversus malitiam irrogatam.* In psalmis etiam legimus censuram pariter & clementiam Dei comminantis simul atque parcentis, punientis ut corrigat, & cum correxerit reservantis. *Visitabo, inquit, in virga facinora eorum, & in flagellis delicta eorum; misericordiam autem meam non dispergam ab eis.* Dominus quoque in evangelio suo pietatem Dei patris ostendens ait: *Quis est ex vobis homo, quem si petierit filius ejus panem, lapidem porrigat illi, aut si piscem postulaverit, serpentem illi porrigat? Si ergo vos, cum fitis nequam, scitis bona da-*

a dare filiis vestris, quanto magis pater vester celestis dabit bona poscentibus eum? Comparat hic Dominus carnalem patrem, & Dei patris æternam largamque pietatem; quod si iste in terris nequam pater offensus graviter a filio peccatore & malo, si tamen eundem postmodum viderit reformatum, & depositis prioris vitæ delictis ad sobrios & bonos mores & ad innocentiae disciplinam pœnitentiæ dolore correctum, & gaudet & gratulatur, & susceptum, quem ante projece rat, cum voto paternæ exultationis amplectitur, quanto magis unus ille & verus pater bonus, misericors, & pius, immo ipse bonitas & misericordia & pietas, lætatur in pœnitentia filiorum suorum, nec jam pœnitentibus, aut plangentibus & lamentantibus pœnam comminatur, sed veniam magis & indulgentiam pollicetur. Unde Dominus in evangelio beatos dicit plangentes, quia qui plangit, misericordiam provocat; qui pervicax & superbus est, iram sibi & pœnam judicii venientis exaggerat. Et iccirco, frater carissime, pœnitentiam non agentes, nec dolorem delictorum suorum toto corde & manifesta lamentationis suæ professione testantes, prohibendos omnino censuimus a spe communicationis & pacis, si in infirmitate atque in periculo cœperint deprecari; quia rogare illos non delicti pœnitentia, sed mortis urgentis admonitio compellit, nec dignus est in morte accipere solatium, qui se non cogitavit esse moriturum. Quod vero ad Novatiani personam pertinet, frater carissime, de quo desiderasti tibi scribi, quam hæresim introduxisset, scias nos primo in loco nec curiosos esse debere quid ille doceat, cum foris doceat. Quisquis ille est & qualiscumque est, christianus non est qui in Christi ecclesia non est. Jactet se licet & philosophiam, vel eloquentiam suam superbis vocibus prædicet, qui nec fraternam caritatem, nec ecclesiasticam unitatem tenuit, etiam quod prius fuerat,

amisit. Nisi si episcopus tibi videtur qui episcopo in ecclesia a sedecim coepiscopis factus, adulter atque extraneus episcopus fieri a desertoribus per ambitum nititur, & cum sit a Christo una ecclesia per totum mundum in multa membra divisa, item episcopatus unus episcoporum multorum concordie numerositate diffusus, ille post Dei traditionem, post connexam & ubique conjunctam catholicæ ecclesiæ unitatem, humanam conetur ecclesiam facere, & per plurimas civitates novos apostolos suos mittat, ut quædam recentia institutionis suæ fundamenta constituat, cumque jam pridem per omnes provincias & per urbes singulas ordinati sint episcopi in ætate antiqui, in fide integri, in presura probati, in persecutione proscripti, ille super eos creare alios pseudoepiscopos audeat. Quasi possit aut totum orbem novi conatus obstinatione peragrarè, aut ecclesiastici corporis compaginem discordiæ suæ seminatione rescindere, nesciens schismaticos semper inter initia fervere, incrementa vero habere non posse, nec augere quod illicite cœperint, sed statim cum prava sua æmulatione deficere, episcopatum autem tenere non posset, etiam si episcopus prius factus a coepiscoporum suorum corpore & ab ecclesiæ unitate descisceret; quando apostolus admoneat, ut invicem nosmetipsos sustineamus, ne ab unitate quam Deus constituit recedamus, & dicat: *Sustinentes invicem in dilectione, satis agentes servare unitatem spiritus in conjunctione pacis.* Qui ergo nec unitatem spiritus nec conjunctionem pacis observat, & se ab ecclesiæ vinculo, atque a sacerdotum collegio separat, episcopi nec potestatem potest habere nec honorem, qui episcopatus nec unitatem voluit tenere nec pacem. Tum deinde quantus arrogantiae tumor est, quanta humilitatis & lenitatis oblivio; arrogantiae suæ quanta jactatio, ut quis aut audeat aut facere se posse credat, quod nec apostolis concessit Dominus, ut zizania a frumen-

frumento putet se posse discernere, aut quasi ipsi palam ferre, & aream purgare concessum sit, paleas conetur a tritico separare? cumque apostolus dicat: *In domo autem magna non solum vasa aurea sunt & argentea, sed & lignea & fictilia*, aurea & argentea vasa videatur eligere, lignea vero & fictilia contemnere, abjicere, damnare, quando non nisi die Domini vasa lignea divini ardoris incendio concrementur, & fictilia ab eo cui data est ferrea virga, frangantur. Aut si se cordis & renis scrutatorem constituit & judicem, per omnia æqualiter judicet: & cum sciat scriptum esse: *Ecce sanus factus es, jam noli peccare, ne quid tibi deterius fiat*, fraudatores & mœchos a latere atque a comitatu suo separet, quando multo & gravior & pejor sit mœchi quam libellatici causa, cum hic necessitate, ille voluntate peccaverit, hic existimans sibi satis esse quod non sacrificaverit, errore deceptus sit, ille matrimonii expugnator alieni, vel lupanar ingressus ad cloacam & cœnosam voraginem vulgi, sanctificatum corpus & Dei templum detestabili colluvione violaverit; sicut apostolus dicit: *Omne peccatum quodcumque fecerit homo, extra corpus est; qui autem mœchatur, in corpus suum peccat*. Quibus tamen & ipsis pœnitentia conceditur & lamentandi ac satisfaciendi spes relinquitur secundum ipsum apostolum dicentem: *Timeo ne forte veniens ad vos lugeam multos ex iis, qui ante peccaverunt, & non egerunt pœnitentiam de immunditiis quas fecerunt, & fornicationibus & libidinibus*. Nec sibi in hoc novi hæretici blandiantur, quod se dicant idololatri non communicare, quando sint apud illos & adulteri & fraudatores, qui teneantur idololatriæ crimine, secundum apostolum dicentem: *Hoc enim scitote intelligentes, quia omnis fornicator aut immundus aut fraudator, quod est idololatria, non habet hæreditatem in regno Christi & Dei*. Et iterum: *Mortificate itaque membra vestra quæ in terra sunt,*

exponentes fornicationem, immunditiam, & concupiscitiam malam, & cupiditatem, quæ sunt idolorum servi propter quæ venit ira Dei. Nam cum corpora nostra membra sint Christi, & singuli sumus templum Dei quisquis adulterio templum Dei violat, Deum violat; & qui in peccatis committendis voluntatem diaboli facit, dæmoniis & idolis servit. Neque enim mala facta de sancto spiritu veniunt, sed de adversarii instinctu, & de immundo spiritu natæ concupiscentiæ contra Deum facere, & diabolo servire compellunt. Ita fit ut si peccato alterius inquinari alteri dicunt, & idololatriam delinquentis ad non delinquentem transire sua asseveratione contendunt, excusati secundum suam vocem non possint ab idololatriæ crimine, cum constet de apostolica probatione mœchæ & fraudatores, quibus illi communicant, idololatri esse. Nobis autem secundum fidem nostram, & de vine prædicationis datam formam competit ratio veritatis, unumquemque in peccato suo ipsum tenere nec posse, alterum pro altero reum fieri, cum Dominus præmoneat & dicat: *Iustitia justi super eum erit, & scelus scelerati super eum erit.* Et iterum: *Nam morientur patres pro filiis, & filii non morientur pro patribus. Unusquisque in peccato suo morietur.* Quod legentes scilicet & tenentes neminem putamus a satisfactionis & spe pacis arcendum, cum sciamus juxta scripturarum divinarum fidem, auctore & hortatore ipso Deo, & ad agendam pœnitentiam peccatores redigi, & veniam atque indulgentiam pœnitentibus non denegari. Atque o frustrandæ fraternitatis irrisio, o miserorum lamentantium & amentium caduca deceptio, o hæreticæ institutionis inefficax & vana traditio! hortari ad satisfactionis pœnitentiam & subtrahere de satisfactione medicinam, dicere fratribus nostris, plange & lacrimas funde, & diebus ac noctibus ingemisce, & pro abluendo & purgando delicto

cto tuo largiter & frequenter operare; sed extra ecclesiam post omnia ista morieris, quæcumque ad pacem pertinent facies, sed nullam pacem, quam quæris, accipies. Quis non statim pereat; quis non ipsa desperatione deficiat, quis non animum suum a proposito lamentationis avertat? Operari tu putas rusticum posse, si dixeris: Agrum peritia omni rusticitatis exerce, culturis diligenter insiste; sed nullam messem metes, nullam vindemiam premes, nullos oliveti tui fructus capies, nulla de arboribus poma decerpes. Vel si ei cui dominium & usum navium suadens dicas: Materiam de excellentibus filvis mercare, frater, carinam prævalidis & electis roboribus intexe, clavo, funibus, velis, ut fabricetur atque armetur navis, operare; sed cum hæc feceris, fructum de actibus ejus & cursibus non videbis. Præcludere est atque abscindere iter doloris ac pœnitendi viam, ut cum in scripturis omnibus Dominus Deus revertentibus ad se & pœnitentibus blandiatur, nostra duritia & crudelitate, dum fructus pœnitentiæ incipitur, pœnitentia ipsa tollatur. Quod si invenimus a pœnitentia agenda neminem debere prohiberi, & deprecantibus atque exorantibus Domini misericordiam, secundum quod ille misericors & pius est, per sacerdotes ejus pacem posse concedi, admittendus est plangentium gemitus, & pœnitentiæ fructus dolentibus non negandus. Et quia apud inferos confessio non est, nec exomologesis illic fieri potest, qui ex toto corde pœnituerint & rogaverint, in ecclesiam debent interius suscipi, & in ipsa Domino reservari, qui ad ecclesiam suam venturus de illis utique quos in ea intus invenerit, judicabit. Apostatæ vero & desertores, vel adversarii & hostes, & Christi ecclesiam dissipantes, nec si occisi pro nomine foris fuerint, admitti secundum apostolum possunt ad ecclesiæ pacem, quando nec spiritus, nec ecclesiæ

tenuerunt unitatem. Hæc interim, frater carissime, pauca de multis quantum potui, breviter decucurri, quibus & desiderio tuo satisfacerem, & te magis ac magis collegi & corporis nostri societati conjungerem. Si autem tibi veniendi ad nos opportunitas & facultas fuerit, plura in commune conferre, & uberior ac plenius quæ in salutarem concordiam faciant, tractare poterimus. Opto te, frater carissime, semper bene valere.

EPISTOLA LIII.

Ad Fortunatum & alios collegas de iis qui per tormenta superantur.

CYPRIANUS Fortunato, Ahymmo, Optato, Privatiano, Donatulo, & Felici fratribus salutem. Scripsistis mihi, fratres carissimi, quod cum in Capsensi civitate propter ordinationem episcopi essetis, pertulerit ad vos Superius frater & collega noster Ninum, Clementianum, Florum fratres nostros, qui in persecutione apprehensi prius fuerant, & nomen Domini confessi, violentiam magistratus & populi frementis impetum vicerant; postmodum cum apud proconsulem pœnis gravibus excruciantur, vi tormentorum subactos esse, & de gradu gloriæ, ad quam plena fidei virtute tendebant, diutinis cruciatibus excidisse; nec tamen post hunc gravem lapsum non voluntate, sed necessitate susceptum a pœnitentia agenda per hoc triennium destitisse. De quibus consulendum putastis, an eos ad communicationem jam fas esset admittere. Et quidem quod ad mei animi sententiam pertinet, puto his indulgentiam Domini non defuturam, quos constat stetisse in acie, nomen Domini confessos esse, violentiam magistratuum, & populi furentis incursum immobilis fidei obstinatione vicif-

vicisse, passos esse carcerem, diu inter minas pro-
consulis, & fremitum populi circumstantis tormen-
tis laniantibus, ac longa iteratione cruciantibus re-
pugnasse; ut quod in novissimo infirmitate carnis sub-
actum videtur, meritorum præcedentium defensione
relevetur, & sit satis talibus gloriam perdidisse, non
tamen debere eis & veniæ locum claudere, atque eos
a paterna pietate, & a nostra communicatione pri-
vare; quibus existimamus ad deprecandam clementiam
Domini posse sufficere, quod triennio jugiter ac do-
lenter, ut scribitis, cum summa pœnitentiæ lamenta-
tione planxerunt. Certe non puto incaute & temere
his pacem committi, quos videmus militiæ suæ forti-
tudine nec prius pugnae defuisse, & si acies etiam de-
nuo venerit, gloriam suam posse reparare. Nam
cum in concilio placuerit pœnitentiam agentibus in
infirmitatis periculo subveniri & pacem dari, debent
utique in accipienda pace præcedere, quos videmus
non animi infirmitate cecidisse; sed in prælio con-
gressos & vulneratos per imbecillitatem carnis con-
fessionis suæ coronam non potuisse perferre; maxime
cum cupientibus mori non permetteretur occidi, sed
tamdiu fessos tormenta laniarent, quamdiu non fidem,
quæ invicta est, vincerent, sed carnem, quæ infirma
est, fatigarent. Quoniam tamen scripsistis, ut cum
pluribus collegis de hoc ipso plenissime tractem, &
res tanta exigit majus & impensius de multorum colla-
tione consilium, & nunc omnes fere inter Paschæ
prima solemnia apud se cum fratribus demorantur;
quando solemnitati celebrandæ apud suos satisfece-
rint, & ad me venire cœperint, tractabo cum singu-
lis plenius, ut de eo quod consuluistis, figatur apud
nos & rescribatur vobis firma sententia, multorum
sacerdotum consilio ponderata: Opto vos, fratres
carissimi, semper bene valere.

EPISTOLA LIV.

Ad Cornelium de pace lapsis danda.

CYPRIANUS, Liberalis, Caldonius, Nicomedes, Cæcilius, Junius, Marrutius, Felix, Successus, Faustinus, Fortunatus, Victor, Saturninus, alius Saturninus, Rogatianus, Tertullus, Lucianus, Sattius, Secundinus, alius Saturninus, Eutyches, Ampius, alius Saturninus, Aurelius, Priscus, Herculaneus, Victoricus, Quintus, Honoratus, Manthaneus, Hortensianus, Verianus, Jambus, Donatus, Pomponius, Polycarpus, Demetrius, alius Donatus, Privatianus, Fortunatus, Rogatus, & Mannulus Cornelio fratri salutem. Statueramus quidem jam pridem, frater carissime, participato invicem nobiscum consilio, ut qui in persecutionis infestatione supplantati ab adversario & lapsi fuissent, & sacrificiis se illicitis maculassent, agerent diu pœnitentiam plenam, & si periculum infirmitatis urgeret, pacem sub ictu mortis acciperent. Nec enim fas erat, aut permittebat paterna pietas & divina clementia, ecclesiam pulsantibus claudi, & dolentibus ac deprecantibus spei salutaris subsidium denegari, ut de sæculo recedentes sine communicatione & pace ad Dominum dimitterentur; quando permiserit ipse qui legem dedit, ut ligata in terris etiam in cælis ligata essent, solvi autem possent illic, quæ hic prius in ecclesia solverentur. Sed enim cum videamus diem rursus alterius infestationis appropinquare cœpisse, & crebris atque assiduis ostensionibus admoneamur, ut ad certamen quod nobis hostis indicit, armati & parati simus, plebem etiam nobis de divina dignatione commissam exhortationibus nostris paremus, & omnes omnino milites Christi, qui arma desiderant, & prœlium flagitant, intra castra dominica colligamus: necessitate

tate cogente censuimus, eis qui de ecclesia Domini non recesserunt, sed pœnitentiam agere, & lamentari, ac Dominum deprecari a primo lapsus sui die non destiterunt, pacem dandam esse, & eos ad prœlium quod imminet, armari & instrui oportere. Obtemperandum est namque ostensionibus atque admonitionibus justis, ut a pastoribus oves in periculo non deferantur, sed grex omnis in unum congregetur, & exercitus Domini ad certamen militiæ cœlestis armetur. Merito enim trahebatur dolentium pœnitentia tempore longiore, ut infirmis in exitu subveniretur, quamdiu quies & tranquillitas aderat, quæ differre diu plangentium lacrimas, & subvenire sero morientibus in infirmitate pateretur. At vero nunc non infirmis, sed fortibus, pax necessaria est, nec morientibus, sed viventibus, communicatio a nobis danda est; ut quos excitamus & hortamur ad prœlium, non inermes & nudos relinquamus, sed protectione sanguinis & corporis Christi muniamus; & cum ad hoc fiat eucharistia, ut possit accipientibus esse tutela, quos tutos esse contra adversarium volumus, munimento dominicæ saturitatis armemus. Nam quomodo docemus aut provocamus eos in confessione nominis sanguinem suum fundere, si eis militaturis Christi sanguinem denegamus? Aut quomodo ad martyrii poculum idoneos facimus, si non eos prius ad bibendum in ecclesia poculum Domini jure communicationis admittimus? Interesse debet, frater carissime, inter eos, qui vel apostataverunt, & ad sæculum cui renuntiaverant, reversi, gentiliter vivunt, vel ad hæreticos transfugæ facti, contra ecclesiam parricidalia quotidie arma suscipiunt: & inter eos qui ab ecclesiæ limine non recedentes, & implorantes jugiter ac dolenter divina & paterna solatia, nunc se ad pugnam paratos esse, & pro Domini sui nomine, ac pro sua salute stare fortiter, & pugnare profitentur.

Hoc in tempore pacem nos non dormientibus, sed vigilantibus damus, pacem non deliciis, sed armis damus, pacem non ad quietem, sed ad aciem damus. Si secundum quod eos audimus, & optamus & credimus, fortiter steterint, & adversarium nobiscum in congressione prostraverint: non pœnitet pacem concessisse tam fortibus, immo episcopatus nostri honor grandis & gloria est, pacem dedisse martyribus, ut sacerdotes qui sacrificia Dei quotidie celebramus, hostias Deo & victimas præparemus. Si autem, quod Dominus avertat a fratribus nostris, aliquis lapsorum fefellerit, ut pacem subdole petat, & impendentis prælii tempore communicationem non præliaturus accipiat: se ipsum fallit & decipit, qui aliud corde occultat, & aliud voce pronuntiat. Nos, in quantum nobis & videre & judicare conceditur, faciem singulorum videmus, cor scrutari & mentem perspicere non possumus. De his judicat occultorum scrutator & cognitor cito venturus, & de arcanis cordis atque abditis judicaturus. Obesse autem mali bonis non debent, sed magis mali a bonis adjuvari. Nec ideo martyrium facturis pax neganda est, quia sunt quidam negaturi; cum propter hoc pax danda sit omnibus militaturis, ne per ignorantiam nostram ille incipiat præteriri, qui habet in prælio coronari. Nec quisquam dicat, qui martyrium tollit, sanguine suo baptizatur, nec pax illi ab episcopo necessaria est habituro gloriæ suæ pacem, & accepturo majorem de Domini dignatione mercedem. Primo idoneus esse non potest ad martyrium, qui ab ecclesia non armatur ad prælium, & mens deficit, quam non recepta eucharistia erigit, & accendit. Dominus enim in evangelio suo dicit: *Cum autem vos tradiderint, nolite cogitare quid loquamini: dabitur enim vobis in illa hora quid loquamini; non enim vos estis qui loquimini, sed spiritus patris vestri, qui loquitur in vobis.* Quando autem

tem dicat, in traditis atque in confessione nominis constitutis spiritum patris loqui, quomodo potest ad confessionem paratus aut idoneus inveniri, qui non prius pace accepta receperit spiritum patris, qui corroborans servos suos ipse loquitur & confitetur in nobis? Tum deinde si relictis omnibus rebus suis fugerit, & in latebris atque in solitudine constitutus, in latrones forte incurrerit, aut in febribus & in languore decesserit: nonne nobis imputabitur, quod tam bonus miles, qui omnia sua dereliquit, & contempta domo & parentibus ac liberis sequi dominum suum maluit, sine pace & sine communicatione decessit? Nonne nobis vel negligentia segnis, vel duritia crudelis adscribetur in die iudicii, quod pastores creditas & commissas nobis oves nec curare in pace, nec in acie voluerimus armare? Nonne ingeretur nobis a Domino, quod per prophetam suum clamat & dicit: *Ecce lac consumitis & lanis vos tegitis, & quod crassum est interficitis, & oves meas non pascitis, quod infirmatum est non confortastis, & quod male habuit non corroborastis, & quod contribulatum est non consolati estis, & quod errabat non revocastis, & quod periit non inquisistis, & quod forte fuit confecistis labore, & dispersa sunt oves meae, eo quod non sunt pastores, & facta sunt in comesturam omnibus bestiis agri, & non fuit qui inquireret, neque qui revocaret.* Propterea haec dicit Dominus: *Ecce ego super pastores, & requiram oves meas de manibus eorum, & avertam eos ut non pascant oves meas, & jam non pascant eas, & extraham oves meas de ore eorum, & pascam eas cum iudicio.* Ne igitur ore nostro, quo pacem negamus, quo duritiam magis humanæ crudelitatis, quam divinæ & paternæ pietatis opponimus, oves nobis commissæ a Domino reposcantur: placuit nobis, sancto spiritu suggerente, & Domino per visiones multas & manifestas admonente, quia hostis imminere prænuntiatur & ostenditur, colligere intra castra milites
Chri-

Christi, examinatis singulorum causis, pacem lapsis dare, immo pugnaturis arma suggerere; quod credimus vobis quoque paternæ misericordiæ contemplatione placitum. Quod si de collegis aliquis exstiterit, qui urgente certamine pacem fratribus & sororibus non putat dandam, reddet ille rationem in die iudicii Domino vel importunæ censuræ, vel inhumanae duritiæ suæ. Nos quod fidei, & caritati, & sollicitudini congruebat, quæ erant in conscientia nostra protulimus, diem certaminis appropinquasse, hostem violentum cito contra nos exsurgere, pugnam, non talem qualis fuit, sed graviolem multo & acriorem venire. Hoc nobis divinitus frequenter ostenditur, de hoc nos providentia & misericordia Domini sæpius admonemur; de cuius ope & pietate qui in eum confidimus, possumus esse securi; quia qui in pace militibus suis futuram prænuntiat pugnam, dabit militantibus in congressione victoriam. Optamus te, frater carissime, semper bene valere.

EPISTOLA LV.

Ad Cornelium de Fortunato & Felicissimo, sive contra hæreticos.

CYPRIANUS Cornelio fratri salutem. Legi litteras tuas, frater carissime, quas per Saturum fratrem nostrum acolythum misisti, & dilectionis fraternæ, & ecclesiasticæ disciplinæ, & sacerdotalis censuræ satis plenas; quibus significasti Felicissimum hostem Christi non novum, sed jam pridem ob crimina sua plurima & gravissima abstentum, & non tantum mea, sed & plurimorum coepiscoporum sententia condemnatum, rejectum a te illic esse, & cum venisset stipatus caterva & factione desperatorum, vigore pleno quo episcopum agere oportet, pulsum de ecclesia

clesia esse, de qua jam pridem cum sui similibus Dei majestate, & Christi Domini & judicis nostri severitate depulsus est, ne schismatis & discidii auctor, ne pecuniæ commissæ sibi fraudator, ne stuprator virginum, ne matrimoniorum multorum depopulator atque corruptor ultra adhuc sponsam Christi incorruptam, sanctam, pudicam præsentiae suæ dedecore, & impudica atque incesta contagione violaret. Sed enim lecta alia tua epistola, frater, quam primis litteris subjunxisti, satis miratus sum, cum animadvertissem te minis atque terroribus eorum, qui venerant, aliquantum esse commotum, cum te, secundum quod scripsisti, aggressi essent, cum summa desperatione comminantes, quod si litteras quas attulerant, non accepisses, publice eas recitarent, & multa turpia ac probrosa, & ore suo digna proferrent. Quod si ita res est, frater carissime, ut nequissimorum timeatur audacia, & quod mali jure atque æquitate non possunt, temeritate ac desperatione perficiant: actum est de episcopatus vigore, & de ecclesiæ gubernandæ sublimi ac divina potestate, nec christiani ultra aut durare aut esse jam possumus, si ad hoc ventum est, ut perditorum minas atque insidias pertimescamus. Nam & gentiles, & Judæi minantur & hæretici, atque omnes quorum pectora & mentes diabolus obsedit, venenatam rabiem suam quotidie furiosa voce testantur. Non tamen iccirco cedendum est, quia minantur, aut ideo adversarius & inimicus major est Christo, quia tantum sibi vindicat, & assumit in sæculo. Manere apud nos debet, frater carissime, fidei robur immobile, & stabilis atque inconcussa virtus contra omnes incurfus, atque impetus oblatrantium fluctuum velut petraë objacentis fortitudine & mole debet obistere. Nec interest, unde episcopo aut terror aut periculum veniat, qui terroribus & periculis vivit obnoxius, & tamen fit de ipsis terroribus ac periculis

lis gloriosus. Neque enim solas gentilium, vel Judæorum minas cogitare & spectare debemus, cum videamus ipsum Dominum a fratribus esse detentum, & ab eo quem inter apostolos ipse delegerat, proditum; inter initia quoque mundi Abel justum nonnisi frater occiderit; & Jacob fugientem persecutus sit frater infestus; & Joseph puer venierit vendentibus fratribus; in evangelio etiam legamus, esse prædictum magis domesticos inimicos futuros, & qui prius copulati sacramento unanimiatis fuerint, ipsos invicem tradituros. Nihil interest quis tradat, aut sæviat, cum Deus tradi permittat, quos disponit coronari. Neque enim nobis ignominia est pati a fratribus, quod passus est Christus, nec illis gloria est facere, quod fecerit Judas. Quæ autem sui elatio est, quæ comminantium tumens, & inflata, & vana jactatio, illic absenti minari, cum hic me habeant in potestate præsentem? Convicia eorum, quibus se & vitam suam quotidie lacerant, non timemus; fustes, & lapides, & gladios, quos verbis parricidalibus jactitant, non perhorrescimus. Quod in illis est, homicidæ sunt apud Deum tales: necare tamen non possunt, nisi eis Dominus necare permiserit. Et cum nobis semel moriendum sit, illi tamen & odio, & verbis, & delictis suis quotidie perimunt. Sed non iccirco, frater carissime, relinquenda est ecclesiastica disciplina, aut sacerdotalis solvenda censura, quoniam conviciis infestamur, aut terroribus quatimur, quando occurrat & moneat scriptura divina dicens: *Ille vero qui præsumit & contumax est, vir sui jactans, nihil omnino proficiet, qui tilatavit tamquam infernus animam suam.* Et iterum: *Et verba viri peccatoris ne timueritis, quia gloria ejus in stercorea erit & in vermes. Hodie extollitur, & cras non invenietur, quoniam conversus est in terram suam, & cogitatio ejus peribit.* Et iterum: *Vidi impium exaltatum, & extolli super cedros Libani: & transivi, &*

occe

ecce non fuit; & quaesivi eum, & non est inventus locus ejus. Exaltatio & inflatio, & arrogans ac superbia jactatio non de Christi magisterio, qui humilitatem docet, sed de antichristi spiritu nascitur, cui exprobrat per prophetam Dominus, & dicit: *Tu autem dixisti in animo tuo: In caelum ascendam, super stellas Dei ponam sedem meam, sedebo in monte alto super montes altos in aquilonem, ascendam super nubes, ero similis altissimo.* Et addidit dicens: *Tu vero ad inferos descendes in fundamenta terrae; & qui videbunt te, mirabuntur super te.* Unde & parem talibus poenam scriptura divina loco alio comminatur & dicit: *Dies enim Domini Sabaoth super omnem injuriosum, & superbum, & super omnem elatum & excelsam.* De ore itaque ac de verbis suis unusquisque statim proditur, & utrum Christum in corde suo, an vero antichristum habeat, loquendo detegitur, secundum quod Dominus in evangelio suo dicit: *Progenies viperarum, quomodo potestis bona loqui, cum sitis nequam? De abundantia enim cordis os emittit. Bonus homo de bono thesauro emittit bona, & nequam homo de nequam thesauro emittit nequam.* Unde & dives ille peccator, qui de Lazaro in sinu Abrahæ posito atque in refrigerio constituto implorat auxilium, cum in tormentis cruciabundus flammæ cremantis ardoribus aduratur, inter omnes corporis partes magis os ejus & lingua poenas dat, quia plus scilicet lingua sua & ore peccaverat. Nam cum scriptum sit: *Neque maledicti regnum Dei consequentur;* & iterum Dominus in evangelio suo dicat: *Qui dixerit fratri suo fatue, & qui dixerit racha, reus erit in gehenna ignis;* quomodo possunt censuram Domini ultoris evadere, qui talia ingerunt, non solum fratribus, sed & sacerdotibus, quibus honor tantus de Dei dignatione conceditur; ut quisquis sacerdoti ejus & ad tempus hic judicanti non obtemperasset, statim necaretur? In Deuteronomio loquitur Dominus Deus dicens: *Et homo qui-*

CIII-

cumque fecerit in superbia, ut non exaudiat sacerdotem aut judicem, quicumque fuerit in diebus illis, morietur homo ille, & omnis populus cum audierit, timebit, & non agent impie etiam nunc. Item ad Samuelem, cum a Judæis sperneretur, Deus dicit: *Non te spreverunt, sed me spreverunt.* Et Dominus quoque in evangelio: *Qui audit vos, inquit, me audit, & eum qui me misit: & qui rejicit vos, me rejicit, & qui me rejicit, rejicit eum qui me misit.* Et cum leprosum emundasset, *Vade, inquit, & demonstra te sacerdoti.* Et cum postea tempore passionis alapam accepisset a servo sacerdotis, cumque ei dixisset: *Sic respondes pontifici?* adversus pontificem Dominus contumeliose nihil dixit, nec quidquam de sacerdotis honore detraxit; sed innocentiam suam magis asserens & ostendens, *Si male, inquit, locutus sum, exprobra de malo; si autem bene, quid me cadis?* Item in actibus apostolorum postmodum beatus apostolus Paulus, cum ei dictum esset: *Sic insulis in sacerdotem Dei maledicendo?* quamvis domino jam crucifixo sacri-legi, & impii, & cruenti illi esse cœpissent, nec jam quidquam de sacerdotali honore & auctoritate retinerent; tamen ipsum quamvis inane nomen & umbram quamdam sacerdotis cogitans Paulus, *Nesciebam, inquit, fratres, quia pontifex est.* Scriptum est enim: *Principem populi tui non maledices.* Cum hæc tanta ac talia & multa alia exempla præcedant, quibus sacerdotalis auctoritas & potestas de divina dignatione firmatur, quales putas esse eos, qui sacerdotum hostes, & contra ecclesiam catholicam rebelles nec præmonentis Domini comminatione, nec futuri judicii ultione terrentur? Neque enim aliunde hæreses obortæ sunt, aut nata sunt schismata, quam inde, quod sacerdoti Dei non obtemperatur, nec unus in ecclesia ad tempus sacerdos & ad tempus judex vice Christi cogitatur: cui si secundum magisteria divina obtemperaret fraternitas universa, nemo adver-

sum

sum sacerdotum collegium quidquam moveret, nemo post divinum iudicium, post populi suffragium, post coepiscoporum consensum, iudicem se jam, non episcopi, sed Dei faceret, nemo discidio unitatis Christi ecclesiam scinderet, nemo sibi placens ac tumens seorsum foris hæresim novam conderet; nisi si ita est aliquis sacrilegæ temeritatis ac perditæ mentis, ut putet sine Dei iudicio fieri sacerdotem, cum Dominus in evangelio suo dicat: *Nonne duo passeret assere veniunt, & neuter eorum cadit in terram sine patris vestri voluntate?* Cum ille nec minima fieri sine voluntate Dei dicat, existimat aliquis summa & magna aut non sciente, aut non permittente Deo in ecclesia Dei fieri, & sacerdotes, id est, dispensatores ejus, non de ejus sententia ordinari? Hoc est fidem non habere qua vivimus, hoc est Deo honorem non dare, cujus nutu & arbitrio regi, & gubernari omnia scimus & credimus. Plane episcopi non de voluntate Dei fiunt, sed qui extra ecclesiam fiunt, sed qui contra dispositionem & traditionem evangelii fiunt, sicut ipse Dominus in duodecim prophetis ponit & dicit: *Sibimetipsis regem constituerunt, & non per me.* Et iterum: *Sacrificia eorum tamquam panis luctus, omnes qui manducant ea, contaminabuntur.* Et per Esaiam quoque spiritus sanctus clamat & dicit: *Va vobis, filii desertores. Hac dicit Dominus: Habuistis consilium, & non per me; & fecistis conventionem, & non per spiritum meum, adjicite peccata super peccata.* Ceterum (dico enim provocatus, dico dolens, dico compulsus) quando episcopus in locum defuncti substituitur, quando populi universi suffragio in pace deligitur, quando Dei auxilio in persecutione protegitur, collegis omnibus fideliter junctus, plebi suæ in episcopatu quadriennio jam probatus, in quiete serviens disciplinæ, in tempestate proscriptus, applicito & adjuncto episcopatus sui nomine, toties ad leonem petitus, in circo, in amphitheatro domini-

cæ dignationis testimonio honoratus : his ipsis etiam diebus quibus has ad te litteras feci, ob sacrificia quæ edicto proposito celebrare populus jubebatur, clamore popularium ad leonem denuo postulatus in circo ; cum talis, frater carissime, a quibusdam desperatis, & perditis, & extra ecclesiam constitutis impugnari videtur, apparet quis impugnet, non scilicet Christus, qui sacerdotes aut constituit aut protegit ; sed ille qui Christi adversarius, & ecclesiæ ejus inimicus ad hoc ecclesiæ præpositum sua infestatione persequitur ut, gubernatore sublato, atrocius atque violentius circa ecclesiæ naufragia grassetur. Nec quemquam fidelem & evangelii memorem, atque apostoli præmonentis mandata retinentem movere debet, frater carissime, si quidam in extremis temporibus superbi, & contumaces & sacerdotum Dei hostes aut de ecclesia recedunt, aut contra ecclesiam faciunt, quando tales nunc futuros & Dominus, & apostoli ejus ante prædixerint. Nec præpositum servum deferri a quibusdam miretur aliquis, quando ipsum Dominum magnalia & mirabilia summa facientem, & virtutes Dei patris factorum suorum testimonio comprobantem discipuli sui reliquerint. Et tamen ille non increpuit recedentes, aut graviter comminatus est, sed magis conversus ad apostolos suos dixit : *Numquid & vos vultis ire?* servans scilicet legem, qua homo libertati suæ relictus, & in arbitrio proprio constitutus, sibi ipse vel mortem appetit vel salutem. Petrus tamen, super quem ædificata ab eodem Domino fuerat ecclesia, unus pro omnibus loquens, & ecclesiæ voce respondens ait : *Domine, ad quem ibimus? Verbum vita æterna habes, & nos credimus et cognovimus, quoniam tu es Christus filius Dei vivi :* significans scilicet & ostendens, eos qui a Christo recesserint, culpa sua perire, ecclesiam tamen, quæ in Christum credat, & quæ semel id quod cognoverit, tenet

teneat, numquam ab eo omnino discedere, & eos esse ecclesiam, qui in domo Dei permanent: plantationem vero plantatam a Deo patre non esse, quos videmus non frumenti stabilitate solidari, sed tamquam paleas dissipantis inimici spiritu ventilari, de quibus & Joannes in epistola sua dicit: *Ex nobis exierunt, sed non fuerunt ex nobis; si enim fuissent ex nobis, mansissent utique nobiscum.* Item Paulus monet nos, cum mali de ecclesia pereunt, non moveri, nec recedentibus perfidis fidem minui: *Quid enim, inquit, si exciderunt a fide quidam eorum, numquid infidelitas illorum fidem Dei evacuavit? Absit. Est enim Deus verax, omnis autem homo mendax.* Quod ad nos attinet, conscientie nostrae convenit, frater carissime, dare operam ne quis culpa nostra de ecclesia pereat, si autem quis ultro & crimine suo perierit, & poenitentiam agere atque ad ecclesiam redire noluerit, nos in die iudicii inculpatos futuros, qui consulimus famitati, illos solos in poenis remansuros, qui noluerint consilii nostri salubritate sanari. Nec movere nos debent convicia perditorum, quo minus a via recta & a certa regula non recedamus, quando & apostolus instruat dicens: *Si hominibus placerem, Christi servus non essem.* Interest utrum quis homines promereri, an Deum cupiat. Si hominibus placetur, Dominus offenditur. Si vero id enitimur & elaboramus, ut possimus Deo placere; & convicia & maledicta debemus humana contemnere. Quod autem tibi de Fortunato isto pseudoepiscopo a paucis & inveteratis hæreticis constituto non statim scripsi, frater carissime, non ea res erat, quæ in notitiam tuam deberet festinato statim quasi magna aut metuenda perferri, maxime quando & Fortunati nomen jam satis nosset, qui est unus ex quinque presbyteris jam pridem de ecclesia profugis, & sententia coepiscoporum nostrorum, multorum & gravissimorum virorum nuper

abstentis, qui super hac re priore anno de te litteras fecerunt. Item Felicissimum signiferum seditionis recognosceres, qui & ipse in iisdem coepiscoporum nostrorum factis ad te pridem litteris continetur; qui non tantum ab iis istic abstentus, sed & abs te illic nuper de ecclesia pulsus est. Cum hæc in notitia tua esse considerem, & pro certo hæere memoriæ & disciplinæ tuæ scirem: necessarium non putavi celeriter & urgenter hæreticorum tibi ineptias nuntiandas. Neque enim ad catholicæ ecclesiæ majestatem pariter ac dignitatem pertinere debet, quid apud se hæreticorum & schismaticorum moliatur audacia. Nam & pars Novatiani Maximum presbyterum, nuper ad nos a Novatiano legatum missum, atque a nostra communicatione rejectum nunc istic sibi fecisse pseudoepiscopum dicitur. Nec tamen de hoc tibi scripseram, quando hæc omnia contemnantur a nobis, & miserim tibi proxime nomina episcoporum istic constitutorum, qui integri & sani in ecclesia catholica fratribus præfunt. Quod utique ideo de omnium nostrorum consilio tibi placuit scribere, ut erroris diluendi ac perspiciendæ veritatis compendium fieret, & scires tu & collegæ nostri, quibus scribere & litteras mutuo a quibus vos accipere oporteret; si quis autem præter hos, quos epistola nostra complexi sumus, scribere vobis auderet, sciretis eum vel sacrificio vel libello esse maculatum, vel unum de hæreticis, perversum scilicet & prophanum. Nactus tamen occasionem familiarissimi hominis & clerici, per Felicianum acolythum, quem cum Perseo collega nostro miseris, inter cetera quæ in notitiam tuam perferenda hinc fuerant, etiam de Fortunato isto tibi scripsi. Sed dum istic Felicianus frater noster vel vento retardatur, vel accipiendis aliis epistolis a nobis detinetur, Felicissimo ad vos properante præventus est. Ita enim semper scelera festinant, quasi contra innocentiam

tiam festinatione prævaleant. Per Felicianum autem significavi tibi, frater, venisse Carthaginem Privatum, veterem hæreticum in Lambesitana colonia, ante multos fere annos ob multa & gravia delicta nonaginta episcoporum sententia condemnatum, antecessorum etiam nostrorum, quod & vestram conscientiam non latet, Fabiani & Donati litteris severissime notatum; qui cum causam suam apud nos in concilio, quod habuimus Idibus Maiis, quæ proximæ fuerunt, agere velle se diceret, nec admissus esset, Fortunatum istum sibi pseudoepiscopum dignum collegio suo fecit. Venerat etiam cum illo & Felix quidam, quem ipse extra ecclesiam in hæresi pseudoepiscopum olim constituerat. Sed & Jovinus, & Maximus comites cum Privato probato hæretico affuerunt, ob nefanda sacrificia & crimina in se probata, sententia novem episcoporum collegarum nostrorum condemnati, & iterato quoque a pluribus nobis anno priore in concilio abstenti. Cum his autem quatuor junctus est & Repostus Suturnicensis, qui non tantum in persecutione ipse cecidit, sed & maximam partem plebis suæ sacrilega persuasionem dejecit. Hi quinque cum paucis vel sacrificatis, vel male sibi conscis Fortunatum sibi pseudoepiscopum cooptarunt, ut criminibus in unum convenientibus talis esset scilicet rector, quales illi qui reguntur. Hinc jam & cetera mendacia, frater carissime, potes noscere, quæ illic homines desperati & perditii ventilaverunt, ut cum de sacrificatis, vel de hæreticis amplius quam quinque pseudoepiscopi non fuerint, qui Carthaginem venerint, & Fortunatum sibi dementiæ suæ socium constituerint: illi tamen quasi filii diaboli & mendacio pleni ausi sunt, ut scribis, jactitare viginti quinque episcopos affuisse. Quod mendacium & istic prius apud fratres nostros jactitabant, dicentes viginti quinque episcopos de Numidia esse venturos, qui sibi episcopum

pum facerent. Quo in mendacio suo posteaquam, quinque solis convenientibus naufragis & a nobis absentis, detecti sunt atque confusi, Romam cum mendaciorum suorum merce navigaverunt, quasi veritas post eos navigare non posset, quæ mendaces linguas rei certæ probatione convinceret. Atque hæc est, frater, vera dementia; non cogitare nec scire, quod mendacia non diu fallant, noctem tamdiu esse quamdiu illucescat dies; clarificato autem die, & sole oborto, luci tenebras & caliginem cedere, & quæ grassabantur per noctem latrocinia, cessare. Denique si nomina ab eis quæreres, non haberent vel quos falso nominarent. Tanta apud eos etiam malorum penuria est, ut ad illos nec de sacrificiis nec de hæreticis viginti quinque colligi possint. Et tamen ad decipiendas aures simplicium & absentium mendacio numerus inflatur; quasi, etsi verus esset hic numerus, aut ab hæreticis ecclesia, aut ab injustis justitia vincatur. Nec me oportet, frater carissime, paria nunc cum illis facere, & ea quæ commiserunt, atque hucusque committunt, meo sermone decurrere; cum considerandum sit nobis, quid proferre & scribere sacerdotes Dei oporteat, nec tam dolor apud nos debeat, quam pudor loqui, & ne videar provocatus maledicta potius, quam crimina & peccata congerere. Taceo itaque de fraudibus ecclesiæ factis. Conjuraciones & adulteria, & varia delictorum genera prætereo. Unum illud, in quo non mea, nec hominum, sed Dei causa est, de eorum facinbre non puto esse reticendum, quod a primo statim persecutionis die, cum recentia deliquentium facinora ferventer, & sacrificiis nefandis non tantum diaboli altaria; sed adhuc manus ipsæ lapsorum atque ora fumarent; communicare cum lapsis & pœnitentiæ agendæ intercedere non destiterunt. Clamat Deus: *Sacrificans diis eradicabitur, nisi Domino soli.* Et Dominus

AUS

mus in evangelio dicit: *Qui me negaverit, negabo illum.* Et alio loco indignatio & ira divina non tacet dicens: *Illis fudistis libamina, & illis imposuistis sacrificia. Super hac non indignabor? dicit Dominus.* Et intercedunt ne rogetur Deus, qui indignari se ipse testatur. Intercedunt ne exoretur precibus & satisfactionibus Christus, qui negantem se negare profitetur. Nos in ipso persecutionis tempore de hoc ipso litteras misimus, nec auditi sumus. Concilio frequenter acto, non consensione tantum nostra, sed & comminatione decrevimus, ut pœnitentiam fratres agerent, ut pœnitentiam non agentibus nemo temere pacem daret. Et illi contra Deum sacrilegi, contra sacerdotes Dei impio furore temerarii, de ecclesia recedentes, & contra ecclesiam parricidalia arma tollentes, elaborant, ut opus suum diaboli malitia consumment, ne vulneratos divina clementia in ecclesia sua curet. Miserorum pœnitentiam mendaciorum suorum fraude corrumpunt, ne Deo indignanti satisfiat, ne Christum Dominum suum, qui christianus esse vel erubuit ante, vel timuit, postmodum quærat, ne ad ecclesiam qui de ecclesia recesserat, redeat. Datur opera ne satisfactionibus & lamentationibus justis delicta redimantur, ne vulnera lacrimis abluantur. Pax vera falsæ pacis mendacio tollitur, salutaris sinus matris noverca intercedente præcluditur, ne de pectore atque ore lapforum fletus & gemitus audiat. Compelluntur adhuc insuper lapsi, ut linguis atque ore, quo in Capitolio ante deliquerant, sacerdotibus convicium faciant, confessores & virgines, & justos quosque fidei laude præcipuos, atque in ecclesia gloriosos contumeliis & maledicis vocibus prosequantur. A quibus quidem non tam nostrorum modestia, & humilitas, & pudor cæditur, quam illorum ipsorum spes & vita laceratur. Neque enim qui patitur, sed qui facit convicium, miser est; nec qui a fratre vapulat,

pulat, sed qui fratrem cædit, in lege peccator est; & cum nocentes innocentibus injuriam faciunt, illi patiuntur injuriam, qui facere se credunt. Denique hinc illis percussa mens, & hebes animus, & sensus alienus est. Ira est Dei non intelligere delicta, ne sequatur pœnitentia, sicut scriptum est: *Et dedit illis Deus spiritum transpunctionis*, ne revertantur scilicet & curentur, & deprecationibus & satisfactionibus justis post peccata sanentur. Paulus apostolus in epistola sua ponit & dicit: *Dilectum veritatis non habuerunt, ut salvi fierent; ac propterea mittet illis Deus operationem erroris, ut credant mendacio, ut judicentur omnes qui non crediderunt veritati, sed sibi placent in injustitia.* Primus felicitatis gradus est, non delinquere; secundus, delicta cognoscere. Illic currit innocentia integra & illibata quæ servet, hic succedit medela quæ sanat. Quod utrumque isti offenso Deo perdiderunt, & ut amissa sit gratia, quæ de baptismi sanctificatione percipitur, & non subveniat pœnitentia, per quam culpa curatur. An putas, frater, levia esse adversus Deum facinora parva & modica delicta, quod per illos non rogatur majestas indignantis Dei, quod non timetur ira, & ignis & dies Domini, quod imminente antichristo exarmatur fides militantis populi, dum tollitur vigor & timor Christi? Viderint laici hoc quomodo curent. Sacerdotibus labor major incumbit in asserenda & procuranda Dei majestate, ne quid videamur in hac parte negligere, quando admoneat Dominus & dicat: *Et nunc præceptum hoc ad vos est, o sacerdotes: si non audieritis, & si non posueritis in corde vestro, ut detis honorem nomini meo, dicit Dominus, immittam in vos maledictionem, & maledicam benedictionem vestram.* Honor ergo datur Deo, quando sic Dei majestas & censura contemnitur, ut cum se ille indignari & irasci sacrificantibus dicat, & cum pœnas æternas & supplicia perpetua

com-

comminetur, proponatur a sacrilegis, atque dicatur, ne ira cogitetur Dei, ne timeatur iudicium Domini, ne pulsetur ad ecclesiam Christi; sed sublata pœnitentia, nec ulla exomologesi criminis facta, despectis episcopis atque calcatis, pax a presbyteris verbis fallacibus prædicetur, & ne lapsi surgant, aut foris positi ad ecclesiam redeant, communicatio non communicantibus offeratur? Quibus etiam satis non fuit ab evangelio recessisse, spem lapsis satisfactionis & pœnitentiæ sustulisse, fraudibus involutos, vel adulteriis commaculatos, vel sacrificiorum funesta contagione pollutos, ne Deum rogarent, ne in ecclesia exomologesin criminum facerent, ab omni & sensu & fructu pœnitentiæ removisse, foris sibi extra ecclesiam & contra ecclesiam constituisse conventiculum perditæ factionis, cum male sibi consciorum & Deum rogare, ac satisfacere nolentium caterva conflueret. Post ista adhuc insuper pseudoepiscopo sibi ab hæreticis constituto, navigare audent, & ad Petri cathedram atque ad ecclesiam principalem, unde unitas sacerdotalis exorta est, a schismaticis & prophanis litteras ferre, nec cogitare eos esse Romanos, quorum fides apostolo prædicante laudata est, ad quos perfidia habere non possit accessum. Quæ autem causa veniendi & pseudoepiscopum contra episcopos factum nuntiandi? Aut enim placet illis quod fecerunt, & in suo scelere perseverant; aut si displicet & recedunt, sciunt quo revertantur. Nam cum statutum sit ab omnibus nobis, & æquum sit pariter ac iustum, ut uniuscujusque causa illic audiatur, ubi est crimen admissum, & singulis pastoribus portio gregis sit adscripta, quam regat unusquisque & gubernet, rationem sui actus Domino redditurus: oportet utique eos quibus præsumus non circumcursare, nec episcoporum concordiam cohærentem sua subdola & fallaci temeritate collidere, sed agere illic causam suam, ubi

& accusatores habere, & testes sui criminis possint; nisi si paucis desperatis & perditis minor videtur esse auctoritas episcoporum in Africa constitutorum, qui jam de illis judicaverunt, & eorum conscientiam multis delictorum laqueis vinctam judicii sui nuper gravitate damnaverunt. Jam causa eorum cognita est, jam de eis dicta sententia est; nec censuræ congruit sacerdotum mobilis atque inconstantis animi levitate reprehendi, cum Dominus doceat & dicat: *Sit sermo vester, est est, non non.* Si eorum, qui de illis priore anno judicaverunt, numerus cum presbyteris & diaconibus computetur, plures tunc affuerunt iudicio & cognitioni, quam sunt iidem isti, qui cum Fortunato nunc videntur esse conjuncti. Scire enim debes, frater carissime, eum posteaquam pseudoepiscopus ab hæreticis factus est, jam pœne ab omnibus esse desertum. Namque ii quibus in præteritum præstigia obtendebantur, & dabantur verba fallacia, quod simul ad ecclesiam regressuri dicerentur; posteaquam viderunt illic pseudoepiscopum factum, frustratos & deceptos se esse didicerunt, & remeant quotidie, atque ad ecclesiam pulsant, nobis tamen, a quibus ratio Domino reddenda est, anxie ponderantibus, & sollicite examinantibus, qui recipi & admitti ad ecclesiam debeant. Quibusdam enim ita aut crimina sua obsistunt, aut fratres obstinate & firmiter renituntur, ut recipi omnino non possint nisi cum scandalo & periculo plurimorum. Neque enim sic putamina quædam colligenda sunt, ut quæ integra & sana sunt vulnerentur, nec utilis aut consultus est pastor, qui ita morbidas & contactas oves gregi admiscet, ut gregem totum mali cohærentis afflictatione contamine. Non attendas ad numerum illorum. Melior est enim unus timens Deum, quam mille filii impii, sicut locutus est Dominus per prophetam dicens: *Fili, ne jocularis in filiis impiis, si multiplicentur tibi, cum non fuerit timor Dei in ipsis.* O si posses, frater caris-

carissime, istic interesse nobiscum, cum pravi isti & perversi de schismate revertuntur. Videres quis mihi labor sit persuadere patientiam fratribus nostris, ut animi dolore sopito recipiendis malis curandisque consentiant. Namque ut gaudent & lætantur, cum tolerabiles & minus culpabiles redeunt: ita contra fremunt & reluctantur, quoties inemendabiles & protervi, & vel adulteriis vel sacrificiis contaminati, & post hæc adhuc insuper & superbi, sic ad ecclesiam remeant, ut bona intus ingenia corrumpant. Vix plebi persuadeo, immo extorqueo, ut tales patiantur admitti. Et justior factus est fraternitatis dolor ex eo, quod unus atque alius, obnitente plebe & contradicente, mea tamen facilitate suscepti, peiores exstiterunt quam prius fuerant, nec fidem pœnitentiæ servare potuerunt, quia nec cum vera pœnitentia venerant. De istis vero quid dicam, qui nunc ad te cum Felicissimo omnium criminum reo navigaverunt, legati a Fortunato pseudoepiscopo missi, tam falsas ad te litteras afferentes, quam est & ipse cujus litteras ferunt, falsus; quam est ejus peccatorum multiplex conscientia, quam execrabilis vita, quam turpis, ut etsi in ecclesia essent, ejici tales de ecclesia debuissent? Denique quia conscientiam suam norunt, nec nos audent adire, aut ad ecclesiæ limen accedere; sed foris per provinciam circumveniendis fratribus & spoliandis pererrant, & omnibus jam satis noti, atque undique pro suis facinoribus exclusi, illuc etiam ad vos navigant. Neque enim potest illis frons esse ad nos accedendi, aut apud nos consistendi, cum sint acerbissima & gravissima crimina, quæ eis a fratribus ingeruntur. Si judicium nostrum voluerint experiri, veniant. Denique si qua illis excusatio & defensio potest esse, videamus quem habeant satisfationis suæ sensum, quem afferant pœnitentiæ fructum. Nec ecclesia istic cuiquam clauditur, nec episcopus
ali-

allicui denegatur. Patientia, & facilitas, & humanitas nostra venientibus præsto est. Opto omnes in ecclesiam regredi, opto universos commilitones nostros intra Christi castra, & Dei patris domicilia concludi. Remitto omnia, multa dissimulo studio & voto colligendæ fraternitatis. Etiam quæ in Deum commissa sunt, non pleno iudicio religionis examino. Delictis plusquam oportet remittendis pæne ipse delinquo. Amplector prompta & plena dilectione cum poenitentia revertentes, peccatum suum satisfactione humili & simplici confitentes. Si qui autem sunt, qui putant se ad ecclesiam non precibus, sed minis regredi posse, aut existimant aditum se sibi non lamentationibus & satisfactionibus, sed terroribus facere; pro certo habeant contra tales clausam stare ecclesiam Domini, nec castra Christi invicta & fortia, Domino tuente munita minis cedere. Sacerdos Dei evangelium tenens, & Christi præcepta custodiens occidi potest, vinci non potest. Suggestit & subministrat nobis exempla virtutis ac fidei Zacharias antistes Dei; qui cum terreri minis & lapidatione non posset: in templo Dei occisus est, clamans & identidem dicens, quod nos quoque contra hæreticos clamamus & dicimus: *Hæc dicit Dominus: Dereliquistis vias Domini, & Dominus derelinquet vos.* Neque enim, quia pauci temerarii & improbi cælestes & salutare vias Domini derelinquunt, & sancta non agentes a Sancto spiritu deferuntur; ideo & nos divinæ traditionis immemores esse debemus, ut maiora esse furentium scelera, quam sacerdotum iudicia censeamus, aut existimemus plus ad impugnandum posse humana conamina, quam quod ad protegendum prævalet divina tutela. An ad hoc, frater carissime, deponenda est catholicæ ecclesiæ dignitas, & plebis intus positæ fidelis atque incorrupta maiestas, & sacerdotalis quoque auctoritas ac potestas, ut iudicare velle se dicant de ecclesiâ
propo-

proposito extra ecclesiam constituti, de christiano hæretici, de sano faucii, de integro vulnerati, de stante lapsi, de iudice rei, de sacerdote sacrilegi? Quid superest, quam ut ecclesia Capitolio cedat, & recedentibus sacerdotibus, ac Domini altare removentibus, in cleri nostri sacrum venerandumque congestum simulacra atque idola cum aris suis transeant, & Novatiano declamandi adversum nos, atque increpandi largior & plenior materia præstetur, si ii qui sacrificaverunt, & Christum publice negaverunt, non tantum rogari, & sine acta pœnitentia admitti, sed adhuc insuper cœperint terroris sui potestate dominari? Si pacem postulant, arma deponant. Si satisfaciunt, quid minantur? Aut si comminantur, sciant quia a Dei sacerdotibus non timentur. Neque enim & antichristus cum venire cœperit, introibit in ecclesiam, quia minatur; aut armis ejus & violentiæ ceditur, quia resistentes perempturum se esse profitetur. Armant nos hæretici, dum nos putant sua comminatione terri, nec in pace nos dejiciunt, sed magis erigunt & accendunt, dum ipsam pacem persecutione pejorem fratribus faciunt. Et optamus quidem ne quod loquuntur furore, impleant crimine, ne qui verbis perfidis & crudelibus peccant, factis quoque delinquant. Oramus ac deprecamur Deum, quem provocare illi & exacerbare non desinunt, ut eorum corda mitescant, ut furore deposito ad sanitatem mentis redeant, ut pectora operta delictorum tenebris pœnitentiæ lumen agnoscant, & magis petant fundi pro se preces atque orationes antistitis, quam ipsi fundant sanguinem sacerdotis. Si autem in suo furore permanserint, atque in istis insidiis ac minis suis parricidalibus crudeliter perseveraverint, nullus Dei sacerdos sic infirmus est, sic jacens & abjectus, sic imbecillitate humanæ mediocritatis invalidus, qui non contra hostes & impugnatores Dei divinitus erigatur,
cujus

cujus non humilitas & infirmitas vigore & robore Domini protegentis animetur. Nostra nihil interest, aut a quo, aut quando perimamur, mortis & sanguinis præmium de Domino recepturi. Illorum flenda & lamentanda concisio est, quos sic diabolus excæcat, ut æterna gehennæ supplicia non cogitantes, antichristi jam propinquantis adventum conentur imitari. Et quamquam sciam, frater carissime, pro mutua dilectione quam debemus, & exhibemus invicem nobis, florentissimo illic clero tecum præsidenti, & sanctissimæ atque amplissimæ plebi legere te semper litteras nostras: tamen nunc & admoneo & peto, ut quod alias sponte atque honorifice facis, etiam petente me facias; ut hac epistola mea lecta, si quod illic contagium venenati sermonis & pestiferæ seminationis irreperat, id omne de fratrum auribus & pectoribus exuatur, & bonorum integra ac sincera dilectio ab omnibus hæreticæ detrectationis sordibus repurgetur. Declinent autem de cetero fortiter, & evitent dilectissimi fratres nostri verba & colloquia eorum, *quorum sermo ut cancer serpit*, sicut apostolus dicit: *Corrum-punt ingenia bona confabulationes pessima*. Et iterum: *Hæreticum hominem post unam correptionem evita, sciens quia perversus est hujusmodi, & peccat, & est a semetipso damnatus*. Et per salomonem loquitur spiritus sanctus: *Perversus, inquit, in ore suo portat perditionem, & in labiis suis ignem condit*. Item denuo monet dicens: *Sepi aures tuas spinis, & noli audire linguam nequam*. Et iterum: *Malus obaudit lingua iniquorum, justus autem non intendit labiis mendacibus*. Quod quamquam sciam illic fraternitatem nostram, vestra scilicet providentia munitam, sed & sua vigilantia satis cautam, nec capi hæreticorum venenis posse nec decipi, tantumque apud illos prævalere magisteria & præcepta divina, quantus illis in Deum timor est: tamen ex abundanti vel sollicitudo nostra, vel caritas scri-

scribere ad vos ista persuasit, ut nulla cum talibus commercia copulentur, nulla cum malis convivia, vel colloquia misceantur, simulque ab eis tam separati, quam sunt illi de ecclesia profugi, quia scriptum est: *Si autem & ecclesiam contempserit, sit tibi tamquam ethnicus & publicanus.* Et beatus apostolus non monet tantum, sed & jubet a talibus ut recedatur: *Præcipimus*, inquit, *vobis in nomine Domini Jesu Christi, ut recedatis ab omnibus fratribus ambulanti- bus inordinate, & non secundum traditionem, quam acceperunt a nobis.* Nulla societas fidei & perfidiæ potest esse. Qui cum Christo non est, qui adversarius Christi est, qui unitati & paci ejus inimicus est, nobiscum non potest cohærere. Si cum precibus & satisfactionibus veniunt, audiantur. Si maledicta & minas ingerunt, respuantur. Opto te, frater carissime, semper bene valere.

E P I S T O L A LVI.

Ad Thibaritanos de exhortatione martyrii.

CYPRIANUS plebi Thibari consistenti salutem. Cogitaveram quidem, fratres dilectissimi, atque in votis habebam, si rerum ratio ac temporis conditio permetteret, secundum quod frequenter desiderastis, ipse ad vos venire, & quantulacumque mediocritate exhortationis nostræ præsens illic fraternitatem corroborare. Sed quoniam sic rebus urgentibus detinemur, ut longe istinc excurrere, & diu a plebe cui de divina indulgentia præsumus, abesse non datur facultas, has interim pro me ad vos vicarias litteras misi. Nam cum Domini instruendis dignatione instigemur sæpius & admoneamur, ad vestram quoque conscientiam admonitionis nostræ sollicitudinem perferre debemus. Scire enim debetis, & pro certo credere ac tenere, pressuræ diem super caput esse co-

pisse,

pisse, & occasum sæculi atque antichristi tempus appropinquasse, ut parati omnes ad prælium stemus, nec quidquam nisi gloriam vitæ æternæ, & coronam confessionis dominicæ cogitemus, nec putemus talia esse quæ veniunt, qualia fuerunt illa quæ transierunt. Gravior nunc & ferocior pugna imminet, ad quam fide incorrupta & virtute robusta parare se debeant milites Christi, considerantes iccirco se quotidie calicem sanguinis Christi bibere, ut possint & ipsi propter Christum sanguinem fundere. Hoc est enim velle cum Christo inveniri, id quod Christus & docuit & fecit imitari, secundum Joannem apostolum dicentem: *Qui dicit se in Christo manere, debet quomodo ille ambulavit, & ipse ambulare.* Item beatus Paulus apostolus exhortatur & docet dicens: *Sumus filii. Si autem filii Dei, & heredes Dei, coheredes autem Christi, siquidem compatiamur, ut & commagnificemur.* Quæ nunc omnia considerata sunt nobis, ut nemo quidquam de sæculo jam moriente desideret, sed sequatur Christum, qui vivit in æternum, & vivificat servos suos in fide sui nominis constitutos. Venit enim tempus, fratres dilectissimi, quod jam pridem Dominus noster prænuntiavit, & docuit advenire docens: *Veniet hora ut omnis qui vos occiderit, putet se officium Deo facere. Sed hæc facient, quoniam non cognoverunt patrem, neque me. Hæc autem locutus sum vobis, ut cum venerit hora eorum, memores sitis quia ego dixi vobis.* Nec quisquam miretur persecutionibus nos assiduis fatigari, & pressuris angentibus frequenter urgeri, quando hæc futura in novissimis temporibus Dominus ante prædixerit, & militiam nostram magisterio & hortamento sui sermonis instruxerit, Petrus quoque apostolus ejus docuerit, ideo persecutiones fieri ut probemur, & ut dilectioni Dei, justorum præcedentium exemplo, nos etiam morte & passionibus copulemur. Posuit enim in epistola sua dicens:

cens: *Carissimi, nolite mirari ardorem accidentem vobis, qui ad tentationem vestram fit, nec excidatis tamquam novum aliquid vobis contingat; sed quotiescumque communicatis Christi passionibus, per omnia gaudete, ut & in revelatione facta claritatis ejus gaudentes exsultetis. Si improperatur vobis in nomine Christi, beati estis, quia majestatis & virtutis Domini nomen in vobis requiescit, quod quidem secundum illos blasphematur, secundum nos autem honoratur.* Docuerunt autem nos apostoli ea, quæ de præceptis dominicis & cælestibus mandatis ipsi quoque didicerunt, Domino ipso scilicet corroborante nos & dicente: *Nemo est qui relinquant domum, aut agrum, aut parentes, aut fratres, aut sorores, aut uxorem, aut filios propter regnum Dei, & non recipiat septies tantum in isto tempore, in saculo autem venturo vitam æternam.* Et iterum: *Beati, inquit, eritis, cum odio vos habuerint homines, & separaverint vos, & expulerint, & maledixerint nomini vestro quasi nequam propter filium hominis. Gaudete in illa die & exsultate. Ecce enim merces vestra multa est in calis.* Gaudere nos & exsultare voluit in persecutionibus Dominus; quia quando persecutiones sunt, tunc dantur coronæ fidei, tunc probantur milites Dei, tunc martyribus patent cæli. Neque enim sic nomen militiæ dedimus, ut pacem tantummodo cogitare, & detrectare & recusare militiam debeamus, quando in ipsa militia primus ambulaverit Dominus humilitatis & tolerantis & passionis magister, ut quod fieri docuit prior faceret, & quod pati hortatur, prior pro nobis ipse pateretur. Si ante oculos vestros, fratres dilectissimi, quod qui omne judicium a patre solus accepit, & qui venturus est judicaturus, jam judicii sui & cognitionis futuræ sententiam protulerit, prænuntians & contestans confesurum se coram patre suo confitentes, & negaturum negantes. Si mortem possemus evadere, merito mori timeremus. Porro autem cum mortalem mori neces-

S. Cypriani Tom. I.

L

se

se sit, amplectamur occasionem de divina promissione & dignatione venientem, & fungamur exitu mortis cum præmio immortalitatis, nec vereamur occidi, quos constat quando occidimur, coronari. Nec quisquam, fratres dilectissimi, cum populum nostrum fugari conspexerit metu persecutionis, & spargi conturbetur quod collectam fraternitatem non videat, nec tractantes episcopos audiat. Simul tunc omnes esse non possunt, quibus occidere non licet, sed occidi necesse est. Ubicumque in illis diebus unusquisque fratrum fuerit a grege interim necessitate temporis corpore, non spiritu separatus, non moveatur ad fugæ illius horrorem, nec recedens & latens deserti loci solitudine terreatur. Solus non est, cui Christus in fuga comes est. Solus non est, qui templum Dei servans, ubicumque fuerit, sine Deo non est. Et si fugientem in solitudine ac montibus latro oppreserit, fera invaserit, fames aut sitis aut frigus affligerit, vel per maria præcipiti navigatione properantem tempestas ac procella submerferit, spectat militem suum Christus ubicumque pugnantem, & persecutionis causa pro nominis sui honore morienti præmium reddit, quod daturum se in resurrectione promisit. Nec minor est martyrii gloria non publice & inter multos perisse, cum pereundi causa sit propter Christum perire. Sufficit ad testimonium martyrii sui testis ille, qui probat martyres & coronat. Imitemur, fratres dilectissimi, Abel justum, qui initiavit martyria, dum propter justitiam primus occiditur. Imitemur Abraham Dei amicum, qui non est cunctatus ut filium victimam suis manibus offerret, dum Deo fide devotionis obsequitur. Imitemur tres pueros, Ananiam, Azariam, & Misahalem, qui nec ætate terri, nec captivitate fracti, judæa devicta, & Hierosolymis captis, in ipso regno suo regem fidei virtute vicerunt, qui adorare statuam quam Nabuchodonosor rex fecerat.

rat.

rat iussi, & minis regis & flammis fortiores exstiterunt, proclamantes & fidem suam per hæc verba testantes: *Nabuchodonosor rex, non opus est nobis de hoc verbo respondere tibi: est enim Deus cui nos servimus, potens eripere nos de camino ignis ardentis, & de manibus tuis, rex, liberabit nos; & si non, notum fit tibi quia diis tuis non servimus, & imaginem auream quam statuisti, non adoramus.* Credebant se illi secundum fidem posse evadere; sed addiderunt, *& si non*, ut sciret rex illos propter Deum quem colebant, & mori posse. Hoc est enim robur virtutis & fidei credere & scire, quod Deus a morte præsentis liberare possit, & tamen mortem non timere nec cedere, ut probari fortius fides possit. Erupit per os eorum spiritus sancti incorruptus & invictus vigor, ut appareant vera esse, quæ in evangelio suo Dominus dixit: *Cum autem vos apprehenderint, nolite cogitare quid loquamini. Dabitur enim vobis in illa hora quid loquamini. Non enim vos estis qui loquimini, sed spiritus patris vestri, qui loquitur in vobis.* Dixit quid loqui & respondere possimus, dari nobis in illa hora divinitus & offerri, nec nos tunc esse qui loquimur, sed spiritum Dei patris; qui cum a confitentibus non discedit neque dividitur, ipse in nobis & loquitur & coronatur. Sic & Daniel cum compelleretur adorare idolum Bel, quem tunc populus & rex colebat, in asserendum Dei sui honorem plena fide & libertate prorupit dicens: *Nihil colo ego nisi Dominum Deum meum, qui condidit calum & terram.* Quid in Machabæis beatorum martyrum gravia tormenta, & multiformes septem fratrum pænæ, & confortans liberos suos mater in pænis, & moriens ipsa quoque cum liberis, nonne magnæ virtutis & fidei documenta testantur, & nos ad martyrii triumphum suis passionibus adhortantur? Quid prophetæ, quos ad præscientiam futurorum spiritus sanctus animavit? Quid apostoli, quos Dominus elegit? Nonne cum

justi occiduntur, propter justitiam mori nos quoque docuerunt? Christi nativitas a martyriis infantium statim cœpit, ut ob nomen ejus a bimatu & infra qui fuerant, necarentur. Ætas necdum habilis ad pugnam idonea exstitit ad coronam. Ut appareret innocentes esse, qui propter Christum necantur, infantia innocens ob nomen ejus occisa est. Ostensum est neminem esse a periculo persecutionis immunem, quando & tales martyria fecerunt. Quam vero gravis causa sit hominis christiani servum pati nolle, cum prior passus sit Dominus, & pro peccatis nostris nos pati nolle, cum peccatum suum proprium non habens, passus sit ille pro nobis? Filius Dei passus est, ut nos filios Dei faceret, & filius hominis pati non vult ut esse Dei filius perseveret. Si odio sæculi laboramus, odium sæculi sustinuit prior Christus. Si contumelias in hoc mundo, si fugam, si tormenta toleramus, graviora expertus est mundi factor & dominus, qui & admonet dicens: *Si sæculum, inquit, vos odit, mementote quia me priorem vobis odiit. Si de sæculo essetis, sæculum quod suum esset, amaret. Sed quia de sæculo non estis, & ego elegi vos de sæculo, propterea odit vos sæculum. Mementote sermonis quem dixi vobis. Non est servus major domino suo. Si me persecuti sunt, & vos persequentur.* Dominus & Deus noster quidquid docuit & fecit, ut discipulus excusatus esse non possit, qui discit & non facit. Neque aliquis ex vobis, fratres dilectissimi, futuræ persecutionis metu, aut antichristi imminentis adventu sic terreatur, ut non evangelicis exhortationibus & præceptis ac monitis cælestibus ad omnia inveniatur armatus. Venit antichristus, sed & supervenit Christus. Grassatur & sævit inimicus, sed & statim sequitur Dominus, passionibus nostras & vulnera vindicaturus. Irascitur adversarius & minatur, sed est qui possit de ejus manibus liberare. Ille metuendus est, cujus iram nemo poterit

terit evadere, ipso præmonente & dicente: *Ne timueritis eos qui occidunt corpus, animam autem non possunt occidere. Magis autem metuite eum, qui potest & corpus & animam occidere in gehennam. Et iterum: Qui amat animam suam, perdet illam, & qui odit animam suam in isto sæculo, in vitam æternam conservabit illam. Et in apocalypsi instruit & præmonet dicens: Si quis adorat bestiam & imaginem ejus, & accipit notam in fronte sua & in manu, bibit & ipse de vino iræ Dei mixto in poculo iræ ejus, & punietur igne & sulphure sub oculis sanctorum angelorum & sub oculis agni, & fumus de tormentis eorum ascendet in sæcula sæculorum, nec habebunt requiem die ac nocte, quicumque adorant bestiam & imaginem ejus. Ad agonem sæcularem exercentur homines & parantur; & magnam gloriam computant honoris sui; si illis spectante populo & Imperatore præsentem contigerit coronari. Ecce agon sublimis & magnus, & coronæ cælestis præmio gloriosus; ut spectet nos certantes Deus, & super eos quos filius facere dignatus est, oculos suos pandens certaminis nostri spectaculo perfruat. Præliantes nos & fidei congressione pugnantem spectat Deus, spectant angeli ejus, spectat & Christus. Quanta est gloriæ dignitas & quanta felicitas, præsentem Deo congredi & Christo iudice coronari? Armemur, fratres dilectissimi, viribus totis, & paremur ad agonem mente incorrupta, fide integra, virtute devota. Ad aciem quæ nobis indicitur, Dei castra procedant. Armentur integri, ne perdat integer quod nuper stetit. Armentur & lapsi, ut & lapsus recipiat, quod amisit. Integros honor, lapsos dolor ad prælium provocet. Armari & præparari nos beatus Paulus apostolus docet dicens: *Non est nobis colluctatio adversus carnem & sanguinem, sed adversus potestates & principes hujus mundi & harum tenebrarum, adversus spiritus nequitie in cælestibus. Propter quod induite tota arma, ut possitis resistere in die nequissimo; ut cum-**

omnia perfeceritis, stetis accincti lumbos vestros in veritate, induti lorica[m] iustitiæ, & calciati pedes in præparatione evangelii pacis, assumentes scutum fidei, in quo possitis omnia ignita jacula nequissimi extinguere, & galeam salutis, & gladium spiritus, qui est sermo Dei. Hæc arma sumamus, his nos juramentis spiritalibus & cœlestibus muniamus, ut in die nequissimo resistere diaboli minis & repugnare possimus. Induamus lorica[m] iustitiæ, ut contra inimici jacula munitum sit pectus & tutum. Calciati sint evangelico magisterio & armati pedes; ut cum serpens calcari a nobis & obteri cœperit, mordere & supplantare non possit. Portemus fortiter scutum fidei, quo protegente quidquid jaculatur inimicus, possit extinguui. Accipiamus quoque ad tegumentum capitis galeam salutarem, ut muniatur aures, ne audiant edicta feralia, muniatur oculi, ne videant detestanda simulacra, muniatur frons, ut signum Dei incolume servetur, muniatur os, ut Dominum suum Christum victrix lingua fateatur. Armemus & dexteram gladio spiritali, ut sacrificia funesta fortiter respuat, ut eucharistiæ memor, quæ Domini corpus accepit, ipsum complectatur, postmodum a Domino sumptura præmium cœlestium coronarum. O dies ille qualis & quantus adveniet, fratres dilectissimi, cum cœperit populum suum Dominus recensere, & divinæ cognitionis examine singulorum merita recognoscere, mittere in gehennam nocentes, & persecutores nostros flammæ pœnalis perpetuo ardore flammare, nobis vero mercedem fidei & devotionis exsolvere. Quæ erit gloria & quanta lætitia admitti ut Deum videas, honorari ut cum Christo Domino Deo tuo salutis ac lucis æternæ gaudium capias, Abraham & Isaac & Jacob, & patriarchas omnes & prophetas, & apostolos & martyres salutare, cum iustis & Dei amicis in regno cœlorum datæ immortalitatis voluptate gaudere, sumere illic

illic quod nec oculus vidit, nec auris audivit, nec in cor hominis ascendit. Majora enim nos accipere quam quod hic aut operamur aut patimur, apostolus prædicat dicens: *Non sunt condigna passionibus hujus temporis ad superventuram claritatem, quæ revelabitur in nobis.* Dum revelatio illa venerit, cum claritas super nos Dei fulserit, tam beati erimus & læti, dignatione Domini honorati, quam rei remanebunt & miseri, qui Dei desertores aut contra Deum rebelles voluntatem fecerunt diaboli, ut eos necesse sit cum ipso simul inextinguibili igne torqueri. Hæc, fratres dilectissimi, hæreant cordibus nostris. Hæc sit armorum nostrorum præparatio, hæc diurna ac nocturna meditatio, ante oculos habere & cogitatione semper ac sensibus volvere iniquorum supplicia & præmia ac merita justorum, quid negantibus Dominus comminetur ad pœnam, quid contra confitentibus promittat ad gloriam. Si hæc cogitantibus ac meditantibus nobis supervenerit persecutionis dies, miles Christi præceptis ejus & monitis eruditus non expavescit ad pugnam, sed paratus est ad coronam. Opto vos, fratres carissimi, semper bene valere.

E P I S T O L A LVII.

Ad Cornelium in exilio de ejus confessione.

CYPRIANUS Cornelio fratri salutem. Cognovimus, frater carissime, fidei ac virtutis vestræ testimonia gloriosa, & confessionis vestræ honorem sic exultanter accepimus, ut in meritis ac laudibus vestris nos quoque participes & socios computemus. Nam cum nobis & ecclesia una sit, & mens juncta, & individua concordia, quis non sacerdos in consacerdotis sui laudibus tamquam in suis propriis gratuletur? aut quæ fraternitas non in fratrum gaudio ubi-

que lætetur? Exprimi satis non potest quanta istic exultatio fuerit, & quanta lætitia cum de vobis prospera & fortia comperissemus, ducem te illic confessionis fratribus exstitisse, sed & confessionem ducis de fratrum consensione crevisse; ut dum præcedis ad gloriam, multos feceris gloriæ comites, & confessorum populum suaseris fieri, dum primus paratus es pro omnibus confiteri; ut non inveniamus, quid prius prædicare in vobis debeamus, utrumne tuam promptam & stabilem fidem, an inseparabilem fidem, fratrum caritatem. Virtus illic episcopi præcedentis publice comprobata est, adunatio sequentis fraternitatis ostensa est. Dum apud vos unus animus & una vox est, ecclesia omnis Romana confessa est. Clauit, fratres carissimi, fides quam de vobis beatus apostolus prædicavit. Hanc laudem virtutis & roboris firmitatem jam tunc in spiritu prævidebat, & præconio futurorum merita vestra contestans, dum parentes laudat, filios provocat. Dum sic unanimes, dum sic fortes estis, magna & ceteris fratribus unanimitalis & fortitudinis exempla tribuistis. Docuistis granditer Deum timere, Christo firmiter adhærere, plebem sacerdotibus in periculo jungi, in persecutione fratres a fratribus non separari, concordiam simul junctam vinci omnino non posse, quidquid simul petitur a cunctis, Deum pacis pacificis exhibere. Profilierat adversarius terrore violento Christi castra turbare. Sed quo impetu venerat, eodem impetu pulsus & victus est; & quantum formidinis & terroris attulit, tantum fortitudinis invenit & roboris. Supplantare se iterum posse crediderat Dei servos, & velut tirones & rudes, quasi minus paratos, & minus cautos solito suo more concutere. Unum primo aggressus, ut lupus ovem secernere a grege, ut accipiter columbam ab agmine volantium separare tentaverat; nam cui non est adversus omnes satis virum,

rium, circumvenire quærit solitudinem singulorum. Sed retusus adunati exercitus fide pariter & vigore, intellexit milites Christi vigilare jam sobrios, & armatos ad prælium stare, vinci non posse, mori posse, & hoc ipso invictos esse, quia mori non timent; nec repugnare contra impugnantes, cum occidere innocentibus nec nocentibus nec nocentem liceat, sed prompte & animas & sanguinem tradere; ut cum tanta in sæculo malitia & sævitia grassetur, a malis & sævis velocius recedatur. Quale illud fuit sub oculis Dei spectaculum gloriosum, quale in conspectu Christi ecclesiæ suæ gaudium, ad pugnam quam tentaverat hostis inferre, non singulos milites, sed tota simul castra prodiisse! Omnes enim constat venturos fuisse, si audire potuissent, quando accurrerit properanter, & venerit quisquis audivit. Quot illic lapsi gloriosa confessione sunt restituti! Steterunt fortes, & ipso dolore pœnitentiæ facti ad prælium fortiores; ut appareat nuper subitatos esse, & novæ, atque insuetæ rei pavore trepidasse; rediisse ad se postmodum fidem veram, & vires suas de Dei timore collectas, ad omnem patientiam constanter & firmiter roborasse, nec jam stare ad criminis veniam, sed ad passionis coronam. Quid ad hæc Novatianus, frater carissime? Utrumne jam deponit errorem? An vero, qui dementium mos est, ipsis bonis & prosperis nostris plus adactus est ad furorem? & quo magis ac magis dilectionis ac fidei crescit hic gloria, illic dissensionis & zeli recrudescent infania; nec vulnus suum miser curat, sed adhuc gravius & se, & suos vulnerat, in perniciem fratrum lingua sua perstrepsens, & facundiæ venenatæ jacula contorquens, magis durus sæcularis philosophiæ pravitate, quam sopheriæ dominicæ lenitate pacificus, desertor ecclesiæ, misericordiæ hostis, interfector pœnitentiæ, doctor superbiæ, veritatis corruptor, perditor caritatis? Agnoscitne jam

qui sit sacerdos Dei? quæ sit ecclesia & domus Christi? qui sint Dei servi, quos diabolus infestet? qui sint christiani, quos antichristus impugnet? Neque enim quærit illos, quos jam subegit, aut gestit evertere, quos jam suos effecit. Inimicus & hostis ecclesiæ quos alienavit ab ecclesia, & foras duxit, ut captivos & victos contemnit & præterit: eos pergit lacerare, in quibus Christum cernit habitare. Quamquam etsi aliquis ex talibus fuerit apprehensus, non est quod sibi quasi in confessione nominis blandiatur, cum constet, si occisi ejusmodi extra ecclesiam fuerint, fidei coronam non esse, sed pœnam potius esse perfidiæ, nec in domo Dei inter unanimes habituros esse, quos videmus de pacifica & divina domo furore discordiæ recessisse. Hortamur plane quantum possumus, frater carissime, pro caritate mutua, qua nobis invicem cohæremus ut, quoniam providentia Domini monentis instruimur, & divinæ misericordiæ consiliis salubribus admonemur, appropinquare jam certaminis & agonis nostri diem, jejuniis, vigiliis, orationibus insistere cum omni plebe non desinamus. Incumbamus gemitibus assiduis, & deprecationibus crebris. Hæc sunt enim nobis arma cælestia, quæ stare & perseverare fortiter faciunt. Hæc sunt munimenta spiritalia, & tela divina, quæ protegent. Memores nostri invicem simus, concordēs atque unanimes, utrobique pro nobis semper oremus, prefuras & angustias mutua caritate relevemus, & si quis istinc nostrum prior divinæ dignationis celeritate præcesserit, perseveret apud Dominum nostra dilectio, pro fratribus, & sororibus nostris apud misericordiam patris non cesset oratio. Opto te, frater carissime, semper bene valere.

EPISTOLA LVIII.

Ad Lucium Papam Romanum reversum ab exilio.

CYPRIANUS cum collegis Lucio fratri salutem. Et nuper quidem tibi, frater carissime, gratulati sumus, cum te honore geminato in ecclesiæ suæ administratione confessorem pariter & sacerdotem constituit divina dignatio. Sed & nunc non minus tibi & comitibus tuis, atque universæ fraternitati gratulamur, quod cum eadem gloria & laudibus vestris reduces vos denuo ad suos fecerit benigna Domini & larga protectio; ut pascendo gregi pastor, & gubernandæ navi gubernator, & plebi regendæ rector redderetur, & appareret relegationem vestram sic divinitus esse dispositam, non ut episcopus relegatus & pulsus ecclesiæ deesset, sed ut ad ecclesiam major rediret. Neque enim in tribus pueris minor fuit martyrii dignitas, quia morte frustrata de camino ignis incolumes exierunt, aut non consummatus Daniel exstitit in suis laudibus, quia qui leonibus missus fuerat ad prædam, protectus a Domino vixit ad gloriam. In confessoribus Christi dilata martyria non meritum confessionis minuunt, sed magnalia divinæ protectionis ostendunt. Repræsentatum videmus in vobis, quod apud regem fortes atque illustres pueri prædixerunt, ipsos quidem paratos esse ardere flammis, ne diis ejus servirent, aut imaginem quam fecerat, adorarent; Deum tamen quem colebant, quemque & nos colimus, potentem esse ut eos de camino ignis eximeret, & de regis manibus, ac de pœnis præsentibus liberaret. Quod invenimus in confessionis vestræ fide, & in Domini circa vos protectione nunc gestum, ut cum vos parati fueritis & prompti omne subire supplicium, Dominus tamen vos pœnæ subtraheret, & ecclesiæ reservaret. Regredientibus vobis
bre-

breviata non est in episcopo confessionis suæ dignitas, sed magis crevit sacerdotalis auctoritas; ut altari Dei assistat antistes, qui ad confessionis arma fumenda, & facienda martyria non verbis plebem, sed factis cohortetur, & imminente antichristo paret ad prælium milites, non solum sermonis & vocis incitamento, sed fidei & virtutis exemplo. Intelligimus, frater carissime, & tota cordis nostri luce perspicimus divinæ majestatis salutaria & sancta consilia, unde illic repentina persecutio nuper exorta sit, unde contra ecclesiam Christi, & episcopum Cornelium beatum martyrem, vosque omnes sæcularis potestas subito proruperit; ut ad confundendos hæreticos & retundendos ostenderet Dominus, quæ esset ecclesia, quis episcopus ejus unus, divina ordinatione delectus, qui cum episcopo presbyteri sacerdotali honore conjuncti, quis adunatus & verus Christi populus, dominici gregis caritate connexus, qui essent, quos inimicus lacefferet, qui contra, quibus diabolus ut suis parceret. Neque enim persequitur & impugnat Christi adversarius, nisi castra & milites Christi. Hæreticos prostratos semel & suos factos contemnit & præterit. Eos quærit dejicere, quos videt stare. Atque utinam nunc facultas daretur, frater carissime, ut interesse illic vobis regredientibus possemus, qui vos mutua caritate diligimus, ut adventus vestri lætissimum fructum præsentem cum ceteris ipsi quoque caperemus. Quæ illic exultatio omnium fratrum? qui concursus atque complexus occurrentium singulorum? Vix oculis adhærentium potest satisfieri, vix vultus ipsi atque oculi plebis possunt videndo satiari de adventus vestri gaudio. Cognoscere illic fraternitas cœpit, qualis & quanta sit secutura Christo veniente lætitia; cujus quia cito appropinquabit adventus, imago jam quædam præcessit in vobis, ut quomodo Joannes præcursor ejus & prævius veniens prædicavit Christum

stum venisse, sic nunc episcopo confessore Domini & fidei dote redeunte, appareat & Dominum jam redire. Vicarias vero pro nobis ego & collegæ, & fraternitas omnis has ad vos litteras mittimus, frater carissime, & repræsentantes vobis per epistolam gaudium nostrum, fida obsequia caritatis expromimus, hic quoque in sacrificiis atque in orationibus nostris non cessantes Deo patri, & Christo filio ejus Domino nostro gratias agere, & orare pariter ac petere, ut qui perfectus est atque perficiens, custodiat & perficiat in vobis confessionis vestræ gloriosam coronam; qui & ad hoc vos fortasse revocavit ne gloria esset occulta, si foris essent confessionis vestræ consummata martyria. Nam victima quæ fraternitati præbet exemplum & virtutis & præsentibus debet fratribus immolari. Optamus te, frater carissime, semper bene valere.

E P I S T O L A L I X.

Ad Fidum de infantibus baptizandis.

CYPRIANUS & ceteri collegæ qui in concilio affuerunt numero LXVI. Fido fratri salutem. Legimus litteras tuas, frater carissime, quibus significasti, de Victore quondam presbytero, quod ei, antequam pœnitentiam plenam egisset, & Domino Deo, in quem deliquerat, satisfecisset, Therapius collega noster immaturo tempore et præpropere festinatione pacem dederit. Quæ res nos satis movit, recessum esse a decreti nostri auctoritate, ut ante legitimum & plenum tempus satisfactionis, & sine petitu & conscientia plebis, nulla infirmitate urgente ac necessitate cōgente, pax ei concederetur. Sed liberato apud nos diu consilio, satis fuit objurgare Therapium collegam nostrum, quod temere hoc fecerit, & instru-

struxisse, ne quid tale de cetero faciat. Pacem tamen quomodocumque a sacerdote Dei semel datam non putavimus auferendam, ac per hoc Victori communicationem sibi concessam usurpare permisimus. Quantum vero ad causam infantium pertinet, quos dixisti intra secundum vel tertium diem, quo nati sint, constitutos baptizari non oportere, & considerandam esse legem circumcisionis antiquæ, ut intra octavum diem eum qui natus est, baptizandum & sanctificandum non putares; longe aliud in concilio nostro omnibus visum est. In hoc enim quod tu putabas esse faciendum, nemo consensit, sed universi potius judicavimus nulli homini nato misericordiam Dei & gratiam denegandam. Nam cum Dominus in evangelio suo dicat: *Filius hominis non venit animas hominum perdere, sed salvare*, quantum in nobis est, si fieri potest, nulla anima perdenda est. Quid enim ei deest, qui semel in utero Dei manibus formatus est? Nobis enim atque oculis nostris secundum dierum sæcularium cursum, accipere qui nati sunt, incrementum videntur. Ceterum quæcumque a Deo fiunt, Dei factoris majestate & opere perfecta sunt. Esse denique apud omnes, sive infantes, sive majores nati, unam divini muneris æqualitatem declarat nobis divinæ scripturæ fides. Helisæus super infantem viduæ filium, qui mortuus jacebat, ita se Deum deprecans superstravit, ut capiti caput, & faciei facies applicaretur, & superfusi Helisæi membra singulis parvuli membris, & pedes pedibus jungerentur. Quæ res si secundum nativitatis nostræ & corporis inæqualitatem cogitetur, adulto & provecto infans non posset æquari, nec cohærere & sufficere possent parva membra majoribus. Sed illic æqualitas divina & spiritualis exprimitur, quod pares atque æquales sint omnes homines, quando a Deo semel facti sunt, & possit ætas nostra in incrementis corpo-

corporis secundum sæculum, non secundum Deum, habere discrimen; nisi si & gratia ipsa, quæ baptizatis datur, pro ætate accipientium vel minor, vel major tribuitur, cum spiritus sanctus non de mensura, sed de pietate atque indulgentia paterna, æqualis omnibus præbeatur. Nam Deus ut personam non accipit, sic nec ætatem, cum se omnibus ad cælestis gratiæ consecutionem æqualitate librata præbeat patrem. Nam & quod vestigium infantis in primis partus sui diebus constituti, mundum non esse dixisti, quod unusquisque nostrum adhuc horreat exosculari, nec hoc putamus ad cælestem gratiam dandam impedimento esse oportere. Scriptum est enim: *Omnia munda sunt mundis*. Nec aliquis nostrum id debet horrere, quod Deus dignatus est facere. Nam etsi adhuc infans a partu novus est, non ita est tamen, ut quisquam illum in gratia danda atque in pace facienda horrere debeat osculari; quando in osculo infantis unusquisque nostrum pro sua religione ipsas adhuc recentes Dei manus debeat cogitare, quas in homine modo formato & recens nato quodam modo exosculamur, quando id quod Deus fecit, amplectimur. Nam quod in Judaica circumcissione carnali octavus dies observabatur; sacramentum est in umbra atque in imagine ante præmissum, sed veniente Christo veritate completum. Nam quia octavus dies, id est, post sabbatum primus dies, futurus erat, quo Dominus resurgeret, & nos vivificaret, & circumcissionem nobis spiritalem daret: hic dies octavus, id est, post sabbatum primus & dominicus, præcessit in imagine. Quæ imago cessavit superveniente postmodum veritate, & data nobis spiritali circumcissione. Propter quod neminem putamus a gratia consequenda impedendum esse ea lege, quæ jam statuta est, nec spiritalem circumcissionem impediri carnali circumcissione debere, sed omnem omnino hominem admittendum esse

esse ad gratiam Christi, quando & Petrus in actis apostolorum loquatur, & dicat: *Dominus mihi dixit neminem hominem communem dicendum & immundum.* Ceterum si homines impedire aliquid ad consecutionem gratiæ posset, magis adultos, & provectos, & majores natu possent impedire peccata graviora. Porro autem si etiam gravissimis delictoribus & in Deum multum ante peccantibus, cum postea crediderint, remissa peccatorum datur, & a baptismo atque a gratia nemo prohibetur; quanto magis prohiberi non debet infans, qui recens natus nihil peccavit, nisi quod secundum Adam carnaliter natus contagium mortis antiquæ prima nativitate contraxit, qui ad remissionem peccatorum accipiendam hoc ipso facilius accedit, quod illi remittuntur, non propria, sed aliena peccata. Et idcirco, frater carissime, hæc fuit in concilio nostra sententia, a baptismo atque a gratia Dei, qui omnibus misericors, & benignus, & pius est, neminem per nos debere prohiberi. Quod cum circa universos observandum sit atque retinendum, tum magis circa infantes ipsos & recens natos observandum putamus, qui hoc ipso de ope nostra, ac de divina misericordia plus merentur, quod in primo statim nativitatis suæ ortu plorantes ac fientes nihil aliud faciunt, quam deprecantur. Optamus te, frater carissime, semper bene valere.

EPISTOLA LX.

Ad episcopos Numidas de redemptione fratrum ex captivitate barbarorum.

CYPRIANUS Januario, Maximo, Proculo, Victorio, Modiano, Nemesiano, Nampulo, & Honorato fratribus salutem. Cum maximo animi nostri gemitu & non sine lacrimis legimus litteras vestras, fra-

fratres carissimi, quas ad nos pro dilectionis vestræ sollicitudine de fratribus nostrorum & sororum captivitate fecistis. Quis enim non doleat in ejusmodi casibus? aut quis non dolorem fratris sui suum proprium computet, cum loquatur apostolus Paulus & dicat: *Si patitur unum membrum, compatiuntur & cetera membra: si letatur membrum unum, collatantur & cetera membra.* Et alio loco: *Quis infirmatur, inquit, & non ego infirmor?* Quare nunc & nobis captivitas fratrum nostra captivitas computanda est, & periclitantium dolor pro nostro dolore numerandus est; cum sit scilicet adunationis nostræ corpus unum, & non tantum dilectio, sed & religio instigare nos debeat, & confortare ad fratrum membra redimenda. Nam cum denuo apostolus Paulus dicat: *Nescitis quia templum Dei estis, & spiritus Dei habitat in vobis?* etiamsi caritas nos minus adigeret ad opem fratribus ferendam; considerandum tamen hoc in loco fuit Dei templa esse, quæ capta sunt, nec pati nos longa cessatione & neglecto dolore debere, ut diu Dei templa captiva sint, sed quibus possumus viribus elaborare, & velociter gerere, ut Christum judicem, & Dominum & Deum nostrum promereamur obsequiis nostris. Nam cum dicat Paulus apostolus: *Quotquot in Christo baptizati estis, Christum induistis;* in captivis fratribus nostris contemplandus est Christus & redimendus de periculo captivitatis, qui nos redemit de periculo mortis; ut qui nos de diaboli faucibus exiit, nunc ipse qui manet & habitat in nobis, de barbarorum manibus exuatur, & redimatur nummaria quantitate, qui nos cruce redemit & sanguine; qui iccirco hæc fieri interim patitur, ut fides nostra tentetur, an faciat unusquisque pro altero, quod pro se fieri vellet, si apud barbaros teneretur ipse captivus. Quis enim non humanitatis memor, & mutuae dilectionis admonitus, si pater est, illic esse nunc filios suos compu-

S. Cypriani Tom. I.

M

tet?

tet? si maritus est, uxorem suam illic captivam teneri cum dolore pariter ac pudore vinculi maritalis existimet? Quantus vero communis omnibus nobis mœror atque cruciatus est de periculo virginum, quæ illic tenentur; pro quibus non tantum libertatis, sed & pudoris jactura plangenda est, nec tam vincula barbarorum, quam lenonum & lupanarium stupra deflenda sunt; ne membra Christo dicata, & in æternum continentiae honorem pudica virtute devota insultantium libidine, & contagione fœdentur? Quæ omnia istic secundum litteras vestras fraternitas nostra cõgitans, & dolenter examinans, prompte omnes & libenter ac largiter subsidia nummaria fratribus contulerunt, semper quidem secundum fidei suæ firmitatem ad opus Dei proni, nunc tamen magis ad opera salutaria contemplatione tanti doloris accensi. Nam cum Dominus in evangelio suo dicat: *Infirmus fui, & visitastis me*: quanto nunc quoque cum majore operis nostri mercede dicturus est: *Captivus fui, & redemistis me*. Et cum denuo dicat: *In carcere fui, & venistis ad me*, quanto plus est cum cœperit dicere: *In carcere captivitatis fui, & clausus & vinctus apud barbaros jacui, & de carcere illo servitutis liberaastis me*, cum judicii dies venerit, præmium de Domino recepturi? Denique maximas vobis gratias agimus, quod nos vestræ sollicitudinis, & tam bonæ ac necessariæ operationis participes esse voluistis, ut offerretis nobis agros uberes, in quibus spei nostræ semina mitteremus, expectaturi messem de amplissimis fructibus, qui de hac cælesti & salutari operatione proveniunt. Misimus autem sestertia centum millia nummorum, quæ istic in ecclesia, cui de Domini indulgentia præsumus, cleri & plebis apud nos consistentis collatione collecta sunt, quæ vos illic pro vestra diligentia dispensabitis. Et optamus quidem nihil tale de cetero fieri, & fratres nostros Domini majestate protectos ab ejusmodi periculis

culis incolumes reservari. Si tamen ad explorandam nostri animi caritatem, & examinandam nostri pectoris fidem tale aliquid acciderit, nolite cunctari nuntiare hæc nobis litteris vestris, pro certo habentes ecclesiam nostram, & fraternitatem istic universam ne hæc ultra fiant, precibus orare; si facta fuerint, libenter & largiter subsidia præstare. Ut autem fratres nostros ac sorores, qui ad hoc opus tam necessarium prompte ac libenter operati sunt, ut semper operentur, in mente habeatis in orationibus vestris, & eis vicem boni operis in sacrificiis & precibus præsentetis: subdidi nomina singulorum; sed & collegarum quoque & confacerdotum nostrorum, qui & ipsi, cum præsentesset, & suo & plebis suæ nomine quædam pro viribus contulerunt, nomina addidi; & præter quantitatem propriam nostram, eorum quoque summulas significavi & misi, quorum omnium secundum quod fides & caritas exigit, in orationibus & precibus vestris meminisse debetis. Optamus vos, fratres carissimi, semper bene valere & nostri meminisse.

E P I S T O L A L X I.

Ad Euchratium de histrione.

CYPRIANUS Euchratio fratri salutem. Pro dilectione mutua & verecundia tua consulendum me existimasti, frater carissime, quid mihi videatur de histrione quodam, qui apud vos constitutus in ejusdem adhuc artis suæ dedecore perseverat, & magister & doctor non erudiendorum, sed perdendorum puerorum, id quod male didicit, ceteris quoque insinuat; an talis debeat communicare nobiscum. Quod puto ego nec majestati divinæ, nec evangelicæ disciplinæ congruere, ut pudor & honor ecclesiæ tam

M 2

turpi

turpi & infami contagione fœdetur. Nam cum in lege prohibeantur viri induere muliebrem vestem, & maledicti ejusmodi judicentur; quanto majoris est criminis, non tantum muliebria indumenta accipere, sed & gestus quoque turpes, & molles, & muliebres magisterio impudicæ artis exprimere? Nec excuset se quisquam, si a theatro ipse cessaverit, cum tamen hoc ceteros doceat. Non potest enim videri cessasse, qui vicarios substituit, & qui pro se uno plures succedaneos suggerit contra institutionem Dei, erudiens & docens, quemadmodum masculus frangatur in feminam, & sexus arte mutetur, & diabolo divinum plasma maculanti per corrupti atque enervati corporis delicta placeatur. Quod si penuriam talis & necessitatem paupertatis obtendit, potest inter ceteros, qui alimentis ecclesiæ sustinentur, hujus quoque necessitas adjuvari, si tamen contentus sit frugalioribus, sed innocentibus cibis. Nec putet salario se esse redimendum, ut a peccatis cesset, quando hoc non nobis, sed sibi præstet. Ceterum quantum velit inquirat, qualis quæstus est qui de convivio Abraham, & Isaac, & Jacob homines rapit, & male ac perniciose in sæculo saginatos ad æternæ famis ac sitis supplicia deducit. Et ideo, quantum potes, ab hac eum pravitate & dedecore ad viam innocentiae, atque ad spem vitæ æternæ revoca; ut sit contentus ecclesiæ sumptibus, parcioribus quidem, sed salutaribus. Quod si illic ecclesia non sufficit, ut laborantibus præstet alimenta, poterit se ad nos transferre, & hic quod sibi ad victum atque ad vestitum necessarium fuerit accipere; nec alios extra ecclesiam mortalia docere, sed ipse salutaria in ecclesia discere. Opto te, frater carissime, semper bene valere.

E P I S T O L A LXII.

Ad Pomponium de virginibus.

CYPRIANUS, Cæcilius, Victor, Sedatus, Tertullus, cum presbyteris qui præsentes aderant, Pomponio fratri salutem. Legimus litteras tuas, frater carissime, quas per Paconium fratrem nostrum misisti, postulans & desiderans, ut tibi rescriberemus, quid nobis de iis virginibus videatur, quæ cum semel statum suum continenter & firmiter tenere decreverint, detectæ sint postea in eodem lecto pariter mansisse cum masculis, ex quibus unum diaconum esse dicis: plane easdem, quæ se cum viris dormisse confessæ sint, asseverare se integras esse. Circa quam rem, quoniam consilium nostrum desiderasti, scias nos ab evangelicis & apostolicis traditionibus non recedere, quo minus fratribus & sororibus nostris constanter & fortiter consulatur, & per omnes utilitatis & salutis vias ecclesiastica disciplina servetur; cum Dominus loquatur & dicat: *Et dabo vobis pastores secundum cor meum, & pascent vos pascentes cum disciplina: & iterum scriptum sit: Disciplinam qui abjicit, infelix est: & in psalmis quoque spiritus sanctus admoneat, & instruat dicens: Continete disciplinam, ne forte irascatur Dominus, & pereatis a via recta, cum exarserit cito ira ejus super vos.* Primo igitur in loco, frater carissime, & præpositis & plebi nihil aliud elaborandum est, quam ut qui Deum timemus, cum omni observatione disciplinæ divina præcepta teneamus, nec patiamur errare fratres nostros, & pro arbitrio & ructu suo vivere, sed ad vitam singulis fideliter consulere; nec pati virgines cum masculis habitare, non dico simul dormire, sed nec simul vivere, quando & sexus infirmus, & ætas adhuc lubrica per omnia frenari a nobis & regi debeat, ne diabolo insidianti, & sævire cupienti ad

nocendum detur occasio, quando & apostolus dicat: *Nolite locum dare diabolo.* Liberanda est vigilanter de periculosis locis navis, ne inter scopulos & saxa frangatur. Exuenda est velociter de incendio sarcina, prius quam flammis supervenientibus concremetur. Nemo diu tutus est, periculo proximus. Nec evadere diabolum servus Dei poterit, qui se diaboli laqueis implicavit. Intercedendum est cito talibus, ut separentur, dum adhuc separari innocentes possunt, quia dividi postmodum nostra intercessionē non poterunt, postea quam conscientia gravissima cohæserunt. Denique quam graves multorum ruinas hinc fieri videmus, & per hujusmodi illicitas & periculosas conjunctiones corrumpi plurimas virgines cum summo animi nostri dolore conspiciamus. Quod si ex fide se Christo dicaverunt, pudicæ & castæ sine ulla fabula perseverent, & ita fortes & stabiles præmium virginitatis expectent. Si autem perseverare nolunt, vel non possunt; melius est ut nubant, quam in ignem delictis suis cadant. Certe nullum fratribus aut sororibus scandalum faciant, cum scriptum sit: *Si cibus scandalizat fratrem, non manducabo carnem in saculum, ne fratrem scandalizem.* Nec aliqua putet se posse hac excusatione defendi, quod & inspicere, & probari possit, an virgo sit, cum & manus obstetricum & oculi sæpe fallantur, & si incorrupta inventa fuerit virgo ea parte sui, qua mulier potest esse, potuerit tamen ex alia corporis parte peccasse, quæ corrumpi potest, & tamen inspicere non potest. Certe ipse concubitus, ipse complexus, ipsa confabulatio & inosculatio, & conjacentium duorum turpis & fœda dormitio quantum dedecoris & criminis confitetur? Si superveniens maritus sponsam suam jacentem cum altero videat, nonne indignatur, & fremit, & per zeli dolorem fortassis & gladium in manum sumit? Quid Christus & Dominus & judex noster, cum virginem suam

suam sibi dicatam, & sanctitati suæ destinatam jacere cum altero cernit, quam indignatur & irascitur? & quas pœnas incestis ejusmodi conjunctionibus committitur, cujus ut gladium spiritalem, & venturum judicii diem unusquisque fratrum possit evadere, omni consilio providere & elaborare debemus? Et cum omnes omnino disciplinam tenere oporteat, multo magis præpositos & diaconos curare hoc fas est, qui exemplum & documentum ceteris de conversatione & moribus suis præbeant. Quomodo enim possunt integritati & continentiae præesse, si ex ipsis incipiant corruptelæ, & vitiorum magisteria procedere? Et iccirco consulte & cum vigore fecisti, frater carissime, abstinendo diaconum, qui cum virgine sæpe mansit, sed & ceteros qui cum virginibus dormire consueverant. Quod si pœnitentiam hujus illiciti concubitus sui egerint, & a se invicem recesserint, inspiciantur interim virgines ab obstetricibus diligenter, & si virgines inventæ fuerint, accepta communicatione ad ecclesiam admittantur, hac tamen interminatione, ut si ad eosdem masculos postmodum reversæ fuerint, aut si cum eisdem in una domo, & sub eodem tecto simul habitaverint, graviore censura ejiciantur, nec in ecclesiam postmodum tales facile recipiantur. Si autem de eis aliqua corrupta fuerit deprehensa, agat pœnitentiam plenam, quia quæ hoc crimen admisit, non mariti, sed Christi adultera est, & ideo æstimato justo tempore postea, exomologesi facta ad ecclesiam redeat. Quod si obstinate perseverant, nec se ab invicem separant, sciant se cum hac sua impudica obstinatione numquam a nobis admitti in ecclesiam posse, ne exemplum ceteris ad ruinam delictis suis facere incipiant. Nec putent sibi vitæ aut salutis constare rationem, si episcopis & sacerdotibus obtemperare noluerint, cum in Deuteronomio Dominus Deus dicat: *Et homo quicumque fecerit in su-*

perbia, ut non exaudiat sacerdotem aut iudicem, quicumque fuerit in diebus illis, morietur homo ille, & omnis populus cum audierit timebit, & non agent impie etiam nunc. Interfici Deus iussit sacerdotibus suis non obtemperantes, & iudicibus a se ad tempus constitutis non obaudientes. Et tunc quidem gladio occidebantur, quando adhuc & circumcisio carnalis manebat. Nunc autem, quia circumcisio spiritalis esse apud fideles servos Dei cœpit, spiritali gladio superbi & contumaces necantur, dum de ecclesia ejiciuntur. Neque enim vivere foris possunt, cum domus Dei una sit, & nemini salus esse, nisi in ecclesia possit. Indisciplinatos autem perire, dum non audiunt, nec obtemperant salubribus præceptis, testatur scriptura divina, quæ dicit: *Non diligit indisciplinatus castigantem se. Qui autem odierunt correptiones, consumentur tarpiter.* Ergo ne indisciplinati consumantur & pereant; da operam, frater carissime, ut quantum potes, consiliis salutaribus fraternitatem regas, & singulis ad salutem suam consulas. Arcta & angusta est via, per quam ingredimur ad vitam, sed summus & magnus est fructus, cum pervenimus ad gloriam. Qui se semel castraverunt propter regnum cælorum, Deo per omnia placeant, nec sacerdotes Dei aut ecclesiam Domini scandalo suæ pravitatis offendant. Et si ad præsens a nobis quidam ex fratribus nostris contristari videntur, nos tamen in salubri persuasionem maneamus, scientes & apostolum dixisse: *Ergo ego inimicus factus vobis sum, verum dicens vobis?* Quod si obtemperaverint nobis, lucrati sumus fratres, & eos ad salutem pariter & dignitatem nostro sermone formavimus. Si autem quidam de perversis obtemperare noluerint, sequamur eundem apostolum dicentem: *Si hominibus placerem, Christi servus non essem.* Si quibusdam suadere non possumus, ut eos Christo placere faciamus, nos certe, quod nostrum est, Christo Domino & Deo nostro,

nōstro, præcepta ejus servando, placeamus. Opto te, frater carissime ac desiderantissime, in Domina bene valere.

E P I S T O L A L X I I I.

Ad Cæcilium de sacramento dominici calicis.

CYPRIANUS Cæcilio fratri salutem. Quamquam sciam, frater carissime, 'episcopos plurimos', ecclesiis dominicis in toto mundo divina dignatione præpositos, evangelicæ veritatis ac dominicæ traditionis tenere rationem, nec ab eo quod Christus magister & præcepit, & gessit, humana & novella institutione decedere; tamen quoniam quidam vel igno-
ranter, vel simpliciter in calice dominico sanctificando, & plebi ministrando non hoc faciunt, quod Jesus Christus, Dominus & Deus noster sacrificii hujus auctor & doctor fecit & docuit; religiosum pariter ac necessarium duxi has ad vos litteras facere, ut si quis in isto errore adhuc tenetur, veritatis luce perspecta, ad radicem atque originem traditionis dominicæ revertatur. Nec nos putes, frater carissime, nostra & humana conscribere, aut ultronea voluntate hoc nobis audacter assumere, cum mediocritatem nostram semper humili & verecunda moderatione teneamus. Sed quando aliquid Deo inspirante & mandante præcipitur, necesse est domino servus fidelis obtemperet, excusatus apud omnes, quod nihil sibi arroganter assumat, qui offensam domini timere compellitur, nisi faciat, quod jubetur. Admonitos autem nos scias, ut in calice offerendo dominica traditio servetur, neque aliud fiat a nobis, quam quod pro nobis Dominus prior fecerit, ut calix qui in commemorationem ejus offertur, mixtus vino offeratur. Nam cum dicat Christus: *Ego sum vitis vera*, sanguis Christi non aqua est.

est utique, sed vinum. Nec potest videri sanguis ejus, quo redempti & vivificati sumus, esse in calice; quando vinum desit calici, quo Christi sanguis ostenditur, qui scripturarum omnium sacramento ac testimonio prædicetur. Invenimus enim & in Genesi circa sacramentum in Noe hoc idem præcucurrisse, & figuram dominicæ passionis illic exstitisse, quod vinum bibit, quod inebriatus est, quod in domo sua nudatus est, quod fuit recubans nudis & patentibus femoribus, quod nuditas illa patris a medio filio denotata est, & foras nunciata, a duobus vero majore & minore contecta, & cetera quæ necesse non est exsequi; cum satis sit hoc solum complecti, quod Noe typum futuræ veritatis ostendens, non aquam sed vinum biberit, & sic imaginem dominicæ passionis expresserit. Item in sacerdote Melchisedech sacrificii dominici sacramentum præfiguratum videmus, secundum quod scriptura divina testatur, & dicit: *Et Melchisedech rex Salem protulit panem & vinum.* Fuit autem sacerdos Dei summi, & benedixit Abraham. Quod autem Melchisedech typum Christi portaret, declarat in psalmis spiritus sanctus ex personâ patris ad filium dicens: *Ante luciferum genui te. Tu es sacerdos in æternum secundum ordinem Melchisedech.* Qui ordo utique hic est de sacrificio illo veniens, & inde descendens; quod Melchisedech sacerdos Dei summi fuit, quod panem & vinum obtulit, quod Abraham benedixit. Nam quis magis sacerdos Dei summi, quam Dominus noster Jesus Christus, qui sacrificium Deo patri obtulit, & obtulit hoc idem, quod Melchisedech obtulerat, id est, panem & vinum, suum scilicet corpus & sanguinem? Et circa Abraham benedictio illa præcedens ad nostrum populum pertinebat. Nam si Abraham Deo credidit, & deputatum est ei ad justitiam, utique quisquis Deo credit, & fide vivit, justus invenitur, & jam pridem in Abraham
fidei

fideli benedictus & justificatus ostenditur, sicut beatus apostolus Paulus probat dicens: *Credidit Abraham Deo, & deputatum est ei ad justitiam.* Cognoscitis ergo, quia qui ex fide sunt, hi sunt filii Abraham. Providens autem scriptura, quia ex fide justificat gentes Deus, prænuntiavit Abraham, quia benedicentur in illo omnes gentes. Igitur qui ex fide sunt, benedicti sunt cum fideli Abraham. Unde in evangelio invenimus de lapidibus excitari, id est, de gentibus colligi filios Abraham. Et cum Zachæum laudaret Dominus, respondit & dixit: *Salus hodie domui huic facta est, quia & hic filius est Abraham.* Ut ergo in Genesi per Melchisedech sacerdotem benedictio circa Abraham posset rite celebrari, præcedit ante imago sacrificii Christi, in pane & vino scilicet constituta; quam rem perficiens & adimplens Dominus, panem & calicem mixtum vino obtulit, & qui est plenitudo veritatis, veritatem præfiguratæ imaginis adimplevit. Sed & per Salomonem spiritus sanctus typum dominici sacrificii ante præmonstrans immolatæ hostiæ & panis & vini, sed & altaris & apostolorum faciens mentionem: *Sapientia, inquit, adificavit sibi domum, & subdidit columnas septem. Maculavit suas hostias, miscuit in cratera vinum suum, & paravit mensam suam. Et misit servos suos, convocans cum excelsa prædicatione ad craterem dicens: Qui est insipiens declinet ad me. Et gentibus sensu dixit: Venite, edite de meis panibus, & bibite vinum, quod miscui vobis.* Vinum mixtum declarat, id est, calicem Domini aquæ & vino mixtum prophetica voce prænuntiat, ut appareat in passione dominica id esse gestum, quod fuerat ante prædictum. In benedictione quoque Judæ hoc idem significatur; ubi & illic Christi figura exprimitur, quod a fratribus suis laudari & adorari haberet, quod inimicorum dorsa cedentium atque fugientium manibus, quibus crucem pertulit, & mortem vicit, compressurus fuisset, quodque ipse sit

fit leo de tribu Juda, & recubet dormiens in passione, & surgat, & sit ipse spes gentium. Quibus scriptura divina adjungit, & dicit: *Lavabit in vino stolam suam, & in sanguine uvæ amictum suum.* Quando autem sanguis uvæ dicitur, quid aliud quam vinum calicis dominici sanguinis ostenditur? Necnon & apud Esaïam hoc idem spiritus sanctus de Domini passione testatur, dicens: *Quare rubicunda sunt vestimenta tua, & indumenta tua velut a calcatione torcularis pleni & percalcati?* Numquid rubicunda vestimenta aqua potest facere? aut in torculari aqua est, quæ pedibus calcatur, vel prælo exprimitur? Vini utique mentio ideo ponitur, ut Domini sanguis intelligatur, & quod in calice dominico postea manifestatum est, prophetis annuntiantibus prædiceretur. Torcularis quoque calcatio & pressura taxatur: quia quomodo ad potandum vinum veniri non potest, nisi bōtrus calcetur ante & prematur: sic nec nos sanguinem Christi possemus bibere, nisi Christus calcatus prius fuisset, & pressus, & calicem prior biberet, in quo credentibus propinaret. Quotiescumque autem aqua sola in scripturis sanctis nominatur, baptisma prædicatur, ut apud Esaïam significari videmus. *Nolite, inquit, priora meminisse, & antiqua nolite reputare. Ecce ego facio nova, quæ nunc orientur, & cognoscetis, & faciam in deserto viam, & flumina in loco inaquoso adaquare genus meum electum, plebem meam, quam acquisivi, ut virtutes meas exponeret.* Prænuntiavit illic per prophetam Deus, quod apud gentes in locis, quæ inaquosa prius fuissent, flumina postmodum redundarent & electum genus Dei, id est per generationem, filios Dei factos baptismi adaquarent. Item denū præcanitur, & ante prædicatur Judæos, si sitierint, & Christum quæsierint, apud nos esse potaturos, id est, baptismi gratiam consecuturos. *Si sitierint, inquit, per deserta adducet illos, aquam de petra producet illis, findetur petra,*

¶

& *fructus aqua, & bibet plebs mea.* Quod in evangelio
 adimpletur, quando Christus, qui est petra, findi-
 tur ictu lanceæ in passione; qui & admonens, quid
 per prophetam sit ante prædictum, clamat & dicit:
Si quis sitit, veniat & bibat. Qui credit in me, sicut
scriptura dicit; flumina de ventre ejus fluent aqua viva.
 Atque ut magis posset esse manifestum, quia non de
 calice, sed de baptismo illic loquitur Dominus; addidit
 scriptura dicens: *Hoc autem dixi de spiritu quem accepturi*
erant, qui in eum credebant. Per baptisma enim spiritus
 sanctus accipitur, & sic a baptizatis, & spiritum sanctum
 consecutis ad bibendum calicem Domini pervenitur,
 Neminem autem moveat, quod cum de baptismo lo-
 quatur scriptura divina, sitire nos dicit & bibere,
 quando & Dominus in evangelio dicat: *Beati esurien-*
tes & sitientes justitiam; quia quod avida & sitienti cu-
 piditate suscipitur, plenius & uberius hauritur. Sicut
 & alio loco ad Samaritanam mulierem Dominus lo-
 quitur, dicens: *Omnis qui biberit ex aqua ista, sitiet*
iterum. Qui autem biberit ex aqua quam ego dederò, non
sitiet in æternum. Quo & ipsum baptisma salutaris
 aquæ significatur, quod semel scilicet sumitur, nec
 rursus iteratur. Ceterum calix Domini in ecclesia
 semper & fititur & bibitur. Nec argumentis plurimis
 opus est, frater carissime, ut probemus appellatione
 aquæ baptisma significatum semper esse, & sic nos in-
 telligere debere, quando Dominus adveniens baptismi
 & calicis manifestaverit veritatem, qui aquam illam
 fidelem, aquam vitæ æternæ præceperit credentibus
 in baptismo dari, calicem vero docuerit exemplo ma-
 gisterii sui, vini & aquæ conjunctione misceri. Cali-
 cem etenim sub die passionis accipiens benedixit, &
 dedit discipulis suis dicens: *Bibite ex hoc omnes. Hic*
est enim sanguis novi testamenti, qui pro multis effundetur
in remissionem peccatorum. Dico vobis, non bibam amodo
ex ista creatura vitis usque in diem illum, quo vobiscum bi-
bam

bam novum vinum in regno patris mei. Qua in parte invenimus calicem mixtum fuisse, quem Dominus obtulit; & vinum fuisse, quod sanguinem suum dixit. Unde apparet sanguinem Christi non offerri, si desit vinum calici, nec sacrificium dominicum legitima sanctificatione celebrari, nisi oblatio & sacrificium nostrum responderit passioni. Quomodo autem de creatura vitis novum vinum cum Christo in regno patris bibemus, si in sacrificio Dei patris & Christi vinum non offerimus, nec calicem Domini dominica traditione miscemus? Beatus quoque apostolus Paulus a Domino electus & missus, & prædicator veritatis evangelicæ constitutus hæc eadem in epistola sua ponit, dicens: *Dominus Jesus in qua nocte tradebatur, accepit panem, & gratias egit, & fregit, & dixit: Hoc est corpus meum, quod pro vobis tradetur. Hoc facite in meam commemorationem. Simili modo & calicem postquam cœnatum est, accepit, dicens: Hic calix novum testamentum est in meo sanguine. Hoc facite quotiescumque viberitis, in meam commemorationem. Quotiescumque enim ederitis panem istum, & calicem biberitis, mortem Domini annuntiabitis quoadusque veniat. Quod si & a Domino præcipitur, & ab apostolo ejus hoc idem confirmatur & traditur, ut quotiescumque biberimus in commemorationem Domini hoc faciamus, quod fecit & Dominus: invenimus non observari a nobis, quod mandatum est, nisi eadem quæ Dominus fecit, nos quoque faciamus, & calicem Domini pari ratione miscentes, a divino magisterio non recedamus. Ab evangelicis autem præceptis omnino recedendum non esse, & eadem quæ magister docuit & fecit, discipulos quoque observare & facere debere, constantius & fortius alio in loco beatus apostolus docet, dicens: *Miror quod sic tam cito demutamini ab eo, qui vos vocavit ad gratiam, ad aliud evangelium, quod non est aliud, nisi si sunt aliqui qui vos conturbant, & volunt convertere evangelium Christi.**

Sed

*Sed licet aut nos aut angelus de cælo aliter annuntiet, præterquam quod annuntiavimus vobis, anathema sit. Sicut prædiximus, & nunc iterum dico: Si quis vobis annuntiaverit præterquam quod accepistis, anathema sit. Cum ergo neque ipse apostolus, neque angelus de cælo annuntiare possit aliter aut docere, præterquam quod semel Christus docuit, & apostoli ejus annuntiaverunt: miror satis unde hoc usurpatum sit, ut contra evangelicam & apostolicam disciplinam quibusdam in locis aqua offeratur in dominico calice, quæ sola Christi sanguinem non possit exprimere. Cujus rei sacramentum nec in psalmis tacet spiritus sanctus, faciens mentionem dominici calicis, & dicens: *Calix tuus inebrians perquam optimus*. Calix autem qui inebriat, utique vino mixtus est. Neque enim aqua inebriare quemquam potest. Sic autem calix dominicus inebriat, ut & Noe in Genesi vinum bibens inebriatus est. Sed quia ebrietas dominici calicis & sanguinis non est talis, qualis est ebrietas vini sæcularis, cum diceret spiritus sanctus in psalmo: *Calix tuus inebrians*, addidit *perquam optimus*, quod scilicet calix dominicus sic bibentes inebriat, ut sobrios faciat, ut mentes ad spiritalem sapientiam redigat, ut a sapore isto sæculari ad intellectum Dei unusquisque resipiscat, & quemadmodum vino isto communi mens solvitur, & anima relaxatur, & tristitia omnis exponitur: ita epotato sanguine Domini & poculo salutari, exponatur memoria veteris hominis, & fiat oblitio conversationis pristinae sæcularis, & mœstum pectus ac triste, quod prius peccatis agentibus premebatur, divinae indulgentiæ lætitia resolvatur; quod tunc demum potest lætificare in ecclesia Domini bibentem, si quod bibitur, dominicam teneat veritatem. Quam vero perversum est quamque contrarium, ut cum Dominus in nuptiis de aqua vinum fecerit, nos de vino aquam faciamus, cum sacramentum quoque*

rei

rei illius admonere, & instruere nos debeat, ut in sacrificiis dominicis vinum potius offeramus. Nam quia apud Judæos defecerat gratia spiritalis, defecit & vinum. Vineam enim Domini sabaoth domus erat Israel. Christus autem docens & ostendens gentium populum succedere, & in locum quem Judæi perderant, nos postmodum merito fidei pervenire, de aqua vinum fecit, id est, quod ad nuptias Christi & ecclesiæ, judæis cessantibus, plebs magis gentium conflueret & conveniret, ostendit. Aquas namque populos significare, in apocalypsi scriptura divina declarat, dicens: *Aqua quas vidisti, super quas sedet meretrix illa, populi, & turba, & gentes ethnicorum sunt & linguæ.* Quod scilicet perspicimus & in sacramento calicis contineri. Nam quia nos omnes portabat Christus, qui & peccata nostra portabat, videmus in aqua populum intelligi, in vino vero ostendi sanguinem Christi. Quando autem in calice vino aqua miscetur, Christo populus adunatur, & credentium plebs ei in quem credidit, copulatur & conjungitur. Quæ copulatio & conjunctio aquæ & vini sic miscetur in calice Domini, ut commixtio illa non possit ab invicem separari. Unde & ecclesiam, id est, plebem in ecclesia constitutam, fideliter & firmiter in eo quod credidit, perseverantem nulla res separare poterit a Christo, quo minus hæreat semper & maneat individua dilectio. Sic autem in sanctificando calice Domini offerri aqua sola non potest, quomodo nec vinum solum potest. Nam si vinum tantum quis offerat, sanguis Christi incipit esse sine nobis. Si vero aqua sit sola, plebs incipit esse sine Christo. Quando autem utrumque miscetur, & adunatione confusa sibi invicem copulatur, tunc sacramentum spiritale & cæleste perficitur. Sic vero calix Domini non est aqua sola, aut vinum solum, nisi utrumque sibi misceatur, quomodo nec corpus Domini potest esse

esse farina sola aut aqua sola, nisi utrumque adunatum fuerit & copulatum, & panis unius compage solidatum. Quo & ipso sacramento populus noster ostenditur adunatus, ut quemadmodum grana multa in unum collecta, & commolita, & commixta panem unum faciunt: sic in Christo, qui est panis cælestis, unum sciamus esse corpus, cui conjunctus sit noster numerus & adunatus. Non est ergo, frater carissime, quod aliquis existimet sequendam esse quorundam consuetudinem, si qui in præteritum in calice dominico aquam solam offerendam putaverunt. Quærendum est enim, ipsi quem sint secuti. Nam si in sacrificio, quod Christus obtulit, non nisi Christus sequendus est, utique id nos obaudire & facere oportet, quod Christus fecit, & quod faciendum esse mandavit, quando ipse in evangelio dicat: *Si feceritis quod mando vobis, jam non dico vos servos, sed amicos.* Et quod Christus debeat solus audiri, pater etiam de cælo contestatur, dicens: *Hic est filius meus dilectissimus, in quo bene sensi, ipsum audite.* Quare si solus Christus audiendus est, non debemus attendere, quid alius ante nos faciendum esse putaverit, sed quid, qui ante omnes est, Christus prior fecerit. Neque enim hominis consuetudinem sequi oportet, sed Dei veritatem, cum per Esaiam prophetam Deus loquatur, & dicat: *Sine causa autem colunt me, mandata & doctrinas hominum docentes.* Et iterum Dominus in evangelio hoc idem repetat dicens: *Rejicitis mandatum Dei, ut traditionem vestram statuatis.* Sed & alio in loco ponit, & dicit: *Qui solverit unum ex mandatis istis minimis, & sic docuerit homines, minimus vocabitur in regno celorum.* Quod si nec minima de mandatis dominicis licet solvere, quanto magis tam magna, tam grandia, tam ad ipsum dominicæ passionis, & nostræ redemptionis sacramentum pertinentia fas non est infringere, aut in aliud, quam quod divinitus institutum

tum sit, humana traditione mutare? Nam si Jesus Christus Dominus & Deus noster ipse est summus sacerdos Dei patris, & sacrificium patri se ipsum primus obtulit, & hoc fieri in sui commemorationem præcepit: utique ille sacerdos vice Christi vere fungitur, qui id, quod Christus fecit, immitatur, & sacrificium verum & plenum tunc offert in ecclesia Deo patri, si sic incipiat offerre, secundum quod ipsum Christum videat obtulisse. Ceterum omnis religionis & veritatis disciplina subvertitur, nisi id quod spiritualiter præcipitur, fideliter reservetur, nisi si in sacrificiis matutinis hoc quis veretur, ne per saporem vini redoleat sanguinem Christi. Sic ergo incipit & a passione Christi in persecutionibus fraternitas retardari, dum in oblationibus discit de sanguine ejus & cruore confundi. Porro autem Dominus in evangelio dicit: *Qui confusus me fuerit, confundetur cum filius hominis.* Et apostolus quoque loquitur dicens: *Si hominibus placerem, Christi servus non essem.* Quomodo autem possumus propter Christum sanguinem fundere, qui sanguinem Christi erubescimus bibere? An illa sibi aliquis contemplatione blanditur, quod etsi mane aqua sola offerri videtur, tamen cum ad cœnandum venimus, mixtum calicem offerimus. Sed cum cœnamus, ad convivium nostrum plebem convocare non possumus, ut sacramenti veritatem fraternitati omni præsentem celebremus. At enim non mane, sed post cœnam, mixtum calicem obtulit Dominus. Numquid ergo dominicum post cœnam celebrare debemus, ut sic mixtum calicem frequentandis dominicis offeramus; Christum offerre oportebat circa vespeream diei, ut hora ipsa sacrificii ostenderet occasum & vespeream mundi, sicut in Exodo scriptum est: *Et occident illum omne vulgus synagoga filiorum Israel ad vespeream.* Et iterum in psalmis: *Allevatio manuum mearum sacrificium vespertinum.* Nos autem resurrectionem Domini mane cele-

celebramus. Et quia passionis ejus mentionem in sacrificiis omnibus facimus (passio est enim Domini sacrificium, quod offerimus) nihil aliud quam quod ille fecit, facere debemus. Scriptura enim dicit: *Quotiescumque enim ederitis panem istum, & calicem istum biberitis, mortem Domini annuntiabitis quoadusque veniat.* Quotiescumque ergo calicem in commemorationem Domini & passionis ejus offerimus, id quod constat Dominum fecisse, faciamus. Et viderit, frater carissime. Si quis de antecessoribus nostris vel ignoranter, vel simpliciter non hoc observavit & tenuit, quod nos Dominus facere exemplo & magisterio suo docuit, potest simplicitati ejus de indulgentia Domini venia concedi. Nobis vero non poterit ignosci, qui nunc a Domino admoniti & instructi sumus, ut calicem vino mixtum, secundum quod Dominus obtulit, offeramus, & de hoc quoque ad collegas nostros litteras dirigamus, ut ubique lex evangelica & traditio dominica servetur, & ab eo quod Christus & docuit, & fecit, non recedatur. Quæ ultra jam contemnere, & in errore pristino perseverare quid aliud est, quam incurrere in objurgationem Domini increpantis in psalmo, & dicentis: *Ad quid exponis justificationes meas, & assumis testamentum meum per os tuum? Tu autem odisti disciplinam, & abjecisti sermones meos retro. Si videbas fur-em, concurrebas ei, & inter mæchos particulam tuam ponebas.* Exponere enim justificationes & testamentum Domini, & non hoc idem facere, quod fecerit Dominus, quid aliud est quam sermones ejus abjicere, & disciplinam dominicam contemnere, nec terrena, sed spiritalia furta & adulteria committere, dum quis de evangelica veritate furatur Domini nostri verba & facta, corrumpit atque adulterat præcepta divina? Sicut apud Hieremiam scriptum est: *Quid est, inquit, paleis ad triticum? Propter hoc ecce ego ad prophetas, dicit Dominus, qui furantur verba mea unusquisque a proximo suo,*

suo, & seducunt populum meum in mendaciis suis, & in erroribus suis. Item apud eundem alio loco: Et machata est, inquit, in lignum & lapidem, & in his omnibus non est reversa ad me. Quod furtum & adulterium ne in nos etiam cadat, cavere sollicite, & timide ac religiose observare debemus. Nam si sacerdotes Dei & Christi sumus, non invenio quem magis sequi, quam Deum & Christum debeamus, quando ipse in evangelio maxime dicat: Ego sum lumen saculi. Qui me secutus fuerit, non ambulabit in tenebris, sed habebit lumen vite. Ne ergo in tenebris ambulemus, Christum sequi & præcepta ejus observare debemus; quia & ipse in alio loco mittens apostolos dixit: Data est mihi omnis potestas in calo & in terra. Ite ergo & docete omnes gentes, tingentes eos in nomine patris & filii & spiritus sancti, docentes eos observare omnia, quaecumque præcepi vobis. Quare si in lumine Christi ambulare volumus, a præceptis & monitis ejus non recedamus, agentes gratias, quod dum instruit in futurum quid facere debeamus, de præterito ignoscit, quod simpliciter erravimus. Et quia jam secundus ejus adventus nobis appropinquat, magis ac magis benigna ejus & larga dignatio corda nostra luce veritatis illuminat. Religioni igitur nostræ congruit & timori, & ipsi loco atque officio sacerdotii nostri, frater carissime, in dominico calice miscendo, & offerendo custodire traditionis dominicæ veritatem, & quod prius apud quosdam videtur erratum, Domino monente corrigere; ut cum in claritate sua & majestate cælesti venire cœperit, inveniat nos tenere quod monuit, observare quod docuit, facere quod fecit. Opto te, frater carissime, semper bene valere.

E P I S T O L A L X I V .

*Ad Epictetum & plebem Assuritanorum de Fortunatiano
quondam eorum episcopo.*

CYPRIANUS Epicteto fratri & plebi Assuras con-
sistenti salutem. Graviter & dolenter motus sum,
fratres carissimi, quod cognoverim Fortunatianum
quondam apud vos episcopum, post gravem lapsum
ruinæ suæ pro integro nunc agere velle, & episcopa-
tum sibi vindicare cœpisse. Quæ res contristavit me,
primo propter ipsum, qui miser, vel diaboli tenebris
in totum excæcatus, vel quorundam sacrilega per-
suasione deceptus, cum debeat satisfacere, & ad Do-
minum exorandum diebus ac noctibus, lacrimis &
orationibus & precibus incumbere, audet sibi adhuc
sacerdotium quod prodidit, vindicare, quasi post
æras diaboli accedere ad altare Dei fas sit, aut non
majorem in se iram & indignationem Domini in die
judicii provocet, qui cum fidei & virtutis dux fra-
tribus esse non potuerit, perfidiæ, & audaciæ, &
temeritatis magister existat, & qui non docuit fra-
tres in prælio fortiter stare, doceat eos, qui victi &
prostrati sunt, nec rogare, cum Dominus dicat: *Illis
fudistis libamina, & illis imposuistis sacrificia, super hæc
omnia ergo non indignabor? dicit Dominus.* Et alio lo-
co: *Sacrificans dñs eradicabitur, nisi Domino soli.* Item
Dominus denuo loquitur, & dicit: *Adoraverunt eos
quos fecerunt digiti eorum, & curvatus est homo, & hu-
miliatus est vir, & non laxabo illis.* In apocalypsi quo-
que legimus iram Domini comminantis, & dicentis:
*Si quis adorat bestiam & imaginem ejus, & accipit notam
in fronte sua & in manu, bibet & ipse de vino ira Dei
mixto in poculo ira ejus, & punietur igne & sulphure sub
oculis sanctorum angelorum, & sub oculis agni, & fumus
de tormentis eorum in sæcula sæculorum ascendet, nec ha-*

bebunt requiem die ac nocte, qui adorant bestiam & imaginem ejus. Cum ergo hæc tormenta, hæc supplicia in die judicii Dominus comminetur iis, qui diabolo obtemperant, & idolis sacrificant, quomodo se putat posse agere pro Dei sacerdote, qui obtemperavit & servivit diaboli sacerdotibus? aut quomodo putat manum suam transferri posse ad Dei sacrificium, & precem Domini, quæ captiva fuerit sacrilegio & crimini? quando in scripturis divinis Deus ad sacrificium prohibeat accedere sacerdotes etiam in leviori crimine constitutos, & in Levitico dicat: *Homo in quo fuerit vitium & macula, non accedet offerre dona Deo.* Item in Exodo: *Et sacerdotes qui accedunt ad Dominum Deum sanctificentur, ne forte devehinuat illos Dominus.* Et iterum: *Et cum accedunt ministrare ad altare sancti, non adducent in se delictum, ne moriantur.* Qui ergo gravia in se delicta adduxerunt, id est, qui idolis sacrificando sacrilega sacrificia fecerunt, sacerdotium Dei sibi vindicare non possunt, nec ullam in conspectu ejus precem pro fratribus facere, quando in evangelio scriptum sit: *Deus peccatorem non audit; sed si quis Deum coluerit, & voluntatem ejus fecerit, illum audit.* Quamvis sic quorumdam pectora tenebrarum ingruentium profunda caligo cæcaverit, ut de præceptis salubribus nihil lucis admittant, sed semel a recto limite veri itineris averfi, per præceptis & per abruptum criminum suorum nocte atque errore rapiantur. Nec mirum si consilia nostra aut Domini præcepta nunc abnuunt, qui Dominum negaverunt. Stipes & oblationes & lucra desiderant, quibus prius insatiabiles incubabant; & cœnis atque epulis etiam nunc inhiant, quarum crapulam superstitie nuper in dies cruditate ructabant, nunc manifestissime comprobantes, nec ante se religioni, sed ventri potius & quæstui prophana cupiditate servisse. Unde & ipsam venisse perspicimus, & credimus de Dei exploratione censuram,

ne

ne apud altare consistere, & contrectare ulterius perseverarent pudorem incesti, fidem perfidi, religionem prophani, divina terreni, sancta sacrilegi. Quod ne tales ad altaris impiamenta & contagia fratrum denuo redeant, omnibus viribus excubandum est, & omni vigore nitendum, ut quantum possumus ab hac eos sui sceleris audacia retundamus, ne adhuc agere pro sacerdote conentur, qui ad mortis extrema dejecti, ultra lapsos laicos ruinæ majoris pondere prorruperunt. Si vero apud insanos furor insanabilis perseveraverit, & recedente spiritu sancto quæ cœpit, cæcitas in sua nocte permanserit, consilium nobis erit singulos fratres ab eorum fallacia separare, & ne quis in laqueos erroris incurrat, ab eorum contagione secernere, quando nec oblatio sanctificari illic possit, ubi spiritus sanctus non sit, nec cuiquam Dominus per ejus orationes & preces profit, qui Dominum ipse violavit. Quod si Fortunatianus aut immemor criminis sui per diaboli cæcitatem, aut minister & servus diaboli factus ad decipiendam fraternitatem, in hoc suo furore permanserit: vos quantum potestis elaborate, & in hac caligine diaboli sævientis fratrum mentes ab errore revocate; ne alienæ demeritiæ facile consentiant, ne se desperatorum delictis participes faciant, sed teneant integri salutis suæ, & integritatis conservatæ a se & custoditæ perpetuum tenorem. Lapsi vero magnitudinem delicti sui cognoscentes, a deprecando Domino non recedant, nec ecclesiam catholicam, quæ una & sola est a Domino constituta, derelinquant: sed satisfactionibus immorantes, & Domini misericordiam deprecantes ad ecclesiam pulsent, ut recipi illic possint, ubi fuerunt, & ad Christum redeant, a quo recefferunt, Nec audiant eos qui se fallaci & mortali seductione decipiunt, cum scriptum sit: *Nemo vos decipiat inanibus verbis. Propterea enim venit ira Dei super filios contumacia.*

lite ergo esse participes eorum. Ergo contumaces & Deum non timentes, & ab ecclesia in totum recedentes nemo comitetur. Quod si quis impatiens fuerit ad deprecandum Dominum, qui offensus est, & nobis obtemperare noluerit, sed desperatos & perditos secutus fuerit, sibi imputabit, cum iudicii dies venerit. Quomodo enim deprecari in die illo Dominum poterit, qui & ante hoc Christum, & nunc quoque ecclesiam Christi negavit, & episcopis sanis & integris & viventibus non obtemperans, comitem se & participem morientibus præbuit? Opto vos, fratres carissimi ac desideratissimi, semper bene valere.

EPISTOLA LXV.

Ad Rogatianum de diacono qui contra episcopum contendit.

CYPRIANUS Rogatiano fratri salutem. Graviter & dolenter commoti sumus ego & collegæ mei qui præsentés aderant, frater carissime, lectis litteris tuis, quibus de diacono tuo conquestus es, quod immemor sacerdotalis loci tui, & officii ac ministerii sui oblitus contumeliis & injuriis suis te exacerbaverit. Et tu quidem honorifice circa nos & pro solita tua humilitate fecisti, ut malles de eo nobis conqueri, cum pro episcopatus vigore & cathedræ auctoritate haberes potestatem, qua posses de illo statim vindicari, certus quod collegæ tui omnes gratum haberemus, quodcumque circa diaconum tuum contumeliosum sacerdotali potestate fecisses, habens circa hujusmodi homines præcepta divina, cum Dominus Deus in Deuteronomio dicat: *Et homo quicumque fecerit in superbia, ut non exaudiat sacerdotem aut iudicem quicumque fuerit in diebus illis, morietur homo ille, & omnis populus cum audierit timebit, & non agent impie etiam nunc.* Et ut sciamus hanc Dei vocem cum vera

vera & summa majestate ejus processisse ad honorandos ac vindicandos sacerdotes suos, cum adversus Aaron sacerdotem tres de ministris, Chore, & Dathan, & Abiron, ausi sunt superbisse, & cervicem suam extollere, & sacerdoti præposito se adæquare, hiatu terræ absorpti ac devorati pœnas statim sacrilegæ audaciæ persolverunt. Nec soli illi, sed & ceteri ducenti quinquaginta, qui eis comites ad audaciam fuerunt; prorumpente a Domino igne consumpti sunt, ut probaretur sacerdotes Dei ab eo qui sacerdotes facit, vindicari. In libro quoque regnorum, cum Samuel sacerdos a Judæorum populo ob senectutem, sicut tu modo, contemneretur, exclamavit iratus Dominus, & dixit: *Non te spreverunt, sed me spreverunt.* Et ut hoc ulcisceretur, excitavit eis Saul regem, qui eos injuriis gravibus affligeret, & per omnes contumelias & pœnas superbum populum calcaret & premeret, ut contemptus sacerdos de superbo populo ultione divina vindicaretur. Sed & Salomon in spiritu sancto constitutus testatur, & docet, quæ sit sacerdotalis auctoritas & potestas dicens: *Ex tota anima tua time Deum, & sacerdotes ejus sanctifica.* Et iterum: *Honora Deum ex tota anima tua; & honorifica sacerdotes ejus.* Quorum præceptorum memor beatus apostolus Paulus, secundum quod in actibus apostolorum legimus, cum ei diceretur: *Sic infilis in sacerdotem Dei maledicendo?* respondit & dixit: *Nesciebam, fratres, quia pontifex est. Scriptum est enim: Principem populi tui non maledices.* Dominus etiam noster ipse Jesus Christus, rex & judex Deus noster usque ad passionis diem servavit honorem pontificibus & sacerdotibus, quamvis illi nec timorem Dei, nec agnitionem Christi servassent. Nam cum lebrosum emundasset, dixit illi: *Vade, & monstra te sacerdoti, & offer donum.* Humilitate ea qua nos quoque esse humiles docuit, sacerdotem adhuc appellabat, quem sciebat esse

esse sacrilegum. Item sub ictu passionis cum alapam accepisset, & ei diceretur: *Sic respondes pontifici?* nihil ille contumeliose locutus est in personam pontificis, sed magis innocentiam suam tuitus est, dicens: *Si male locutus sum, exbrobra de malo. Si autem bene, quid me cadis?* Quæ omnia ab eo ideo facta sunt humiliter atque patienter, ut nos humilitatis ac patientiæ haberemus exemplum. Docuit enim sacerdotes veros legitime & plene honorari, dum circa falsos sacerdotes ipse talis exstitit. Meminisse autem diaconi debent, quoniam apostolos, id est episcopos & præpositos, Dominus elegit: diaconos autem post ascensum Domini in cælos apostoli sibi constituerunt, episcopatus sui & ecclesiæ ministros. Quod si nos aliquid audere contra Deum possumus, qui episcopos facit, possunt & contra nos audere diaconi, a quibus fiunt. Et ideo oportet diaconum de quo scribis, agere audaciæ suæ pœnitentiam, & honorem sacerdotis agnoscere, & episcopo præposito suo plena humilitate satisfacere. Hæc sunt enim initia hæreticorum, & ortus atque conatus schismaticorum male cogitantium, ut sibi placeant, ut præpositum superbo tumore contemnant. Sic de ecclesia receditur, sic altare prophanum foris collocatur, sic contra pacem Christi & ordinationem atque unitatem Dei rebellatur. Quod si ultra de contumeliis suis exacerbaverit & provocaverit, fungeris circa eum potestate honoris tui, ut eum vel deponas, vel abstineas. Nam si apostolus Paulus ad Timotheum scribens dixit: *Juventutem tuam nemo despiciat*, quanto magis tibi a collegis tuis dicendum est: *Senectutem tuam nemo despiciat*. Et quoniam scripsisti quemdam cum eodem diacono tuo se miscuisse, & superbiæ ejus atque audaciæ participem esse, hunc quoque & si qui alii tales exstiterint, & contra sacerdotem Dei fecerint, vel coercere poteris, vel abstinere. Nisi quod hortamur & monemus, ut peccasse se

se potius intelligant, & satisfaciant, & nos propositum nostrum tenere patiantur. Magis enim optamus & cupimus contumelias & injurias singulorum clementi patientia vincere, quam sacerdotali licentia vindicare. Opto te, frater carissime, semper bene valere.

E P I S T O L A LXVI.

Ad clerum & plebem Furnis consistentem de Victore, qui Faustinum presbyterum tutorem nominavit.

CYPRIANUS presbyteris & diaconibus & plebi Furnis consistentibus salutem. Graviter commoti sumus ego & collegæ mei qui præsentés aderant, & compresbyteri nostri qui nobis assidebant, fratres carissimi, cum cognovissemus, quod Geminus Victor frater noster de sæculo excedens, Geminium Faustinum presbyterum tutorem testamento suo nominaverit, cum jam pridem in concilio episcoporum statutum sit, ne quis de clericis & Dei ministris tutorem vel curatorem testamento suo constituat, quando singuli divino sacerdotio honorati, & in clerico ministerio constituti non nisi altari & sacrificiis deservire, & precibus atque orationibus vacare debeant. Scriptum est enim: *Nemo militans Deo obligat se molestiis secularibus, ut possit placere ei cui se probavit.* Quod cum de omnibus dictum sit, quanto magis molestiis & laqueis sæcularibus obligari non debent, qui divinis rebus & spiritualibus occupati, ab ecclesia recedere, & ad terrenos & sæculares actus vacare non possunt? Cujus ordinationis & religionis formam levitæ prius in lege tenuerunt, ut cum terram dividerent, & possessiones partirentur undecim tribus, levitica tribus, quæ templo & altari & ministeriis divinis vacabat, nihil de illa divisionis portione perciperet, sed aliis terram colentibus, illa tantum Deum cole-

coleret, & ad victum atque alimentum suum ab undecim tribubus de fructibus qui nascebantur, decimas perciperet. Quod totum fiebat de auctoritate & dispositione divina, ut qui operationibus divinis infestebant, in nulla re avocarentur, nec cogitare, aut agere sæcularia cogerentur. Quæ nunc ratio & forma in clero tenetur, ut qui in ecclesia Domini ordinatione clerica promoventur, in nullo ab administratione divina avocentur, nec molestiis & negotiis sæcularibus alligentur, sed in honore sportulantium fratrum, tamquam decimas ex fructibus accipientes, ab altari sacrificiis non recedant, sed die ac nocte cælestibus rebus & spiritualibus serviant. Quod episcopi antecessores nostri religiose considerantes, & salubriter providentes censuerunt, ne quis frater excedens ad tutelam vel curam clericum nominaret, ac si quis hoc fecisset, non offerretur pro eo, nec sacrificium pro dormitione ejus celebraretur. Neque enim apud altare Dei meretur nominari in sacerdotum prece, qui ab altari sacerdotes & ministros voluit avocare. Et ideo Victor, cum contra formam nuper in concilio a sacerdotibus datam, Geminium Faustinum presbyterum ausus sit tutorem constituere, non est quod pro dormitione ejus apud nos fiat oblatio, aut deprecatio aliqua nomine ejus in ecclesia frequentetur, ut sacerdotum decretum religiose & necessarium factum servetur a nobis, simul & ceteris fratribus detur exemplum, ne quis sacerdotes & ministros Dei, altari ejus, & ecclesiæ vacantes ad sæculares molestias devocet. Observari enim de cetero poterit, ne ultra hoc fiat circa personam clericorum, si quod nunc factum est, fuerit vindicatum. Opto vos, fratres carissimi, semper bene valere.

EPISTOLA LXVII.

Ad Stephanum de Marciano Arelatensi, qui Novatiano consensit.

CYPRIANUS Stephano fratri salutem. Faustinus collega noster Lugduni consistens, frater carissime, semel atque iterum mihi scripsit, significans ea, quæ etiam vobis scio utique nuntiata tam ab eo, quam a ceteris coepiscopis nostris in eadem provincia constitutis, quod Marcianus Arelate consistens Novatiano sese conjunxerit, & a catholicæ ecclesiæ unitate atque a corporis nostri & sacerdotii consensione discesserit, tenens hæreticæ præsumptionis durissimam pravitatem, ut servis Dei pœnitentibus & dolentibus, & ecclesiam lacrimis & gemitu & dolore pulsantibus, divinæ pietatis & lenitatis paternæ solatia & subsidia claudantur, nec ad fovenda vulnera admittantur vulnerati, sed sine spe pacis & communicationis relictī, ad luporum rapinam & prædam diaboli projiciantur. Cui rei nostrum est consulere & subvenire, frater carissime, qui divinam clementiam cogitantes, & gubernandæ ecclesiæ libram tenentes sic censuram vigoris peccatoribus exhibemus, ut tamen lapsis erigendis, & curandis vulneratis bonitatis & misericordiæ divinæ medicinam non denegemus. Quapropter facere te oportet plenissimas litteras ad coepiscopos nostros in Galliis constitutos ne ultra Marcianum pervicacem & superbum, & divinæ pietatis ac fraternæ salutis inimicum collegio nostro insultare patiantur, quod necdum videatur a nobis abstentus, qui jampridem jactat & prædicat, quod Novatiano studens, & ejus pervicaciam sequens a communicatione se nostra segregaverit, cum Novatianus ipse, quem sequitur, olim abstentus, & hostis ecclesiæ judicatus sit, & cum ad nos in Africam legatos misisset, optans
ad

ad communicationem nostram admitti, hinc a concilio plurimorum sacerdotum, qui præsentes eramus, sententiam retulerit, se foris esse cœpisse, nec posse a quoquam nostrum sibi communicari qui, episcopo Cornelio in catholica ecclesia de Dei judicio & cleri ac plebis suffragio ordinato, prophanum altare erigere, & adulteram cathedram collocare, & sacrilega contra verum sacerdotem sacrificia offerre tentaverit. Proinde si resipiscere, & ad sanæ mentis consilium redire vellet, ageret pœnitentiam, & ad ecclesiam supplex rediret. Quam vanum est, frater carissime, ut Novatiano nuper retuso & refutato, & per totum orbem a sacerdotibus Dei abstento, nunc adultores adhuc nobis patiamur illudere, & de majestate ac dignitate ecclesiæ judicare. Dirigantur in provinciam, & ad plebem Arelate consistentem a te litteræ, quibus abstento Marciano alius in locum ejus substituatur, & grex Christi, qui in hodiernum ab illo dissipatus & vulneratus contemnitur, colligatur. Sufficiat multos illic ex fratribus nostris annis istis superioribus excessisse sine pace. Vel ceteris subveniatur, qui supersunt, qui & diebus ac noctibus ingemiscunt, & divinam ac paternam misericordiam deprecantes, solatium nostræ opitulationis exposcunt. Iccirco enim, frater carissime, copiosum corpus est sacerdotum concordiae mutæ glutino atque unitatis vinculo copulatum, ut si quis ex collegio nostro hæresim facere, & gregem Christi lacerare & vastare tentaverit, subveniant ceteri, & quasi pastores utiles & misericordes oves dominicas in gregem colligant. Quid enim si in mari portus aliquis munitionibus suis ruptis infestus periculosus esse navibus cœperit, nonne navigantes ad alios proximos portus naves suas dirigunt, ubi sit tutus accessus & salutaris introitus, & statio secura? Aut si in via stabulum aliquod obsideri, & teneri a latronibus cœperit, ut quisquis ingressus fue-

fuerit, insidiantium illic infestatione capiatur, nonne commeantes, hac opinione comperta, stabula alia in itinere appetunt tutiora, ubi sint fida hospitia, & receptacula commeantibus tuta? Quod nunc esse apud nos debet, frater carissime, ut fratres nostros qui iactati Marciani scopulis, petunt ecclesiæ portus salutare, suscipiamus ad nos prompta & benigna humanitate, & stabulum commeantibus præbeamus tale, quale est in evangelio, quo a latronibus sauciati & vulnerati suscipi & foveri, & tutari ab stabulario possint. Quæ est enim major aut melior cura præpositorum, quam diligenti sollicitudine & medela salubri fovendis & conservandis ovibus providere, cum Dominus loquatur & dicat: *Quod infirmatum est, non confortastis, & quod male habuit, non corroborastis, & quod contribulatum est, non consolidastis, & quod erravit, non revocastis, & quod periit, non inquisistis; & dispersæ sunt oves meæ, eo quod non sint pastores, & factæ sunt in comesturam in omnibus bestiis agri, & non fuit qui inquireret, neque qui revocaret. Propterea hæc dicit Dominus: Ecce ego super pastores, & inquiram oves meas de manibus eorum, & avertam eos ut non pascant oves meas; & jam non pascunt eas, & extraham eas de ore eorum, & pascam eas cum iudicio.* Cum ergo pastoribus talibus, per quos dominicæ oves negliguntur & pereunt, sic Dominus cominetur, quid nos aliud facere oportet, frater carissime, quam colligendis & refovendis Christi ovibus exhibere diligentiam plenam, & curandis lapsorum vulneribus paternæ pietatis adhibere medicinam, quando & Dominus in evangelio moneat & dicat: *Non est opus sanis medicus, sed male habentibus.* Nam etsi pastores multi sumus, unum tamen gregem pascimus, & oves universas quas Christus sanguine suo & passione quæsit, colligere & fovere debemus, nec pati supplices & dolentes fratres nostros crudeliter despici, & superba quorundam præsumptione calca-

calcari, cum scriptum sit: *Ille autem qui contumax est, vir sui jactans, nihil omnino perficiet, qui dilatavit tamquam infernus animam suam, & ejusmodi homines Dominus in evangelio suo culpet & damnet, dicens: Vos estis, qui justificatis vos in conspectu hominum. Deus autem dignoscit corda vestra, quoniam quod excelsum est in hominibus, execratio est in conspectu Dei.* Execrabiles & detestabiles dicit esse qui sibi placeant, qui tumidi & inflati aliquid sibi arroganter assumant. Ex quibus cum Marcianus esse cœperit, & se Novatiano conjungens, adversarius misericordiæ & pietatis exstiterit: sententiam non dicat, sed accipiat, nec si agat quasi ipse judicaverit de collegio sacerdotum, quando ipse sit ab universis sacerdotibus judicatus. Servandus est enim antecessorum nostrorum beatorum martyrum Cornelii & Lucii honor gloriosus; quorum memoriam cum nos honoremus, multo magis tu, frater carissime, honorificare, & servare gravitate & auctoritate tua debes, qui vicarius & successor eorum factus es. Illi enim pleni spiritu Dei, & in glorioso martyrio constituti dandam esse lapsis pacem censuerunt, & pœnitentia acta fructum communicationis & pacis negandum non esse litteris suis signaverunt. Quam rem omnes omnino ubique censuimus. Neque enim poterat esse apud nos sensus diversus, in quibus unus est spiritus. Et ideo manifestum est eum spiritus sancti veritatem cum ceteris non tenere, quem videmus diversa sentire. Significa plane nobis, quis in locum Marciani Arelate fuerit substitutus, ut sciamus ad quem fratres nostros dirigere, & cui scribere debeamus. Opto te, frater carissime, semper bene valere.

E P I S T O L A LXVIII.

Ad clerum & plebes in Hispania consistentes, de Basilide & Martiale.

CYPRIANUS Cæcilius, Primus, Polycarpus, Nicomedes, Lucilianus, Successus, Sedatus, Fortunatus, Januarius, Secundinus, Pomponius, Honoratus, Victor, Aurelius, Sätius, Petrus, alius Januarius, Saturninus, alius Aurelius, Venantius, Quietus, Rogatianus, Tenax, Felix, Faustus, Quintus, alius Saturninus, Lucius, Vincentius, Libofus, Geminius, Marcellus, Jambus, Adelphius, Victorius, & Paulus Felici presbytero & plebibus consistentibus ad Legionem & Asturicæ, item Lælio diacono & plebi Emeritæ consistentibus, fratribus in Domino salutem. Cum in unum convenissemus, legimus litteras vestras, fratres dilectissimi, quas ad nos per Felicem & Sabinum coepiscopos nostros pro fidei vestræ integritate, & pro Dei timore fecistis, significantes Basilidem & Martialem libellis idololatriæ commaculatos, & nefandorum facinorum conscientia victos episcopatum gerere, & sacerdotium Dei administrare non oportere; & desiderastis rescribi ad hæc vobis, & justam pariter ac necessariam sollicitudinem vestram vel solatio, vel auxilio nostræ sententiæ sublevari. Sed enim desiderio huic vestro non tam nostra consilia, quam divina præcepta respondent, quibus jampridem mandatur voce cælesti, & Dei lege præscribitur, quos & quales oporteat deservire altari, & sacrificia divina celebrare. In Exodo namque ad Moysen Deus loquitur, & monet dicens: *Sacerdotes qui accedunt ad Dominum Deum sanctificentur, ne forte devehinuat illos Dominus. Et iterum: Et cum accedunt ministrare ad altare sancti, non adducunt in se delictum, ne moriantur.* Item in Levitico præcipit Dominus.

O

minus

S. Cypriani Tom. I.

minus, & dicit: *Homo in quo fuerit macula & vitium, non accedet offerre dona Deo.* Quæ cum prædicta & manifestata sint nobis, præceptis divinis necesse est obsequia nostra deserviant; nec personam in ejusmodi rebus accipere, aut aliquid cuiquam largiri potest humana indulgentia, ubi intercedit, & legem tribuit divina præscriptio. Neque enim immemores esse debemus, quid ad Judæos per Esaiam prophetam locutus sit Dominus, increpans & indignans, quod, contemptis divinis præceptis, humanas doctrinas sequerentur. *Populus iste, inquit, labiis suis honorificat me, cor vero eorum longe separatum est a me. Sine causa autem colunt me, mandata & doctrinas hominum docentes.* Quod item Dominus in evangelio repetit & dicit: *Rejicitis mandatum Dei, ut traditionem vestram statuatis.* Quæ ante oculos habentes, & sollicite ac religiose considerantes, in ordinationibus sacerdotum non nisi immaculatos & integros antistites eligere debemus, qui sancte & digne sacrificia Deo offerentes, audiri in precibus possint, quas faciunt pro plebis dominicæ incolumitate, cum scriptum sit: *Deus peccatorem non audit; sed si quis Deum coluerit, & voluntatem ejus fecerit, illum audit.* Propter quod plena diligentia & exploratione sincera oportet eos ad sacerdotium Dei deligi, quos a Deo constet audiri. Nec sibi plebs blandiatur, quasi immunis esse a contagio delicti possit, cum sacerdote peccatore communicans, & ad injustum atque illicitum præpositi sui episcopatum consensum suum commodans, quando per Osee prophetam comminetur, & dicat censura divina: *Sacrificia eorum tamquam panis luctus, omnes qui manducant ea, contaminabuntur,* docens scilicet & ostendens, omnes omnino ad peccatum constringi, qui fuerint prophani & injusti sacerdotis sacrificio contaminati. Quod item in Numeris manifestari invenimus, quando Chore, & Dathan, & Abiron contra Aaron sacerdotem sacrificandi

ficandi sibi licentiam vindicaverunt. Illic quoque per Moysen præcepit Dominus, ut ab eis populus separaretur, ne facinorosis conjunctus eodem facinore & ipse perstringatur. *Separamini*, inquit, *a tabernaculis horum hominum iniquorum durissimorum, & nolite tangere ea quæ ad eos pertinent, ne simul pareatis in peccato eorum.* Propter quod plebs obsequens præceptis dominicis, & Deum metuens a peccatore præposito separare se debet, nec se ad sacrilegi sacerdotis sacrificia miscere, quando ipsa maxime habeat potestatem vel eligendi dignos sacerdotes, vel indignos recusandi. Quod & ipsum videmus de divina auctoritate descendere, ut sacerdos plebe præsentē sub omnium oculis deligatur, & dignus atque idoneus publico iudicio ac testimonio comprobetur, sicut in Numeris Dominus Moyse præcepit dicens: *Apprehende Aaron fratrem tuum, & Eleazarum filium ejus, & impones eos in montem coram omni synagoga, & exue Aaron stolam ejus, & indue Eleazarum filium ejus, & Aaron appositus moriatur illic.* Coram omni synagoga jubet Deus constitui sacerdotem, id est, instruit & ostendit ordinationes sacerdotales non nisi sub populi assistentis conscientia fieri oportere, ut plebe præsentē vel detegantur malorum crimina, vel bonorum merita prædicentur, & sit ordinatio justa & legitima, quæ omnium suffragio & iudicio fuerit examinata. Quod postea secundum divina magisteria observatur in actis apostolorum, quando de ordinando in locum Judæ apostolo Petrus ad plebem loquitur: *Surrexit*, inquit, *Petrus in medio discipulorum, fuit autem turba hominum fere centum viginti.* Nec hoc in episcoporum tantum & sacerdotum, sed & in diaconorum ordinationibus observasse apostolos animadvertimus, de quo & ipso in actis eorum scriptum est: *Et convocaverunt*, inquit, *illi duodecim totam plebem discipulorum, & dixerunt eis.* Quod utique accirco tam

diligenter & caute convocata plebe tota gerebatur, ne quis ad altaris ministerium, vel ad sacerdotalem locum indignus obreperet. Ordinari enim nonnumquam indignos non secundum Dei voluntatem, sed secundum humanam præsumptionem, & hæc Deo displicere, quæ non veniant ex legitima & iusta ordinatione, Deus ipse manifestat per Osee prophetam, dicens: *Sibimetipsis constituerunt regem, & non per me.* Propter quod diligenter de traditione divina, & apostolica observatione servandum est, & tenendum, quod apud nos quoque & fere per provincias universas tenetur, ut ad ordinationes rite celebrandas ad eam plebem, cui præpositus ordinatur, episcopi ejusdem provinciæ proximi quique convenient, & episcopus deligatur plebe præsentē, quæ singulorum vitam plenissime novit, & uniuscujusque actum de ejus conversatione perspexit. Quod & apud vos factum videmus in Sabini collegæ nostri ordinatione, ut de universæ fraternitatis suffragio, & de episcoporum qui in præsentia convenerant, quique de eo ad vos litteras fecerant, judicio episcopatus ei deferretur, & manus ei in locum Basilidis imponeretur. Nec rescindere ordinationem jure perfectam potest, quod Basilides post crimina detecta, & conscientiam etiam propria confessione nudatam Romam pergens, Stephanum collegam nostrum longe positum, & gestæ rei ac veritatis ignarum fefellit, ut exambiret reponi se injuste in episcopatum, de quo fuerat jure depositus. Hoc eo pertinet, ut Basilidis non tam abolita sint, quam cumulata delicta, ut ad superiora peccata ejus etiam fallaciæ & circumventionis crimen accesserit. Neque enim tam culpandus est ille, cui negligenter obreptum est, quam hic execrandus, qui fraudulenter obrepfit. Obrepere autem si hominibus Basilides potuit, Deo non potest, cum scriptum sit: *Deus non deridetur.* Sed nec Martiali potest profuisse fallacia,

lacia, quo minus ipse quoque delictis gravibus involutus, episcopatum tenere non debeat, quando & apostolus moneat & dicat: *Episcopum oportet esse sine crimine, quasi Dei dispensatorem.* Quapropter cum, sicut scripsistis, fratres dilectissimi, & ut Felix & Sabinus collegæ nostri asseverant, utque alius Felix de Cæsaraugusta fidei cultor ac defensor veritatis litteris suis significat, Basilides & Martialis nefando idololatriæ libello contaminati sint, Basilides adhuc insuper, præter libelli maculam, cum in infirmitate decumberet, in Deum blasphemaverit, & se blasphemasse confessus sit, & episcopatum pro conscientiae suæ vulnere sponte deponens; ad agendam pœnitentiam conversus sit, Deum deprecans, & satis gratulans si sibi vel laico communicare contingeret; Martialis quoque præter gentilium turpia & lutulenta convivia in collegio diu frequentata, & filios in eodem collegio exterarum gentium more apud prophana sepulcra depositos & alienigenis consепultos, actis etiam publice habitis apud procuratorem ducenarium obtemperasse se idololatriæ, & Christum negasse contestatus sit; cumque alia multa sint & gravia delicta, quibus Basilides & Martialis implicati tenentur: frustra tales episcopatum sibi usurpare conantur, cum manifestum sit ejusmodi homines nec ecclesiæ Christi posse præesse, nec Deo sacrificia offerre debere; maxime cum jampridem nobiscum, & cum omnibus omnino episcopis in toto mundo constitutis etiam Cornelius collega noster, sacerdos pacificus ac justus, & martyrio quoque dignatione Domini honoratus, decreverit ejusmodi homines ad pœnitentiam quidem agendam posse admitti, ab ordinatione autem cleri atque sacerdotali honore prohiberi. Nec vos moveat, fratres dilectissimi, si apud quosdam in novissimis temporibus aut lubrica fides nutat, aut Dei timor irreligiosus vacillat, aut pacifica concordia non perseverat. Prænuntiata

tiata sunt hæc futura in sæculi fine, & Domini voce, atque apostolorum contestatione prædictum est, deficiente jam mundo, atque appropinquante antichristo, bona quæque deficere, mala vero & adversa proficere. Non sic tamen, quamvis novissimis temporibus, in ecclesia Dei aut evangelicus vigor cecidit, aut Christianæ virtutis aut fidei robur elanguit, ut non supersit portio sacerdotum, quæ minime ad has rerum ruinas, & fidei naufragia succumbat, sed fortis & stabilis honorem divinæ majestatis & sacerdotalem dignitatem plena timoris observatione tueatur. Meminimus & tenemus, succumbentibus licet & cedentibus ceteris, Mathatiam legem Dei vindicasse fortiter, Heliam, Judæis deficientibus, atque a religione divina recedentibus, stetisse & certasse sublimiter, Daniele nec solitudine regionis alienæ, nec persecutionis assiduæ infestatione deterritum, frequenter ac fortiter gloriosa dedisse martyria, tres item pueros nec caminis, nec minis fractos contra ignes Babylonios fideliter obstitisse, & victorem regem in ipsa sua captivitate vicisse. Viderit vel prævaricatorum numerus, vel proditorum, qui nunc in ecclesia contra ecclesiam surgere, & fidem pariter ac veritatem labefactare cœperunt. Permanet apud plurimos sincera mens, & religio integra, & non nisi Domino & Deo suo anima devota, nec christianam fidem aliena perfidia deprimit ad ruinam, sed magis excitat & exaltat ad gloriam, secundum quod beatus apostolus Paulus hortatur, & dicit: *Quid enim si exciderunt a fide quidam eorum, numquid infidelitas illorum fidem Dei evacuavit? Absit. Est enim Deus verax, omnis autem homo mendax.* Si autem omnis homo mendax est, & solus Deus verax, quid aliud servi, & maxime sacerdotes Dei, facere debemus, nisi ut humanos errores & mendacia reliquamus, & præcepta dominica custodientes, in Dei veritate maneamus? Quare etfi

etſi aliqui de collegis noſtris exſtiterint, fratres dilectiſſimi, qui deificam diſciplinam negligendam putant, & cum Baſilide & Martiale temere communicant, conturbare fidem noſtram res iſta non debet, cum ſpiritus ſanctus in Pfalmis talibus comminetur, dicens: *Tu autem odiſti diſciplinam, & abieciſti ſermones meos retro. Si videbas furem, concurrebas ei, & cum adulteris portionem tuam ponebas.* Conſortes & participes oſtendit eos alienorum delictorum fieri, qui fuerint delinquentibus copulati. Sed & hoc idem Paulus apoſtolus ſcribit, & dicit: *Suffurratores, detractores, abhorrentes Deo, injurioſi, ſuperbi, jaſtantes ſui, adinventores malorum, qui cum juſtitiam Dei cognoviſſent, non intellexerunt, quoniam qui talia agunt morte ſunt digni, non tantum qui faciunt ea, ſed & qui conſentiunt eis, qui hac agunt: quoniam qui talia, inquit, agunt, morte ſunt digni.* Maniſteſtat & comprobatur morte dignos eſſe, & ad pœnam venire, non tantum illos qui mala faciunt, ſed etiam eos qui talia agentibus conſentiunt, qui dum malis & peccatoribus, & pœnitentiam non agentibus illicita communicatione miſcentur, nocentium contactibus polluuntur, & dum junguntur in culpa, ſic nec in pœna ſeparantur. Propter quod integritatis & fidei veſtræ religioſam ſollicitudinem, fratres dilectiſſimi, & laudamus pariter, & probamus; & quantum poſſumus adhortamur litteris noſtris, ne vos cum prophanis & maculatis ſacerdotibus communicatione ſacrilega miſceatis, ſed integram & ſinceram fidei veſtræ firmitatem religioſo timore ſervetis. Opto vos, fratres cariſſimi, ſemper bene valere.

E P I S T O L A LXIX.

Ad Florentium Pupianum de obtreſſatoribus.

CYPRIANUS, qui & Thaſcius, Florentio cui & Pupiano fratri ſalutem. Ego te, frater, credideram

deram tandem jam ad poenitentiam converti, quod in præteritum tam infanda, tam turpia, tam etiam gentilibus execranda aut audisses de nobis temere, aut credidisses. Porro autem etiam nunc in litteris tuis animadverto eundem te adhuc esse, qui prius fueras, eadem te de nobis credere, & in eo quod credideris, perseverare, & ne forte claritatis & martyrii tui dignitas nostra communicatione maculetur, in mores nostros diligenter inquirere, & post Deum judicem, qui sacerdotes facit, te velle, non dicam de me, (quantus enim ego sum?) sed de Dei & Christi judicio judicare. Hoc est in Deum non credere, hoc est, rebellem adversus Christum, & adversus evangelium ejus existere, ut cum ille dicat: *Nonne duo passeres asse veneunt, & neuter eorum cadit in terram sine patris voluntate?* & probet majestas ejus & veritas sine conscientia & permisso Dei etiam minora non fieri, tu existimes sacerdotes Dei sine conscientia ejus in ecclesia ordinari. Nam credere quod indigni & incesti sint qui ordinantur; quid aliud est quam credere, quod non a Deo, nec per Deum sacerdotes ejus in ecclesia constituentur? An putas majus esse de me meum, quam Dei testimonium, cum Dominus ipse doceat, & dicat testimonium non esse verum, si quis ipse de se testis existat, eo quod unusquisque utique sibi faveat, nec contra se aliquis infesta & adversa depromat, fides vero sincera sit veritatis, si in prædicationibus nostris alius sit prædicator ac testis. Si *testimonium*, inquit, *dixero de me, testimonium meum non est verum. Alius est enim qui testis est de me.* Quod si ipse Dominus omnia postmodum judicaturus, noluit de testimonio suo sibi credi, sed maluit de judicio ac testimonio Dei patris probari, quanto magis hoc servos ejus observare oportet, qui judicio ac testimonio Dei non probantur tantum, sed etiam glorian-

riantur? Prævaluit autem apud te contra divinam sententiam, & contra conscientiam nostram fidei sue viribus nixam inimicorum & malignorum commentum, quasi apud lapsos, & prophanos, & extra ecclesiam positos, de quorum pectoribus excefferit spiritus sanctus, esse aliud possit nisi mens prava, & fallax lingua, & odia venenata, & sacrilega mendacia; quibus qui credit, cum illis necesse est inveniatur, cum iudicii dies venerit. Quod vero dixisti sacerdotes humiles esse debere, quia & Dominus & apostoli ejus humiles fuerunt, humilitatem meam & fratres omnes, & gentiles quoque optime norunt & diligunt; & tu quoque noveras & diligebas, cum adhuc in ecclesia esses, & mecum communicares. Quis autem nostrum longe est ab humilitate, utrumne ego, qui quotidie fratribus servio, & venientes ad ecclesiam singulos benigne, & cum voto & gaudio suscipio: an tu, qui te episcopum episcopi, & judicem judicis ad tempus a Deo dati constituis, cum Dominus Deus in Deuteronomio dicat? *Et homo quicumque fecerit in superbia, ut non exaudiat sacerdotem aut judicem quicumque fuerit in diebus illis, morietur homo ille, & omnis populus cum audierit timebit, & non agent impie etiam nunc.* Et iterum ad Samuelem loquitur & dicit: *Non te spreverunt, sed me spreverunt.* Et adhuc Dominus in evangelio, cum ei dictum esset: *Sic respondes pontifici?* custodiens & docens sacerdotalem honorem servari oportere, contra pontificem nihil dixerit, sed innocentiam suam tantummodo purgans responderit, dicens: *Si male locutus sum, exprobra de malo. Si autem bene, quid me cadis?* Item beatus apostolus, cum ei dictum esset: *Sic in filis in sacerdotem Dei maledicendo?* Nihil contumeliose locutus sit adversus sacerdotem, quando & potuerit se constanter exerere adversus eos, qui Dominum crucifixissent, & qui jam Deum, & Christum, & templum, & sacerdotium perdidissent; sed quamvis

in falsis & spoliatis sacerdotibus umbram tamen ipsam
 inanem sacerdotalis nominis cogitans dixerit: *Nescie-*
bam, fratres, quia pontifex est. Scriptum est enim: Prin-
cipem populi tui non maledices. Nisi si sacerdos tibi fui
 ante persecutionem, quando mecum communicabas,
 post persecutionem sacerdos esse desivi. Persecutio
 enim veniens te ad summam martyrii sublimitatem
 provexit. Me autem proscriptionis onere depreffit,
 cum publice legeretur: *Si quis tenet vel possidet de bo-*
nis Cacilii Cypriani episcopi Christianorum; ut etiam qui
 non credebant Deo episcopum constituenti, vel dia-
 bolo crederent episcopum proscribenti. Nec hæc
 jacto, sed dolens profero, cum te iudicem Dei con-
 stituas & Christi, qui dicit ad apostolos, ac per hoc ad
 omnes præpositos, qui apostolis vicaria ordinatione
 succedunt: *Qui audit vos, me audit; & qui me audit,*
audit eum qui me misit. Et qui rejicit vos, me rejicit,
& eum qui me misit. Inde enim schismata & hæreses
 obortæ sunt, & oriuntur, dum episcopus, qui unus
 est, & ecclesiæ præest, superba quorundam præsump-
 tione contemnitur, & homo dignatione Dei honora-
 tus, indignus hominibus judicatur. Quis enim hic
 est superbiæ tumor, quæ arrogantia animi, quæ
 mentis inflatio, ad cognitionem suam præpositos
 & sacerdotes vocare, ac nisi apud te purgati fue-
 rimus, & sententia tua absoluti, ecce jam sex an-
 nis nec fraternitas habuerit episcopum, nec plebs
 præpositum, nec grex pastorem, nec ecclesia guber-
 natorem, nec Christus antistitem, nec Deus sacerdo-
 tem? Subveniat Pupianus, & sententiam dicat, &
 iudicium Dei & Christi in acceptum referat, ne tan-
 tus fidelium numerus, qui sub nobis arcessitus est, si-
 ne spe salutis & pacis exisse videatur, nec novus cre-
 dentium populus nullam per nos consecutus esse ba-
 ptismi & spiritus sancti gratiam iudicetur, ne tot lap-
 sis & pœnitentibus pax data, & communicatio nostra
 exami-

examinatione concessa iudicii tui auctoritate solvatur: Annue aliquando, & dignare pronuntiare de nobis, & episcopatum nostrum cognitionis tuæ auctoritate firmare, ut Deus & Christus ejus agere tibi gratias possint, quod per te sit antistes & rector altari eorum pariter & plebi restitutus. Apes habent regem, & ducem pecudes, & ei fidem servant. Latrones mancipi obsequio pleno humilitatis obtemperant. Quanto simpliciores & meliores vobis sunt brutæ pecudes, & muta animalia, & cruenti licet ac furentes inter gladios atque inter arma prædones? Præpositus illic agnoscitur & timeatur, quem non sententia divina constituit, sed in quem factio perdita, & nocens caterva consensit. Dixisti sane scrupulum tibi esse tollendum de animo, in quem incidisti. Incidisti, sed tua credulitate inreligiosa. Incidisti, sed tua mente & voluntate sacrilega, dum incesta, dum impia, dum nefanda contra fratrem, contra sacerdotem facile audis, libenter credis, aliena mendacia quasi propria & privata defendis; nec recordaris scriptum esse: *Sepi aures tuas spinis, & noli audire linguam nequam.* Et iterum: *Malus obaudit lingue iniquorum, justus autem non intendit labiis mendacibus.* Quare in hunc scrupulum non inciderunt martyres sancto spiritu pleni, & ad conspectum Dei & Christi ejus passione jam proximi, qui ad Cyprianum episcopum litteras de carcere direxerunt, sacerdotem Dei agnoscentes & contestantes ei? Quare in hunc scrupulum non inciderunt tot episcopi collegæ mei, qui vel cum de medio recederent, proscripti sunt, vel apprehensi in carcerem conjecti, & in catenis fuerunt, aut qui in exilium relegati, illustri itinere ad Dominum profecti sunt, aut qui quibusdam locis animadversi cælestes coronas de Domini clarificatione sumpserunt? Quare in hunc scrupulum non inciderunt de plebe ista, nostra quæ apud nos est, & nobis de Dei dignatione commissa est, tot confessores quæstionati & torti, & in-

signium

signium vulnerum & cicatricum memoria gloriosi, tot virgines integræ, tot laudabiles viduæ, ecclesiæ denique universæ per totum mundum nobiscum unitatis vinculo copulatæ? nisi si omnes isti communicantes mecum, secundum quod scripsisti, polluto nostro ore polluti sunt, & spem vitæ æternæ communicationis nostræ contagione perdiderunt. Pupianus solus integer, inviolatus, sanctus, pudicus, qui nobis miscere se noluit, in paradiso atque in regno cælorum solus habitabit. Scripsisti quoque quod ecclesia nunc propter me portionem sui in disperso habeat, quando omnis ecclesia populus & collectus sit, & adunatus, & individua concordia sibi junctus, soli illi foris remanserint, qui etsi intus essent, ejiciendi fuerant, nec patiatur Dominus populi sui protector & tutor triticum de area sua diripi, sed solæ possit paleæ de ecclesia separari, quando & apostolus dicat: *Quid enim si exciderunt a fide quidam illorum? Numquid infidelitas illorum fidem Dei evacuavit? Absit. Est enim Deus verax, omnis autem homo mendax.* Et Dominus quoque in evangelio, cum eum loquentem discipuli dereliquerent, conversus ad duodecim dixit: *Numquid & vos vultis ire? Respondit ei Petrus dicens: Domine, ad quem ibimus? Verbum vitæ æternæ habes, & nos credimus & cognovimus, quoniam tu es filius Dei vivi.* Loquitur illic Petrus, super quem ædificanda fuerat ecclesia ecclesiæ nomine docens & ostendens, quia etsi contumax ac superba obaudire nolentium multitudo discedat, ecclesia tamen a Christo non recedit, & illi sunt ecclesia plebs sacerdoti adunata, & pastori suo grex adhærens. Unde scire debes episcopum in ecclesia esse, & ecclesiam in episcopo, & si quis cum episcopo non sit, in ecclesia non esse, & frustra sibi blandiri eos, qui pacem cum sacerdotibus Dei non habentes obrepunt, & latenter apud quosdam communicare se credunt, quando ecclesia, quæ catholica & una est,

scissa

scissa non sit neque divisa, sed sit utique connexa, & cohærentium sibi invicem sacerdotum glutino copulata. Quamòbrem, frater, si majestatem Dei, qui sacerdotes ordinat, cogitaveris, si Christum, qui arbitrio & nutu ac præsentia sua & præpositos ipsos, & ecclesiam cum præpositis gubernat, aliquando respexeris, si de innocentia sacerdotum, non humano odio, sed divino judicio credideris, si temeritatis & superbiæ atque insolentiæ tuæ agere vel sero pœnitentiam cœperis, si Deo & Christo ejus, quibus servio, & quibus puro atque immaculato ore sacrificia & in persecutione pariter, & in pace indefinenter offero, plenissime satisfeceris: communicationis tuæ poterimus habere rationem, manente tamen apud nos divinæ censuræ respectu & metu, ut prius Dominum meum consulam, an tibi pacem dari, & te ad communicationem ecclesiæ suæ admitti sua ostensione & admonitione permittat. Memini enim quid jam mihi sit ostensum, immo quid sit servo obsequenti & timenti de dominica & divina auctoritate præceptum; qui inter cetera, quæ ostendere & revelare dignatus est, & hoc addidit: Itaque qui Christo non credit sacerdotem facienti, postea credere incipiet sacerdotem vindicanti. Quamquam sciam somnia ridicula, & visiones ineptas videri, sed utique illis qui malunt contra sacerdotes credere, quam sacerdoti. Sed nihil mirum, quando de Joseph fratres sui dixerunt: *Eccè somniator ille venit, nunc ergo venit, occidamus illum*, & somniator postea quod somniaverat, consecutus sit, & occisores ac venditores confusi sint; ut qui verbis prius non credidissent, factis postmodum crederent. De iis autem quæ tu egisti vel in persecutione, vel in pace; stultum est ut velim te judicare, quando tu magis judicem te nostri constitueris. Hæc pro animi mei pura conscientia, & pro Domini & Dei mei fiducia rescripsi. Habes tu litteras meas, & ego tuas.

In

In die iudicii ante tribunal Christi utrumque recitabitur.

EPISTOLA LXX.

Ad Januarium & ceteros episcopos Numidas de baptizandis hæreticis.

CYPRIANUS, Liberalis, Caldonius, Junius, Primus, Cæcilius, Polycarpus, Nicomedes, Felix, Marrutius, Successus, Lucianus, Honoratus, Fortunatus, Victor, Donatus, Lucius, Herculanus, Pomponius, Demetrius, Quintus, Saturninus, Marcus, alius Saturninus, alius Donatus, Rogatianus, Sedatus, Tetullus, Hortensianus, item alius Saturninus, Sattius Januario, Saturnino, Maximo, Victori, alio Victori, Cassio, Proculo, Modiano, Citino, Gargilio, Eutyciano, alio Gargilio, alio Saturnino, Nemesiano, Nampulo, Antoniano, Rogatiano, Honorato fratribus salutem Cum simul in concilio essemus, fratres carissimi, legimus litteras vestras, quas ad nos fecistis de iis, qui apud hæreticos & schismaticos baptizati videntur, an ad ecclesiam catholicam, quæ una & vera est, venientes baptizari debeant. De qua re quamquam & ipsi illic veritatem & firmitatem catholicæ regulæ teneatis, tamen quoniam consulendos nos pro communi dilectione existimastis, sententiam nostram non novam promimus, sed jampridem ab antecessoribus nostris statutam, & a nobis observatam vobiscum pari consensione conjungimus, censentes scilicet, & pro certo tenentes neminem foris baptizari extra ecclesiam posse, cum sit baptisma unum in sancta ecclesia constitutum, & scriptum sit Domino dicente: *Me dereliquerunt fontem aquæ viæ, & effoderunt sibi lacus detritæ, qui non possunt aquam portare.* Et iterum divina scriptu-

scriptura moneat, & dicat: *Ab aqua aliena abstine te, & a fonte aquae alienae ne biberis.* Oportet ergo mundari, & sanctificari aquam prius a sacerdote, ut possit baptismo suo peccata hominis qui baptizatur, abluere; quia per Ezechielem prophetam Dominus dicit: *Et aspergam super vos aquam mundam, & mundabimini ab omnibus immuditiis vestris, & ab omnibus simulacris vestris emundabo vos, & dabo vobis cor novum, & spiritum novum dabo in vobis.* Quomodo autem mundare & sanctificare aquam potest, qui ipse immundus est, & apud quem spiritus sanctus non est? cum Dominus dicat in Numeris: *Et omnia quaecumque tetigerit immundus, immunda erunt.* Aut quo modo baptizans dare alteri remissionem peccatorum potest, qui ipse sua peccata deponere extra ecclesiam non potest? Sed & ipsa interrogatio quæ fit in baptismo, testis est veritatis. Nam cum dicimus: *Credis in vitam æternam, & remissionem peccatorum per sanctam ecclesiam?* intelligimus remissionem peccatorum non nisi in ecclesia dari, apud hæreticos autem, ubi ecclesia non sit, non posse peccata dimitti. Itaque qui hæreticos baptizare posse asserunt, aut interrogationem mutant, aut vindicent veritatem, nisi si eis & ecclesiam tribuunt, quos baptisma habere contendunt. Ungi quoque necesse est eum, qui baptizatus sit, ut accepto chrismate, id est, unctione, esse unctus Dei, & habere in se gratiam Christi possit. Porro autem eucharistia est, unde baptizati unguuntur oleo in altari sanctificato. Sanctificare autem non potuit olei creaturam, qui nec altare habuit, nec ecclesiam. Unde nec unctio spiritualis apud hæreticos potest esse, quando constat oleum sanctificari, & eucharistiam fieri apud illos: omnino non posse. Scire autem & meminisse debemus scriptum esse: *Oleum peccatoris non ungat caput meum:* quod ante in psalmis præmonuit spiritus sanctus, ne quis exorbitans, & a via veritatis exerrans,
apud

apud hæreticos & Christi adversarios ungeretur. Sed & pro baptizato quam precem facere potest sacerdos sacrilegus & peccator? cum scriptum sit: *Deus peccatorem non audit: sed qui eum coluerit, & voluntatem ejus fecerit, illum audit.* Quis autem potest dare, quod ipse non habeat, aut quomodo potest spiritalia agere, qui ipse amiserit spiritum sanctum? Et iccirco baptizandus est & innovandus, qui ad ecclesiam rudis venit, ut intus per sanctos sanctificetur, quia scriptum est: *Sancti estote, quia & ego sanctus sum, dicit Dominus:* ut qui in errorem seductus est, & foris tinctus, in baptismo vero & ecclesiastico etiam hoc ipsum deponat, quod homo ad Deum veniens, dum sacerdotem quærit, in sacrilegum fraude erroris incurrit. Ceterum probare est hæreticorum & schismaticorum baptisma consentire in id, quod illi baptizaverint. Neque enim potest pars illic inanis esse, & pars prævalere. Si baptizare potuit, potuit & spiritum sanctum dare. Si autem spiritum sanctum dare non potest, quia foris constitutus cum sancto spiritu non est, nec baptizare venientem potest, quando & baptisma unum sit, & spiritus sanctus unus, & una ecclesia a Christo Domino super Petrum origine unitatis & ratione fundata. Ita fit, ut cum omnia apud illos inania & falsa sint, nihil eorum quæ illi gesserint probari a nobis debeat. Quid enim potest ratum & firmum esse apud Deum, quod illi faciunt, quos Dominus hostes & adversarios suos dicit in evangelio suo ponens: *Qui non est mecum adversum me est; & qui non mecum colligit, spargit?* Et beatus quoque apostolus Joannes mandata Domini & præcepta custodiens, in epistola sua posuerit, dicens: *Audistis quia antichristus venit. Nunc autem antichristi multi facti sunt. Unde cognoscimus quia novissima hora est. Ex nobis exierunt, sed non fuerunt ex nobis. Si enim fuissent ex nobis, mansissent utique nobiscum.* Unde nos quoque colligere, & confi-

considerare debemus, an qui adversarii sunt Domini, & appellati sunt antichristi, possint dare gratiam Christi. Quare qui cum Domino sumus, & unitatem Domini tenemus, & secundum ejus dignationem sacerdotium ejus in ecclesia administramus, quocumque adversarii ejus & antichristi faciunt, repudiare & rejicere, & pro prophanis habere debemus, & eis qui de errore & pravitate venientes, agnoscunt unius ecclesiae veram fidem, dare illis per omnia divinæ gratiæ sacramenta & unitatis & fidei veritatem. Optamus vos, fratres carissimi, semper bene valere.

E P I S T O L A LXXI.

Ad Quintum de hæreticis baptizandis.

CYPRIANUS Quinto fratri salutem. Retulit ad me, frater carissime, Lucianus compresbyter noster, te desiderasse, ut significarem tibi quid sentiamus de his, qui apud hæreticos, & schismaticos baptizati videntur. De qua re quid nuper in concilio plurimi coepiscopi cum compresbyteris qui aderant, censuerimus, ut scires, ejusdem epistolæ exemplum tibi misi. Nescio etenim, qua præsumptione ducuntur quidam de collegis nostris, ut putent eos qui apud hæreticos tincti sunt, quando ad nos venerint, baptizari non oportere, eo quod dicant unum baptisma esse; quod unum scilicet ideo est, quia ecclesia una est, & esse baptisma extra ecclesiam non potest. Nam cum duo baptismata esse non possint, si hæretici vere baptizant, ipsi habent baptisma. Et qui hoc illis patrociniū de auctoritate sua præstat, cedit illis, & consentit, ut hostis & adversarius Christi habere videatur abluendi, & purificandi, & sanctificandi hominis potestatem. Nos autem dicimus eos qui inde veniunt, non rebaptizari apud nos, sed baptizari. Neque enim accipiunt

S. Cypriani Tom. I. P illic

illic aliquid, ubi nihil est; sed veniunt ad nos, ut hic accipiant, ubi & gratia, & veritas omnis est; quia & gratia, & veritas una est. Porro autem quidam de collegis nostris malunt hæreticis honorem dare, quam nobis consentire; & dum unius baptismi asseveratione baptizare venientes nolunt, sic aut duo baptis-
mata ipsi faciunt, dum & apud hæreticos baptismum esse dicunt, aut certe, quod est gravius, hæretico-
rum sordidam & prophanam tinctionem vero, & unico, & legitimo ecclesiæ catholicæ baptismum præponere, & præferre contendunt, non considerantes scriptum esse: *Qui baptizatur a mortuo, quid proficit lavatio ejus?* Manifestum est autem eos, qui non sunt in ecclesia Christi inter mortuos computari, nec posse ab eo vivificari alterum, qui ipse non vivat, quando una sit ecclesia, quæ vitæ æternæ gratiam consecuta, & vivit in æternum, & vivificat Dei populum. Et dicunt se in hoc veterem consuetudinem sequi, quando apud veteres hæreseos & schismatum prima adhuc fuerint initia, ut hi illic essent, qui de ecclesia recedebant, & hic baptizati prius fuerant; quos tunc tamen ad ecclesiam revertentes, & pœnitentiam agentes necesse non erat baptizare. Quod nos quoque hodie observamus, ut quos constet hic baptizatos esse, & a nobis ad hæreticos transisse, si postmodum peccato suo cognito, & errore digesto ad veritatem, & matricem redeant, satis sit in pœnitentiam manum imponere; ut quia ovis jam fuerat, hanc ovem abalienatam & errabundam in ovile suum pastor recipiat. Si autem, qui ab hæreticis venit, baptizatus in ecclesia prius non fuit, sed alienus in totum & prophanus venit, baptizandus est, ut ovis fiat, quia una est aqua in ecclesia sancta, quæ oves faciat. Et iccirco quia nihil potest esse commune mendacio & veritati, tenebris & luci, morti & immortalitati, antichristo & christo, per omnia debemus ecclesiæ catholicæ unitatem tenere,
nec

nec in aliquo fidei & veritatis hostibus cedere. Non est autem consuetudine præscribendum, sed ratione vincendum. Nam nec Petrus, quem primum Dominus elegit, & super quem ædificavit ecclesiam suam, cum secum Paulus de circumcisione postmodum disceptaret, vindicavit sibi aliquid insolenter, aut arroganter assumpsit, ut diceret se primatum tenere, & obtemperari a novellis & posteris sibi potius oportere. Nec despexit Paulum, quod ecclesiæ prius persecutor fuisset, sed consilium veritatis admisit, & rationi legitimæ quam Paulus vindicabat, facile consensit, documentum scilicet nobis & concordia, & patientiæ tribuens, ut non pertinaciter nostra amemus, sed quæ aliquando a fratribus & collegis nostris utiliter & salubriter suggeruntur, si sint vera & legitima, ipsa potius nostra ducamus. Cui rei Paulus quoque prospiciens, & concordia & paci fideliter consulens in epistola sua posuit, dicens: *Propheta autem duo aut tres loquantur, & ceteri examinent. Si autem alii revelatum fuerit sedenti, ille prior taceat.* Qua in parte docuit, & ostendit multa singulis in melius revelari, & debere unumquemque non pro eo quod semel inbiberat, & tenebat, pertinaciter congregi, sed si quid melius & utilius exstiterit, libenter amplecti. Non enim vincimur quando offeruntur nobis meliora; sed instruimur, maxime in his, quæ ad ecclesiæ unitatem pertinent, & spei ac fidei nostræ veritatem; ut nos sacerdotes Dei, & ecclesiæ ejus de ipsius dignatione præpositi, sciamus remissam peccatorum non nisi in ecclesia dari posse, nec posse adversarios Christi quidquam sibi circa ejus gratiam vindicare. Quod quidem & Agrippinus, bonæ memoriæ vir, cum ceteris coepiscopis suis, qui illo in tempore in provincia Africa & Numidia ecclesiam Domini gubernabant, statuit, & librato consilii communis examine firmavit. Quorum sententiam & re-

ligiosam, & legitimam, & salutarem, fidei & ecclesiæ catholicæ congruentem, nos etiam secuti sumus. Et quales super hac re litteras fecerimus ut scires, exemplum earum ad notitiam tam tuam, quam coepiscoporum nostrorum qui illic sunt, pro communi dilectione transmisimus. Opto te, frater carissime, semper bene valere.

EPISTOLA LXXII.

Ad Stephanum Papam de Concilio.

CYPRIANUS & ceteri Stephano fratri salutem. Ad quædam disponenda, & consilii communis examinatione limanda, necesse habuimus, frater carissime, convenientibus in unum pluribus sacerdotibus cogere, & celebrare concilium, in quo multa quidem prolata atque transacta sunt. Sed de eo vel maxime tibi scribendum, & cum tua gravitate ac sapientia conferendum fuit, quod magis pertineat & ad sacerdotalem auctoritatem, & ad ecclesiæ catholicæ unitatem pariter ac dignitatem de divinæ dispositionis ordinatione venientem, eos qui sint foris extra ecclesiam tincti, & apud hæreticos & schismaticos prophanæ aquæ labe maculati, quando ad nos atque ad ecclesiam, quæ una est, venerint, baptizari oportere; eo quod parum sit eis manum imponere ad accipiendum spiritum sanctum, nisi accipiant & ecclesiæ baptismum. Tunc enim demum plene sanctificari, & esse filii Dei possunt, si sacramento utroque nascantur, cum scriptum sit: *Nisi quis renatus fuerit ex aqua & spiritu, non potest introire in regnum Dei.* Invenimus enim etiam in actis apostolorum, hoc esse ab apostolis custoditum, & salutaris fidei veritate servatum, ut cum in domo Cornelii centurionis super ethnicos, qui illic aderant, fidei calore ferventes, & in Domi-
num

num toto corde credentes descendisset spiritus sanctus, quo adimpleti variis linguis Deum benedicerent: nihilominus tamen beatum apostolum Petrum, divini præcepti atque evangelii memorem præcepisse; ut baptizarentur iidem illi, qui jam fuerant sancto spiritu pleni, ut nihil prætermissum videretur, quo minus per omnia divini præcepti atque evangelii legem apostolica magisteria servarent. Baptismum autem non esse quo hæretici utuntur, nec quemquam apud eos, qui Christo adversantur, per gratiam Christi posse proficere, diligenter nuper expressum est in epistola, quæ ad Quintum collegam nostrum, in Mauritania constitutum super ea re scripta est, item in litteris, quas collegæ nostri ad coepiscopos in Numidia præfidentes ante fecerunt; cujus utriusque epistolæ exempla subdimus hic. Addimus plane & adjungimus, frater carissime, consensu & auctoritate communi, ut etiam si qui presbyteri aut diaconi, qui vel in ecclesia catholica prius ordinati fuerint, & postmodum perfidi ac rebelles contra ecclesiam steterint, vel apud hæreticos a pseudoepiscopis & antichristis contra Christi dispositionem prophana ordinatione promoti sint, & contra altare unum atque divinum sacrificia foris falsa, ac sacrilega offerre conati sint, eos quoque hac conditione suscipi cum revertuntur, ut communicent laici, & satis habeant quod admittuntur ad pacem, qui hostes pacis exstiterint, nec debere eos revertentes ea apud nos ordinationis & honoris arma retinere, quibus contra nos rebellaverint. Oportet enim sacerdotes & ministros qui altari & sacrificiis deserviunt, integros atque immaculatos esse, cum Dominus Deus in Levitico loquatur, & dicat: *Homo in quo fuerit macula & vitium, non accedet offerre dona Deo.* Item in Exodo hæc eadem præcipiat & dicat: *Et sacerdotes qui accedunt ad Dominum Deum, sanctificentur, ne forte derelinquat illos Dominus.*

Et iterum: *Et cum accedunt ministrare ad altare sancti, non adducent in se delictum, ne moriantur.* Quod autem majus potest esse delictum, aut quæ macula deformior, quam adversus Christum stetisse, quam ecclesiam ejus, quam ille sanguine suo paravit, & condidit, dissipasse, quam evangelicæ pacis ac dilectionis oblitum, contra unanimem & concordem Dei populum hostilis discordiæ furore pugnasse? Qui etsi postmodum ad ecclesiam redeunt, restituere tamen eos, & secum revocare non possunt, qui ab eis seducti, & foris morte præventi extra ecclesiam sine communicatione & pace perierunt; quorum animæ in die judicii de ipsorum manibus expetentur, qui perditionis auctores & duces exstiterunt. Et iccirco satis est talibus revertentibus veniam dari. Non tamen debet in domo fidei perfidia promoveri. Nam quid bonis & innocentibus, atque ab ecclesia non recedentibus reservamus, si eos qui a nobis recesserint, & contra ecclesiam steterint, honoramus? Hæc ad conscientiam tuam, frater carissime, & pro honore communi, & pro simplici dilectione pertulimus, credentes etiam tibi pro religionis tuæ & fidei veritate placere, quæ & religiosa pariter & vera sunt. Ceterum scimus quosdam quod semel inbiberint, nolle deponere, nec propositum suum facile mutare, sed salvo inter collegas pacis & concordie vinculo quædam propria, quæ apud se semel sint usurpata, retinere. Qua in re nec nos vim cuiquam facimus, aut legem damus, quando habeat in ecclesiæ administratione voluntatis suæ arbitrium liberum unusquisque præpositus, rationem actus sui Domino redditurus. Optamus te, frater carissime, semper bene valere.

EPISTOLA. LXXIII.

Ad Jubajanum de hæreticis baptizandis.

CYPRIANUS Jubajano fratri salutem. Scripsisti mihi, frater carissime, desiderans significari tibi motum animi nostri, quid nobis videatur de hæreticorum baptismo, qui foris positi, & extra ecclesiam constituti vindicant sibi rem nec juris sui, nec potestatis. Quod nos nec ratum possumus, nec legitimum computare, quando hoc apud eos esse constet illicitum. Et quoniam jam super hac re quid sentiremus, litteris nostris expressimus, ut compendium facerem, exemplum earundem litterarum tibi misi, quid in concilio, cum complures adessemus, decreverimus, quid item postea Quinto collegæ nostro de eadem re quærenti rescripserim. Et nunc quoque cum in unum convenissemus tam provinciæ Africæ quam Numidiæ episcopi, numero septuaginta & unus, hoc idem denuo sententia nostra firmavimus, statuentes unum baptisma esse, quod sit in ecclesia catholica constitutum, ac per hoc non rebaptizari, sed baptizari à nobis, quicumque ab adultera & prophana aqua venerint abluendi, & sanctificandi salutaris aquæ veritate. Nec nos movet, frater carissime, quod in litteris tuis complexus es, Novatianenses rebaptizare eos, quos à nobis sollicitant, quando ad nos omnino non pertineat, quid hostes ecclesiæ faciant, dummodo teneamus ipsi potestatis nostræ honorem, & rationis ac veritatis firmitatem. Nam Novatianus simiarum more, quæ cum homines non sint, humana tamen imitantur, vult ecclesiæ catholicæ auctoritatem sibi, & veritatem vindicare, quando ipse in ecclesia non sit, immo adhuc insuper contra ecclesiam rebellis & hostis exstiterit. Sciens etenim unum esse baptisma, hoc unum sibi vindicat, ut apud se esse ecclesiam di-

cat, & nos hæreticos faciat. Nos autem, qui ecclesiæ unius caput & radicem tenemus, pro certo scimus & fidimus, nihil illi extra ecclesiam licere, & baptisma, quod est unum, apud nos esse, ubi & ipse baptizatus prius fuerat, quando divinæ unitatis & rationem & veritatem tenebat. Quod si in ecclesia baptizatos rebaptizandos foris extra ecclesiam Novatianus existimat, a se incipere debuerat, ut prior extraneo & hæretico baptismo rebaptizaretur, qui post ecclesiam, immo & contra ecclesiam baptizando, foris opinatur. Quale est autem, ut quia hoc Novatianus facere audet, nos putemus non esse faciendum? Quid ergo? Quia & honorem cathedræ sacerdotalis Novatianus usurpat, num ideo nos cathedræ renuntiare debemus? Aut quia Novatianus altare collocare, & sacrificia offerre contra fas nititur, ab altari & sacrificiis cessare nos oportet, ne paria & similia cum illo celebrare videamur? Vanum prorsus & stultum est, ut quia Novatianus extra ecclesiam vindicat sibi veritatis imaginem, relinquamus ecclesiæ veritatem. Apud nos autem non nova, aut repentina res est, ut baptizandos censeamus eos, qui ab hæreticis ad ecclesiam veniunt, quando multi jam anni sint, & longa ætas, ex quo sub Agrippino, bonæ memoriæ viro, convenientes in unum episcopi pluri hoc statuerint, atque exinde in hodiernum tot millia hæreticorum in provinciis nostris ad ecclesiam conversi, non aspernati sint neque cunctati, immo & rationabiliter & libenter amplexi sint, ut lavacri vitalis & salutaris baptismi gratiam consequerentur. Neque enim difficile est doctore, vera & legitima insinuare ei, qui hæretica pravitate damnata, & ecclesiastica veritate comperta, ad hoc venit ut discat, ad hoc discit ut vivat. Nos non debemus stuporem hæreticis patrocínio consensus nostri augere, cum libenter ac prompte obtemperant veritati. Plane quoniam

niam inveni in epistola, cujus exemplum ad me transmisisti, scriptum esse quod quærendum non sit, quis baptizaverit, quando is qui baptizatus sit, accipere remissam peccatorum potuerit secundum quod credit; prætereundum hunc locum non putavi, maxime cum in eadem epistola animadverterim, etiam Marcionis fieri mentionem, ut nec ab ipso venientes dicat baptizari oportere, quod jam in nomine Jesu Christi baptizati esse videantur. Considerare itaque debemus fidem eorum, qui foris credunt, an secundum eandem fidem possint aliquid gratiæ consequi. Nam si fides una est nobis & hæreticis, potest esse & gratia una. Si eundem patrem, eundem filium, eundem spiritum sanctum, eandem ecclesiam confitentur nobiscum Patripassiani, Anthropiani, Valentiniani, Appellatiani, Ophitæ, Marcionitæ, & ceteræ hæreticorum pestes, & gladii, ac venena subvertendæ veritatis, potest illic & baptisma unum esse, si est & fides una. Ac ne longum sit per hæreses universas decurrere, & singularum vel ineptias vel insanias recensere, quia nec delectat id dicere, quod aut horret, aut pudet nosse, de Marcione interim solo, cujus mentio in epistola a te ad nos transmissa facta est, examinemus, an possit baptismatis ejus ratio constare. Dominus enim post resurrectionem discipulos suos mittens, quemadmodum baptizare deberent, instruxit & docuit, dicens: *Data est mihi omnis potestas in calo & in terra. Ite ergo & docete gentes omnes, baptizantes eos in nomine patris & filii & spiritus sancti.* Insinuat trinitatem, cujus sacramento gentes baptizarentur. Numquid hanc trinitatem Marcion tenet? Numquid eundem asserit, quem & nos patrem creatorem? Numquid eundem novit filium Christum de Maria virgine natum, qui sermo caro factus sit, qui peccata nostra portaverit, qui mortem moriendo vicerit, qui resurrectionem carnis per

femetipsum primus initiaverit, & discipulis suis quod in eadem carne resurrexisset, ostenderit? Longe alia est apud Marcionem; sed & apud ceteros hæreticos fides. Immo nihil est apud illos nisi perfidia, & blasphemia, & contentio sanctitatis & veritatis inimica. Quomodo ergo potest videri qui apud illos baptizatur, consecutus esse peccatorum remissionem, & divinæ indulgentiæ gratiam per suam fidem, qui ipsius fidei non habuerit veritatem? Si enim, sicut quibusdam videtur, secundum fidem suam quis accipere aliquid foris extra ecclesiam potuit, utique id accepit, quod credidit. Falsum autem credens verum accipere non potuit, sed potius adultera ad prophana, secundum quod credebat, accepit. Quem locum prophani & adulteri baptismi subtiliter Hieremias propheta perstringit, dicens: *Ut quid, qui contristant me, praevalent? Plaga mea solida est, unde sanabor? Deum fit, facta est mihi quasi aqua mendax non habens fidem.* Mentionem facit per prophetam spiritus sanctus aquæ mendacis, & fidem non habentis. Quæ est hæc aqua mendax & perfida? Utique ea quæ baptismi imaginem mentitur, & gratiam fidei adumbrata simulatione frustratur. Quod si secundum pravam fidem baptizari aliquis foris, & remissionem peccatorum consequi potuit, secundum eandem fidem consequi & spiritum sanctum potuit, & non est necesse ei venienti manum imponi, ut spiritum sanctum consequatur, & signetur. Aut utrumque enim fide sua foris consequi potuit, aut neutrum eorum, qui foris fuerat, accepit. Manifestum est autem, ubi & per quos remissa peccatorum dari possit, quæ in baptismo scilicet datur. Nam Petro primum Dominus, super quem ædificavit ecclesiam, & unde unitatis originem instituit & ostendit, potestatem istam dedit, ut id solveretur in cælis, quod ille solvisset in terris. Et post resurrectionem quoque ad apostolos loquitur dicens: *Sicut misit*
me

me pater, & ego mitto vos. Hoc cum dixisset, inspiravit, & ait illis: Accipite spiritum sanctum. Si cujus remiseritis peccata, remittentur illi; si cujus tenueritis, tenentur. Unde intelligimus non nisi in ecclesia præpositis, & in evangelica lege ac dominica ordinatione fundatis, licere baptizare, & remissam peccatorum dare, foris autem nec ligari aliquid posse nec solvi, ubi non sit, qui aut ligare possit aliquid, aut solvere. Nec hoc, frater carissime, sine scripturæ divinæ auctoritate proponimus, ut dicamus certa lege ac propria ordinatione divinitus cuncta esse disposita, nec posse quemquam contra episcopos & sacerdotes usurpare sibi aliquid, quod non sit sui juris & potestatis. Nam & Chore & Dathan & Abiron contra Moysem & Aaron sacerdotem sacrificandi sibi licentiam usurpare conati sunt; nec tamen quod illicite ausi sunt, impune fecerunt. Et filii Aaron, qui alienum ignem altari imposuerunt, in conspectu statim Domini indignantis extincti sunt. Quod supplicium manet eos, qui alienam aquam baptismo inferunt falso, ut divina censura ulciscatur, & vindicet id hæreticos contra ecclesiam gerere, quod non nisi soli liceat ecclesiæ. Quod autem dicunt quidam de eis qui in Samaria baptizati fuerant, advenientibus apostolis Petro & Joanne, tantum super eos manum impositam esse, ut acciperent spiritum sanctum, rebaptizatos tamen non esse, locum istum, frater carissime, ad præsentem causam videmus omnino non pertinere. Illi enim qui in Samaria crediderant, fide vera crediderant, & intus in ecclesiâ, quæ una est, & cui soli gratiam baptismi dare, & peccata solvere permissum est, a Philippo diacono, quem iidem apostoli miserant, baptizati erant. Et ideo quia legitimum & ecclesiasticum baptismum consecuti fuerant, baptizari eos ultra non oportebat, sed tantummodo quod deerat, id a Petro & Joanne factum est, ut oratione
pro

pro eis habita, & manu imposita, invocaretur & infunderetur super eos spiritus sanctus. Quod nunc quoque apud nos geritur, ut qui in ecclesia baptizantur, præpositis ecclesiæ offerantur, & per nostram orationem ac manus impositionem spiritum sanctum consequantur, & signaculo dominico consummentur. Non est ergo, frater carissime, quod hæreticis cedendum existimemus, ut baptismus, quod non nisi uni & soli ecclesiæ datum sit, prodendum putemus. Bóni militis est, adversus rebelles & hostes imperatoris sui castra defendere. Gloriosi ducis est, commissa sibi signa servare. Scriptum est: *Dominus Deus tuus Deus zelans est.* Qui spiritum Dei accepimus, zelum divinæ fidei habere debemus. Quo zelo Phinees placuit, & Deum promeritis indignantis iram populo pereunte lenivit. Quid adulteram & alienigenam & divinæ unitatis inimicam in acceptum referimus, qui non nisi unum Christum & unam ejus ecclesiam novimus? Ecclesia paradisi instar exprimens arbores fructíferas intra muros suos intus includit, ex quibus quæ non facit fructum bonum, exciditur, & in ignem mittitur. Has arbores rigat quatuor fluminibus, id est, evangeliiis quatuor, quibus baptismi gratiam salutaris cælesti inundatione largitur. Numquid de ecclesiæ fontibus rigare potest, qui intus in ecclesia non est? Numquid paradisi potus salubres & salutares impertire cuiquam potest, qui perversus, & a semetipso damnatus, & extra paradisi fontes relegatus aruit, & æternæ sitis siccitate defecit? Clamat Dominus, ut qui sitit, veniat & bibat de fluminibus aquæ vivæ, quæ de ejus ventre fluxerunt. Quo venturus est qui sitit, utrumne ad hæreticos, ubi fons & fluvius aquæ vitalis omnino non est, an ad ecclesiam, quæ una est, & super unum, qui & claves ejus accepit, Domini voce fundata est? Hæc est una, quæ tenet & possidet omnem sponsi sui & domini potestatem. In hac præsi-

præsidemus, pro honore ejus atque unitate pugnamus, hujus & gratiam pariter & gloriam fidei devotione defendimus. Nos de divino permisso rigamus sitientem Dei populum, nos custodimus terminos vitalium fontium. Si possessionis ergo nostræ jus tenemus, si sacramentum unitatis agnoscimus, cur prævaricatores veritatis, cur proditores unitatis existimamur? Aqua ecclesiæ fidelis & salutaris & sancta corrumpi, & adulterari non potest, sicut & ipsa ecclesia incorrupta & casta & pudica est. Si ecclesiæ devoti & in ecclesia constituti sunt hæretici, possunt & baptismo ejus & ceteris salutaribus bonis uti. Si autem in ecclesia non sunt, immo & contra ecclesiam faciunt, quomodo baptizare baptismo ecclesiæ possunt? Neque enim parva res hæreticis & modica conceditur, quando a nobis baptismus eorum in acceptum refertur, cum inde incipiat omnis fidei origo, & ad spem vitæ æternæ salutaris ingressio, & purificandis ac vivificandis Dei servis divina dignatio. Nam si baptizari quis apud hæreticos potuit, utique & remissam peccatorum consequi potuit. Si peccatorum remissam consecutus est, & sanctificatus est, & templum Dei factus est, si sanctificatus est, si templum Dei factus est, quæro cujus Dei? Si creatoris, non potuit, quia in eum non credidit. Si Christi, nec hujus fieri potuit templum, qui negat Deum Christum. Si spiritus sancti, cum tres unum sint, quomodo spiritus sanctus placatus esse ei potest, qui aut filii aut patris inimicus est? Proinde frustra quidam qui ratione vincuntur, consuetudinem nobis opponunt; quasi consuetudo major sit veritate, aut non id sit in spiritalibus sequendum, quod in melius fuerit a sancto spiritu revelatum. Ignosci enim potest simpliciter erranti, sicut de se ipso dicit beatus apostolus Paulus: *Qui primo, inquit, fui blasphemus; & persecutor, & injuriosus; sed misericordiam merui, quia ignorans feci.* Post inspirationem vero & revelationem factam,

factam, qui in eo quod erraverat, perseverat prudens & sciens, sine venia ignorantiae peccat. Præsumptione enim atque obstinatione quadam nititur, cum ratione superetur. Nec quisquam dicat, quod accepimus ab apostolis, hoc sequimur, quando apostoli non nisi unam ecclesiam tradiderunt, & baptisma unum, quod non nisi in eadem ecclesia sit constitutum, & neminem inveniamus ab apostolis, cum apud hæreticos baptizatus esset, in eodem baptismo admissum esse, & communicasse, ut videantur apostoli baptisma hæreticorum probasse. Quod enim quidam dicunt, quasi ad hæreticorum suffragium pertineat, quod dixerit apostolus Paulus: *Verumtamen omni modo, sive per occasionem, sive per veritatem Christus annuntietur*, invenimus hoc quoque ad eorum patrocinium, qui hæreticis suffragantur & plaudunt, nihil posse proficere. Neque enim de hæreticis, aut de eorum baptismo loquebatur in epistola sua Paulus; ut aliquid, quod ad hanc rem pertineat, posuisse ostendatur. Loquebatur de fratribus sive inordinate, & contra ecclesiasticam disciplinam ambulantes, sive evangelicam veritatem de Dei timore servantibus. Et quosdam ex eis posuit verbum Domini constanter atque intrepide locutos, quosdam vero in invidia & dissensione versatos, quosdam servasse circa se benevolam caritatem, aliquos vero habuisse malevolam dissensionem, se tamen patienter omnia sustinere, dummodo sive in veritatem, sive per occasionem nomen Christi, quod Paulus prædicabat, ad plurimorum notitiam perveniret, & nova adhuc ac rudis sermonis seminatio loquentium prædicatione crebresceret. Porro aliud est eos, qui intus in ecclesia sunt, de nomine Christi loqui, aliud est eos qui foris sunt, & contra ecclesiam faciunt, in nomine Christi baptizare. Quare qui hæreticis patrocinantur, non id proferant, quod Paulus de fratribus posuit, sed ostendant si hæretico

tico aliquid concedendum putavit, aut si fidem & baptismum eorum probavit, aut si perfidos & blasphemos remissionem peccatorum accipere extra ecclesiam posse constituit. Si autem quid apostoli de hæreticis senserint, consideremus, inveniemus eos in omnibus epistolis suis execrari, & detestari hæreticorum sacrilegam pravitatem. Nam cum dicant sermonem eorum ut cancer serpere, quomodo potest is sermo dare remissionem peccatorum, qui ut cancer serpit ad aures audientium? Et cum dicant nullam participationem esse justitiæ & iniquitati, nullam communionem luminis & tenebris, quomodo possunt aut tenebræ illuminare, aut iniquitas justificare? Et cum dicant de Deo eos non esse, sed esse de antichristi spiritu, quomodo gerunt spiritualia & divina, qui sunt hostes Dei, & quorum pectora obsederit spiritus antichristi? Quare si rejectis humanæ contentionis erroribus, ad evangelicam auctoritatem, atque ad apostolicam traditionem sincera & religiosa fide revertamur, intelligemus nihil eis ad gratiam ecclesiasticam & salutarem licere, qui spargentes atque impugnantes ecclesiam Christi, a Christo ipso adversarii, ab apostolis vero ejus antichristi nominantur. Non est autem quod aliquis ad circumveniendam christianam veritatem Christi nomen opponat, ut dicat; In nomine Jesu Christi ubique & quomodocumque baptizati, gratiam baptismi sunt consecuti, quando ipse Christus loquatur & dicat: *Non omnis qui dicit mihi, Domine, Domine, intrabit in regnum celorum;* & iterum præmoneat atque instruat, ne quis a pseudoprophetis & pseudochristis in nomine suo facile fallatur. *Multi, inquit, venient in nomine meo dicentes: Ego sum Christus, & multos fallent,* & postea addidit dicens: *Vos autem cave.* *Ecce prædixi vobis omnia.* Unde apparet non ea statim suscipienda & assumenda, quæ jactantur in nomine Christi, sed quæ geruntur in Christi veritate, Quod

Quod enim in evangelis & in apostolorum epistolis Jesu Christi nomen insinuatur ad remissionem peccatorum, non ita est, quasi aut sine patre, aut contra patrem prodesse cuiquam solus filius possit, sed ut Judæis, qui jactitabant se patrem habere, ostenderetur, quod nihil eis pater profuturus esset, nisi in filium crederent, quem ille misisset. Nam qui Deum patrem creatorem sciebant, filium quoque Christum scire debebant, nec sibi blandirentur & plauderent de solo patre sine filii ejus agnitione, qui & dicebat: *Nemo venit ad patrem nisi per me.* Duorum autem cognitionem esse quæ salvet, idem ipse manifestat dicens: *Hac est autem vita aterna, ut cognoscant te solum & verum Deum, & quem misisti Jesum Christum.* Cum ergo ex ipsius Christi prædicatione & contestatione pater ante cognoscendus sit, qui misit, tunc deinde Christus, qui missus est, nec possit esse spes salutis, nisi duobus simul cognitis, quomodo non cognito, immo & blasphemato Deo patre, qui apud hæreticos Christi nomine baptizati dicuntur, peccatorum remissionem consecuti judicantur? Alia enim fuit Judæorum sub apostolis ratio, alia est gentilium conditio. Illi, quia jam legis & Moyse antiquissimum baptisma fuerant adepti, in nomine quoque Jesu Christi erant baptizandi, secundum quod in actis apostolorum Petrus ad eos loquitur, & dicit: *Pœnitementi, & baptizetur unusquisque vestrum in nomine Domini Jesu Christi in remissionem peccatorum, & accipietis donum spiritus sancti.* Vobis enim est hæc promissio & filiis vestris, & omnibus deinceps, quoscumque advocaverit Dominus Deus voster. Jesu Christi mentionem facit Petrus, non quasi pater omitteretur, sed ut patri quoque filius adjungeretur. Denique ubi post resurrectionem a Domino apostoli ad gentes mittuntur, in nomine patris & filii & spiritus sancti baptizare gentiles jubentur. Quomodo ergo quidam dicunt foris extra

eccle-

ecclesiam immo & contra ecclesiam, modo in nomine Jesu Christi, ubicumque & quomodocumque gentilem baptizatum, remissionem peccatorum consequi posse, quando ipse Christus gentes baptizari jubeat in plena & adunata trinitate. Nisi si qui Christum negat, negatur a Christo; qui patrem ejus negat, quem ipse Christus confessus sit, non negatur, & qui in eum blasphematur, quem Christus Dominum & Deum suum dixerit, remuneratus a Christo remissionem peccatorum, & baptismi sanctificationem consequitur. Qua autem potestate consequi in baptismo remissionem peccatorum potest, negans Deum creatorem patrem Christi, quando ipsam potestatem qua baptizamur, & sanctificamur, ab eodem patre Christus acceperit; quem majorem dixerit, a quo clarificari petierit, cujus voluntatem usque ad obsequium bibendi calicis & subeundæ mortis impleverit? Quid est igitur aliud, quam participem hæreticis blasphemantibus fieri, defendere velle & asserere, quod remissionem peccatorum accipere in Christi nomine possit blasphemans graviter, & peccans in patrem & Dominum & Deum Christi? Quid deinde illud, quale est, ut qui filium Dei negat, neque patrem habeat, & qui patrem negat, filium habere videatur, cum filius ipse contestetur & dicat: *Nemo potest venire ad me, nisi fuerit illi datum a patre*; ut manifestum sit nullam remissionem peccatorum in baptismo accipi a filio posse, quam constet patrem non dedisse, maxime quando adhuc idem repetat, & dicat: *Omnis blasphe-matio quam non plantavit pater meus celestis, eradicabitur*. Quod si Christi discipuli discere a Christo nolunt, quantum venerationis & honoris paterno nomini debeatur, vel de exemplis terrenis ac sæcularibus discant, & sciant Christum non sine maxima exprobratione posuisse: *Filii sæculi hujus prudentiores sunt filiis lucis*. In sæculo isto si cujus patri aliquis convicium fecerit, si

S. Cypriani Tom. I.

Q

con-

contumeliosus ac procax, pudorem ejus & honorem maledico ore laceraverit, indignatur filius & irascitur, & læsi patris injuriam, quibus potest viribus, vindicare conatur. Tu Christum putas impiis & sacrilegis, & in patrem suum blasphemis impunitatem dare, & ois in baptismo peccata dimittere, quos constet baptizatos eadem adhuc in personam patris maledicta congerere, & incessabili blasphemantis linguæ scelere peccare? Hoc christianus, hoc Dei servus potest aut mente concipere, aut fide credere, aut sermone proferre? Et ubi erunt legis præcepta divinæ, quæ dicunt: *Honora patrem & matrem*, si vocabulum patris quod in homine honorari præcipitur, in Deo impune violatur? Ubi erit quod ipse Christus in evangelio ponit & dicit: *Qui maledixerit patri aut matri, morte moriatur*, si is qui maledicentes parentibus carnalibus puniri, & interfici mandat, in cælestem & spiritalem patrem maledicos, atque ecclesiæ matris inimicos ipse vivificat? Execranda ac detestanda res a quibusdam prorsus asseritur, ut is qui blasphemantem in spiritum sanctum reum futurum peccati æterni comminatur, idem in patrem Deum blasphemos salutari baptismo sanctificare dicatur. Et nunc qui talibus ad ecclesiam venientibus sine baptismo communicandum existimant, non putant se alienis, immo æternis peccatis communicare, admittentes sine baptismo eos, qui non nisi in baptismo possint blasphemiarum suarum peccata deponere. Quam vanum est porro & perversum, ut cum ipsi hæretici repudiato & relicto vel errore, vel scelere in quo prius fuerant, agnoscant ecclesiæ veritatem, nos veritatis ejusdem jura & sacramentum mutilemus, & venientibus ac pœnitentibus dicamus eos remissionem peccatorum consecutos esse, quando illi & se peccasse, & propter hoc ad ecclesiæ indulgentiam venire fateantur? Quare ecclesiæ catholicæ fidem ac veritatem, frater carissime, & tenere;

nere debemus firmiter, & docere, & per omnia evangelica & apostolica præcepta rationem divinæ dispositionis atque unitatis ostendere. Numquid potest vis baptismi esse major aut potior, quam confessio, quam passio, ut quis coram hominibus Christum confiteatur, & sanguine suo baptizetur? Et tamen neque hoc baptisma hæretico prodest, quamvis Christum confessus, & extra ecclesiam fuerit occisus; nisi si hæreticorum patroni & advocati hæreticos in falsa confessione Christi interfectos, martyres prædicant, & contra apostoli contestationem, qui nihil eos quamvis exustos & occisos dicit posse proficere, gloriam eis & coronam passionis assignant. Quod si hæretico nec baptisma publicæ confessionis & sanguinis proficere ad salutem potest, quia salus extra ecclesiam non est, quanto magis ei nihil proderit, si in latebra & in latronum spelunca adulteræ aquæ contagione tinctus, non tantum peccata antiqua non exposuerit, sed adhuc potius nova & majora cumulaverit? Quare baptisma nobis & hæreticis commune esse non potest, cum quibus nec pater Deus, nec filius Christus, nec spiritus sanctus, nec fides, nec ecclesia ipsa communis est. Et ideo baptizari eos oportet, qui de hæresi ad ecclesiam veniunt; ut qui legitimo & vero atque unico sanctæ ecclesiæ baptismo ad regnum Dei regeneratione divina præparantur, sacramento utroque nascantur, quia scriptum est: *Nisi quis renatus fuerit ex aqua, & spiritu, non potest intrare in regnum Dei.* Quo in loco quidam, quasi evacuare possint humana argumentatione prædicationis evangelicæ veritatem, catecuminos nobis opponunt, si quis ex his antequam in ecclesia baptizetur, in confessione nominis apprehensus fuerit & occisus, an spem salutis & præmium confessionis amittat, eo quod ex aqua prius non sit renatus. Sciant igitur hujusmodi homines suffragatores & fautores hæreticorum, catecuminos illos primo integram

fidem & ecclesiæ veritatem tenere, & ad debellandum diabolum de divinis castris cum plena & sincera Dei patris, & Christi, & spiritus sancti cognitione procedere, deinde nec privari baptismi sacramento, utpote qui baptizentur gloriosissimo & maximo sanguinis baptismo, de quo & Dominus dicebat habere se aliud baptisma baptizari. Sanguine autem suo baptizatos, & passione sanctificatos consummari, & divinæ pollicitationis gratiam consequi, declarat in evangelio idem Dominus, quando ad latronem in ipsa passione credentem & confitentem loquitur, & quod secum futurus sit in paradiso, pollicetur. Quapropter qui fidei & veritati præsumus, eos qui ad fidem & veritatem veniunt, & agentes pœnitentiam remitti sibi peccata deponunt, decipere non debemus & fallere, sed correctos a nobis ac reformatos ad regnum cœlorum disciplinis cœlestibus erudire. Sed dicit aliquis: Quid ergo fiet de his, qui in præteritum de hæresi ad ecclesiam venientes, sine baptismo admissi sunt? Potens est Dominus misericordia sua indulgentiam dare, & eos qui ad ecclesiam simpliciter admissi, in ecclesia dormierunt, ab ecclesiæ suæ muneribus non separare. Non tamen quia aliquando erratum est, ideo semper errandum est, cum magis sapientibus, & Deum timentibus congruat, patefactæ & perspectæ veritati libenter atque incunctanter obsequi, quam pertinaciter atque obstinate contra fratres & sacerdotes pro hæreticis reluctari. Nec quisquam existimet hæreticos, eo quod illis baptisma opponitur, quasi secundi baptismi vocabulo scandalizatos, ut ad ecclesiam veniant, retardari. Immo vero hoc ipso magis ad necessitatem veniendi testimonio offensæ sibi, & probatæ veritatis adiguntur. Nam si viderint iudicio ac sententia nostra id decerni & statui, ut baptisma justum & legitimum computetur, quo illic baptizantur, putabunt se ecclesiam quoque, & cetera ecclesiæ munera juste & legi-

legitime possidere; nec erit causa veniendi ad nos, quando habentes baptismum habere videantur & cetera. Porro autem cum cognoscunt baptismum nullum foris esse, nec remissam peccatorum extra ecclesiam dari posse, avidius ad nos & promptius properant, & munera ac dona ecclesie matris implorant, certi pervenire se omnino non posse ad veram divinae gratiae pollicitationem, nisi prius venerint ad ecclesie veritatem. Nec recusabunt baptizari apud nos haeretici legitimo & vero ecclesie baptismo, quando ex nobis didicerint, baptizatos quoque a Paulo eos, qui jam baptismo Joannis baptizati fuissent, sicut legimus in actibus apostolorum. Et nunc apud quosdam de nostris haeticorum baptismum occupatum asseritur, & invidia quadam quasi rebaptizandi, baptizare post hostes Dei nefas ducitur, cum baptizatos inveniamus quos Joannes baptizaverat, ille Joannes major inter prophetas habitus, ille divina gratia adhuc in utero matris impletus, ille Heliae spiritu & virtute subnixus, qui non adversarius Domini, sed praecursor ac praedicator fuit, qui Dominum nostrum non tantum verbis praenuntiavit, sed & oculis ostendit, qui ipsum Christum, per quem baptizantur ceteri, baptizavit. Quod si iccirco haeticus jus baptismi obtinere potuit, quia prior baptizavit, non possidentis erit jam baptismum, sed occupantis; & cum separari a se, & dividi omnino non possint baptismum & ecclesia, qui occupare baptismum prior potuit, & ecclesiam pariter occupavit; & incipis tu illi haeticus videri, qui praeventus posterior esse coepisti, qui cedendo ac manus dando, jus quod acceperas, reliquisti. Quam periculosum sit autem in divinis rebus, ut quis cedat jure suo & potestate, scriptura sancta declarat, cum in Genesi Esau primatus suos inde perdiderit, nec recipere id postmodum potuerit, quod semel cessit. Haec tibi breviter pro nostra mediocritate rescripti-

mus, frater carissime, nemini præscribentes aut præjudicantes, quo minus unusquisque episcoporum quod putat, faciat, habens arbitrii sui liberam potestatem. Nos, quantum in nobis est, propter hæreticos cum collegis & coepiscopis nostris non contendimus, cum quibus divinam concordiam & dominicam pacem tenemus; maxime cum & apostolus dicat: *Si quis autem putatur contentiosus esse, nos talem consuetudinem non habemus, neque ecclesia Dei.* Servatur a nobis patienter & leniter caritas animi, collegii honor, vinculum fidei, & concordia sacerdotii. Propter hoc etiam libellum nunc de bono patientiæ, quantum valuit nostra mediocritas, permittente Domino & inspirante conscripsimus, quem ad te pro mutua dilectione transmisimus. Opto te, frater carissime, semper bene valere.

E P I S T O L A LXXIV.

Ad Pompejum contra epistolam Stephani de hæreticis baptizandis.

CYPRIANUS Pompejo fratri salutem. Quamquam plene ea, quæ de hæreticis baptizandis dicenda sunt, complexi sumus in epistolis, quarum ad te exempla transmisimus, frater carissime, tamen quia desiderasti in notitiam tuam perferri, quid mihi ad litteras nostras Stephanus frater noster rescripserit, misi tibi rescripti ejus exemplum: quo lecto, magis ac magis ejus errorem denotabis, qui hæreticorum causam contra christianos, & contra ecclesiam Dei asserere conatur. Nam inter cetera vel superba, vel ad rem non pertinentia, vel sibi ipsi contraria, quæ imperite atque improvide scripsit, etiam illud adjunxit, ut diceret: *Si quis ergo a quacumque hæresi venerit ad vos, nihil innovetur nisi quod traditum est, ut manus illi*

illi imponatur in pœnitentiam, cum ipsi hæretici proprie alterutrum ad se venientes non baptizent, sed communicent tantum. A quacumque hæresi venientem baptizari in ecclesia vetuit, id est; omnium hæreticorum baptismata iusta esse, & legitima iudicavit. Et cum singulæ hæreses singula baptismata & diversa peccata habeant, hic cum omnium baptismo communicans, univerforum delicta in sinum suum coacervata conegessit. Et præcepit nihil aliud innovari, nisi quod traditum est; quasi is innovet qui unitatem tenens, unum baptismata uni ecclesiæ vindicat, & non ille utique, qui unitatis oblitus, mendacia & contagia prophanæ tinctionis usurpat. *Nihil innovetur, inquit, nisi quod traditum est.* Unde est ista traditio? Utrumne de dominica & evangelica auctoritate descendens, an de apostolorum mandatis atque epistolis veniens? Ea enim facienda esse, quæ scripta sunt, Deus testatur & præmonet ad Jesum Nave dicens: *Non recedat liber legis hujus ex ore tuo, sed meditaberis in eo die ac nocte, ut observes facere omnia, quæ scripta sunt in eo.* Item Dominus apostolos suos mittens, mandat baptizari gentes & doceri, ut observent omnia quæcumque ille præcepit. Si ergo aut in evangelio præcipitur, aut in apostolorum epistolis vel actibus continetur, ut a quacumque hæresi venientes non baptizentur, sed tantum manus illis imponatur in pœnitentiam, observetur divina hæc & sancta traditio. Si vero ubique hæretici nihil aliud quam adversarii & antichristi nominantur, si vitandi, & perversi, & a semetipsis damnati pronuntiantur, quale est ut videantur damnandi a nobis non esse, quos constat apostolica contestatione a semetipsis damnatos esse? Ut nemo infamare apostolos debeat, quasi illi hæreticorum baptismata probaverint, aut eis sine ecclesiæ baptismo communicaverint, quando talia de hæreticis apostoli scripserint, & hoc cum non-

dum hæreticæ pestes acriores prorupissent, necdum quoque Marcion Ponticus de Ponto emerfisset, cuius magister Cerdon sub Hygino tunc episcopo, qui in Urbe nonus fuit, Romam venit: quem Marcion secutus, additis ad crimen augmentis, impudentius ceteris & abruptius in Deum patrem creatorem blasphemare instituit, & hæreticum furorem sacrilegis armis contra ecclesiam rebellantem sceleratius & gravius armavit. Quod si hæreses constat postmodum plures ac peiores exstitisse, & si retro nusquam omnino præceptum est neque conscriptum, ut hæretico tantum manus in pœnitentiam imponatur, & sic ei communicetur, & si baptismus non nisi unus est, quod apud nos est, & intus est, & soli ecclesiæ de divina dignatione concessum est, quæ ista obstinatio est, quæve præsumptio, humanam traditionem divinæ dispositioni antepondere, nec animadvertere indignari & irasci Deum, quoties divina præcepta solvit, & præterit humana traditio? sicut per Esaiam prophetam clamat, & dicit: *Populus iste labiis honorificat me, cor vero eorum longe separatum est a me. Sine causa autem colunt me, mandata & doctrinas hominum docentes.* Item Dominus in evangelio increpans similiter & objurgans ponit, & dicit: *Rejicitis mandatum Dei ut traditionem vestram statuatis.* Cujus præcepti memor beatus apostolus commonet ipse quoque, & instruit dicens: *Si quis aliter docet, & non acquiescit sanis verbis Domini nostri Jesu Christi & doctrina ejus, stupore elatus est, nihil sciens, discede ab hujusmodi.* Præclara fane & legitima traditio Stephano fratre nostro docente proponitur, quæ auctoritatem nobis idoneam præbeat. Nam in eodem loco epistolæ suæ addidit, & adjecit: *cum ipsi hæretici proprie alterutrum ad se venientes non baptizent, sed communicent tantum.* Ad hoc enim malorum devoluta est ecclesia Dei, & sponsa Christi, ut hæreticorum exempla sectetur, ut ad celebranda sacramenta

menta cælestia disciplinam lux de tenebris mutuetur, & id faciant christiani, quod antichristi faciunt. Quæ vero est animi cæcitas, quæ pravitas, fidei unitatem de Deo patre, & de Jesu Christi Domini & Dei nostri traditione venientem nolle cognoscere? Nam si iccirco apud hæreticos ecclesia non est, quia una est, & dividi non potest, & si ideo illic spiritus sanctus non est, quia unus est, & esse apud prophanos & extraneos non potest, utique & baptisma, quod in eadem unitate consistit, esse apud hæreticos non potest, quia separari neque ab ecclesia, neque a spiritu sancto potest. Aut si effectum baptismi majestati nominis tribuunt, ut qui in nomine Jesu Christi ubicumque & quomodocumque baptizantur, innovati & sanctificati judicentur, cur non in ejusdem Christi nomine illic & manus baptizato imponitur ad accipiendum spiritum sanctum, cur eadem ejusdem majestas nominis non prævalet in manus impositione, quam valuisse contendunt in baptismi sanctificatione? Nam si potest quis extra ecclesiam natus templum Dei fieri, cur non possit super templum & spiritus sanctus infundi? Qui enim peccatis in baptismo expositis sanctificatus est, & in novum hominem spiritualiter reformatus, ad accipiendum spiritum sanctum idoneus factus est, quando apostolus dicat: *Quotquot in Christo baptizati estis, Christum induistis*, qui potest apud hæreticos baptizatus Christum induere, multo magis potest spiritum sanctum, quem Christus misit, accipere. Ceterum major erit mittente qui missus est, ut incipiat foris baptizatus Christum quidem induisse, sed spiritum sanctum non potuisse percipere; quasi possit aut sine spiritu Christus indui, aut a Christo spiritus separari. Illud quoque quam ineptum est, ut cum nativitas secunda spiritalis sit, qua in Christo per lavacrum regenerationis nascimur, dicant quod possit quis apud hæreticos spiritaliter nasci, ubi spiritum negant

esse. Peccata enim purgare & hominem sanctificare aqua sola non potest, nisi habeat & spiritum sanctum. Quare aut spiritum sanctum necesse est concedant esse illic, ubi baptisma esse dicunt, aut nec baptisma est, ubi spiritus sanctus non est, quia baptisma esse sine spiritu sancto non potest. Quale est autem asserere, & contendere, quod esse possint filii Dei, qui non sint in ecclesia nati? Baptisma enim esse, in quo homo vetus moritur, & novus nascitur, manifestat & probat beatus apostolus, dicens: *Servavit nos per lavacrum regenerationis.* Si autem in lavacro, id est in baptismo, est regeneratio, quomodo generare filios Deo hæresis per Christum potest, quæ Christi sponsa non est? Ecclesia est enim sola, quæ Christo conjuncta & adunata, spiritualiter filios generat, eodem apostolo rursus dicente: *Christus dilexit ecclesiam, & se ipsum tradidit pro ea ut eam sanctificaret, purgans eam lavacro aquæ.* Si igitur hæc est dilecta & sponsa; quæ sola a Christo sanctificatur, & lavacro ejus sola purgatur, manifestum est hæresim, quæ sponsa Christi non sit, nec purgari nec sanctificari lavacro ejus possit, filios Deo generare non posse. Porro autem non per manus impositionem quis nascitur, quando accipit spiritum sanctum, sed in ecclesiæ baptismo, ut spiritum sanctum jam natus accipiat, sicut in primo homine Adam factum est. Ante enim Deus eum plasmavit, & tunc insufflavit in faciem ejus flatum vitæ. Nec enim potest accipi spiritus, nisi prius fuerit qui accipiat. Cum autem nativitas christianorum in baptismo sit, baptismi autem generatio & sanctificatio apud solam sponsam Christi sit, quæ parere spiritualiter, & generare filios Deo possit, ubi, & ex qua, & cui natus est, qui filius ecclesiæ non est, ut habere quis possit Deum patrem ante ecclesiam matrem? Cum vero nulla omnino hæresis, sed neque aliquod schisma habere salutaris baptismi sanctificationem foris possit,

cur

cur in tantum Stephani fratris nostri obstinatio dura prorupit, ut etiam de Marcionis baptismo, item Valentini & Apelletis, & ceterorum blasphemantium in Deum patrem contendat filios Deo nasci, & illic in nomine Jesu Christi dicat remissionem peccatorum dari, ubi blasphematur in patrem, & in Dominum Deum Christum? Quo in loco considerandum est, frater carissime, pro fide & religione loci sacerdotalis, quo fungimur, an constare sacerdoti Dei ratio in die judicii possit asserenti, & probanti & in acceptum referenti blasphemantium baptismata, cum Dominus comminetur & dicat: *Et nunc praeceptum hoc ad vos est, o sacerdotes, si non audieritis, & si non posueritis in corde vestro, ut detis honorem nomini meo, dicit Dominus omnipotens, immittam in vos maledictionem, & maledicam benedictionem vestram.* Dat honorem Deo, qui Marcionis baptismo communicat? Dat honorem Deo, qui apud eos qui in Deum blasphemant, remissionem peccatorum dari judicat? Dat honorem Deo, qui foris de adultera & fornicaria nasci Deo filios asseverat? Dat honorem Deo, qui unitatem & veritatem de divina lege venientem non tenens, hæreses contra ecclesiam vindicat? Dat honorem Deo, qui hæreticorum amicus, & inimicus christianorum sacerdotes Dei veritatem Christi, & ecclesiae unitatem tuentes abstinendos putat? Si sic honor Deo datur, si sic a cultoribus & sacerdotibus ejus Dei timor & disciplina servatur; abjiciamus arma, manus demus in captivitatem, tradamus diabolo ordinationem evangelii, dispositionem Christi, majestatem Dei, divinae militiae sacramenta solvantur, castrorum caelestium signa prodantur, succumbat & cedat ecclesia hæreticis, lux tenebris, fides perfidiæ, spes desperationi, ratio errori, immortalitas morti, caritas odio, veritas mendacio, Christus antichristo. Merito & sic in dies singulos schismata & hæreses surgunt, cre-

brius

brius atque uberius excrescunt, & serpentinis crinibus pullantes, adversus ecclesiam Dei majoribus viribus venenorum suorum virus expromunt, dum illis advocacy quorundam & auctoritas præstatur, & firmitas, dum baptisma eorum defenditur, dum fides, dum veritas proditur, dum id quod contra ecclesiam foris geritur, intus in ipsa ecclesia vindicatur. Quod si est apud nos, frater dilectissime, Dei timor, si tenor prævalet fidei, si custodimus Christi præcepta, si incorruptam atque inviolatam sponsæ ejus sanctitatem tuemur, si hærent sensibus & cordibus nostris verba Domini dicentis: *Putas cum venerit filius hominis, inveniet fidem in terra?* quia fideles Dei milites, qui Deo fide & religione sincera militamus, commissa nobis divinitus castra fideli virtute servemus. Nec consuetudo quæ apud quosdam obrepserat, impedire debet, quo minus veritas prævaleat & vincat. Nam consuetudo sine veritate vetustas erroris est. Propter quod relicto errore sequamur veritatem, scientes quia & apud Esdram veritas vincit, sicut scriptum est: *Veritas manet & invalescit in æternum, & vivit & obtinet in sæcula sæculorum. Nec est apud eam accipere personam nec differentias, sed quæ sunt iusta facit, nec est in iudicio ejus iniquum, sed fortitudo, & regnum, & majestas, & potestas omnium sæculorum. Benedictus Dominus Deus veritatis.* Quam veritatem nobis Christus ostendens, in evangelio suo dicit: *Ego sum veritas.* Propter quod si in Christo sumus, & Christum in nobis habemus, si manemus in veritate, & veritas in nobis manet, ea quæ sunt vera & recta teneamus. Fit autem studio præsumptionis & contumaciæ, ut quis magis sua prava & falsa defendat, quam ad alterius recta & vera consentiat. Cui rei prospiciens beatus apostolus Paulus ad Timotheum scribit, & monet episcopum non litigiosum, nec contentiosum, sed mitem & docibilem esse debere.

Doci-

Docibilis autem ille est, qui est ad discendi patientiam lenis & mitis. Oportet enim episcopum non tantum docere, sed & discere, quia & ille melius docet, qui quotidie crescit, & proficit discendo meliora. Quod ipsum quoque idem apostolus Paulus docet præmonens, ut si alii sedenti melius revelatum fuerit, prior taceat. In compendio est autem apud religiosas & simplices mentes, & errorem deponere, & invenire atque eruere veritatem. Nam si ad divinæ traditionis caput & originem revertamur, cessat error humanus, & sacramentorum cælestium ratione perspecta, quidquid sub caligine ac nube tenebrarum obscurum latebat, in lucem veritatis aperitur. Si canalis aquam ducens, qui copiose prius & largiter profluebat, subito deficiat, nonne ad fontem pergitur, ut illic defectionis ratio noscatur, utrumne ardescantibus venis, in capite unda siccaverit, an vero integra inde & plena procurrens in medio itinere destiterit: ut si vitio interrupti aut bibuli canalis effectum est, quo minus aqua continua perseveranter ac jugiter flueret, resecto & confirmato canali, ad usum atque ad potum civitatis aqua collecta eadem ubertate atque integritate repræsentetur, qua de fonte proficiscitur. Quod & nunc facere oportet Dei sacerdotes præcepta divina servantes, ut si in aliquo nutaverit, & vacillaverit veritas, ad originem dominicam, & ad evangelicam atque apostolicam traditionem revertamur, & inde surgat actus nostri ratio, unde & ordo, & origo surrexit. Traditum est enim nobis, quod sit unus Deus, & Christus unus, & una spes, & fides una, & una ecclesia, & baptisma unum non nisi in una ecclesia constitutum; a qua unitate quisquis discesserit, cum hæreticis necesse est inveniat; quos dum contra ecclesiam vindicat, sacramentum divinæ traditionis impugnat. Cujus unitatis sacramentum expressum videmus etiam in cantico
canti-

canticorum, ex persona Christi dicentis: *Hortus conclusus, soror mea, sponsa, fons signatus, puteus aqua viva, paradysus cum fructu pomorum.* Si autem ecclesia ejus hortus conclusus est, & fons signatus, quomodo in eundem hortum introire, aut bibere de fonte ejus potest, qui in ecclesia non est? Item Petrus ipse quoque demonstrans, & vindicans unitatem, mandavit & monuit, nisi per unum solum baptismum unius ecclesiæ salvari nos non posse. *In arca, inquit, Noe pauci, id est, octo animæ hominum salva factæ sunt per aquam, quod & vos similiter salvos faciet baptisma.* Quam brevi & spiritali compendio unitatis sacramentum manifestavit? Nam ut in illo mundi baptismo, quo iniquitas antiqua purgata est, qui in arca Noe non fuit, non potuit per aquam salvatus fieri, ita nec nunc potest per baptismum salvus videri, qui baptizatus in ecclesia non est, quæ ad arcæ unius sacramentum dominica unitate fundata est. Observatur itaque a nobis & tenetur, frater carissime, explorata & perspecta veritate, ut omnes qui ex quacumque hæresi ad ecclesiam convertuntur, ecclesiæ unico & legitimo baptismo baptizentur, exceptis his, qui baptizati in ecclesia prius fuerant, & sic ad hæreticos transierant. Illos enim oportet, cum redeunt, acta pœnitentia, per manus impositionem solam recipi, & in ovile, unde erraverant, a pastore restitui. Opto te, frater carissime, semper bene valere.

EPISTOLA LXXV.

Firmiliani episcopi Casarea Cappadocia ad Cyprianum contra epistolam Stephani.

FIRMILIANUS Cypriano fratri in Domino salutem. Accepimus per Rogatianum carissimum nostrum diaconum a vobis missum, litteras, quas ad nos fecisti, frater dilectissime; & gratias propter hoc Domino
no

no maximas egimus, quod contigerit, ut qui corpore ab invicem separamur, sic spiritu adunemur, quasi non unam tantum regionem tenentes, sed in ipsa atque in eadem domo simul inhabitantes. Quod & decet dicere, quia & spiritalis domus Dei una est: *Erit enim in novissimis*, ait propheta, *diebus manifestus mons Domini & domus Dei super vertices montium*. In quam convenientes cum jucunditate adunantur, secundum quod & in psalmo hoc postulatur a Domino, inhabitare in domo Dei per omnes dies vitæ. Unde & in alio loco manifestatum est, esse apud sanctos magnam voluntatis caritatem in unum convenire. *Ecce*, inquit, *quam bonum & voluptabile est, ut habitent fratres in unum*. Adunatio enim & pax & concordia, non solum hominibus fidelibus & cognoscentibus veritatem, sed & angelis ipsis cælestibus voluptatem maximam præstat, quibus dicit sermo divinus, esse gaudium in uno peccatore pœnitentiam agente, & ad unitatis vinculum revertente. Quod utique non diceretur de angelis, conversationem in cælis habentibus, nisi ipsi quoque essent nobis adunati, qui nostra adunatione lætantur; sicut e contrario utique contristantur, quando vident diversas quorundam mentes & scissas voluntates, quasi non tantum unum & eundem Deum simul invocent, sed separatis & divis ab invicem nec confabulatio jam possit esse, aut sermo communis. Nisi quod nos gratiam referre Stephano in isto possumus, quod per illius inhumanitatem nunc effectum sit, ut fidei & sapientiæ vestræ experimentum caperemus. Sed non enim si nos propter Stephanum hanc beneficii gratiam cepimus, statim Stephanus beneficio & gratia digna commisit. Neque enim & Judas perfidia sua & proditione, qua scelerate circa salvatorem operatus est, dignus videri potest, quasi causam bonorum tantorum ipse præstiterit, ut per illum mundus & gentium populus pas-

sione.

sione Domini liberaretur. Sed hæc interim, quæ ab Stephano gesta sunt, prætereantur; ne dum audaciæ & insolentiæ ejus meminimus, de rebus ab eo improbe gestis longiorem mœstitiâ nobis inferamus. De vobis autem cognoscentes, quod secundum regulam veritatis & sapientiam Christi, hoc de quo nunc quæritur, disposueritis, cum magna lætitiâ exultavimus, & Deo gratias egimus, quia invenimus in fratribus tam longe positis tantam nobiscum fidei & veritatis unanimi-
tatem. Potens est enim gratia Dei copulare, & conjungere caritatis atque unitatis vinculo etiam ea, quæ videntur longiore terrarum spatio esse divisa, secundum quod & olim intervallo temporum separatos ab Job & Noe, qui in primis fuerant, Ezechielem & Daniele posteriores ætate, ad unitatis vinculum virtus divina conjunxit, ut quamvis temporibus longis discreti essent, eadem tamen divina inspiratione sentirent. Quod & nunc in vobis animadvertimus, ut qui longissimis regionibus a nobis separati estis, sensu tamen & spiritu copulatos vos esse nobiscum probaretis: quod totum hoc fit divina unitate. Nam cum Dominus unus atque idem sit, qui habitat in nobis, conjungit ubique & copulat suos vinculo unitatis. Unde in universam terram exivit sonus eorum, qui a Domino missi sunt, unitatis spiritu velociter currentes; sicut e contrario nihil prodest aliquos proximos & junctos sibi esse corporibus, si animo & mente dissideant, quando adunari animæ omnino non possint, quæ se a Dei unitate diviserint. *Ecce enim, inquit, qui longinquant se abs te, peribunt.* Sed tales judicium Domini pro merito suo subibunt, recedentes a verbis ejus, qui patrem pro unitate deprecatur, & dicit: *Pater, da ut quomodo ego & tu unum sumus, sic & hi in nobis unum sint.* Nos vero ea quæ a vobis scripta sunt, quasi nostra propria suscepimus, nec in transcurso legimus, sed sæpe repetita memoriæ man-

mandavimus. Neque obest utilitati salutari, aut eadem retexere ad confirmandam veritatem, aut & quædam addere ad cumulandam probationem. Si quid autem a nobis additum fuerit, non sic additur quasi a vobis aliquid minus dictum sit, sed quoniam sermo divinus humanam naturam supergreditur, nec potest totum & perfectum anima concipere; iccirco & tantus est numerus prophetarum, ut multiplex & divina sapientia per multos distribuatur. Unde & tacere præcipitur primo in prophetia loquenti, si secundo fuerit revelatum. Qua ex causa necessario apud nos fit, ut per singulos annos seniores & præpositi in unum conveniamus ad disponenda ea, quæ curæ nostræ commissa sunt, ut si qua graviora sunt, communi consilio dirigantur, lapsis quoque fratribus, & post lavacrum salutare a diabolo vulneratis per pœnitentiam medela quæratur; non quasi a nobis remissionem peccatorum consequantur, sed ut per nos ad intelligentiam delictorum suorum convertantur, & Domino plenius satisfacere cogantur. Quoniam vero legatus iste a vobis missus, regredi ad vos festinabat, & hibernum tempus urgebat, quantum potuimus ad scripta vestra rescripsimus. Et quidem quantum ad id pertineat, quod Stephanus dixit, quasi apostoli eos qui ab hæresi veniunt, baptizari prohibuerint, & hoc custodiendum posteris tradiderint, plenissime vos respondistis neminem tam stultum esse, qui hoc credat apostolos tradidisse, quando etiam ipsas hæreses constet execrabiles ac detestandas postea exstitisse, cum & Marcion Cerdonis discipulus inveniatur sero post apostolos, & post longa ab eis tempora, sacrilegam adversus Deum traditionem induxisse, Apelles quoque blasphemix ejus consentiens, multa alia nova & graviora fidei ac veritati inimica addiderit. Sed & Valentini & Basilidis tempus manifestum est, quod & ipsi post apostolos & post longam ætatem, adversus

S. Cypriani Tom. I.

R

eccle-

ecclesiam Dei sceleratis mendacijs suis rebellaverint. Ceteros quoque hæreticos constat pravas suas sectas & inventiones perversas, prout quisque errore ductus est, postea induxisse; quos omnes manifestum est a semetipsis damnatos esse, & ante diem judicii in excusabilem sententiam adversus semetipsos dixisse, quorum baptisma qui confirmat, quid aliud quam cum ipsis se adjudicat, & se ipse participem talibus faciendo condemnat. Eos autem qui Romæ sunt, non ea in omnibus observare, quæ sint ab origine tradita, & frustra apostolorum auctoritatem prætere, scire quis etiam inde potest, quod circa celebrandos dies Paschæ & circa multa alia divinæ rei sacramenta videat esse apud illos aliquas diversitates, nec observari illic omnia æqualiter, quæ Hierosolymis observantur, secundum quod in ceteris quoque plurimis provinciis multa pro locorum & nominum diversitate variantur, nec tamen propter hoc ab ecclesiæ catholicæ pace atque unitate aliquando discessum est. Quod nunc Stephanus ausus est facere, rumpens adversum vos pacem, quam semper antecessores ejus vobiscum amore & honore mutuo custodierunt, adhuc etiam infamans Petrum & Paulum beatos apostolos, quasi hoc ipsi tradiderint, qui in epistolis suis hæreticos execrati sunt, & ut eos evitemus, monuerunt. Unde apparet traditionem hanc humanam esse, quæ hæreticos asserit & baptisma, quod non nisi solius ecclesiæ est, eos habere defendit. Sed & ad illam partem bene a vobis responsum est, ubi Stephanus in epistola sua dixit, hæreticos quoque ipsos in baptismo convenire, & quod alterutrum ad se venientes non baptizent, sed communicent tantum, quasi & nos hoc facere debeamus. Quo in loco, etsi vos jam probastis satis ridiculum esse, ut quis sequatur errantes, illud tamen ex abundanti addimus, non esse mirum si sic hæretici agant, qui etsi in quibusdam minoribus dis-

cre.

crepant, in eo tamen quod est maximum, unum & eundem consensum tenent, ut blasphement creatorem, quædam somnia sibi & phantasmata ignoti Dei confingentes; quos utique consequens est sic consentire in baptismi sui vanitate, ut consentiunt in repudianda divinitatis veritate. De quibus quoniam longum est ad singula eorum vel scelestâ, vel supervacua respondere, satis est breviter illud in compendio dicere, eos qui non teneant verum Dominum patrem, tenere non posse nec filii nec spiritus sancti veritatem, secundum quod etiam illi, qui Cataphrygas appellantur, & novas prophetias usurpare conantur, nec patrem possunt habere, nec filium, nec (spiritum sanctum); a quibus si quæramus quem Christum prædicent, respondebunt eum se prædicare, qui miserit spiritum per Montanum & Priscam locutum. In quibus cum animadvertamus non veritatis spiritum, sed erroris fuisse, cognoscimus, eos qui falsam illorum prophetiam contra Christi fidem vindicant, Christum habere non posse. Sed & ceteri quique hæretici, si se ab ecclesia Dei sciderint, nihil habere potestatis aut gratiæ possunt, quando omnis potestas & gratia in ecclesia constituta sit, ubi præsident majores natu, qui & baptizandi, & manum imponendi, & ordinandi possident potestatem. Hæretico enim sicut ordinare non licet, nec manum imponere, ita nec baptizare, nec quidquam sancte nec spiritaliter gerere, quando alienus sit a spiritali & deifica sanctitate. Quod totum nos jampridem in Iconio, qui Phrygiæ locus est, collecti in unum convenientibus ex Galatia, & ceteris proximis regionibus confirmavimus tenendum contra hæreticos firmiter & vindicandum, cum a quibusdam de ista re dubitaretur. Et quoniam Stephanus, & qui illi consentiunt, contendunt dimissionem peccatorum, & secundam nativitatem in hæreticorum baptismâ posse procedere, apud quos etiam ipsi

R 2

con-

confitentur spiritum sanctum non esse, considerent & intelligant spiritalem nativitatem sine spiritu esse non posse, secundum quod & beatus apostolus Paulus eos, qui ab Joanne baptizati fuerant, priusquam missus esset spiritus sanctus a Domino, baptizavit de novo spiritali baptismo, & sic eis manum imposuit, ut acciperent spiritum sanctum. Quale est autem ut cum Paulum post Joannis baptismum iterato discipulos suos baptizasse videamus, nos eos qui ab hæresi ad ecclesiam veniunt, post illicitam & prophanam eorum tinctionem baptizare dubitemus? Nisi si his episcopis quibus nunc minor fuit Paulus, ut hi quidem possint per solam manus impositionem venientibus hæreticis dare spiritum sanctum, Paulus autem idoneus non fuerit, qui ab Joanne baptizatis spiritum sanctum per manus impositionem daret, nisi eos prius etiam ecclesiæ baptismo baptizasset. Illud quoque absurdum, quod non putant quærendum esse, quis sit ille qui baptizaverit, eo quod qui baptizatus sit, gratiam consequi poterit invocata trinitate nominum patris & filii & spiritus sancti. Deinde hæc erit sapientia, quam scribit Paulus esse in his, qui perfecti sunt. At quis est in ecclesia perfectus & sapiens, qui hoc aut defendat, aut credat, quod invocatio hæc nominum nuda sufficiat ad remissionem peccatorum, & baptismi sanctificationem, cum hæc tunc utique proficiant, quando & qui baptizat, habet spiritum sanctum, & baptismum quoque ipsum non sit sine spiritu constitutum. Sed dicunt eum qui quomodo-cumque foris baptizatur, mente & fide sua baptismi gratiam consequi posse. Quod & ipsum sine dubio ridiculum est, quasi de cælo adducere ad se possit aut mens prava justorum sanctificationem, aut fides falsa credentium veritatem. Non omnes autem qui nomen Christi invocant, audiri, & invocationem suam consequi aliquid gratiæ posse, Dominus ipse manifestat, dicens:

eens: Multi venient in nomine meo dicentes: Ego sum Christus, & multos fallent. Nulla quippe differentia est inter pseudoprophetam & hæreticum. Nam ut ille in nomine Dei aut Christi, ita iste in sacramento baptismi fallit. Mendacio uterque nititur ad decipiendas hominum voluntates. Volo autem vobis & de historia, quæ apud nos facta est, exponere ad hoc ipsum pertinente. Ante viginti enim & duos fere annos, temporibus post Alexandrum Imperatorem, multæ istic conflictationes & pressuræ acciderunt, vel in commune omnibus hominibus, vel privatim christianis, terræ etiam motus plurimi & frequentes exstiterunt, ut & per Cappadociam & per Pontum multa subruerent, quædam etiam civitates in profundum receptæ, disrupti soli hiatu devoraretur, ut ex hoc persecutio quoque gravis adversum nos christiani nominis fieret, quæ post longam retro ætatis pacem repente oborta, de inopinato & insueto malo ad turbandum populum nostrum terribilior effecta est. Serenianus tunc fuit in nostra provincia præses, acerbus & dirus persecutor. In hac autem perturbatione constitutis fidelibus, & huc atque illuc persecutionis metu fugientibus, & patrias suas relinquentibus, atque in alias partes regionum transeuntibus (Erat enim transeundi facultas, eo quo persecutio illa, non per totum mundum, sed localis fuisset) emerfit istic subito quædam mulier, quæ in ecstasin constituta, propheten se præferret, & quasi sancto spiritu plena sic ageret. Ita autem principalium dæmoniorum impetu ferebatur, ut per longum tempus sollicitaret & deciperet fraternitatem, admirabilia quædam & portentosa perficiens, & facere se terram moveri polliceretur. Non quod dæmoni tanta esse potestas, ut terram movere aut elementum concutere vi sua valeret, sed quod nonnumquam spiritus nequam præsciens, & intelligens terræ motum futurum, id se facturum esse simularet,

R 3

quod

quod futurum videret. Quibus mendaciis & jactationibus subegerat mentes singulorum, ut sibi obedirent, & quocumque præciperet & duceret, sequerentur, faceret quoque mulierem illam cruda hieme nudis pedibus per asperas nives ire, nec vexari in aliquo aut lædi illa discurfione, diceret etiam se in Judæam & Hierosolymam festinare, fingens tamquam inde venisset. Hic & unum de presbyteris Rusticum, item & alium diaconum fefellit, ut eidem mulieri commiscerentur: quod paulo post detectum est. Nam subito apparuit illi unus de exorcistis, vir probatus, & circa religiosam disciplinam bene semper conversatus, qui exhortatione quoque fratrum plurimorum, qui & ipsi fortes ac laudabiles in fide aderant, excitatus, erexit se contra illum spiritum nequam revincendum; qui subtili fallacia etiam hoc paulo ante prædixerat, venturum quemdam aversum & tentatorem infidelem. Tamen ille exorcista inspiratus Dei gratia fortiter resistit, & esse illum nequissimum spiritum, qui prius sanctus putabatur, ostendit. Atque illa mulier, quæ prius per præstigias & fallacias dæmonis multa ad deceptionem fidelium moliebatur, inter cetera quibus plurimos deceperat, etiam hoc frequenter ausa est, ut & invocatione non contemptibili sanctificare se panem & eucharistiam facere simularet, & sacrificium Domino sine sacramento solitæ prædicationis offerret, baptizaret quoque multos usitata & legitima verba interrogationis usurpans, ut nil discrepare ab ecclesiastica regula videretur. Quid igitur de hujus baptismo dicemus, quo nequissimus dæmon per mulierem baptizavit? Numquid & hoc Stephanus & qui illi consentiunt, comprobant, maxime cui nec symbolum trinitatis, nec interrogatio legitima & ecclesiastica defuit? Potest credi aut remissio peccatorum data, aut lavacri salutaris regeneratio rite perfecta, ubi omnia, quamvis ad imaginem veritatis, tamen per dæmonem gesta

gesta sunt? Nisi si & dæmonem in nomine patris, & filii, & spiritus sancti gratiam baptismi dedisse contendunt, qui hæreticorum baptisma defendunt, apud quos sine dubio idem error est, dæmonum fallacia ipsa est, quande apud illos omnino spiritus sanctus non est. Illud etiam quale est quod vult Stephanus, his qui apud hæreticos baptizantur, adesse præsentiam & sanctimoniam Christi? Nam si non mentitur apostolus dicens: *Quotquot in Christo tincti estis, Christum induistis*, utique qui illic in Christo baptizatus est, induit Christum. Si autem induit Christum, accipere potuit & spiritum sanctum, qui a Christo missus est, & frustra illi venienti ad accipiendum spiritum manus imponitur; nisi si a Christo spiritum induit, ut apud hæreticos sit quidem Christus, non sit autem illic spiritus sanctus. Decurramus vero breviter & cetera, quæ a vobis copiose & plenissime dicta sunt, festinante vel maxime ad vos Rogatiano diacono carissimo nostro. Sequitur enim illud, quod interrogandi sunt a nobis, qui hæreticos defendunt, utrum carnale sit eorum baptisma, an spiritale. Si enim carnale est, nihil differunt a Judæorum baptismo, quo sic illi utuntur, ut eo tamquam communi & vulgari lavacro tantum sordes laventur. Sin autem spiritale est, quomodo apud illos esse baptisma spiritale potest, apud quos spiritus sanctus non est? Ac per hoc aqua quatinguntur, lavacrum est illis carnale tantum, non baptismi sacramentum. Quod si baptisma hæreticorum habere potest regenerationem secundæ nativitatis, non hæretici sed filii Dei computandi sunt, qui apud illos baptizantur. Secunda enim nativitas quæ est in baptismo, filios Dei generat. Si autem sponsa Christi una est, quæ est ecclesia catholica, ipsa est quæ sola generat Dei filios. Neque enim multæ sponsæ Christi, cum dicat apostolus: *Despondi vos uni viro virginem castam assignare Christo*, &: *Audi filia & vide*,

*Et inclina aurem tuam, Et obliviscere populi tui, quia desideravit rex speciem tuam, &: Veni sponsa de Libano, advenies Et pertransibis a principio fidei, &: Ingressus sum in hortum meum, fovear mea, sponsa, videmus unam personam ubique proponi, quia & sponsa est una. Non est autem una nobiscum hæreticorum synagoga, quia nec sponsa est adultera & fornicaria. Unde nec potest filios Dei parere. Nisi si, secundum quod Stephanano videtur, hæresis quidem parit, & exponit, expositos autem ecclesia suscipit, & quos non ipsa pepererit, pro suis nutrit, cum filiorum alienorum mater esse non possit. Et ideo Christus Dominus noster unam esse manifestans sponsam suam, & unitatis ejus sacramentum declarans, ait: *Qui non est mecum, adversus me est, Et qui non mecum colligit, spargit.* Si enim nobiscum est Christus, hæretici autem non sunt nobiscum, pro certo adversus Christum sunt hæretici. Et si nos colligimus cum Christo, non colligunt autem nobiscum hæretici, sine dubio spargunt. Sed nec illud prætereundum est a nobis, quod a vobis necessario dictum est, quod ecclesia secundum canticum canticorum hortus sit conclusus & fons signatus, paradisus cum fructu pomorum. Qui autem numquam in hunc hortum introierunt, neque paradisum a Deo creatore plantatum viderunt, quomodo de fonte qui intus inclusus est, & divino sigillo signatus est, aquam vivam lavacri salutaris præbere alicui poterunt? Cum vero & arca Noe nihil aliud fuerit quam sacramentum ecclesiæ Christi, quæ tunc, omnibus foris pereuntibus, eos solos servavit, qui intra arcam fuerunt, manifeste instruimur ad ecclesiæ unitatem perspiciendam, quemadmodum & apostolus Petrus posuit dicens: *sic Et vos similiter salvos faciet baptisma*, ostendens quoniam, quomodo qui cum Noe in arca non fuerunt, non tantum purgati, & salvati per aquam non sunt, sed statim diluvio illo perierunt, sic & nunc quicumque in ecclesia*

eclesia cum Christo non sunt, foris peribunt, nisi ad unicum & salutare ecclesiæ lavacrum per pœnitentiam convertantur. Qualis vero error sit, & quanta sit cæcitas ejus, qui remissionem peccatorum dicit apud synagogas hæreticorum dari posse, nec permanet in fundamento unius ecclesiæ, quæ semel a Christo supra petram solidata est, hinc intelligi potest, quod soli Petro Christus dixerit: *Quaecumque ligaveris super terram, erunt ligata & in calis, & quaecumque solveris super terram, erunt soluta & in calis,* & iterum in evangelio quando in solos apostolos insufflavit Christus dicens: *Accipite spiritum sanctum. Si cujus remiseritis peccata, remittentur illi; & si cujus tenueritis, tenebuntur.* Potestas ergo peccatorum remittendorum apostolis data est, & ecclesiis, quas illi a Christo missi constituerunt & episcopis, qui eis ordinatione vicaria successerunt. Hostes autem unius catholicæ ecclesiæ, in qua nos sumus, & adversarii nostri, qui apostolis successimus, sacerdotia sibi illicita contra nos vindicantes, & altaria prophana ponentes, quid aliud sunt, quam Chore & Dathan & Abiron, pari scelere sacrilegi, & easdem quas & illi pœnas daturi cum his qui sibi consentiunt, secundum quod etiam tunc illorum participes & fautores pari cum eis morte perierunt. Atque ego in hac parte juste indignor ad hanc tam apertam & manifestam Stephani stultitiam, quod qui sic de episcopatus sui loco gloriatur, & se successionem Petri tenere contendit, super quem fundamenta ecclesiæ collocata sunt, multas alias petras inducat, & ecclesiarum multarum nova ædificia constituat, dum esse illic baptisma sua auctoritate defendit. Nam qui baptizantur, complent sine dubio ecclesiæ numerum. Qui autem baptisma eorum probat, de baptizatis & ecclesiam illic esse confirmat. Nec intelligit obfuscarî a se, & quodam modo aboleri christianæ petreæ veritatem, qui sic prodit & deserit unitatem. Judæos ta-

men, quamvis ignorantia cæcos & gravissimo facinore constrictos, zelum Dei apostolus habere proficitur. Stephanus, qui per successionem cathedram Petri habere se prædicat, nullo adversus hæreticos zelo excitatur, concedens illis non modicam, sed maximam gratiæ potestatem, ut dicat eos & asseveret per baptismi sacramentum sordes veteris hominis abluere, antiqua mortis peccata donare, regeneratione cælesti filios Dei facere, ad æternam vitam divini lavacri sanctificatione reparare. Qui sic magna & cælestia ecclesiæ munera hæreticis concedit & tribuit, quid aliud agit, quam communicat eis, quibus tantum gratiæ defendit ac vindicat? Et frustra jam dubitat in ceteris quoque consentire eis, & particeps esse, ut & simul cum eis conveniat, & orationes pariter cum eisdem misceat, & altare ac sacrificium commune constituat. Sed in multum, inquit, proficit nomen Christi ad fidem & baptismi sanctificationem, ut quicumque & ubicumque in nomine Christi baptizatus fuerit, consequatur statim gratiam Christi, quando huic loco breviter occurri possit & dici, quoniam si in nomine Christi valuit foris baptismus ad hominem purgandum, in ejusdem Christi nomine valere illic potuit & manus impositio ad accipiendum spiritum sanctum. Et incipient cetera quoque, quæ apud hæreticos aguntur, iusta & legitima videri, quando in nomine Christi gerantur, secundum quod vos in epistola vestra exsecuti estis, non nisi in ecclesia sola valere posse nomen Christi, cui uni concesserit Christus cælestis gratiæ potestatem. Quod autem pertinet ad consuetudinem refutandam, quam videntur opponere veritati, quis tam vanus sit, ut veritati consuetudinem præferat, aut qui perspecta luce tenebras non derelinquat? Nisi si & Judæos Christo adventante, id est, veritate, adjuvat in aliquo antiquissima consuetudo, quod relicta nova veritatis

via

via in vetustate permanferint. Quod quidem adver-
sus Stephanum vos dicere Afri potestis, cognita ve-
ritate errorem vos consuetudinis reliquiffe. Ceterum
nos veritati & consuetudinem jungimus, & consuetu-
dini Romanorum consuetudinem, sed veritatis, op-
ponimus, ab initio hoc tenentes quod a Christo &
ab apostolis traditum est. Nec meminimus hoc apud
nos aliquando cœpisse, cum semper istic observatum
sit, ut non nisi unam Dei ecclesiam nossemus, & san-
ctum baptisma non nisi sanctæ ecclesiæ computaremus.
Plane quoniam quidam de eorum baptismo dubitabant,
qui etsi non ut nos prophetas recipiunt, eosdem ta-
men patrem & filium nosse nobiscum videntur, plu-
rimi simul convenientes in Iconio, diligentissime trā-
ctavimus & confirmavimus repudiandum esse omne
omnino baptisma, quod sit extra ecclesiam constitu-
tum. Ad illud autem quod pro hæreticis ponunt,
& ajunt apostolum dixisse: *sive per occasionem, sive per*
veritatem Christus annuntietur, ut respondeamus; in-
eptum est, quando manifestum sit apostolum in epi-
stola sua, qua hoc dixit, neque hæreticorum neque
baptismi eorum mentionem fecisse, sed locutum esse
de fratribus tantum, sive perfide secum loquentibus,
sive in fide sincera perseverantibus, nec oporteat
hoc longo tractatu excutere, sed ipsam satis sit epi-
stolam legere, & quid apostolus dixerit, de ipso apo-
stolo recognoscere. Quid ergo, inquiunt, fiet de his
qui ab hæreticis venientes, sine ecclesiæ baptismo ad-
missi sunt? Si de sæculo excesserunt, in eorum nu-
mero habentur, qui apud nos catechisati quidem
sunt, sed prius quam baptizarentur, obierunt, non
modo dicunt emolumentum veritatis & fidei, ad
quam relicto errore pervenerant, etsi consummatio-
nem gratiæ consecuti non sunt, morte præventi.
Qui autem adhuc in sæculo permanent, baptizentur
ecclesiæ baptismo, ut remissionem peccatorum con-
sequi-

sequi possint, ne per alienam præsumptionem in pristino errore manentes, sine gratiæ consummatione moriantur. Ceterum quale delictum est, vel illorum qui admittunt, vel eorum qui admittuntur, ut non ablutis per ecclesiæ lavacrum sordibus, nec peccatis expositis, usurpata temere communicatione contingant corpus & sanguinem Domini? cum scriptum sit: *Quicumque ederit panem aut biberit calicem Domini indigne, reus erit corporis & sanguinis Domini.* Nos etiam illos quos hi, qui prius in ecclesia catholica episcopi fuerant, & postmodum sibi potestatem clericæ ordinationis assumentes baptizaverant, pro non baptizatis habendos judicavimus. Et hoc apud nos observatur, ut quicumque ab illis tincti, ad nos veniunt, tamquam alieni & nihil consecuti, unico & vero ecclesiæ catholice baptismi apud nos baptizentur, & lavacri vitalis regenerationem consequantur. Et tamen multum interest inter eum qui invitus, & necessitate persecutionis coactus succubuit, & illum, qui sacrilega voluntate audax contra ecclesiam rebellat, vel in patrem & Deum Christi, & totius mundi conditorem impia voce blasphemat. Et non pudet Stephanum hoc asserere, ut per eos, qui cum ipsi in omnibus peccatis sint constituti, dicat posse remissionem peccatorum dari, quasi possit esse in domo mortis lavacrum salutis. Ubi ergo erit quod scriptum est: *Ab aqua aliena abstine te, & a fonte alieno ne biberis?* si relicto ecclesiæ fonte signato, alienam aquam pro tua suscipis & prophanis fontibus ecclesiam polluis? Quando enim baptismi hæreticorum communicas, quid aliud quam de voragine & cœno illorum bibis, & ipse ecclesiæ sanctificatione purgatus, alienarum sordium contactibus inquinaris? Nec metuis iudicium Dei hæreticis testimonium contra ecclesiam perhibens, cum scriptum sit: *Falsus testis non erit impunitus.* Quinimmo tu hæreticis omnibus pejor es. Nam cum

cum inde multi cognito errore suo ad te veniant, ut ecclesiæ verum lumen accipiant, tu venientium errores adjuvas, & obscurato lumine ecclesiasticæ veritatis, tenebras hæreticæ noctis accumulās. Cumque se illi in peccatis esse, & nihil gratiæ habere se, ac propterea ad ecclesiam venire fateantur, tu eis remissionem peccatorum subtrahis, quæ in baptismo datur, dum dicis eos jam baptizatos, & extra ecclesiam ecclesiæ gratiam consecutos. Nec intelligis animas eorum de manu tua exquiri, cum iudicii dies venerit, qui sitientibus ecclesiæ potum negasti, & volentibus vivere, causâ mortis fuisti. Et insuper indignaris. Vide qua imperitia reprehendere audeas eos, qui contra mendacium pro veritate nituntur. Quis enim iustius indignari contra alterum debuit? Utrumne qui hostes Dei asserit, an vero qui adversus eum qui hostes Dei asserit, pro ecclesiæ veritate consentit? Nisi quod imperitos etiam animosos atque iracundos esse manifestum est, dum per inopiam consilii & sermonis ad iracundiam facile vertuntur, ut de nullo alio magis, quam de te dicat scriptura divina: *Homo animosus parat lites, & vir iracundus exaggerat peccata.* Lites enim & dissensiones quantas parasti per ecclesias totius mundi? Peccatum vero quam magnum tibi exaggerasti, quando te a tot gregibus scidisti? Excidisti enim te ipsum. Noli te fallere. Siquidem ille est vere schismaticus, qui se a communione ecclesiasticæ unitatis apostatam fecerit. Dum enim putas omnes a te abstineri posse, solum te ab omnibus abstinuisti. Nec te informare ad regulam veritatis & pacis vel apostoli præcepta potuerunt, monentis & dicentis: *Obsecro ergo vos ego vinctus in Domino digne ambulare vocatione qua vocati estis, cum omni humilitate sensus & lenitate, cum patientia sustinentes invicem in dilectione, satis agentes servare unitatem spiritus in conjunctione pacis, unum corpus, & unus spiritus, sicut vocati estis in una spe vocationis vestræ.*

Unna

Unus Dominus, una fides, unum baptisma, unus Deus & pater omnium, qui super omnes, & per omnia, & in omnibus nobis. Hæc apostoli mandata & monita salutaria quam diligenter Stephanus implevit, humilitatem sensus & lenitatem primo in loco servans. Quid enim humilior aut lenior, quam cum tot episcopis per totum mundum dissensisse, pacem cum singulis vario discordiæ genere rumpentem, modo cum orientalibus, quod nec vos latere confidimus, modo vobiscum, qui in meridie estis; a quibus levatos episcopos patienter satis & leniter suscepit, ut eos nec ad sermonem saltem colloquii communis admitteret, adhuc insuper dilectionis & caritatis memor, præciperet fraternitati universæ, ne quis eos in domum suam reciperet, ut venientibus, non solum pax & communio, sed & tectum & hospitium negaretur. Hoc est servasse unitatem spiritus in conjunctione pacis, abscindere se a caritatis unitate, & alienum se per omnia fratribus facere, & contra sacramentum & fidem contumacis furore discordiæ rebellare. Apud talem potest esse unum corpus & unus spiritus, apud quem fortasse ipsa anima una non est, sic lubrica & mobilis & incerta? Sed quantum ad illum pertinet, relinquamus. Excutiamus potius id, de quo maxima quæstio est. Qui contendunt ab hæreticis baptizatos sic recipi oportere, tamquam legitimi baptismi gratiam consecutos, unum nobis atque illis baptisma dicunt esse, & in nullo discrepare. Sed quid ait apostolus Paulus? *Unus Dominus, una fides, unum baptisma, unus Deus.* Si unum atque idem est cum nostro baptisma hæreticorum, sine dubio & fides una est. Si autem fides una est, utique & Dominus unus est. Si Dominus est, consequens est dicere quia unus est. Si autem hæc unitas, quæ separari omnino & dividi non potest, etiam apud hæreticos ipsa est, quid ultra contendimus, ut quid illos hæreticos, & non christia-

nos

nos vocamus? Porro cum nobis & hæreticis nec Deus unus sit, nec Dominus unus, nec una ecclesia, nec fides una, sed nec unus spiritus, aut corpus unum, manifestum est nec baptisma nobis & hæreticis commune esse posse, quibus nihil est omnino commune. Et tamen non pudet Stephanum talibus adversus ecclesiam patrocinium præstare, & propter hæreticos asserendos fraternitatem scindere, insuper & Cyprianum pseudochristum, & pseudoapostolum, & dolosum operarium dicere. Qui omnia in se esse conscius prævenit, ut alteri ea per mendacium objiceret, quæ ipse ex merito audire deberet. Bene te valere omnibus nobis cum universis, qui in Africa sunt episcopis, & cunctis clericis, & omni fraternitate universi optamus, ut perpetuo unanimes & unum sentientes habeamus nobiscum etiam de longinquo adunatos.

EPISTOLA LXXVI.

Ad Magnum de baptizandis Novatianis & de iis qui in lecto gratiam consequuntur.

CYPRIANUS Magno filio salutem. Pro tua religiosa diligentia consulisti mediocritatem nostram, fili carissime, an inter ceteros hæreticos, eos quoque qui a Novatiano veniunt, post prophanum ejus lavacrum baptizari, & sanctificari in ecclesia catholica legitimo & vero & unico ecclesiæ baptismo oporteat. De qua re, quantum fidei nostræ capacitas, & scripturarum divinarum sanctitas ac veritas suggerit, dicimus omnes omnino hæreticos & schismaticos nihil habere potestatis ac juris. Propter quod Novatianus nec debet nec potest excipi, quo minus ipse quoque extra ecclesiam consistens, & contra pacem ac dilectionem Christi faciens, inter adversarios & anti-chri-

christos computetur. Neque enim Dominus noster Jesus Christus cum in evangelio suo testaretur adversarios suos esse eos, qui secum non essent, aliquam speciem hæreseos designavit, sed omnes omnino qui secum non essent, & secum non colligentes, gregem suum spargerent, adversarios suos esse ostendit dicens: *Qui non est mecum, adversum me est; & qui mecum non colligit, spargit.* Item beatus Joannes apostolus nec ipse ullam hæresim aut schisma discrevit, aut aliquos speciatim separe posuit, sed universos qui de ecclesia exissent, quique contra ecclesiam facerent, antichristos appellavit dicens: *Audistis quia antichristus venit, nunc autem antichristi multi facti sunt. Unde cognoscimus quia novissima hora est. Ex nobis exierunt, sed non fuerunt ex nobis. Si enim fuissent ex nobis, mansissent utique nobiscum.* Unde apparet adversarios Domini & antichristos omnes esse, quos constat a caritate atque ab unitate ecclesiæ catholicæ recessisse. Adhuc quoque Dominus in evangelio suo ponit & dicit: *Si vero & ecclesiam contempserit, sit tibi tamquam ethnicus & publicanus.* Si autem qui ecclesiam contemnunt, ethnici & publicani habentur, multo magis utique rebelles & hostes falsa altaria, & illicita sacerdotia, & sacrificia sacrilega, & nomina adulterata fingentes inter ethnicos & publicanos necesse est computentur, quando minora peccantes & tantum ecclesiæ contemptores ethnici & publicani sententiam Domini judicentur. Quod autem ecclesia una sit, declarat in cantico canticorum spiritus sanctus ex persona Christi dicens: *Una est columba mea, perfecta mea, una est matri suæ, electa genitrici suæ,* de qua item denuo dicit: *Hortus conclusus, soror mea, sponsa, fons signatus, puteus aquæ vivæ.* Si autem hortus conclusus est sponsa Christi, quæ est ecclesia, patere res clausa alienis & prophanis non potest. Et si fons signatus est, neque bibere inde neque consignari

signari potest, cui foris posito accessus ad fontem non est. Puteus quoque aquæ vivæ si unus est, idemque intus est, vivificari & sanctificari foris positus ex illa aqua non potest, ex qua solis eis qui intus sunt, usus omnis & potus concessus est. Quod & Petrus, ostendens unam ecclesiam esse, & solos eos qui in ecclesia sint, baptizari posse, posuit & dixit: *In arca Noe pauci, id est, octo anima hominum salva facta sunt per aquam, quod & vos similiter salvos faciet baptisma*, probans & contestans unam arcam Noe typum fuisse unius ecclesiæ. Si potuit tunc in illo expiati & purificati mundi baptismo salvus per aquam fieri, qui in arca Noe non fuit, potest & nunc vivificari per baptisma, qui in ecclesia non est, cui soli baptisma concessum est. Sed & Paulus apostolus hoc idem adhuc apertius & clarius manifestans ad Ephesios scribit & dicit: *Christus dilexit ecclesiam, & se ipsum tradidit pro ea, ut eam sanctificaret, purgans eam lavacro aquæ*. Quod si una est ecclesia, quæ a Christo diligitur & lavacro ejus sola purgatur, quomodo qui in ecclesia non est, aut diligi a Christo aut abluui & purgari lavacro ejus potest? Propter quod cum sola ecclesia habeat aquam vitalem, & baptizandi atque abluendi hominis potestatem, qui dicit apud Novatianum baptizari & sanctificari aliquem posse, prius ostendat & doceat Novatianum in ecclesia esse, aut ecclesiæ præsidere. Ecclesia enim una est, quæ una & intus esse & foris non potest. Si enim apud Novatianum est, apud Cornelium non fuit. Si vero apud Cornelium fuit, qui Fabiano episcopo legitima ordinatione successit, & quem præter sacerdotii honorem martyrio quoque Dominus glorificavit, Novatianus in ecclesia non est, nec episcopus computari potest, qui evangelica & apostolica traditione contempta, nemini succedens, a se ipso ortus est. Habere namque aut tenere ecclesiam nullo modo potest, qui ordinatus in ecclesia non est. Foris enim non

esse ecclesiam, nec scindi adversum se aut dividi posse, sed inseparabilis atque individuae domus unitatem tenere manifestat scripturae divinae fides., cum de sacramento paschae & agni, qui agnus Christum designabat, scriptum sit: *In domo una comedetur, non ejicietis de domo carnem foras.* Quod item circa Raab, quae ipsa quoque typum portabat ecclesiae, expressum videmus; cui mandatur & dicitur: *Patrem tuum & matrem tuam & fratres tuos & totam domum patris tui colliges ad te ipsam in domum tuam, & omnis qui exierit ostium domus tuae foras, reus sibi erit.* Quo sacramento declaratur in unam domum solam, id est, in ecclesiam, victuros & ab interitu mundi evasuros colligi oportere, quisquis autem de collectis foras exierit, id est, si quis, quamvis in ecclesia gratiam consecutus, recesserit & ab ecclesia exierit, reum sibi futurum, id est, ipsum sibi quod pereat, imputaturum. Quod apostolus Paulus explanat docens & praecipiens, haereticum vitandum esse ut perversum & peccatorem & a semetipso damnatum. Hic enim reus sibi erit, qui non ab episcopo ejectus, sed sponte de ecclesia profugus, haeretica praesumptione a semetipso damnatus. Et ideo Dominus insinuans nobis unitatem de divina auctoritate venientem ponit & dicit: *Ego & pater unum sumus.* Ad quam unitatem redigens ecclesiam suam denuo dicit: *Et erit unus grex & unus pastor.* Si autem grex unus est, quomodo potest gregi annumerari, qui in numero gregis non est? aut pastor haberi quomodo potest, qui, manente vero pastore & in ecclesia Dei ordinatione succedanea praesidente, nemini succedens, & a se ipso incipiens, alienus sit & prophanus, dominicae pacis ac divinae unitatis inimicus, non habitans in domo Dei, id est, in ecclesia Dei, in qua non nisi concordēs atque unanimēs habitant, loquente in psalmis spiritu sancto & dicente: *Deus qui inhabitare facit unanimes in domo.* Denique unani-

unanimitatem christianam firma sibi atque inseparabili caritate connexam etiam ipsa dominica sacrificia declarant. Nam quando Dominus corpus suum panem vocat de multorum granorum adunatione congestum, populum nostrum quem portabat, indicat adunatum; & quando sanguinem suum vinum appellat de botris atque acinis plurimis expressum, atque in unum coactum, gregem item nostrum significat commixtione adunatae multitudinis copulatum, Si Novatianus huic panis dominico adunatus est, si Christi poculo & ipse commixtus est, poterit videri & unici ecclesiastici baptismi habere gratiam posse, si eum confiterit ecclesiae unitatem tenere. Denique quam sit inseparabile unitatis sacramentum, & quam sine spe sint & perditionem sibi maximam de indignatione Dei acquirant, qui schisma faciunt, & relicto episcopo, alium sibi foris pseudoepiscopum constituunt, declarat in libris regnorum scriptura divina, ubi a tribu Juda & Benjamin decem tribus scissae sunt, & relicto rege suo, alterum sibi foris constituerunt: *Et indignatus est, inquit, Dominus in omni semine Israel, & dimovit eos, & dedit eos in direptionem donec abjiceret eos a facie sua, quia dissipatus est Israel a domo David, & constituerunt sibi regem Hieroboam filium Nabath.* Indignatum esse Dominum dicit, & eos in perditionem dedisse, quod ab unitate dissipati essent, atque alterum sibi regem constituissent. Et tanta indignatio Domini existit adversus illos qui schisma fecerant, ut etiam cum homo Dei ad Hieroboam missus esset, qui ei peccata sua exprobraret, atque ultionem futuram praediceret, panem quoque apud illos edere, & aquam bibere vetaretur. Quod cum non custodisset, & contra praeceptum Dei prandisset, statim divinae censurae maiestate percussus est, ut inde regrediens impetu ac morsu leonis in itinere necaretur. Et audet quisquam dicere aquam baptismi salutarem &

gratiam cælestem communem cum schismaticis esse posse, cum quibus nec terrestres cibis nec sæcularis potus debet esse communis? Satiat adhuc in evangelio suo Dominus, & majorem intelligentiæ lucem manifestat, quod iidem qui se tunc a tribu Juda & Benjamin sciderant, & Hierosolymis derelictis Samariam secesserant, inter prophanos & gentiles computarentur. Nam cum primum discipulos suos in ministerium salutis mitteret, mandavit & dixit: *In viam nationum ne abieritis, & in civitatem Samaritanorum ne introieritis.* Ad Judæos prius mittens, gentiles adhuc præteriri jubet. Addendo autem & civitatem Samaritanorum debere omitti, ubi erant schismatici, ostendit schismaticos gentilibus adæquari. Quod si aliquis illud opponit, ut dicat eandem Novatianum legem tenere quam catholica ecclesia teneat, eodem symbolo quo & nos baptizare, eundem nosse Deum patrem, eundem filium Christum, eundem spiritum sanctum, ac propter hoc usurpare eum potestatem baptizandi posse, quod videatur in interrogatione baptismi a nobis non discrepare, sciat quisquis hoc opponendum putat, primum non esse unam nobis & schismaticis symboli legem, neque eandem interrogationem. Nam cum dicunt: *Credis remissionem peccatorum & vitam æternam per sanctam ecclesiam,* mentiuntur in interrogatione, quando non habeant ecclesiam. Tunc deinde voce sua ipsi confitentur remissionem peccatorum non dari nisi per sanctam ecclesiam posse; quam non habentes, ostendunt remitti illic peccata non posse. Quod vero eundem quem & nos Deum patrem, eundem filium Christum, eundem spiritum sanctum nosse dicuntur, nec hoc adjuvare tales potest. Nam & Chore & Dathan & Abiron cum sacerdote Aaron & Moyse eundem Deum noverant, pari lege & religione viventes, unum & verum Deum, qui colendus atque invocandus fuerat, invocabant. Tamen quia loci sui mini-

ministerium transgressi contra Aaron sacerdotem, qui sacerdotium legitimum dignatione Dei atque ordinatione Domini perceperat, sacrificandi sibi licentiam vindicaverunt, divinitus percussi pœnas statim pro illicitis conatibus pependerunt, nec potuerunt rata esse & proficere sacrificia irreligiose & illicite contra jus divinæ dispositionis oblata. Turibula quoque ipsa, in quibus incensum illicite fuerat oblatum, ne in usu de cetero essent sacerdotibus, sed potius indignationis & ultionis divinæ memoriam corrigendis posteris exhiberent, jussu Domini conflata atque igne purgata in laminas ductiles producuntur, & affiguntur altari, secundum quod loquitur scriptura divina: *Memoriale, inquit, filiis Israel, ut non accedat quisquam alienigena qui non est ex semine Aaron imponere incensum ante Dominum, ut non sit sicut Chore.* Et tamen illi schisma non fecerant, nec foras egressi, contra Dei sacerdotes impudenter atque hostiliter rebellaverant, quod nunc hi ecclesiam scindentes, & contra pacem atque unitatem Christi rebelles cathedram sibi constituere, & primatum assumere, & baptizandi atque offerendi licentiam vindicare conantur. Quomodo perficere quæ agunt aut impetrare aliquid illicitis conatibus de Deo possunt, qui contra Deum, quod eis non licet, moliuntur? Quare qui Novatiano sive ceteris ejusmodi schismaticis patrocinantur, frustra contendunt baptizari & sanctificari illic aliquem saluari baptismo posse, ubi constet baptizantem baptizandi licentiam non habere. Atque ut magis intelligi posset, contra ejusmodi audaciam quæ sit censura divina, invenimus in tali facinore non solum duces & auctores, sed & participes pœnis destinari, nisi se a communione malorum separaverint, præcipiente per Moysen Domino & dicente: *Separamini a tabernaculis hominum istorum durissimorum, & nolite tangere ab omnibus quæ sunt eis, ne simul pereatis in*

peccato eorum. Et quod comminatus per Moysen Dominus fuerat implevit, ut quisquis se a Chore & Dathan & Abiron non separasset, pœnas statim pro impia communione persolveret. Quo exemplo ostenditur & probatur obnoxios omnes & culpæ & pœnæ futuros, qui se schismaticis contra præpositos & sacerdotes irreligiosa temeritate miscuerint. Sicut etiam per Osee prophetam spiritus sanctus contestatur & dicit: *Sacrificia eorum tamquam panis luctus, omnes qui manducant ea contaminabuntur*, docens scilicet & ostendens omnes omnino cum auctoribus supplicio conjungi, qui fuerint eorum peccato contaminati. Quæ ergo apud eos merita esse circa Deum possunt, quibus supplicia divinitus irrogantur? Aut quomodo tales justificare & sanctificare baptizatos possunt, qui hostes sacerdotum aliena & illicita, & nullo sibi jure concessa usurpare conantur? Quos tamen ipsos non miramur pro sua pravitate contendere. Afferant enim necesse est singuli quique quod faciunt, nec volunt victi facile succumbere, quamvis sciant id quod faciunt, non licere. Illud mirandum est, immo indignandum potius & dolendum, christianos antichristis assistere, & prævaricatores fidei atque ecclesiæ proditores intus in ipsa ecclesia contra ecclesiam stare. Qui, quamquam pertinaces alias & indociles, vel hoc tamen confitentur, quod universi sive hæretici sive schismatici non habeant spiritum sanctum, & ideo baptizare quidem possunt, dare autem spiritum sanctum non possunt, in hoc ipso a nobis tenentur, ut ostendamus nec baptizare omnino eos posse, qui non habeant spiritum sanctum. Nam cum in baptismo unicuique peccata sua remittantur, probat & declarat in evangelio suo Dominus, per eos solos peccata posse dimitti, qui habeant spiritum sanctum. Post resurrectionem enim discipulos suos mittens loquitur ad eos, & dicit: Si-

cut misit me pater, & ego mitto vos. Hoc cum dixisset, insufflavit & ait illis: Accipite spiritum sanctum. Si cujus remiseritis peccata, remittentur illi; si cujus tenueritis, tenebuntur. Quo in loco ostendit eum solum posse baptizare, & remissionem peccatorum dare, qui habeat spiritum sanctum. Denique ipsum Christum Dominum nostrum baptizaturus Joannes accepit ante spiritum sanctum, cum adhuc esset in utero matris constitutus, ut certum esset atque manifestum, baptizare non posse, nisi eos, qui habeant spiritum sanctum. Itaque qui hæreticis sive schismaticis patrocinantur, respondeant nobis, an habeant spiritum sanctum, an non habeant. Si habent, cur illic baptizatis, quando ad nos veniunt, manus imponitur ad accipiendum spiritum sanctum, cum jam utique illic acceptus sit, ubi si fuit, dari potuit? Si autem foris tincti hæretici & schismatici non habent spiritum sanctum, & ideo apud nos manus imponitur, ut hic accipiatur quod illic nec est, nec dari potest; manifestum est, nec remissionem peccatorum dari per eos posse, quos constat spiritum sanctum non habere. Et ideo ut secundum divinam dispositionem atque evangelicam veritatem, peccatorum remissionem consequi & sanctificari, ac templa Dei fieri possint, ecclesiæ baptismo baptizandi sunt omnes omnino, qui ab adversariis & antichristis ad Christi ecclesiam veniunt.

Quæstisti etiam fili carissime, quid mihi de illis videatur, qui in infirmitate & languore gratiam Dei consequuntur, an habendi sint legitimi christiani, eo quod aqua salutari non loti sint, sed perfusi, qua in parte nemini verecundia & modestia nostra præjudicat, quominus unusquisque quod putat, sentiat, & quod fenderit, faciat. Nos, quantum concipit mediocritas nostra, æstimamus in nullo mutilari & debilitari posse beneficia divina, nec minus aliquid illic posse contingere, ubi plena & tota fide & dantis & fumentis

accipitur, quod de divinis muneribus hauritur. Neque enim sic in sacramento salutari delictorum contagia, ut in lavacro carnali & sæculari sordes cutis & corporis abluuntur, ut aphronitris & ceteris quoque adjumentis, & dolio & piscina opus sit, quibus ablui & mundari corpusculum possit. Aliter pectus credentis abluitur, aliter mens hominis per fidei merita mundatur. In sacramentis salutaribus necessitate cogente, & Deo indulgentiam suam largiente, totum credentibus conferunt divina compendia. Nec quemquam movere debet, quod aspergi vel perfundi videntur ægri, cum gratiam dominicam consequuntur, quando scriptura sancta per Ezechielem prophetam loquatur & dicat: *Et aspergam super vos aquam mundam, & mundabimini ab omnibus immunditiis vestris, & ab omnibus simulacris vestris emundabo vos, & dabo vobis cor novum, & spiritum novum dabo in vobis.* Item in Numeris: *Et homo qui fuerit immundus usque ad vespertam, hic purificabitur die tertio & die septimo, & mundus erit. Si autem non fuerit purificatus die tertio & die septimo, non erit mundus, & exterminabitur anima illa de Israel, quoniam aqua aspersione non est super eum sparsa.* Et iterum: *Et locutus est Dominus ad Moysen dicens: Accipe levitas de medio filiorum Israel, & purificabis eos. Et ita facies eis purificationem eorum. Circumsparges eos aqua purificationis.* Et iterum: *Aqua aspersione purificationis est.* Unde apparet aspersione quoque aquæ instar salutari lavacri obtinere, & quando hæc in ecclesia fiunt, ubi sit & accipientis & dantis fides integra, stare omnia, & consummari ac perfici posse majestate Domini & fidei veritate. Porro autem quod quidam eos salutari aqua & fide legitima Christi gratiam consecutos non christianos, sed chinos vocant, non invenio, unde hoc nomen assumant; nisi forte qui plura & secretiora legerunt, apud Hippocratem vel Soranum clinicos istos apprehenderunt.

runt. Ego enim, qui clinicum de evangelio novi, scio paralytico illi & debili, per longa ætatis curricula in lecto jacenti nihil infirmitatem suam obfuisse, quo minus ad firmitatem cælestem plenissime perveniret, nec tantum indulgentia dominica excitatum degrabato esse, sed ipsum grabatum suum reparatis & vegetatis viribus sustulisse. Et iccirco, quantum fide concipere & sentire nobis datur, mea sententia hæc est, ut christianus judicetur legitimus, quisquis fuerit in ecclesia lege & jure fidei divinam gratiam consecutus. Aut si aliquis existimat eos nihil consecutos, eo quod aqua salutari tantum perfusi sint, sed inanes & vacui sunt, non decipiantur, ut si incommodum languoris evaserint, & convalescerint, baptizentur, si autem baptizari non possunt, qui jam baptismo ecclesiastico sanctificati sunt, cur in fide sua & Domini indulgentia scandalizantur? An consecuti sunt quidem gratiam dominicam, sed brevioris & minoris mensuræ muneris divini ac spiritus sancti, ut habeantur quidem christiani, non sint tamen ceteris adæquandi? Quin immo spiritus sanctus non ad mensuram datur, sed super credentem totus infunditur. Nam si dies omnibus æqualiter nascitur, & si sol super omnes pari & æquali luce diffunditur, quanto magis Christus sol & dies verus in ecclesia sua lumen vitæ æternæ pari æqualitate largitur? Cujus æqualitatis sacramentum videmus in Exodo esse celebratum, cum de cælo manna deflueret, & futurorum præfiguratione alimentum panis cælestis, & cibum Christi venientis ostenderet. Illic enim sine discrimine vel sexus, vel ætatis gomora singulis æqualiter colligebatur. Unde apparebat Christi indulgentiam & cælestem gratiam postmodum secuturam, æqualiter omnibus dividi sine sexus varietate, sine annorum discrimine, sine acceptione personæ, super omnem Dei populum spiritualis gratiæ munus infundi. Plane eadem gratia spiritualis, quæ æqualiter in baptis-

mo a credentibus sumitur, in conversatione atque actu nostro postmodum vel minuitur, vel augetur; ut in evangelio dominicum semen æqualiter seminatur, sed pro varietate terræ aliud absumitur, aliud in multiformem copiam vel tricesimi, vel sexagesimi, vel centesimi numeri fructu exuberante cumulatur. Adhuc vero cum singuli ad denarium vocentur, quid est, ut quod a Deo æqualiter distribuitur, humana interpretatione minuatur? Quod si aliquis in illo movetur, quod quidam de iis qui ægri baptizantur, spiritibus adhuc immundis tentantur, sciat diaboli nequitiam pertinacem usque ad aquam salutarem valere, in baptismo vero omne nequitiae suæ virus amittere. Quod exemplum cernimus in rege Pharaone, qui diu reluctatus, & in sua perfidia demoratus, tamdiu resistere potuit & prævalere, donec ad aquam veniret: quo cum venisset, & victus est, & extinctus. Mare autem illud sacramentum baptismi fuisse declarat beatus apostolus Paulus, dicens: *Nolo enim vos ignorare, fratres, quia patres nostri omnes sub nube fuerunt, & omnes per mare transierunt, & omnes in Moyse baptizati sunt in nube & in mari.* Et addidit dicens: *Hec autem omnia figura nostra fuerunt.* Quod hodie etiam geritur, ut per exorcistas voce humana & potestate divina flagelletur, & uratur, & torqueatur diabolus, & cum exire se, & homines Dei dimittere sæpe dicat, in eo tamen quod dixerit, fallat, & id quod per Pharaonem prius gestum est, eodem mendacio obstinationis & fraudis exerceat. Cum tamen ad aquam salutarem, atque ad baptismi sanctificationem venit, scire debemus & fidere, quia illic diabolus opprimitur, & homo Deo dicatus divina indulgentia liberatur. Nam sicut scorpium & serpentes, qui in sicco prævalent, in aquam præcipitati prævalere non possunt, aut sua venena retinere: sic & spiritus nequam, qui scorpium & serpentes appellantur, & tamen per nos data a Domino

mino potestate calcantur, permanere ultra non possunt in hominis corpore, in quo baptizato & sanctificato incipit spiritus sanctus habitare. Hoc denique & rebus ipsis experimur, ut necessitate urgente in ægritudine baptizati, & gratiam consecuti careant immundo spiritu, quo antea movebantur, & laudabiles ac probabiles in ecclesia vivant, plusque per dies singulos in augmentum cælestis gratiæ per fidei incrementa proficiant. Et contra sæpe nonnulli de illis, qui sani baptizantur, si postmodum peccare cœperint, spiritu immundo redeunte quatiuntur; ut manifestum sit diabolus in baptismo fide credentis excludi, si fides postmodum defecerit, regredi. Nisi si justum quibusdam videtur, ut illi, qui extra ecclesiam apud adversarios & antichristos prophana aqua polluuntur, baptizati judicentur; hi vero qui in ecclesia baptizantur, minus indulgentiæ & gratiæ divinæ consecuti esse videantur, & tantus honor habeatur hæreticis, ut inde venientes non interrogentur, utrumne loti sint an perfusi, utrumne clinici sint an peripatetici; apud nos autem de integra fidei veritate detrahatur, & baptismo ecclesiastico majestas sua & sanctitas derogetur. Rescripsi, fili carissime, ad litteras tuas, quantum parva nostra mediocritas valuit, & ostendi quid nos, quantum in nobis est, sentiamus, nemini præscribentes, quo minus statuatur quod putat unusquisque præpositus actus sui rationem Domino redditurus, secundum quod beatus apostolus Paulus in epistola sua ad Romanos scribit, & dicit: *Unusquisque nostrum pro se rationem dabit. Non ergo nos invicem judicemus.* Opto te, fili carissime, semper bene valere.

EPISTOLA LXXVII.

Ad Nemefianum & ceteros martyres in metallo constitutos.

CYPRIANUS Nemefiano, Felici, Lucio, alteri Felici, Litteo, Poliano, Victori, Jaderi, Dativo coepiscopis, item compresbyteris & diaconibus, & ceteris in metallo constitutis martyribus Dei patris omnipotentis & Jesu Christi Domini & Dei conservatoris nostri æternam salutem. Gloria quidem vestra poscebat, beatissimi ac dilectissimi fratres, ut ad conspectum atque ad complexum vestrum venire ipse deberem, nisi me quoque ob confessionem nominis relegatum præfiniti loci termini coercerent. Sed quomodo possum, repræsentare me vobis, & ad vos, etiamsi corpore & gressu venire non datur, dilectione tamen & spiritu venio, exprimens litteris animum meum, qui istis virtutibus & laudibus vestris lætus exulto, participem me computans vobis, etsi non passione corporis, consortio caritatis. An ego possim tacere, & vocem meam silentio premere, cum de carissimis meis tam multa & gloriosa cognoscam, quibus vos divina dignatio honoravit, ut ex vobis pars jam martyrii sui consummatione præcesserit, meritorum suorum coronam de Domino receptura, pars adhuc in carcerum claustris, sive in metallis & vinculis demoretur, exhibens per ipsas suppliciorum moras corroborandis fratribus & armandis majora documenta, ad meritorum titulos ampliores tormentorum tarditate proficiens, habitura tot mercedes in cælestibus præmiis, quot nunc dies numerat in pœnis? Quæ quidem vobis, fortissimi ac beatissimi fratres, pro merito religionis ac fidei vestræ accidisse non miror, ut vos sic Dominus ad gloriarum sublime fastigium clarificationis suæ honore provexerit, qui semper in eccle.

ecclesia ejus custodito fidei tenore viguistis, conservantes firmiter dominica mandata, in simplicitate innocentiam, in caritate concordiam, modestiam in humilitate, diligentiam in administratione, vigilantiam in adjuvandis laborantibus, misericordiam in fovendis pauperibus, in defendenda veritate constantiam, in disciplinæ severitate censuram. Ac ne aliquid ad exemplum bonorum factorum deesset in vobis, etiam in confessione nunc vocis & passione corporis fratrum mentes ad divina martyria provocatis, duces vos exhibendo virtutis; ut dum grex pastores suos sequitur, & quod fieri a præpositis cernit, imitatur, paribus obsequiorum meritis a Domino coronetur. Quod autem fustibus cæsi prius graviter & afflicti, per ejusmodi pœnas initiastis confessionis vestræ gloriosa primordia, execranda nobis ista res non est. Neque enim ad fustes christianum corpus expavit, cujus est spes omnis in ligno. Sacramentum salutis suæ Christi servus agnovit. Redemptus ligno ad vitam æternam, ligno provectus est ad coronam. Quid vero mirum, si vasa aurea & argentea in metallum, id est, auri & argenti domicilium, dati estis, nisi quod nunc metallorum natura conversa est, locaque quæ aurum & argentum dare ante consueverant, accipere cœperunt? Imposuerunt quoque compedes pedibus vestris, & membra felicia ac Dei templa infamibus vinculis ligaverunt, quasi cum corpore ligetur & spiritus, aut aurum vestrum ferri contagione maculetur. Dicatis Deo hominibus, & fidem suam religiosa virtute testantibus ornamenta sunt ista, non vincula; nec christianorum pedes ad infamiam copulant; sed clarificant ad coronam. O pedes feliciter vincti, qui non a fabro, sed a Domino resolvuntur. O pedes feliciter vincti, qui in itinere salutari ad paradysum diriguntur. O pedes in sæculo ad præsens ligati, ut sint semper apud Dominum liberi.

beri. O pedes compedibus & traversariis interim cunctabundi, sed celeriter ad Christum glorioso itinere cursuri. Quantum vult hic vel invida crudelitas, vel maligna nexibus vos suis & vinculis teneat, cito a terris & pœnis istis ad cœlorum regna venietis. Non fovetur in metallis lecto & culcitris corpus, sed refrigerio & solatio Christi fovetur. Humi jacent fessa laboribus viscera; sed pœna non est cum Christo jacere. Squalent sine balneis membra, situ & sorde deformia; sed spiritualiter intus abluitor, quod foris carnaliter sordidatur. Panis illic exiguus; at non in solo pane vivit homo, sed in sermone Dei. Vestis argentibus deest; sed qui Christum induit, & vestitus abundanter & cultus est. Semitonii capitis capillus horrescit; sed cum sit caput viri Christus, qualecumque illud caput deceat necesse est, quod ob Domini nomen insigne est. Omnis ista deformitas detestabilis & tetra gentilibus, quali splendore pensabitur? Sæcularis hæc & brevis pœna, quam clari & æterni honoris mercede mutabitur, cum secundum beati apostoli vocem transformaverit Dominus corpus humilitatis nostræ conformatum corpori claritatis suæ? Sed nec in illo, fratres dilectissimi aliqua potest aut religionis aut fidei jactura sentiri, quod illic nunc sacerdotibus Dei facultas non datur offerendi & celebrandi sacrificia divina. Celebratis immo atque offertis sacrificium Deo & pretiosum pariter & gloriosum, & plurimum vobis ad retributionem præmiorum cœlestium profuturum, cum scriptura divina loquatur & dicat: *Sacrificium Deo spiritus contribulatus, cor contritum & humiliatum Deus non despicit.* Hoc vos sacrificium Deo offertis, hoc sacrificium sine intermissione die ac nocte celebratis, hostiæ facti Deo & vosmetipsos sanctas atque immaculatas victimas exhibentes, sicut apostolus adhortatur & dicit: *Oro ergo vos, fratres, per misericordiam Dei, ut constituatis corpora vestra*

vestra hostiam vivam sanctam, placentem Deo, nec configuremini saculo huic, sed transformemini in renovatione sensus, ad probandum quæ sit voluntas Dei bona & placens, & perfecta. Hoc est enim quod præcipue Deo placeat; hoc est, in quo majoribus meritis ad promerendam voluntatem Dei opera nostra proveniant; hoc est quod solum Domino de beneficiis ejus grandibus & salutaribus fidei ac devotionis nostræ obsequia retribuunt, prædicante in psalmis, & contestante spiritu sancto: Quid retribuam, inquit, Domino pro omnibus quæ tribuit mihi? Calicem salutaris accipiam, & nomen Domini invocabo. Pretiosa in conspectu Domini mors justorum ejus. Quis non libenter & prompte calicem salutis accipiat? quis non appetat gaudebundus & lætus, in quo aliquid & ipse Domino suo retribuatur? quis non pretiosam in conspectu Domini mortem fortiter & constanter excipiat, placiturus ejus oculis, qui nos in congressione nominis sui constitutos desuper spectans volentes comprobatur, adjuvat dimicantes, vincentes coronat, retributione bonitatis ac pietatis paternæ remunerans in nobis, quidquid ipse præstitit, & honorans quod ipse perfecit? Ipsius enim esse quod vincimus, & quod ad maximi certaminis palmam subacto adversario pervenimus, declarat & docet Dominus in evangelio suo dicens: Cum autem vos tradiderint, nolite cogitare quomodo aut quid loquamini. Dabitur enim vobis in illa hora quid loquamini. Non enim vos estis qui loquimini, sed spiritus patris vestri qui loquitur in vobis. Et iterum: Ponite in cordibus vestris non præmeditari excusare. Ego enim dabo vobis os & sapientiam, cui non poterunt resistere adversarii vestri. In quo quidem & credentium magna fiducia est, & culpa gravissima perfidorum non credere ei, qui se opem suam daturum confidentibus pollicetur, nec rursus eundem timere, qui æternam pœnam negantibus comminatur. Quæ vos omnia,
for-

fortissimi ac fidelissimi milites Christi, insinuaſtis fratribus nostris, implentes factis quod verbis ante docuiſtis, futuri maximi in regno cælorum, pollicente Domino & dicente: *Qui fecerit & sic docuerit, maximus vocabitur in regno calorum.* Denique exemplum vestrum ſecuta multiplex plebis portio, confessa est vobiscum pariter & pariter coronata est, connexa vobis vinculo fortissimæ caritatis, & a præpositis suis nec carcere nec metallis separata. Cujus numero nec virgines defunt, quibus ad sexagenarium fructum centenus accessit, quasi que ad cælestem coronam gloria gemina provexit. In pueris quoque virtus major ætate annos suos confessionis laude transcendit, ut martyrii vestri beatum gregem & sexus, & ætas omnis ornaret. Qui nunc vobis, dilectissimi fratres, conscientiæ victricis vigor, quæ sublimitas animi, quæ in sensu exsultantia, qui triumphus in pectore, unumquemque vestrum stare ad promissum Dei præmium, de judicio Dei esse securum, ambulare in metallo, captivo quidem corpore, sed corde regnante, scire Christum secum esse præsentem; gaudentem tolerantia servorum suorum per vestigia & vias suas ad regna æterna gradientium? Expectatis quotidie læti professionis vestræ salutarem diem, & jam jamque de sæculo recessuri, ad martyrum munera & domicilia divina properatis, post has mundi tenebras visuri candidissimam lucem, & accepturi majorem passionibus omnibus & conflictationibus claritatem, apostolo testante & dicente: *Non sunt condigna passionis hujus temporis ad superventuram claritatem, quæ revelabitur in nobis.* Plane quia nunc vobis in precibus efficacior sermo est, & ad impetrandum quod in pressuris petitur, faciliior oratio est, petite impensius & rogate, ut confessionem omnium nostrum dignatio divina consummet, ut de istis tenebris & laqueis mundi nos quoque vobiscum integros & gloriosos Deus liberet, ut qui hic caritatis

&

& pacis vinculo copulati, contra hæreticorum injurias & pressuras gentilium simul stetimus, pariter in regnis cælestibus gaudeamus. Opto vos, beatissimi ac dilectissimi fratres in Domino bene valere, & nostri semper & ubique meminisse.

EPISTOLA LXXVIII.

Nemesiani, Dativi, Felicis, & Victoris responsum ad Cyprianum.

CYPRIANO fratri Nemesianus, Dativus, Felix, & Victor in Domino æternam salutem. Semper magnis sensibus pro temporis conditione litteris tuis locutus es, Cypriane dilectissime; quibus assidue lectis, & pravi corriguntur, & bonæ fidei homines corroborantur. Dum enim non desinis tractatibus tuis sacramenta occulta nudare, sic nos in fide facis crescere, & de sæculo homines ad credulitatem accedere. Nam quæcumque bona in multis libris tuis intulisti, nescius ipsum te nobis designasti. Es enim omnibus hominibus in tractatu major, in sermone facundior, in consilio sapientior, in patientia simplicior, in operibus largior, in abstinentia sanctior, in obsequio humilior, & in actu bono innocentior. Scis & ipse, carissime, nostrum optabile votum esse, quod te videamus doctorem & amatorem nostrum ad coronam magnæ confessionis pervenisse. Nam quasi bonus & verus doctor quid nos discipuli secuti apud præsidem dicere deberemus, prior apud acta proconsulis pronuntiasti, & tuba canens, Dei milites cælestibus armis instructos ad congressionis prælium excitasti, & in acie prima pugnans spiritali gladio diabolus interfecisti, agmina quoque fratrum hinc & inde verbis tuis composuisti, ut insidiæ inimico undique tenderentur, & cadaveris ipsius publici hostis nervi concissi calcarentur.

S. Cypriani Tm. I.

T

tur.

tur. Crede nobis, carissime, quoniam non est a centesimo præmio minor tua innocens anima; quæ nec sæculi primos impetus timuit, nec ire in exilium recusavit, nec relinquere civitatem dubitavit, nec in deserto loco commorari horruit, & quoniam multis documentum confessionis dedit, ipsa martyrium prior duxit. Alios enim ad martyria facienda exemplo suo provocavit; & non tantum martyrum de sæculo jam excedentium socia esse cœpit, sed & cum futuris caelestem amicitiam copulavit. Agunt ergo tibi nobiscum damnati maximas apud Deum gratias, Cypriane dilectissime, quod litteris tuis laborantia pectora recreasti, fustibus vulnerata membra curasti, compe-
dibus pedes ligatos resolvisti, semitonis capitis capilaturam adæquasti, tenebras carceris illuminasti, montes metalli in planum deduxisti, naribus etiam fragrantibus flores imposuisti, & tetrum odorem fumi exclusisti. Fecit autem & profectum ministerium tuum, & Quirini dilectissimi nostri; quod per Herennianum hypodiaconum, & Lucianum, & Maximum, & Amantium acolythos distribuendum misisti, quæcumque necessitatibus corporum defuerant, expediri. Simus ergo orationibus nostris alterutrum adiutores, & rogemus, sicut mandasti, ut Deum, & Christum, & angelos in omnibus actibus nostris habeamus fautores. Optamus te, Domine frater, semper bene valere, & nostri meminisse. Saluta omnes qui tecum sunt. Omnes nostri qui nobiscum sunt, te amant, & salutant, & videre desiderant.

E P I S T O L A LXXIX.

Ad eundem Lucii & ceterorum martyrum responsum.

CYPRIANO fratri & collegæ Lucius, & qui mecum sunt, fratres omnes in Domino salutem.
Exsul.

Exsultantibus nobis & lætantibus in Deo, quod nos ad congressionem armaverit, & in prælio victores a dignatione fecerit, supervenerunt litteræ tuæ, frater carissime, quas per Herennianum hypodiaconum & Lucianum, & Maximum, & Amantium acolythos misisti nobis; quibus lectis recepimus in vinculis laxamentum, in pressura solatium, & in necessitate præsidium, & excitati sumus, & robustius animati ad si quid amplius fuerit pœnarum. Nam ante passionem a te sumus ad gloriam provocati, qui prior nobis ducatum ad confessionem nominis Christi præbuiisti. Nos vero secuti vestigia confessionis tuæ parem gratiam tecum speramus. Nam qui prior est in cursu, prior est & ad præmium; & qui prior occupasti, de quo cœpisti, inde hoc nobis communicasti, demonstrans scilicet individuam caritatem, qua semper nos dilexisti; ut quibus unus fuit spiritus in conjunctione pacis, esset precum tuarum gratia, & una corona confessionis. Accessit autem tibi, frater carissime, ad confessionis coronam retributio operum, abundans mensura, quam accipies a Domino in die remunerationis, qui & te nobis litteris tuis repræsentasti, ut pectus illud tuum candidum & beatum, quod semper novimus, manifestares, & secundum latitudinem ejus nobiscum laudes Deo diceres, non quantum nos meremur audire, sed quantum tu potes dicere. Tuis enim vocibus & quæ minus in nobis instructa erant, exornasti, & confirmasti ad sustentationem earundem passionum, quas patimur securi de præmio cælesti, & de corona martyrii, & de regno Dei ex prophetia, quam litteris tuis spiritu sancto plenus spopondisti. Hoc totum fiet, dilectissime, si nos orationibus tuis in mente habueris, quod te facere confido, sicut & nos utique facimus. Accepimus itaque, frater desiderantissime, id quod a Quirino, & a te ipso misisti sacrificium ex omni opere mundo- Sicut & Noe obtulit Deo, &

delectatus est Deus in odorem suavitatis, & respexit in sacrificium ejus, ita & in vestrum respiciat, & delectetur reddere vobis hujus tam boni operis mercedem. Peto autem ut litteras, quas ad Quirinum fecimus, transmitti præcipias. Opto te, frater carissime ac desiderantissime, semper bene valere, & nostri meminisse. Saluta omnes qui tecum sunt. Vale.

EPISTOLA LXXX.

Felici, Jaderis, Poliani, & ceterorum martyrum responsum ad Cyprianum.

CYPRIANO carissimo & dilectissimo Felix, Jader, Polianus, una cum presbyteris & omnibus nobiscum commorantibus apud metallum Siguenſe, æternam in Domino salutem. Resalutamus te, frater carissime, per Herennianum hypodiaconum, Lucianum, & Maximum fratres nostros fortes & incolumes adjuvantibus orationibus tuis; a quibus accepimus oblationis nomine non minimam quantitatem una cum litteris tuis quas scripsisti, in quibus dignatus es de verbis cælestibus nos tamquam filios confortare. Et Deo patri omnipotenti per Christum ejus gratias egimus, & agimus quod sic confortati, & corroborati sumus per tuam adlocutionem, petentes de animi tui candore; ut nos assiduis orationibus tuis in mente habere digneris, ut confessionem vestram, & nostram, quam Dominus in nobis conferre dignatus est, suppleat. Saluta omnes qui tecum commorantur. Optamus te, frater carissime, in Deo semper bene valere. Felix scripsi. Jader subscripsi. Polianus legi. Dominum meum Eutychianum saluto.

EPISTOLA LXXXI.

*Cypriani ad Sergium & Rogatianum & ceteros confes-
sores in carcere constitutos.*

CYPRIANUS Sergio, & Rogatiano, & ceteris confessoribus in Domino perpetuam salutem. Saluto vos, fratres carissimi ac beatissimi, optans ipse quoque conspectu vestro frui, si me ad vos pervenire loci conditio permetteret. Quid enim mihi optatius & lætius posset accidere, quam nunc vobis inhærere, ut complectemini me manibus illis, quæ puræ & innocentes & dominicam fidem servantes sacrilega obsequia respuerunt? Quid jucundius & sublimius, quam osculari nunc ora vestra, quæ gloriosa voce Dominum confessa sunt; conspici etiam præsentem ab oculis vestris, qui, despecto sæculo, conspiciendo Deo digni exstiterunt? Sed quoniam huic lætitiæ interesse facultas non datur, has pro me ad aures, & ad oculos vestros vicarias litteras mitto, quibus gratulor pariter & exhortor, ut in confessione cælestis gloriæ fortes & stabiles perseveretis, & ingressi viam dominicæ dignationis, ad accipiendam coronam spiritali virtute pergatis, habentes Dominum protectorem & ducem, qui dixit: *Ecce ego vobiscum sum omnibus diebus usque ad consummationem mundi.* O beatum carcerem, quem illustravit vestra præsentia. O beatum carcerem, qui homines Dei mittit ad cælum. O tenebras lucidiores sole ipso, & luce hac mundi clariiores, ubi modo constituta sunt Dei templa, & sanctificanda divinis confessionibus membra vestra. Nec quidquam nunc versetur in cordibus & mentibus vestris, quam divina præcepta & mandata cælestia, quibus vos ad tolerantiam passionis spiritus sanctus semper animavit. Nemo mortem cogitet, sed immortalitatem, nec temporariam pœnam, sed glo-

riam sempiternam, cum scriptum sit: *Preiosa est in conspectu Domini mors justorum ejus.* Et iterum: *Sacrificium Deo spiritus contribulatus, cor contritum & humiliatum Deus non despicit.* Et iterum ubi loquitur scriptura divina de tormentis, quæ martyres Dei consecrant, & in ipsa passionis probatione sanctificant: *Et si coram hominibus tormenta passi sunt, spes eorum immortalitate plena est.* Et in paucis vexati, in multis bene disponuntur, quoniam Deus tentavit illos, & invenit illos dignos se. *Tamquam aurum in fornace probavit illos, & quasi holocausti hostiam accepit illos, & in tempore erit respectus illorum.* Fulgebunt iusti, & tamquam scintilla in arundinetis discurrent. *Judicabunt nationes, & dominabuntur populis, & regnabit eorum Dominus in perpetuum.* Quando ergo judicatueros vos & regnatu-
 ros cum Christo Domino cogitatis, exsultetis necesse est, & futurorum gaudio præsentia supplicia calcetis, scientes ab initio mundi sic institutum; ut laboret istic in sæculari conflictatione iustitia, quando in origine statim prima Abel iustus occiditur, & exinde iusti quique & prophetæ & apostoli missi. Quibus omnibus Dominus quoque in se ipso constituit exemplum, docens ad suum regnum non nisi eos qui se per viam suam secuti sint, pervenire, dicens: *Qui amat animam suam in isto sæculo, perdet illam.* Et qui odit animam suam in isto sæculo, in vitam æternam conservabit illam. Et iterum: *Nolite timere eos qui occidunt corpus, animam vero non possunt occidere.* Magis autem metuite eum, qui potest & animam & corpus occidere in gehennam. Paulus etiam nos adhortatur, ut qui ad Domini promissa venire cupimus, imitari Dominum in omnibus debeamus. Sumus, inquit, filii Dei. Si autem filii, & heredes, heredes quidem Dei, coheredes autem Christi, siquidem compatiamur, ut & commagistrificemur. Addidit etiam comparisonem præsentis temporis, & futuræ claritatis, dicens: *Non sunt condignæ*
passiones

passiones hujus temporis ad superventuram claritatem, quæ revelabitur in nobis. Cujus claritatis gloriam cogitantes, pressuras omnes & persecutiones tolerare nos convenit; quia etsi sunt multæ pressuræ justorum, ex omnibus tamen liberantur, qui in Deum fidunt. Beatas etiam feminas, quæ vobiscum sunt in eadem confessionis gloria constitutæ, quæ dominicam fidem tenentes, & sexu suo fortiores, non solum ipsæ ad gloriæ coronam proximæ sunt, sed & ceteris quoque feminis exemplum de sua constantia præbuerunt. Ac ne quid deesset ad gloriam numeri vestri, ut omnis vobiscum & sexus, & ætas esset in honore, pueros etiam vobis gloriosa confessione sociavit divina dignatio, repræsentans nobis tale aliquid, quale Ananias, Azarias, & Misahel illustres pueri aliquando fecerunt; quibus inclusis in caminum cesserunt ignes, & refrigerium flammæ dederunt, præsentem cum illis Domino, & probante quod in confessores & martyres ejus nihil posset gehennæ ardor operari, sed quod qui in Deum crederent, incolumes semper & tuti in omnibus perseverarent. Et consideretis peto pro vestra religione, quæ apud pueros fides fuerit, quæ promereri Dominum plenius potuit. Ad omnia enim parati, sicut omnes esse debemus, ajunt regi: *Nabuchodonosor rex, non opus est nobis de hoc verbo respondere tibi. Est enim Deus, cui nos servimus, potens eripere nos de camino ignis ardentis, & de manibus tuis, rex, liberabit nos. Et si non, notum tibi sit: quoniam diis tuis non servimus, & imaginem auream quam statuisti, non adoramus.* Cum se crederent, & pro fide sua scirent posse etiam de præsentis supplicio liberari, jactare hoc tamen, & vindicare sibi noluerunt, dicentes: *Et si non, ne minor esset confessionis virtus sine testimonio passionis.* Addiderunt posse omnia Deum facere, sed tamen non in hoc fidere, ut liberari in præsentia vellent, sed illam libertatis, & securitatis æternæ

gloriam cogitarent. Quam fidem vos quoque retinentes, & die ac nocte meditantes, toto corde ad Deum prompti, contemptu præsentium futura tantummodo cogitatis, ut ad fructum regni æterni, & ad complexum & osculum Domini & conspectum venire possitis, ut sequamini in omnibus Rogatianum presbyterum gloriosum senem, viam vobis ad gloriam temporis nostri religiosa virtute & divina dignatione facientem, qui cum Felicissimo fratre nostro quieto semper & sobrio excipiens ferocientis populi impetum, primum hospitium vobis in carcere præparavit, & metator quodammodo vester, nunc quoque vos antecedit. Quod ut consummetur in vobis, assiduis orationibus Dominum deprecamur, ut initiis ad summa pergentibus, quos confiteri fecit, faciat & coronari. Opto vos, fratres carissimi ac beatissimi, in Domino semper bene valere & ad coronam cælestis gloriæ pervenire. Victor diaconus & qui mecum sunt vos salutant.

E P I S T O L A LXXXII.

Ad Successum de nuntiis Roma revertis persecutionem nuntiantibus.

CYPRIANUS Successo fratri salutem. Ut non vobis in continenti scriberem, frater carissime, illa res fecit, quod universi clerici sub ictu agonis constituti recedere istinc omnino non poterant, parati omnes pro animi sui devotione ad divinam & cælestem gloriam. Sciatis autem eos venisse, quos ad Urbem propter hoc miseram, ut quomodocumque de nobis rescriptum fuisset, exploratam sibi veritatem ad nos perferrent. Multa enim varia & incerta opinionibus ventilantur. Quæ autem sunt in vero, ita se habent. Rescripsisse Valerianum ad senatum; ut

ut episcopi, & presbyteri, & diacones in continenti animadvertantur, senatores vero & egregii viri, & equites Romani, dignitate amissa, etiam bonis spoliuntur, & si adeptis facultatibus christiani esse perseveraverint, capite quoque multentur, matronæ vero adeptis bonis in exilium relegentur, Cæsariani autem quicumque vel prius confessi fuerant, vel nunc confessi fuerint confiscentur, & vincti in Cæsarianas possessiones descripti mittantur. Subjecit etiam Valerianus Imperator orationi suæ exemplum litterarum, quas ad præsides provinciarum de nobis fecit: quas litteras quotidie speramus venire, stantes secundum fidei firmitatem ad passionis tolerantiam, & expectantes de ope & indulgentia Domini vitæ æternæ coronam. Xistum autem in cœmeterio animadversum sciatis octavo iduum Augustarum die, & cum eo diacones quatuor. Sed & huic persecutioni quotidie insistent præfecti in Urbe; ut si qui sibi oblati fuerint; animadvertantur, & bona eorum fisco vindicentur. Hæc peto per vos & ceteris collegis nostris innotescant, ut ubique hortatu eorum possit fraternitas corroborari, & ad agonem spiritalem præparari, ut singuli ex nostris non magis mortem cogitent, quam immortalitatem, & plena fide ac tota virtute Domino dicati, gaudeant magis, quam timeant in hac confessione; in qua sciunt Dei & Christi milites non perimi, sed coronari. Opto te, frater carissime, semper in Domino bene valere.

E P I S T O L A LXXXIII.

Ad clerum & plebem de suo secessu paulo ante passionem.

CYPRIANUS presbyteris & diaconibus & plebi
 univ[er]sæ salutem. Cum perlatum ad nos fuisset,
 T S fratres

fratres carissimi, commentarios esse missos, qui me Uticam perducerent, & consilio carissimorum persuasum esset, ut de hortis nostris interim secederemus, iusta interveniente causa consensi, eo quod congruat episcopum in ea civitate, in qua ecclesiæ dominicæ præest, illic Dominum confiteri, & plebem universam præpositi præsentis confessione clarificari. Quodcumque enim sub illo confessionis momento confessor episcopus loquitur, aspirante Deo ore omnium loquitur. Ceterum mutilabitur honor ecclesiæ nostræ tam gloriosæ, si ego episcopus alterius ecclesiæ præpositus, accepta apud Uticam super confessione sententia, exinde martyr ad Dominum proficiscar, quandoquidem ego & pro me, & pro vobis apud vos confiteri, & ibi pati, & exinde ad Dominum proficisci orationibus continuis deprecet, & votis omnibus exoptem & debeam. Expectamus ergo hic in secessu abdito constituti adventum proconsulis Carthaginem redeuntis, audituri ab eo, quid Imperatores super christianorum laicorum, & episcoporum nomine mandaverint, & dicturi quod ad horam Dominus dici voluerit. Vos autem, fratres carissimi, pro disciplina quam de mandatis dominicis a me semper accepistis, & secundum quod me tractante sæpissime didicistis, quietem & tranquillitatem tenete, nec quisquam vestrum aliquem tumultum fratribus moveat, aut ultro se gentilibus offerat. Apprehensus enim & traditus loqui debet. Siquidem in nobis Dominus positus illa hora loquatur, qui nos confiteri magis voluit, quam profiteri. Quid autem de cetero nos observare conveniat; antequam in me super confessione nominis Dei proconsul sententiam ferat, instruente Domino in commune disponemus. Incolumes vos, fratres carissimi, Dominus noster in ecclesia sua permanere faciat, & conservare dignetur. Ita fiat per suam misericordiam.

Tras

Tres epistolæ, quæ sequuntur, inter epistolas Cypriani reperiuntur in quibusdam libris antiquis,

Epistola Cornelii Papa ad Cyprianum.

DILECTIONIS tuæ non delectabilia, & contra fidei regulam scripta suscepi, in quibus nauseas recognovi, & venena sermonum adversus catholicam per totum orbem diffusam ecclesiam horribilibus a te superseri zizaniis non laudavi. Quæ peto velociter tollas ac prædamnes. Quod prius quidem te facere oportebat, quam in mundo letale virus aspersum simplicium & innocentium interficeret mentes. Non ergo dignum est rebaptizare. Ergo eradica & extrica, ut diximus, florulentis sermonibus atque dignis per posteriorem epistolam priora scripta, quæ contra catholicam fidem servare censuerunt genimina viparum. Non enim decet tantæ urbis antistitem, excellentissimumque doctorem, ut dum putas hæresis baptismus prædamnandum, verum baptismus sermonibus maculare audeas, quæ doles contra apostolum scilicet repugnare dicentem: *Unus Deus, una fides, unum baptisma.*

Ad plebem Carthagini.

CYPRIANUS plebi Carthagini consistenti æternam in Domino salutem. Gratias quidem agimus Deo patri & Domino Jesu Christo, qui vos adunatos, atque in conventicula restituit. Propter quam rem memoravimus & scriptum beatissimorum martyrum atque confessorum voluimus ad consilium nostrum servare. Jubeat desuper majestas atque spiritus sanctus, cujus in nobis-

bis gratia testis est salutaris. Nam cum tractaret de traditoribus, jubet tam in evangelio quam in apostolo, tam in psalmis quam in prophetis & ceteris scripturis: *Scrutamini*. Quo scrutato a nobis, inventis ab iis qui scripturas sanctas tradiderunt, non mereri eos congregari consilium nostrum, id est, consilium habitare. Nemo est enim qui hoc consilium congregiatur, non cælestem spectet. Ac propterea memoravimus ut ii, qui taliter scripturas tractaverunt, ad statum plebis & judicium ab ipsis porrectum, nec aliqua actio ab ipsis promi, sed nec etiam ad statum sacrificii neque plebis esse proximi; qui utique jam dudum derelicta plebe, nudata altaria, prompta sacrificia. Merito hæc memorantes cum mœstitia atque dolore animi profici teste ad Dominum, quod debui-
mus statuere, quam omnes disceptationes, & dissensiones, & hæreses & scandala hauserant ne ulterius provocent se homines, seu minus fidei seu scripturis leves sint & lectores id statuimus, atque statuto nostro recedi nolumus, ut si qui tradidit præpositus huic plebi mereantur antistitem administrantem altari ac corpore integro. Iis vero iussimus a quibus & sacrificium offerri jubemus, merito præceptis iis obtemperari debet, nec aliud fiet quam statim evangelica vox sincera cata Joannem loquitur: *Nolo, inquit, de manibus vestris sacrificia, quia non venistis ad me cum hostia munda*. Qui utique hostiam mundam non offert, hostia de manibus ejus non ascendit. Nam iterum legimus: *In principio erat verbum, & verbum erat apud Deum, & Deus erat verbum*. Qui per verbum functionem finxerint dare res inhabitabiles apud illos seu veras scripturas sanctas seu finctas qui dat vocem, & qui dat desideria proxima, qui utique finget tradere, supplebit traditionem. Merito negantes volumus interim veniam habere confitentes patres. Nam qui dicit se scripturas non habere, utique paratus fuit & torqueri,

ri, quorum exempla habemus. Tertio negaverunt; & sacramentum non tradiderunt. Hi autem qui nec interrogati obtulerunt, interim, usque ad statum consilii laici communicabunt. Verumtamen in statum consilii quod scriptura sancta promoverit, secundum sententiam fixam sanctis & amicis Dei suppleri volumus, cum jam testes & proximi aliquid jam dudum statuerant nostri antecessores. Ob quam rem necesse est nos testibus consentire, complecti, & supplere. Opto vos in Domino semper bene valere. Amen. Deo gratias.

Ad Turasium presbyterum.

CYPRIANUS benedicto & dilectissimo parenti Turasio in Domino æternam salutem. Caritatis tuæ scripta percepi, quibus animum tuum dolore commotum de filiæ dormitione cognovi. Non aliud principaliter admiratus sum, quam christiani pectoris in te jactatam fuisse virtutem, ut animum flecteres ad dolorem. Stupeo murum fidei penetratum vulneribus orbitatis, quem sepire debuerat spes resurrectionis & regni cælestis. Numquam spes cum dolore concordat, nec fides aliquando sentit quancumque jacturam. Resurgere credimus mortuos, & plangimus. Quid faceremus, si mori tantummodo sine resurrectione præciperet Deus? Voluntas utique ejus sola sufficeret ad solatium, cui nullum præponendum scimus affectum. Quod dederat, abstulit qui creaverat. Quid certas plangere, quod ad tempus acciperas. Commodaverat ut haberes, quancumque tempore voluisset, & cum vellet, rursus auferret. Nihil abstulit tuum, qui recipere dignatus est proprium. Creditum suum recipere decuerat creditorem, & nihil aliud decet, quam creditori suo gratias agere mutuantem. Sic Job legimur quam sequamur devotissi-

votissimam vocem. *Dominus, inquit, dedit, Dominus abstulit. Sicut Domino placuit, ita factum est. Sit nomen Domini benedictum.* Parum ergo non erat hæc sola consolatio contra luctum, quod nemo lugere debeat cum aliquid reddiderit alienum, quia fas non erat apud alium detineri, quod domino suo fuerat necessarium. Additur consolationis alia providentia, quæ jaculis occurrat orbitatis. Gaudere debuimus de sæculo recedentibus, si sæculi contra nos inimicitias sentiremus, & plangimus beneficia Domini, qui nobis quod præstat, infirmitati nostræ præstat. Periclitari volebat adhuc qui dolet aliquem dormientem, & inter fluctus vitæ præsentis videre cupiebat miserum laborare. Ad quid christianum & fidelem animam putas intra carcerem mundi remorari debuisse, cui totus mundus naufragium est. Tantis & talibus tempestatibus vitæ tot impugnationes diaboli, tot corporis bella, tot clades sæculi, tot calamitates evasit. Et lacrimas fundis, quasi nescias quid in te ipse quotidie patiaris. Propter quod Dominus sic admonet apostolos suos, dicens: *Si me diligeretis, gauderetis, quoniam vado ad patrem.* Plane mortuum Lazarum flevit, sed non tuis lacrimis. Resurrectionis promissor dolere non poterat, ne fidem perfidiam faceret, quam docebat. Doluit Lazarum non dormientem, sed potius resurgentem, & flebat quem cogeatur propter salvandos alios, & confundendos incredulos ad sæculum revocare. Hanc vitam dans Dominus ingemiscebat, quam tu doles esse sublatam. Contra lacrimas ejus pugnant lacrimæ tuæ, & amor tuus amor ejus non convenit. Fletus ejus non habet parem. Ille nolebat reddere laboribus quem dilexerat, & ut amare & credis, cui laborum volebas adhuc restare tormenta. Ceterum si putas eum mortuum Lazarum doluisse, ante non permisisset exire, qui repellere poterat mortem, aut certe non fletet, qui mortuum resuscitandi

tandi postmodum habuerat potestatem. Unde apparet eum sola ea causa fuisse commotum, quod ad hostilem vitam carissimum suum revocare denuo propter credituros aliquos, vel confundendos incredulos urgebatur. Denique sic subsequutus est Dominus dicens: *Ergo, pater, ut credant quia tu me misisti*, ait clara voce: *Lazare prodi foras*. Et factum est. Gaudere ergo debes unde ille coactus est flere, ne videaris dormientis felicitatibus invidere. Ab alieno mundo ad proprium transivit, transivit ad Dominum, & de hostili patria ad paternam patriam migravit ad cælum, dicente apostolo: *Scimus*, inquit, *quoniam si terrena domus nostra hujus corporis resolvatur, quod habitationem habemus non manu factam, æternam in calis*. Caruit ergo domo, quam nec nosse debuerat. Caruit malis civibus, quorum odia sustinebat, ne adhuc peregrinaretur in terra contraria, sicut apostolus memorat dicens: *Quamdiu sumus in hoc sæculo, peregrinamur a Domino*. Non nobis ergo debet luctus incumbere, quisquis a peregrinatione redire meruerit ad propriam regionem, maxime cum non inanis & vacuus redire noscatur, qui christianitatis mercatus est lucrum, propter quod venit ad mundi commercium. Negotium explicavit, rediit, & Deo debitum solvit. Comparavit propter quam descenderat emptionem, & ad Dominum regredi properavit, cui offerat mercem, ut comparatæ mercis tam securitatem accipiat, quam honorem. Et ego, inquires, nulla promissorum cælestium dubitatione conturbor, sed sola separatione morientis æstuans, desolatus solatio pii pignoris jactor. Excusatio hæc est sine dubio fragilitatis humanæ, quæ patrocinari non potest diffidentiae. Si enim desolationem homines ferre non valerent, nunquam prorsus a se sua pignora dimisissent. Destitutos se a morientibus conqueruntur, & vivos filios aut propter litteras, aut propter honores,

res, aut propter negotia peregrinis regionibus credunt; & gaudent tota vita sine affectibus commorari, dummodo capiant, quod de suis cupiunt pignoribus adipisci, & ut ad palatia pergant, peregrinantur. Ad studia dignitatis navigant acquirenda, vel causas patrimonii explicandas per labores & pericula proficiscientes impellunt, nec secum vacare quos diligunt, patiuntur. Et ut ad palatium cæli, ad studia Christi, ad honorem vitæ perpetuæ, ad patrimonium possessionis æternæ cum securitate valeant pervenire, nemo filios suos libenter a se gratulatur abscedere. Propter incerta per incerta filium vel fratrem vel parentem peregrinari unusquisque compellit, & propter certa per certa suorum aliquem proficisci nullus admittit. Ad comparanda peccata gaudent tam parentes a filiis, quam filii a parentibus separari provocante diabolo, ad indulgentiam percipiendam nolunt ab invicem Deo vocante discerni; ut appareat non pro nostra ratione nos dolere, quemcumque videmur amittere, sed indicium magis ostendere diffidentiae, qui non sustinemus nostrorum profectiones ad Dominum, quorum peregrinationes in sæculo gratulamur. Quia credimus mundi lucris, toleramus divisa nostri corporis membra. Si crederemus Dei promissis, post abscissionem nostrum nihil aliud, quam gratias debuerant resonare nostri pectoris gaudia. Mihi crede, semper in omnibus incredulitas mœret, & sicut non potest nosse fides quod doleat, sic diffidentia sola doloribus tenetur ancilla. Nam si dormientes dicimus, dormientes utique credere debemus; non mortuos, sed requiescentes interim secundum vocem Domini fideliter loquentis: *Omnis, inquit, qui credit in me, licet moriatur, vivet.* Si cui medicus homo promitteret quidquam, sine dubio promissioni ejus negare non poterit omnino lætitiā. Nunc quia Dominus Christus fabricator & resuscitator promittit,

non

non times plangere, ut fidelio rem Christo pariter & potentio rem medicum videaris in promissionibus judicare. Sed destitutam, dicis, doleo senectutem, quia debueram meos liberos potius antecedere, ne in laboribus remanerem. Quando de spiritualibus bonis quodcumque tractatur, nihil est omnino de carnalibus ante oculos reponendum. Ego tibi melius profiteor evenisse, quoniam non carnalem, sed spiritua lem circa te considero fidelitatem. Tu te dicis de alicujus pignoris obitu in senectute confectum. Ego contra comprobo sublevatam senectutem tuam. Amputavit Dominus sollicitudinem, quæ te torquebat de viva filia, ne periret. Melius utique nunc mortuam sæculo rediisse ad Dominum vivam, quam vivam sæculo doleres forsitan apud Dominum mortuam. Gaude tibi quod christianam mereberis sequi, quam secutus in cælo gaudeas rursus amplecti. Non te deseruit, sed præcessit; & ne doleret excedentem patrem, suscipere festinavit. Non amisisti tua nutrimenta. Si luctum horrueris, & senex tuum obtulisse pignus Domino deputare poteris, potes secundum votum habere post Abraham, si non potes primum, ut quod ille non trepidavit offerre, tu saltem videaris de sublato gaudere. Ab illo Dominus postulavit, a te tulit. Ille jussioni paruit, tu voluntati consensisti. Illi per illicitam legem naturæ quem Dominus sibi probavit devotum, te saltem per licitam conditionem religionis annotet religiosum, advocet religiosum. Nam si ve voluntate nec necessitate compelleris devotionis Domino aliquid exhibere, in qua parte te christianum poteris approbare. Erubescat incredulitas nostra cum gentilibus, si Domino vult esse subiecta. Communis est nobis cum illis exitus mortis, & dolores illorum superamus doloribus nostris. Quid ageremus, si peculiariter aliquid exigeretur a nobis, quod

S. Cypriani Tom. I.

U

ad

ad dedecus nostrum pertineret? Gentiles dolores sæpe contemnunt; cum non ad promissa cælestia, sed ad pœnas tartari rapiantur. Et nos plangimus euntes ad cælum. Consideret christianus talis quid deinceps mereatur, qui nec imitari contendit exempla sanctorum, nec contemptum habere gentilium. Illi luctus desperando despiciunt, & nos sperando despiciere conamur. Denique vendere liberos sæpe non dubitant, ut vivos, quod pejus est, spernant. Et nos nec defunctorum obitus sublevant. Et nos sublatos captivitati, & libertate donatos volumus servare. Filios suos intrepide mortalibus tradunt, & nos de nostro simul, & suos liberos, & nostros liberandos dimittere sacrilega mente cunctamur, quasi tutius apud homines judicemus magis quam penes Dominum commendari aliquem filiorum. Pudendum nescio quid christianus est apud gentiles opprobrii; quibus peiores sine dubio judicantur, quos pares habere non dicam meliores fuerat putare criminofum. Christiani nolunt vel gratulatione suos deducere ad bona, gentiles tradere non cunctantur ad mala. Postremo vel cum ipsa felicitate nostrorum morientium cogamur animum flectere, & desideriis eorum desideria nostra incipiant repugnare. Lætantur illi, qui exeunt venientes ad requiem. Lætetur & nos cum ipsis, saltem computantes nostrorum exeuntium beatitudinem. Si religiosus vel novitius qui evasit, si non potes vel exulta, quia placuisse cognoscis participium tui sanguinis Christo, maxima quod vel de occasione debeas tolerare Domini voluntatem, cui non potes contradicere. Et cum sit omnibus communis hic casus, vanus dolor est, qui nec primus videtur esse nec solus. Sed dicis: Nullus me de mea desolatione mentis angor exulcerat, sed pro delictis parvuli morientis humanitatis affectus impulsat. Nec hoc licet commovere animum christianum, ne contra

tra Christi imperia luctetur. Quid est inter quoscumque & qualescumque filios dimisisse, quos jubeamur a Domino pro causa devotionis odisse. Melius nunc salvat animam suam moriens. Relinquit in pace, ne persecutionem dimittere cum suo interitu non valeret, ipse illi auxiliatur in mundo, quorum mater habitat in cælo, & qui matri subvenit, & filiis pro certo succurrit. Postremo vide si habeat aliquis dolore concidi, ubi sine aliquo remedio potest aliquis fatigari. Sapienter debet dolere qui dolet, ne perdat sine causa, quod dolet. Nunc autem contra luctum sumenda sunt arma, ut spes nostra possit habere victoriam. Principaliter quod Dominus voluit suscipere, gratulemur. Denique quia hoc omnibus in mundo commune additur, privatum particulare nostrum quod ad requiem revocamur. Sequitur consummatio omnium gaudiorum, quæ in resurrectione invicem nobis Domino reformante reddetur, sicut apostolus pollicetur: *Nolumus igitur ignorare vos, fratres, de dormientibus ut non contristemini sicut & ceteri, qui spem non habent. Si enim credimus quod Jesus mortuus est & resurrexit, sic & eos qui dormierunt in Jesu, adducet cum eo.* Hæc tibi, benedicte, pro caritate mutua transmissi. Ceterum scio te bene valere alios consolari. Tunc te orbitas non inveniet penetrabilem, si alios contra illam non cessabis armare. Opto te, frater carissime, semper bene valere, & nostri meminisse.

LIBER DE HABITU VIRGINUM.

Disciplina custos spei, retinaculum fidei, dux itineris salutaris, fomes ac nutrimentum bonæ indolis, magistra virtutis, facit in Christo manere semper ac jugiter Deo vivere, & ad promissa cælestia & ad divina præmia pervenire. Hanc & sectari salubre est, & averfari ac negligere letale. In psalmis loquitur spiritus sanctus: *Continete disciplinam, ne forte irascatur Dominus, & pereatis a via recta, cum exarserit cito ira ejus super vos.* Et iterum: *Peccatori autem dixit Deus. Ad quid exponis justificationes meas, & assumis testamentum meum per os tuum? Tu autem odisti disciplinam, & abjecisti sermones meos retro.* Et de novo legimus: *Disciplinam qui abjicit, infelix est.* Et de Salomone mandata sapientiæ monentis accepimus: *Fili, ne neglexeris disciplinam Domini, nec defeceris ab eo correptus. Quem enim diligit Deus, corripit. Si autem Deus quem diligit, corripit, & ad hoc corripit ut emendet, fratres quoque, & maxime sacerdotes, non oderunt, sed diligunt eos quos corripiunt, ut emendent, quando & Deus per Hieremiam ante prædixerit, & tempora nostra significaverit, dicens: Et dabo vobis pastores secundum cor meum, & pascunt vos pascentes cum disciplina.* Quod si in scripturis sanctis frequenter & ubique disciplina præcipitur, & fundamentum omne religionis ac fidei de observatione ac timore proficiscitur, quid cupidius appetere, quid magis velle ac tenere nos convenit, quam ut radicibus fortius fixis, & domiciliis nostris super petram robusta mole solidatis, inconcussi ad procellas & turbines sæcu-

sæculi stemus, ut ad Dei munera per divina præcepta
 veniamus, considerantes pariter ac scientes, quod
 templa Dei sint membra nostra, ab omni fæce con-
 tagionis antiquæ lavacri vitalis sanctificatione purga-
 ta, nec violari ea aut pollui fas sit, quando qui vio-
 lat, & ipse violetur. Eorum nos templorum cultor-
 es & antistites sumus. Serviamus illi, cujus esse
 jam cœpimus. Paulus in epistolis suis dicit, quibus
 nos ad curricula vivendi per divina magisteria forma-
 vit: *Non estis vestri. Empti enim estis pretio magno.*
Clarificate & portate Deum in corpore vestro. Clarifice-
 mus & portemus Deum puro & mundo corpore, &
 observatione meliore; & qui per sanguinem Christi
 redempti sumus, per omnia servitutis obsequia re-
 demptoris imperio pareamus, demusque operam ne
 quid immundum & prophanum templo Dei inferatur,
 ne offensus sedem quam inhabitat, derelinquat. So-
 spitantis Domini verba sunt & docentis, curantis pa-
 riter & monentis: *Ecce, inquit, sanus factus es, jam*
noli peccare, ne quid tibi deterius fiat. Dat vivendi te-
 norem, dat innocentiae legem, postquam contulit
 sanitatem; nec habenis liberis & solutis vagari post-
 modum patitur, sed ipsis potius, quibus sanatus fue-
 rat, mancipato gravius comminatur, quod sit scili-
 cet minor culpa deliquisse ante, cum necdum nosse
 disciplinam Dei, nulla sit venia ultra delinquere,
 postquam Deum nosse cœpisti. Et quidem hoc tam
 viri quam mulieres, tam pueri quam puellæ, sexus
 omnis atque omnis ætas observet, & curet pro reli-
 gione & fide, quam Deo debet, ne quod sanctum &
 purum de Domini dignatione percipitur, minus solli-
 cito timore teneatur. Nunc nobis ad virgines sermo
 est; quarum quo sublimior gloria est, major & cura
 est. Flos est ille ecclesiastici germinis, decus atque
 ornamentum gratiæ spiritualis, læta indoles, laudis &
 hono-

honoris opus integrum atque incorruptum, Dei imago respondens ad sanctimoniam Domini; illustrior portio gregis Christi. Gaudet per illas, atque in illis largiter floret ecclesiæ matris gloriosa fecunditas; quantoque plus copiosa virginitas numero suo addit, tanto plus gaudium matris augefcit. Ad has loquimur, hac adhortamur affectione potius, quam potestate; non quod extremi & minimi & humilitatis nostræ admodum conscii, aliquid ad censuram licentiæ vindicemus, sed quod ad sollicitudinem magis cauti, plus de diaboli infestatione timeamus. Neque enim inanis hæc cautio est, & vana formido, quæ ad salutis viam consulit, quæ dominica & vitalia præcepta custodit, ut quæ se Christo dicaverint, & a carnali concupiscentia recedentes, tam carne quam mente se Deo voverint, consumment opus suum magno præmio destinatum, nec ornari jam aut placere cuiquam, nisi domino suo studeant, a quo & mercedem virginitatis expectant, dicente ipso: *Non omnes capiunt verbum, sed illi quibus datum est. Sunt enim spadones qui ex utero matris sic nati sunt, & sunt spadones qui coacti sunt ab hominibus, & sunt spadones qui se ipsos castraverunt propter regnum calorum.* Denuo quoque per hanc angeli vocem continentia munus ostenditur, virginitas prædicatur: *Hi sunt, qui cum mulieribus se non coinquinaverunt. Virgines enim permanserunt. Hi sunt qui sequuntur agnum quocumque ierit.* Neque enim tantum masculis continentia gratiam Dominus repromittit, & feminas præterit, sed quoniam femina viri portio est, & ex eo sumpta atque formata est, in scripturis fere omnibus ad protoplastum Deus loquitur, quia sunt duo in carne una, & in masculo simul significatur & femina. Quod si Christum continentia sequitur, & regno Dei virginitas destinatur, quid est illis cum terreno cultu
&

& cum ornamentis, quibus dum hominibus placere gestiunt, Deum offendunt, non cogitantes esse prælictum: *Qui hominibus placent confusi sunt, quoniam Deus nihil fecit illos, & Paulum quoque gloriose & sublimiter prædicasse: Si hominibus placere vellem, Christi servus non essem.* Continentia vero & pudicitia non in sola carnis integritate consistit, sed etiam in cultus & ornatus honore pariter ac pudore, ut secundum apostolum quæ innupta est, sancta sit & corpore, & spiritu. Instruit nos Paulus, & docet dicens: *Calebs cogitat ea quæ sunt Domini, quomodo placeat Deo. Qui autem matrimonium contraxit, cogitat ea quæ sunt mundi hujus, quomodo placeat uxori. Sic & virgo & mulier innupta cogitat ea quæ sunt Domini, ut sit sancta & corpore & spiritu.* Virgo non esse tantum, sed & intelligi debet, & credi. Nemo cum virginem viderit, dubitet an virgo sit. Parem se integritas in omnibus præstet, nec bonum mentis corporis cultus infamet. Quid ornata, quid compta procedit, quasi maritum aut habeat aut quærat? Timeat potius placere, si virgo est, nec periculum sui appetat, quæ ad meliora & divina se servat. Quæ virum non habent, cui placere se simulent, integræ & puræ non tantum corpore, sed etiam spiritu perseverent. Neque enim fas est virginem ad speciem formæ suæ comi, aut de carne & de ejus pulchritudine gloriari, cum nulla sit illi magis, quam adversus carnem coluctatio, & vincendi corporis ac domandi obstinata certatio. Paulus forti ac sublimi voce proclamat: *Mihi autem absit gloriari nisi in cruce Domini nostri Jesu Christi, per quem mihi mundus crucifixus est, & ego mundo.* Et virgo in ecclesia de specie carnis ac de corporis pulchritudine gloriatur? Addit Paulus & dicit: *Qui enim sunt Christi, carnem suam crucifixerunt cum vitiis & concupiscentiis.* Et quæ se concupiscen-

tiis carnis, & vitiis renuntiassse profitetur, in iisdem quibus renuntiaverat, invenitur. Deprehenderis virgo, detegeris. Aliud esse te jactas, & aliud affectas. Maculis te concupiscentiæ carnalis aspergis, cum integritatis candidata sis, & pudoris. *Clama, inquit Eſaiæ Deus: Omnis caro fœnum, & omnis claritas ejus ut flos fœni. Aruit fœnum, & flos decidit. Sermo autem Domini manet in æternum.* Neminem christianum decet, & maxime virginem non decet, claritatem ullam computare carnis & honorem, sed solum appetere sermonem Dei, bona in æternum mansura complecti. Aut si in carne sit gloriandum, tunc plane quando in nominis confessione cruciatur, quando fortior femina viris torquentibus invenitur, quando ignes, aut cruces, aut ferrum, aut bestias patitur, ut coronetur. Illa sunt carnis pretiosa monilia, illa corporis ornamenta meliora. Sed sunt aliquæ divites, & facultatum ubertate locupletes, quæ opes suas præferant, & se bonis suis uti debere contendunt. Sciant primo illam divitem esse, quæ in Deo dives est, illam esse locupletem, quæ locuples in Christo est, bona illa esse quæ sunt spiritalia, divina, cælestia, quæ nos ad Deum ducant, quæ nobiscum apud Deum perpetua possessione permaneant. Ceterum quæcumque terrena sunt in sæculo accepta, & hic cum sæculo remansura, tam contemni debent, quam mundus ipse contemnitur, cujus pompis & deliciis jam tunc renuntiavimus, cum meliore transgressu ad Deum venimus. Joannes nos excitat, & hortatur spiritali & cælesti voce contestans: *Nolite, ait, diligere mundum, neque ea quæ in mundo sunt. Si quis dilexerit mundum, non est caritas patris in illo: quoniam omne quod in mundo est, concupiscentia carnis est, & concupiscentia oculorum, & ambitio sæculi, quæ non est a patre, sed ex concupiscentia sæculi. Et mundus transibit*

bit & concupiscentia ejus. Qui autem fecerit voluntatem Dei, manet in æternum, quomodo & Deus manet in æternum. Æterna igitur & divina sectanda sunt, & omnia de Dei voluntate facienda sunt, ut Domini nostri vestigia & magisteria divina sectemur, qui monuit & dixit: *Non descendi de calo ut faciam voluntatem meam, sed voluntatem ejus qui me misit* Quod si non est major domino suo servus, & liberatori debet obsequium liberatus, qui esse cupimus christiani, debemus quod Christus dixit & fecit, imitari. Scriptum est, & legitur, & auditur, & in exemplum nostri ecclesiæ ore celebratur: *Qui dicit se in Christo manere, debet quomodo ille ambulavit, & ipse ambulare.* Ambulandum est igitur vestigiis paribus, æmula ingressione nitendum est. Tunc respondet ad fidem nominis sectatio veritatis, & credenti præmium datur, si quod creditur, & geratur. Locupletem te dicis & divitem: sed divitiis tuis Paulus occurrit, & ad cultum atque ornatum tuum justo fine moderandum sua voce præscribit. *Sint, inquit, mulieres cum verecundia & pudicitia componentes se, non in tortis crinibus, neque auro, neque margaritis, aut veste pretiosa, sed ut decet mulieres promittentes castitatem per bonam conversationem.* Item Petrus ad hæc eadem præcepta consentit, & dicit: *Sit in muliere non exterior ornamentum, aut auri, aut vestis cultus, sed cultus cordis.* Quod si illi mulieres quoque admonent coercendas, & ad ecclesiasticam disciplinam religiosa observatione moderandas, quæ excusare cultus suos soleant per maritum, quanto id magis observare virginem fas est, cui nulla ornatus sui competat venia, nec derivari in alterum possit mendacium culpæ, sed sola ipsa remaneat in crimine? Locupletem te dicis & divitem. Sed non omne quod potest, debet & fieri, nec desideria proluxa, & de sæculi ambitione nascentia ul-

tra honorem ac pudorem virginitatis extendi, cum scriptum sit: *Omnia licent, sed non omnia expediunt. Omnia licent, sed non omnia edificant.* Ceterum si tu te sumptuosius comas, & per publicum notabiliter incedas, oculos in te juventutis illicias, suspiria adolescentium post te trahas, concupiscendi libidinem nutrias, suspirandi fomenta succendas, ut etsi ipsa non pereas, alios tamen perdas, & velut gladium te, & venenum videntibus præbeas, excusari non potest, quasi mente casta sis & pudica. Redarguit te cultus improbus & impudicus ornatus, nec computari jam potes inter puellas & virgines Christi, quæ sic vivis, ut possis adamari. Locupletem te dicis & divitem. Sed jactare divitias suas virginem non decet, cum dicat scriptura divina: *Quid nobis profuit superbia, aut quid divitiarum jactatio contulit nobis? transierunt omnia illa tamquam umbra, & apostolus rursum moneat & dicat: Et qui emunt, sic sint, quasi non ementes, & qui possident quasi non possidentes, & qui hoc mundo utuntur quasi non utantur.* Præterit enim figura hujus mundi. Petrus etiam, cui oves suas Dominus pascendas tuendasque commendat, super quem posuit & fundavit ecclesiam, aurem quidem sibi esse & argentum negat, sed esse se dicit Christi gratia divitem, esse fide ejus & virtute locupletem, quibus multa magnalia cum miraculo faceret, quibus ad gratiam gloriæ bonis spiritualibus abundaret. Has opes, has divitias possidere non potest, quæ se divitem sæculo mavult esse, quam Christo. Locupletem te dicis & divitem, & utendum putas iis, quæ possidere te Deus voluit. Utere, sed ad res salutare; utere, sed ad bonas artes; utere, sed ad illa quæ Deus præcepit, quæ Dominus ostendit. Divitem te sentiant pauperes, locupletem te sentiant indigentes. Patrimonium tuum Deo fenera, Christum ciba. Ut
virgi-

virginitatis perferre gloriam liceat, ut ad Domini præmia venire contingat, multorum precibus exora. Commenda illic thesauros tuos, ubi fur nullus effodiat, quo nullus insidians grassator irrumpat. Possessiones tibi sed cælestes magis compara, ubi fructus tuos juges ac perennes, & ab omni contactu injuriæ sæcularis immunes nec rubigo atterat, nec grando cædat, nec sol urat, nec pluvia corrumpat. Nam delinquis & hoc ipso in Deum, si ad hoc tibi ab illo divitias datas credis, ut illis non salubriter perfruaris. Nam & vocem Deus homini dedit, & tamen non sunt iccirco amatoria cantanda nec turpia; & ferrum esse ad culturam terræ Deus voluit, nec homicidia sunt iccirco facienda; aut quia tura, & merum, & ignem Deus instituit, sacrificandum est inde idolis; vel quia abundant pecudum greges in agris tuis, victimas & hostias diis immolare debebis. Alioqui tentatio est patrimonium grande, nisi ad usus bonos census operetur, ut patrimonio suo unusquisque locupletior magis redimere debeat, quam augere delicta. Ornamentorum ac vestium insignia & lenocinia formarum non nisi prostitutis & impudicis feminis congruunt, & nullarum fere pretiosior cultus est, quam quarum pudor vilis est. Sic in scripturis sanctis, quibus nos instrui Dominus voluit & moneri, describitur civitas meretrix, compta pulchrius & ornata, & cum ornamentis suis, ac propter ipsa potius ornamenta peritura. *Et venit, inquit, unus ex septem angelis habentibus phialas septem, & aggressus est me dicens: Veni, ostendam tibi damnationem meretricis magna sedentis super aquas multas, cum qua fornicati sunt reges terræ. Et duxit me in spiritu. Et vidi mulierem sedentem super bestiam; & mulier illa amicta erat pallio purpureo & coccineo, & adornata erat auro & lapidibus pretiosis & margaritis, tenens peculum aureum in manu sua plenum execrationum & immunditia,*

& fornicationis

cationis totius terra. Fugiant castæ virgines & pudicæ incestarum cultus, habitus impudicarum, lupanarium insignia, ornamenta meretricum. Clamat etiam spiritu sancto plenus Esaias, & filias Sion auro & argento, ac veste corruptas increpat, & objurgat perniciosis opibus affluentes, & a Deo per sæculi delicias recedentes: *Exaltatae sunt*, ait, *filiae Sion, & ambulaverunt alto collo & nutu oculorum, & incesu pedum trahentes tunicas, & pedibus simul ludentes. Et humiliabit Deus principales filias Sion, & revelabit Dominus habitum earum, & auferet Dominus gloriam vestis illarum & ornamenta earum, & crines, & cincinnos, & lunulas, & discriminalia, & armillas, & botronatum, & dextralia, & annulos, & inanes, & serica contexta cum auro & hyacintho. Et erit pro odore suavitatis pulvis, & pro cingulo veste cingeris, & pro ornamento capitis aureo calvitium habebis.* Hoc Deus culpatur, hoc denotatur. Hinc corruptas esse virgines, hinc a cultu vero atque divino descivisse pronuntiat. Exaltatae ceciderunt, comptæ turpitudinem fœditatemque meruerunt. Sericum & purpuram indutæ Christum induere non possunt. Auro & margaritis, & monilibus adornatæ ornamenta cordis ac pectoris perdiderunt. Quis non id excretur & fugiat, quod alii fuerit exitio? Quis id appetat & assumat, quod ad necem alterius pro gladio fuerit & telo? Si hausto poculo moreretur ille qui biberat, venenum scires esse quod ille potavit. Si accepto cibo, qui acceperat, interiret, scires esse lethale, quod acceptum potuit occidere, nec ederes inde, nec biberes, unde interiisse alios ante conspiceres. Nunc quanta ignorantia veri est, animi quanta dementia, id velle, quod & nocuerit semper, & noceat, & putare quod inde ipsa non pereas, unde alios periisse cognoscas? Neque enim Deus coccineas aut purpureas oves fecit, aut herbarum succis & conchyllis tingere,

re, & colorare lanas docuit, nec distinctis auro lapillis & margaritis, contexta serie & numerosa compage digestis monilia institui, quibus cervicem quam fecit, absconderes, ut operiatur illud, quod Deus in homine formavit, & conspiciatur id desuper, quod diabolus adinvenit. An vulnera inferri auribus Deus voluit, quibus innocens adhuc infantia, & mali secularis ignara crucietur, ut postea de aurium cicatricibus & cavernis pretiosa grana dependeant, grava etsi non suo pondere, mercium tamen quantitate? Quæ omnia peccatores & apostatæ angeli suis artibus prodiderunt, quando ad terrena contagia devoluti, a cælesti vigore recesserunt. Illi & oculos circumducto nigrore fucare, & genas mendacio ruboris inficere, & mutare adulterinis coloribus crimem, & expugnare omnem oris & capitis veritatem corruptelæ suæ impugnatione docuerunt. Et quidem isto in loco pro timore, quem nobis fides suggerit, pro dilectione quam fraternitas exigit, non virgines tantum aut viduas, sed & nuptas puto, & omnes omnino feminas admonendas, quod opus Dei & factura ejus & plastica adulterari nullo modo debeat, adhibito flavo colore, vel nigro pulvere, vel rubore, aut quolibet denique liniamenta nativa corrumpente medicamine. Dicit Deus: *Faciamus hominem ad imaginem, & similitudinem nostram.* Et audet quisquam mutare & convertere, quod Deus fecit? Manus Deo inferunt, quando id quod ille formavit, reformare & transfigurare contendunt, nescientes, quia opus Dei est omne quod nascitur, diaboli, quodcumque mutatur. Si quis pingendi artifex vultum alicujus & speciem, & corporis qualitatem æmulo colore signasset, & signato jam consummatoque simulacro, manus alius inferret, ut jam formata, jam picta quasi peritior reformaret, gravis prioris artificis injuria & justa indignatio videretur. Tu te existimas impune laturam tam impro-

bæ temeritatis audaciam, Dei artificis offensam? Ut enim impudica circa homines & incesta fucis lenocinantibus non sis, corruptis violatisque quæ Dei sunt, pejor adultera detineris. Quod ornari te putas, quod putas comi, impugnatio est ista divini operis, prævaricatio est veritatis. Monentis apostoli vox est: *Expurgate vetus fermentum, ut sitis nova conspersio, sicut estis azymi. Nam & pascha nostrum immolatus est Christus. Itaque festa celebremus, non in fermento vetere, neque in fermento malitiæ & nequitia, sed in azymis sinceritatis & veritatis.* Num sinceritas perseverat & veritas, quando quæ sincera sunt, polluantur colorum adulteriis, & adulterinis medicaminum fucis in mendacium vera mutantur? Dominus tuus dicit: *Non potes facere capillum unum albam aut nigrum.* Et tu ad vincendam Domini tui vocem vis te esse potiolem? Audaci conatu & sacrilego contemtu crines tuos inficis, malo præfagio futurorum capillos jam tibi flammeos auspicaris, & peccas, proh nefas, capite, id est corporis parte meliore. Et cum scriptum sit de Domino: *Caput autem ejus & capilli erant albi velut lana aut nix,* tu execraris canitiem, detestaris albonem, qui sit ad Domini caput similis. Non metuis oro quæ talis es, ne cum resurrectionis dies venerit, artifex tuus te non recognoscat, ad sua præmia & promissa venientem removeat, & excludat, increpans vigore censoris & judicis dicat? Opus hoc meum non est, nec imago nostra est. Cutem falso medicamine polluisti, crinem adultero colore mutaisti, expugnata est mendacio facies, figura corrupta est, vultus alienus est. Deum videre non poteris, quando oculi tui non sunt, quos Deus fecit, sed quos diabolus inficit. Illum tu sectata es, rutilos atque depictos oculos serpentis imitata es, de inimico tuo compta, cum illo pariter & arsurâ. Hæc oro cogitanda non sunt Dei servis, non die semper ac nocte metuenda?

Vide-

Viderint quid sibi nuptæ per placendi studium de conjugum solatio blandiantur; quos dum in excusationem suam proferunt, ad societatem criminosa consensionis adsciscunt. Virgines certe, quibus hic sermo nunc consulit, quæ se ejusmodi artibus comperint, inter virgines non putem debere numerari, sed tamquam contactas oves, & morbidas pecudes a sancto & puro grege virginitatis arceri, ne contagio suo ceteras polluant, dum simul degunt, ne perdant alias quæcumque perierunt. Et quoniam continentia bonum quærimus, perniciofa quæque & infesta vitemus. Nec illa prætereo, quæ dum negligentia in usum veniunt, contra pudicos & sobrios mores licentiam sibi de usurpatione fecerunt. Quasdam non pudet nubentibus interesse, & in illa lascivientium libertate sermonum colloquia incesta miscere, audire quod non decet, quod non licet, observare, & esse præsentibus inter verba turpia, & temulenta convivia, quibus libidinum fomes accenditur, sponsa ad patientiam stupri, ad audaciam sponsus animatur. Quis illi in nuptiis locus est, cui animus ad nuptias non est? Aut voluptaria illic & læta esse quæ possunt, ubi & studia & vota diversa sunt? Quid illic discitur, quid videtur? Quantum a proposito suo virgo deficit, quando pudica quæ venerat, impudica discedit? Corpore licet virgo ac mente permaneat oculis, auribus, lingua minuit illa quæ habebat. Quid vero quæ promiscuas balneas adeunt, quæ oculis ad libidinem curiosis pudori ac pudicitia corpora dicata prostituunt, quæ cum viros, atque a viris nudæ vident turpiter, ac videntur, nonne ipsæ illecebram vitiis præstant? Nonne ad corruptelam & injuriam suam desideria præsentium sollicitant & invitant? Videris, inquis, quas illuc mente quis veniat, mihi tantum reficiendi corpusculi cura est, & lavandi. Non te purgat ista defensio, nec lasciviae & petulan-

tulantiae crimen excusat. Sordidat lavatio ista, non abluit, nec emundat membra, sed maculat. Impudice tu neminem conspicias, sed ipsa conspiceris impudice. Oculos tuos turpi oblectatione non polluis; sed dum oblectas alios, ipsa pollueris. Spectaculum de lavacro facis. Teatro sunt fœdiora quo convenis. Verecundia illic omnis exuitur, simul cum amictu vestis honor corporis ac pudor ponitur, denotanda & contrectanda virginitas revelatur. Jam nunc considera, an cum vestita es, verecunda sis inter viros, talis, cui ad inverecundiam proficit audacia nuditatis. Sic ergo frequenter ecclesia virgines suas plangit, sic ad infames earum ac detestabiles fabulas ingemiscit, sic flos virginum exstinguitur, honor continentiae ac pudor cæditur, gloria omnis ac dignitas prophanatur. Sic se expugnator inimicus per artes suas inserit. Sic insidiis per occulta fallentibus diabolus obrepit. Sic dum ornari cultius, dum liberius evagari virgines volunt, esse virgines desinunt, furtivo dedecore corruptæ, viduæ antequam nuptæ, non mariti sed Christi adulteræ, quam fuerant præmiis ingentibus virgines destinatæ, tam magna supplicia pro amissa virginitate sensuræ. Audite itaque me virgines ut parentem, audite quæso vos timentem pariter ac monentem, audite utilitatibus & commodis vestris fideliter consulentem. Estote tales quales vos Deus artifex fecit. Estote tales quales vos manus patris instituit. Maneat in vobis facies incorrupta, cervix pura, forma sincera. Non inferantur auribus vulnera, nec brachia includat aut colla de armillis & monilibus catena pretiosa; sint a compedibus aureis pedes liberi, crines nullo colore fucati, oculi conspiciendo Deo digni. Celebrentur lavacra cum feminis, quarum inter vos pudica lavatio est. Nuptiarum festa improba, & convivium lascivum vitentur, quorum periculosa contagio est. Vince vestem,

quæ

quæ virgo es. Vince aurum, quæ carnem vincis & sæculum. Non est ejusdem non posse a majoribus vinci, & imparem minoribus inveniri. Arta & angusta est via quæ ducit ad vitam, durus & arduus est limes, qui tendit ad gloriam. Per hunc viæ limitem martyres pergunt, eunt virgines, justi quique gradiuntur. Lata & spatiosa itinera vitæ. Letales illic illecebræ & mortiferæ voluptates. Illic diabolus blanditur ut fallat, arridet ut noceat, illicit ut occidat. Primus cum centeno martyrum fructus est, secundus sexagenarius vester est. Ut apud martyres non est carnis & sæculi cogitatio, nec parva & levis & delicata congressio, sic & in vobis, quarum ad gratiam merces secunda est, sit & virtus ad tolerantiam proxima. Non est ad magna facilis ascensus. Quem sudorem perpetimur, quem laborem, cum conamur ascendere colles & vertices montium? Quid ut ascendamus ad cælum? Si præmium pollicitationis attendas, minus est quod laboras. Immortalitas perseveranti datur, perpetua vita promittitur, regnum Dominus pollicetur. Servatæ virgines, fervate quod esse cœpistis, fervate quod eritis. Magna vos merces manet, præmium grande virtutis, munus maximum castitatis. Vultis scire quo malo careat, & quid boni teneat continentie virtus? *Multiplicabo, inquit mulieri Deus, tristitias tuas & gemitus tuos, & in tristitia paries filios, & conversio tua ad virum tuum, & ipse tui dominabitur.* Vos ab hac sententia liberæ estis, vos mulierum tristitias & gemitus non timetis. Nullus vobis de partu circa filios metus est, nec maritus est dominus, sed dominus vester & caput Christus est ad instar & vicem masculi. Sors vobis & conditio communis est. Domini vox est illa dicentis: *Filii sæculi hujus generant & generantur. Qui autem habuerint dignationem sæculi illius & resurrectionis a mortuis, non nubunt, neque matrimonium faciunt.* Ne-

*que enim incipient mori. Aequales enim sunt angelis Dei, cum sint filii resurrectionis. Quod futuri sumus, jam vos esse cœpistis. Vos resurrectionis gloriam in isto sæculo jam tenetis, per sæculum sine sæculi contagione transitis. Cum castæ perseveratis & virgines, angelis Dei estis æquales. Tantum maneat & duret solida & illæsa virginitas, & ut cœpit fortiter, jugiter perseveret, nec monilium aut vestium quærat ornamenta, sed morum. Deum spectet & cælum, neque oculos ad sublime porrectos, ad carnis & mundi concupiscentiam deprimat, aut ad terrena deponat. Prima sententia crescere & generare præcepit, secunda continentiam suavit. Cum adhuc rudis mundus & inanis est, copiam fecunditate generantes propagamur, & crescimus ad humani generis augmentum. Cum jam refertus est orbis & mundus impletus, qui capere continentiam possunt, spadonum more viventes, castrantur ad regnum. Nec hoc jubet Dominus, sed hortatur; nec jugum necessitatis imponit, quando maneat voluntatis arbitrium liberum. Sed cum habitationes multas apud patrem suum dicat, melioris habitaculi hospitia demonstrat. Habitacula ista meliora vos petitis, carnis desideria castrantes, majoris gratiæ præmium in cælestibus obtinetis. Omnes quidem qui ad divinum lavacrum baptismi sanctificatione perveniunt, hominem illic veterem gratia lavacri salutaris exponunt, & innovati spiritu sancto a sordibus contagionis antiquæ iterata nativitate purgantur. Sed nativitatis iteratæ vobis major sanctitas & veritas competit, quibus desideria jam carnis & corporis nulla sunt. Sola in vobis quæ sunt virtutis & spiritus, ad gloriam remanserunt. Apostoli vox est, quem Dominus vas electionis suæ dixit, quem ad promenda mandata cælestia Deus misit: *Primus homo, inquit, de terra limo, secundus homo, de calo. Qualis ille de limo, tales & qui de limo; & qualis calo-**

*caelestis, tales & caelestes. Quomodo portavimus imaginem
 ejus qui de limo est, portemus & imaginem ejus qui de celo
 est. Hanc imaginem virginitas portat, portat inte-
 gritas, sanctitas portat & veritas. Portant disciplina
 Deo memores, justitiam cum religione retinentes,
 stabiles in fide, humiles in timore, ad omnem tole-
 rantiam fortes, ad sustinendam injuriam mites, ad
 faciendam misericordiam faciles, fraterna pace una-
 nimes atque concordēs. Quæ vos singula, o bonæ
 virgines, observare, diligere, implere debetis, quæ
 Deo & Christo vacantes, ad Dominum, cui vos di-
 castis, & majore & meliore parte præceditis. Pro-
 vectæ annis, junioribus facite magisterium. Mino-
 res natu præbete, comparibus incitamentum. Horta-
 mentis vos mutuis excitate, æmulis de virtute docu-
 mentis ad gloriam provocate. Durate fortiter, spi-
 ritualiter pergite, pervenite feliciter. Tantum me-
 mentote tunc nostri, cum incipiet in vobis virgini-
 tas laborari.*

LIBER DE LAPSIS.

Pax ecce, dilectissimi fratres, ecclesiæ reddita est,
 & quod difficile nuper incredulis, ac perfidis im-
 possibile videbatur, ope atque ultione divina securi-
 tas nostra reparata est. In lætitiā mentes redeunt,
 & tempestate pressuræ ac nube discussa, tranquillitas
 ac serenitas resulserunt. Dandæ laudes Deo, & be-
 neficia ejus ac munera cum gratiarum actione cele-
 branda, quamvis agere gratias nostra vox nec in per-
 secutione cessaverit. Neque enim tantum inimico li-
 cere potest, ut non qui Dominum toto corde & ani-
 ma,

ma, & virtute diligimus, benedictiones ejus & laudes
semper & ubique cum gloria prædicemus. Exopta-
tus votis omnium dies venit, & post longæ noctis
horribilem tetramque caliginem, Domini luce radia-
tus mundus eluxit. Confessores præconio boni no-
minis claros, & virtutis ac fidei laudibus gloriosos
lætis conspectibus intuemur, sanctis osculis adhaeren-
tes, desideratos diu inexplibili cupiditate complecti-
mur. Adest militum Christi cohors candida, qui per
secutionis urgentis ferociam turbulentam stabili con-
gressione fregerunt, parati ad patientiam carceris,
armati ad tolerantiam mortis. Repugnastis fortiter
saeculo, spectaculum gloriosum præbuitis Deo, secu-
turis fratribus fuistis exemplo. Religiosa vox Chri-
stum locuta est, in quem se semel credidisse confessa
est. Illustres manus, quæ non nisi divinis operibus
assueverant, sacrificiis sacrilegis resisterunt. Sancti-
ficata ora cælestibus cibis post corpus & sanguinem
Domini, prophana contagia, & idolorum reliquias
respuerunt. Ab impio sceleratoque velamine, quo
filic velabantur sacrificantium capita captiva, caput
vestrum liberum mansit. Frons cum signo Dei pura
diaboli coronam ferre non potuit, coronæ se Domini
reservavit. Quam vos læte sinu suo excipit mater
ecclesia de prælio revertentes! Quam beata, quam
gaudens portas suas aperit, ut adunatis agminibus in-
tretis, de hoste prostrato tropæa referentes! Cum
triumphantibus viris & feminae veniunt, quæ cum
saeculo dimicantes, sexum quoque vicerunt. Veniunt
& geminata militiæ suæ gloria virgines, & pueri an-
nos suos virtutibus transeuntes. Necnon & cetera
stantium multitudo vestram gloriam sequitur, proxi-
mis & pæne conjunctis laudis insignibus vestigia ve-
stra comitatur. Eadem & in illis sinceritas cordis,
eadem fidei tenacis integritas. Inconcussis præcepto-
rum cælestium radicibus nixos, & evangelicis tradi-
tioni-

monibus reboratos non præscripta exilia, non destinata tormenta, non rei familiaris damna, non corporis supplicia terruerunt. Exploranda fidei præstiebantur dies. Sed qui sæcula renuntiasse se meminit, nullum sæculi diem novit; nec tempora terrena jam computat, qui æternitatem de Deo sperat. Nemo, fratres dilectissimi, nemo hanc gloriam mutilet; nemo incorruptam stantium firmitatem maligna obtreptione debilitet. Cum dies negantibus præstitutus excessit, quisquis professus intra diem non est; Christianum se esse confessus est. Primus est victoriæ titulus, gentilium manibus apprehensum Dominum confiteri. Secundus ad gloriam gradus est, causa secessione subtraham Domino reservari. Illa publica, hæc privata confessio est. Ille judicem sæculi vincit, hic contentus Deo suo iudice, conscientiam puram cordis integritate custodit. Illic fortitudo promptior, hic sollicitudo securior. Ille appropinquante hora sua jam maturus inventus est. Hic fortasse dilatus est qui, patrimonio derelicto, iccirco secessit, quia non erat negaturus. Confiteretur utique, si fuisset & ipse detentus. Has martyrum cælestes coronas, has confessorum glorias spirituales, has stantium fratrum maximas eximiasque virtutes mœstitia una contristat, quod avulsam nostrorum viscerum partem violentus inimicus populationis suæ strage deiecit. Quid hoc loco faciam, dilectissimi fratres? Fluctuans vario mentis æstu, quid, aut quomodo dicam? Lacrimis magis, quam verbis opus est ad exprimendum dolorem, quo corporis nostri plaga defendenda est, quo populi aliquando numerosi multiplex lamentanda jactura est. Quis enim sic durus aut ferreus, qui sic fraternæ caritatis oblitus, qui inter suorum multiformes ruinas, & lugubres, ac multo squalore deformes reliquias constitutus, siccos oculos tenere prævaleat, nec erumpente statim fletu,

prius gemitus suos lacrimis quam voce depromat? Doleo, fratres, doleo vobiscum, nec mihi ad leniendos dolores meos integritas propria, & sanitas privata blanditur, quando plus pastor in gregis sui vulnere vulneretur. Cum singulis pectus meum copulo, mœroris & funeris pondera luctuosa participo. Cum plangentibus plango, cum desipientibus desleo, cum jacentibus jacere me credo. Jaculis illis graffantis inimici mea simul membra percussa sunt, savientes gladii per mea viscera transierunt. Immunis & liber a persecutionis incurso fuisse non potest animus. In prostratis fratribus & me prostravit affectus. Habenda tamen est, fratres dilectissimi, ratio veritatis; nec sic mentem debet & sensum persecutionis infestæ tenebrosa caligo cæcasse, ut nihil remanserit lucis & luminis, unde divina præcepta perspicere possint. Si cladis causa cognoscitur, & medela vulneris invenitur. Dominus probari familiam suam voluit; & quia traditam nobis divinitus disciplinam pax longa corruerat, jacentem fidem & pæne, ut ita dixerim, dormientem censura cælestis erexit; cumque nos peccatis nostris amplius mereremur, clementissimus Dominus sic cuncta moderatus est; ut hoc omne quod gestum est, exploratio potius quam persecutio videretur. Studebant augendo patrimonio singuli; & obliti quid credentes aut sub apostolis ante fecissent, aut semper facere deberent, insatiabili cupiditatis ardore ampliandis facultatibus incubabant. Non in sacerdotibus religio devota, non in ministris fides integra, non in operibus misericordia, non in moribus disciplina. Corrupta barba in viris, in feminis forma fucata. Adulterati post Dei manus oculi, capilli mendacio colorati. Ad decipienda corda simplicium callidæ fraudes, circumvenientis fratribus subdolæ voluntates. Jungere infidelibus vinculum matrimonii, prostituere gentilibus mem-

membra Christi. Non jurare tantum tenere, sed adhuc etiam pejerare, præpositos superbo tumore contemnere, venenato sibi ore maledicere, odiis pertinacibus invicem diffidere. Episcopi plurimi, quos & hortamento esse oportet ceteris, & exemplo, divina procuratione contempta, procuratores rerum sæcularium fieri, derelicta cathedra, plebe deserta, per alienas provincias oberrantes, negotiationis quæstuosæ nundinas aucupari, esurientibus in ecclesia fratribus, habere argentum largiter velle, fundos insidiosis fraudibus rapere, usuris multiplicantibus fœnus augere. Quid non perpeti tales pro peccatis ejusmodi mereremur, cum jam pridem præmonuerit ac dixerit censura divina? *Si dereliquerint legem meam, & in judiciis meis non ambulaverint, si justificationes meas prophanaverint, & præcepta mea non observaverint; visitabo in virga facinora eorum, & in flagellis delicta eorum.* Prænuntiata sunt ista nobis, & ante prædicta. Sed nos datæ legis & observationis immemores, id egimus per nostra peccata, ut dum Domini mandata contemnimus, ad correctionem delicti & probationem fidei remediis severioribus veniremus. Nec saltem sero converſi ad Domini timorem sumus, ut hanc correctionem nostram, probationemque divinam patienter & fortiter subiremus. Ad prima statim verba minantis inimici maximus fratrum numerus fidem suam prodidit; nec prostratus est persecutionis impetu, sed voluntario lapsu se ipse prostravit. Quid oro inauditum, quid novum venerat, ut velut incognitis, atque inopinatis rebus exortis, Christi sacramentum temeritate præcipiti solveretur? Nonne hæc & prophetæ ante, & apostoli postmodum nuntiaverunt? Nonne justorum pressuras, & gentilium semper injurias pleni sancto spiritu prædicaverunt? Nonne fidem nostram semper armans, & Dei servos cælesti voce corroborans dicit scriptura divina: *Dominiun Deum*

num adorabis, & illi soli servies? Nonne iram divina indignationis ostendens, & pœnæ metum præmonens denuo dicit: *Adoraverunt eos quos fecerunt digiti eorum; & curvatus est homo, & humiliatus est vir, & non laxabo illis?* Et iterum Deus loquitur dicens: *Sacrificans diis eradicabitur, nisi Domino soli.* In evangelio quoque postmodum Dominus in verbis doctor, & consummator in factis, docens quid fieret, & faciens quodcumque docuisset, quidquid nunc geritur & geretur, nonne ante præmonuit? Nonne & negantibus æterna supplicia, & salutaria consentientibus præmia ante constituit? Exciderunt quibusdam, pro nefas, omnia, & de memoria recesserunt. Non expectaverunt saltem, ut ascenderent apprehensi, ut interrogati negarent. Ante aciem multi victi, sine congressione prostrati, nec hoc sibi reliquerunt, ut sacrificare idolis viderentur invitati. Ultro ad forum currere, ad mortem sponte properare, quasi hoc olim cuperent, quasi amplecterentur occasionem datam, quam semper optassent. Quot illic a magistratibus vespera urgente dilati sunt, quot ne eorum differretur interitus, etiam rogaverunt? Quam vim potest talis obtendere, qua crimen suum purget, cum vim magis ipse fecerit, ut periret? Nonne quando ad Capitolium sponte ventum est, quando ultro ad obsequium diri facinoris accessum est, labavit gressus, caligavit aspectus, tremuerunt viscera, brachia conciderunt? Nonne sensus obstupuit, lingua hæsit, sermo defecit? Stare illic potuit Dei servus, & loqui & renuntiare Christo, qui jam diabolo renuntiaverat & sæculo? Nonne ara illa, quo moriturus accessit, rogos illi fuit? Nonne diaboli altare, quod fœtore tetro fumare ac redolere conspexerat, velut funus & bustum vitæ suæ horrere, ac fugere debebat? Quid hostiam tecum, miser, quid victimam immolaturus imponis? Ipse ad aram hostia, victima ipse venisti.

nisti. Immolasti illic salutem tuam, spem tuam, fidem tuam funestis illis ignibus concremasti. Ac multis proprius interitus satis non fuit. Hortamentis mutuis in exitium populus impulsus est, mors invicem letali poculo propinata est. Ac ne quid deesset ad criminis cumulum, infantes quoque parentum manibus vel impositi, vel attracti amiserunt parvuli, quod in primo statim nativitatis exordio fuerant consecuti. Nonne illi cum iudicii dies venerit, dicent: Nos nihil mali fecimus, nec derelicto cibo & poculo Domini ad prophana contagia sponte properavimus. Perdidit nos aliena perfidia, parentes sensimus parricidas. Illi nobis ecclesiam matrem, illi patrem Deum negaverunt; ut dum parvi & improvidi, & tanti facinoris ignari per alios ad consortium criminum jungimur, aliena fraude caperemur? Nec est, pro dolor, justa aliqua & gravis causa, quæ tantum facinus excuset. Relinquenda erat patria, & patrimonii facienda jactura. Cui enim nascenti atque morienti non relinquenda quandoque patria, & patrimonii sui facienda jactura est? Christus non relinquatur, salutis ac sedis æternæ jactura timeatur. Clamat ecce per prophetam spiritus sanctus: *Discedite, exite inde, & immundum nolite tangere. Exite de medio ejus, separamini qui fertis vasa Domini.* Et qui vasa sunt Domini, ac templum Dei, ne immundum tangere, & feralibus cibis pollui violarique cogantur, non exeunt de medio, nec recedunt. Alibi quoque vox auditur e cælo præmonens, quid Dei servos facere conveniat, dicens: *Exi de ea populus meus, ne particeps sis delictorum ejus, & ne perstringaris plagis ejus.* Qui exit & cedit, delicti particeps non fit. Plagis vero & ipse perstringitur, qui socius criminis invenitur. Et ideo Dominus in persecutione secedere & fugere mandavit, atque ut id fieret, & docuit & fecit. Nam cum corona de Dei dignatione descendat, nec possit accipi, nisi fue-

rit hora sumendi, quisque in Christo manens interim cedit, non fidem negat, sed tempus expectat. Qui autem cum non secederet, cecidit, negaturus remansit. Dissimulanda, fratres dilectissimi, veritas non est, nec vulneris nostri materia & causa reticenda. Decepit multos patrimonii sui amor cæcus, nec ad recedendum parati aut expediti esse potuerunt, quos facultates suæ velut compedes ligaverunt. Illa fuerunt remanentibus vincula, illæ catenæ, quibus & virtus retardata est, & fides pressa, & mens vincta, & anima præclusa, ut serpenti terram secundum Dei sententiam devoranti, præda & cibus fierent, qui terrestribus inhærent. Et ideo Dominus bonorum magister, & præmonens in futurum: *Si vis*, inquit, *perfectus esse, vade, vende omnia tua, & da pauperibus, & habebis thesaurum in calis: & veni, sequere me*: Si hoc divites facerent, per divitias suas non perirent, thesaurum in cælo reponentes, hostem nunc & expugnatorem domesticum non haberent. Esset in cælo cor & animus, & sensus, si thesaurus esset in cælo. Nec vinci a sæculo posset, qui unde vinceretur, in sæculo non haberet. Sequeretur Dominum solutus & liber, ut apostoli & sub apostolis multi, & nonnulli sæpe fecerunt, qui & rebus suis & parentibus derelictis, individuis Christo nexibus adhæserunt. Sequi autem Christum quomodo possunt, qui patrimonii vinculo detinentur? Aut quomodo cælum petunt, & ad sublimia & alta conscendunt, qui terrenis cupiditatibus degravantur? Possidere se credunt, qui potius possidentur, census sui servi, nec ad pecuniam suam domini, sed magis pecuniæ mancipati. Hoc tempus, hos homines apostolus denotat dicens: *Qui autem volunt divites fieri, incidunt in tentationem & insidulam, & desideria multa inutilia & nocentia, quæ mergunt hominem in perditionem & in interitum. Radix enim omnium malorum est cupiditas*,

*ditas, quam quidam appetentes erraverunt a fide, & inferuerunt se doloribus multis. Dominus autem, quibus nos præmiis ad contemptum rei familiaris invitat? Parva hæc & exigua hujus temporis damna, quibus mercedibus pensat? Nemo est, inquit, qui relinquat domum, aut agrum, aut parentes, aut fratres, aut uxorem, aut filios propter regnum Dei, & non recipiat septies tantum in isto tempore, in saculo autem venturo vitam æternam. Quibus cognitis, & de Domini pollicentis veritate compertis, non tantum timenda non est ejusmodi, sed & optanda jactura, ipso denuo Domino prædicante & monente: *Beati eritis cum persecuti vos fuerint, & separaverint vos, & expulerint, & maledixerint nomini vestro ut nequam propter filium hominis. Gaudete in illa die & exsultate. Ecce enim merces vestra multa est in calis.* Sed tormenta postmodum venerant, & cruciatus graves reluctantibus imminebant. Quæri de tormentis potest, qui per tormenta superatus est. Potest excusationem doloris obtendere, qui victus est in dolore. Potest rogare talis & dicere: Certare quidem fortiter volui, & sacramenti mei memor, devotionis ac fidei arma suscepi: sed me in congressione pugnantem cruciamenta varia & supplicia longa vicerunt. Stetit mens stabilis & fides fortis, & cum tormentibus pœnis immobilis diu anima luctata est. Sed cum durissimi judicis recrudescente sævitia jam fatigatum, nunc flagella scinderent, nunc contunderent fustes, nunc equuleus extenderet, nunc ungula effoderet, nunc flamma torreret: caro me in collocatione deseruit, infirmitas viscerum cessit, nec animus sed corpus in dolore defecit. Potest cito proficere ad veniam causa talis. Potest ejusmodi excusatio esse miserabilis. Sic hic Casto & Æmilio aliquando Dominus ignovit. Sic in prima congressione devictos, victores in secundo proelio reddidit, ut fortiores ignibus fierent, qui ignibus ante cessissent,*

&

& unde superati essent, inde superarent. Deprecabantur illi non lacrimarum miseratione, sed vulnorum, nec sola lamentabili voce, sed laceratione corporis & dolore. Manabat pro fletibus sanguis, & pro lacrimis cruor semiuistulatis visceribus defluebat. Nunc vero quæ vulnera ostendere victi possunt, quas plagas hiantium viscerum, quæ tormenta membro-
rum, ubi non fides congressa cecidit, sed congressionem perfidia prævenit? Nec excusat oppressum necessitas criminis, ubi crimen est voluntatis. Nec hoc ideo dico, ut fratrum causas onerem, sed ut magis fratres ad precem satisfactionis instigem. Nam cum scriptum sit: *Qui vos felices dicunt, in errorem vos mittunt, & semitas pedum vestrorum turbant*, qui peccantem blandimentis adulantibus palpat, peccandi fomitem subministrat; nec comprimit delicta ille; sed nutrit. At qui consiliis fortioribus redarguit simul, atque instruit fratrem, promovet ad salutem. *Quos diligo*, inquit Dominus, *redarguo & castigo*. Sic oportet & Dei sacerdotem non obsequiis decipientibus fallere, sed remediis salutaribus providere. Imperitus est medicus, qui tumentes vulnorum sinus manu parcente contrectat, & in altis recessibus viscerum virus inclusum dum servat, exaggerat. Aperendum vulnus est, & secandum, & putraminibus amputandis medela fortiore curandum. Vociferetur & clamet licet, & conqueratur æger impatiens per dolorem, gratias agat postmodum, cum senserit sanitatem. Emersit enim, fratres dilectissimi, novum genus cladis; & quasi parum persecutionis procella sævierit, accessit ad cumulum sub misericordiæ titulo malum fallens, & blanda perniciēs. Contra evangelii vigorem, contra Domini ac Dei legem temeritate quorundam laxatur incautis communicatio, irrita & falsa pax, periculosa dantibus, & nihil accipientibus profutura. Non quærunt sanitatis patientiam,

clam, nec veram de satisfactione medicinam. Pœnitentia de pectoribus excussa est, gravissimi extremique delicti memoria sublata est. Operiuntur morientium vulnera, & plaga letalis altis & profundis visceribus infixâ dissimulato dolore contegitur. A diaboli aris revertentes, ad sanctum Domini sordidis & infectis nidore manibus accedunt. Mortiferos idolorum cibos adhuc pœne ructantes, exhalantibus etiam nunc scelus suum faucibus, & contagia funesta redolentibus, Domini corpus invadunt, quando occurrat scriptura divina, & clamet, & dicat: *Omnis mundus manducabit carnem, & anima quacunque manducaverit ex carne sacrificii salutaris, quod est Domini, & immunditia ipsius super ipsam est, peribit anima illa de populo suo.* Apostolus item testetur & dicat: *Non potestis calicem Domini bibere, & calicem demoniorum, non potestis mensam Domini communicare, & mensam demoniorum.* Idem contumacibus & pervicacibus comminatur, & denuntiat dicens: *Quicumque ederit panem, aut biberit calicem Domini indigne, reus erit corporis & sanguinis Domini.* Spreta his omnibus atque contentis, ante expiata delicta, ante exomologesin factam criminis, ante purgatam conscientiam sacrificio & manu sacerdotis, ante offensam placatam indignantis Domini & minantis, vis infertur corpori ejus & sanguini, & plus modo in Dominum manibus atque ore delinquant, quam cum Dominum negaverunt. Pacem putant esse, quam quidam verbis fallacibus venditant. Non est pax illa sed bellum; nec ecclesiæ jungitur, qui ab evangelio separatur. Quid injuriam beneficium vocant? Quid impietatem vocabulo pietatis appellant? Quid est qui flere jugiter, & rogare Dominum suum debent, intercepta pœnitentis lamentatione communicare se simulat? Hoc sunt ejusmodi lapsis, quod grando frugibus, quod turbidum sidus arboribus, quod armentis pessens vastitas, quod navigiis fœva tempestas.

pestas. Solatium æternæ spei adimunt, arborem a radice subvertunt, sermone morbido ad letale contagium serpunt, navem scopulis, ne in portum perveniat, illidunt. Non concedit pacem facilitas ista, sed tollit; nec communicationem tribuit, sed impedit ad salutem. Persecutio est hæc alia, & alia tentatio, per quam subtilis inimicus impugnandis adhuc lapsis occulta populatione grassatur, ut lamentatio conquiescat, ut dolor fileat, ut delicti memoria evanescat, ut comprimatur pectorum gemitus, statuatur fletus oculorum, nec Dominum graviter offensus longa & plena pœnitentia deprecetur, cum scriptum sit: *Memento unde cecideris. & age pœnitentiam.* Nemo se fallat, nemo se decipiat. Solus Dominus misereri potest. Veniam peccatis, quæ in ipsum commissa sunt, solus potest ille largiri, qui peccata nostra portavit, qui pro nobis doluit, quem Deus tradidit pro peccatis nostris. Homo Deo esse non potest major; nec remittere aut donare indulgentia sua servus potest, quod in Dominum delicto graviore commissum est; ne adhuc lapso & hoc accedat ad crimen, si nesciat esse prædictum: *Maledictus homo qui spem habet in homine.* Dominus orandus est, Dominus nostra satisfactione placandus est; qui negantem negare se dixit, qui omne iudicium de patre solus accepit. Credimus quidem posse apud iudicem plurimum martyrum merita, & opera iustorum; sed cum iudicii dies venerit, cum post occasum sæculi huius & mundi ante tribunal Christi populus ejus adstiterit. Ceterum si quis præpropere festinatione temerarius remissionem peccatorum dare se cunctis putat posse, aut audet Domini præcepta rescindere, non tantum nihil prodest; sed & obest lapsis. Provocasse est iram, non servasse sententiam, nec misericordiam prius Dei deprecandam putare, sed contempto Domino de sua facultate præsumere. Sub ara
Dei

Dei tunc occisorum martyrum clamant, magna voce dicentes: Quousque Domine sanctus & verus non iudicas & vindicas sanguinem nostrum de his, qui in terris inhabitant? & requiescere, ac patientiam tenere adhuc iubentur. Et quemquam posse aliquis existimat remittendis passim, donandisque peccatis bonum fieri contra iudicem velle, aut prius quam vindicetur ipse, alios posse defendere? Mandant martyres aliquid fieri; sed si iusta, si licita, si non contra ipsum Dominum a Dei sacerdote facienda, si obtemperantis facilis & prona consensio, si petentis fuerit religiosa moderatio. Mandant aliquid martyres fieri; sed si scripta non sint in Domini lege quæ mandant; ante est ut sciamus illos de Deo impetrasse quod postulant, tunc facere quod mandant. Neque enim statim videri potest de divina maiestate concessum, quod fuisse humana pollicitatione promissum. Nam & Moyses pro peccatis populi petiit, nec tamen peccantibus veniam cum petisset, accepit. Precor, ait, Domine, deliquit populus hic delictum grande, & fecerunt sibi deos aureos; & nunc si dimittis eis, delictum dimitte; sin autem, dele me de libro quem scripsisti. Et dixit Dominus ad Moysen: Si quis deliquerit ante me, deleam eum de libro meo. Ille amicus Dei, ille facie ad faciem locutus saepe cum Domino, quod petiit impetrare non potuit, nec Dei indignantis offensam sua deprecatione placavit. Hieremiam Deus laudat, & prædicat dicens: Prius quam te formarem in utero; novi te, & prius quam exires de vulva; sanctificavi te, & prophetam in gentibus posui te; & eidem pro peccatis populi deprecanti frequentius, & oranti: Noli, ait, orare pro populo hoc, & noli postulare pro eis in prece & oratione, quia non exaudiam in tempore, in quo invocabunt me, in tempore afflictionis sue. Quid vero iustius Noe, qui cum repleta esset terra peccatis, solus inventus est iustus in terris? Quid gloriosius Daniele?

Quid

Quid illo ad facienda martyria in fidei firmitate robustius, in Dei dignatione felicius qui toties & cum confingeret, vicit, & cum vinceret, supervixit? Quid Job in operibus promptius, in tentationibus fortius, in dolore patientius, in timore submissius, in fide verius? Nec his tamen, si rogarent, concessurum se Deus dixit. Cum propheta Ezechiel pro delicto populi deprecaretur: *Terra, inquit, quacumque peccaverit mihi, ut delinquat delictum, extendam manum meam super eam, & obteram stabilimentum panis, & immittam in eam famem, & auferam ab ea hominem & pecora. Et si fuerint tres viri hi in medio ejus, Noe, & Daniel, & Job, non liberabunt filios neque filias, ipsi soli salvi erunt.* Adeo non omne quod petitur in præjudicio petentis, sed in dantis arbitrio est; nec quidquam sibi usurpat, & vindicat humana sententia, nisi annuat & censura divina. In evangelio Dominus loquitur, dicens: *Qui confessus me fuerit coram hominibus, & ego confitebor eum coram patre meo, qui in calis est. Qui autem me negaverit, & ego negabo eum.* Si negantem non negat, nec confitentem confitetur. Non potest evangelium in parte consistere, & in parte nutare. Aut utrumque oportet valeat, aut utrumque vim veritatis amittat. Si negantes rei criminis non erunt, nec confitentes præmium virtutis accipient. Porro si fides quæ vicerit, coronatur, necesse est ut victa perfidia puniatur. Ita martyres aut nihil possunt, si evangelium solvi potest; aut si evangelium non potest solvi, contra evangelium facere non possunt, qui de evangelio martyres fiunt. Nemo, fratres dilectissimi, nemo infamet martyrum dignitatem, nemo eorum glorias destruat & coronas. Manet incorruptæ fidei robur incolume, nec dicere aliquid, aut facere contra Christum potest, cujus & spes, & fides, & virtus, & gloria omnis in Christo est. Ut ab episcopis contra mandatum Dei fiat, auctores

Et ore esse non possunt, qui ipsi Dei mandata fecerunt.
 An quisquam major Deo, aut divina bonitate clem-
 entior, qui aut infectum velit, quod passus est Deus
 fieri, aut quasi illi minus potestatis ad protegendam
 ecclesiam suam fuerit, auxilio nos suo putet posse
 servari? Nisi si hæc ignaro Deo gesta sunt, aut non
 permittente illo omnia ista venerunt, cum doceat in-
 dociles, & admoneat immemores scriptura divina,
 quæ loquitur dicens: *Quis dedit in direptionem Jacob &
 Israel iis, qui prædabantur illum? Nonne Deus, sui pec-
 caverunt, & noluerunt in viis ejus ambulare, neque au-
 dire legem ejus? Et superduxit super eos iram animationis
 suæ.* Et alibi testatur ac dicit: *Numquid non valet ma-
 nus Dei, ut salvos faciat, aut gravavit aurem ut non
 exaudiat? Sed peccata vestra inter vos & Deum separant,
 & propter delicta vestra avertit faciem a vobis ne miserea-
 tur.* Delicta potius nostra reputemus, actus nostros &
 animi secreta revolventes, conscientia merita pon-
 deremus. Redeat in cor nostrum non ambulasse nos
 in viis Domini, & abjecisse legem Dei, præcepta ejus
 & monita salutaria numquam servare voluisse. Quid
 de eo boni sentias, quem timorem fuisse apud eum,
 quam fidem credas, quem corrigere nec motus potuit,
 quem persecutio ipsa non reformavit? Alta & erecta
 cervix nec quia cecidit, inflexa est. Tumens animus
 & superbus, nec quia victus est, fractus est. Jacens
 stantibus, & integris vulneratus minatur, & quod
 non statim Domini corpus inquinatis manibus acci-
 piat, aut ore polluto Domini sanguinem bibat, sacer-
 dotibus sacrilegus irascitur. Atque o tuam nimiam,
 furiosæ, dementiam. Irasceris ei, qui abs te averte-
 re iram Dei nititur; ei minaris, qui pro te Domini
 misericordiam deprecatur, qui vulnus tuum sentit,
 quod ipse non sentis, qui pro te lacrimas fundit, quas
 forsitan ipse non fundis. Oneras adhuc crimen, &
 annulas, & cum sis ipse implacabilis ad antistites &

sacerdotes Dei, putas circa te Dominum posse placari? Accipe potius, & admitte, quæ loquimur. Quid surdæ aures salutaria præcepta non audiunt, quæ monemus? Quid cæci oculi pœnitentiæ iter non vident, quod ostendimus? Quid perculsa & alienata mens remedia vitalia non percipit, quæ de scripturis cælestibus & discimus, & docemus? Aut si incredulis quibusdam minor fides est futurorum, vel præsentibus terreantur. Ecce eorum qui negaverunt, quæ supplicia conspiciamus, quos eorum tristes exitus flemus? Nec hic esse sine pœna possunt, quamvis necdum dies venerit pœnæ. Plectuntur interim quidam, quo ceteri corrigantur. Exempla sunt omnium tormenta paucorum. Unus ex his qui sponte Capitolium negaturus ascendit, postquam Christum negavit, obmutuit. Pœna inde cœpit, unde cœpit & crimen; ut nec rogare jam posset, qui verba ad precum misericordiam non haberet. Alia in balneis constituta (hoc enim crimini ejus & malis deerat, ut & ad balneas statim pergeret, quæ lavacri vitalis gratiam perdidisset) illic ab immundo spiritu immunda correpta, laniavit dentibus linguam, qua fuerat vel pasta impie, vel locuta. Postquam scleratus cibus sumptus est, in perniciem suam rabies oris armata est. Ipsa sui carnifex exstitit, nec diu superesse postmodum potuit. Doloribus ventris & viscerum cruciata defecit. Præsente ac teste me ipso accipite, quid evenit. Parentes forte fugientes dum trepidi minus consulunt, sub nutricis alimento parvulam filiam reliquerunt, relictam nutrix detulit ad magistratus. Illi ei apud idolum quo populus confluebat, quod carnem necdum posset edere per ætatem, panem mero mixtum, quod tamen & ipsum de immolatione pereuntium supererat, tradiderunt. Recepit filiam postmodum mater. Sed facinus puella commissum tam loqui, & indicare non potuit, quam nec intelligere prius

prius

prius potuit, nec arcere. Ignoracione igitur obreptum est, ut sacrificantibus nobis eam secum mater inferret. Sed enim puella mixta cum sanctis, precis nostræ & orationis impatiens, nunc ploratu concuti, nunc mentis æstu cœpit fluctuabunda jactari, & velut tortore cogente, quibus poterat indiciis, conscientiam facti in simplicibus adhuc annis rudis anima fatebatur. Ubi vero solemnibus adimpletis calicem diaconus offerre præsentibus cœpit, & accipientibus ceteris locus ejus advenit, faciem suam parvula instinctu divinæ majestatis avertere, q̄s labiis obturantibus premere, calicem recusare. Perstitit tamen diaconus, & reluctanti licet de sacramento calicis infudit. Tunc sequitur singultus & vomitus. In corpore atque ore violato eucharistia permanere non potuit. Sanctificatus in Domini sanguine potus de polutis visceribus erupit. Tanta est potestas Domini, tanta majestas. Secreta tenebrarum sub ejus luce detecta sunt, sacerdotem Dei nec occulta crimina fefellerunt. Hoc circa infantem, quæ ad eloquendum alienum circa se crimen necdum habuit ætatem. At vero ea, quæ ætate provecta, & in annis adultioribus constituta sacrificantibus nobis latenter obrepfit, non cibum sed gladium sibi sumens, & velut quædam venena letalia intra fauces & pectus admittens, angī & anima exæstuante concludi postmodum cœpit. Et pressuram non jam persecutionis, sed delicti sui passa, palpitans & tremens concidit. Impunitum diu non fuit, nec occultum dissimulatæ conscientiæ crimen. Quæ fefellerat hominem, Deum sensit ultorem. Et cum quædam arcam suam, in qua Domini sanctum fuit, manibus indignis tentasset aperire, igne inde surgente deterrita est, ne auderet attingere. Et quidam alius, quia & ipse maculatus, sacrificio a sacerdote celebrato, partem cum ceteris ausus est latenter accipere; sanctum Domini edere, & contrectare.

stare non potuit; cinerem ferre se apertis manibus invenit. Documento unius ostensum est, Dominum recedere cum negatur, nec immerentibus ad salutem prodesse, quod sumitur, quando gratia salutaris in cinerem sanctitate fugiente mutatur. Quam multi quotidie poenitentiam non agentes, nec delicti sui conscientiam confitentes, immundis spiritibus adimplentur, quam multi usque ad insaniam mentis exordes, dementiæ furore quatiantur? Nec necesse est ire per exitus singulorum, cum per orbis multiformes ruinas tam delictorum poena sit varia, quam delinquentium multitudo numerosa. Unusquisque consideret, non quid alius passus sit, sed quid pati & ipse mereatur. Nec evasisse se credat; si eum interim poena distulerit, cum timere plus debeat, quam sibi Dei iudicis ira servavit. Nec sibi quo minus agant poenitentiam, blandiantur, qui etsi nefandis sacrificiis manus non contaminaverunt, libellis tamen conscientiam polluerunt. Et illa professio denegantis contestatio est christiani, quod fuerat, abnuentis. Fecisse se dixit, quidquid alius faciendo commisit. Cumque scriptum sit: *Non potestis duobus dominis servire*, servivit sæculari domino, qui obtemperavit ejus edicto; magis obaudivit humano imperio, quam Deo. Viderit an minore vel dedecore, vel crimine apud homines publicaverit, quod admisit. Deum tamen judicem fugere & vitare non poterit, cum dicat spiritus sanctus in psalmis: *Quod est imperfectum meum, viderunt oculi tui, & in libro tuo omnes scribentur*. Et iterum: *Homo videt in facie, Deus autem in corde*. Ipse quoque Dominus præmoneat, & præstruat dicens: *Et scient omnes ecclesia, quia ego sum scrutator renis & cordis*. Perspicit ille abdita, & secreta atque occulta considerat. Nec Dei oculos potest aliquis evadere dicentis: *Ego Deus approximans, & non Deus de longinquo*. Si absconditus fuerit homo in
abscon-

*absconditis, ego ergo non videbo eum? Nonne calum & terram ego impleo? Videt ille corda & pectora singulorum, & judicaturus est, non tantum de factis, sed & de verbis & de cogitationibus nostris, omnium mentes voluntatesque conceptas in ipsis adhuc clausi pectoris latebris intuetur. Denique quanto & fide majores, & timore meliores sunt, qui quamvis nullo sacrificii aut libelli facinore constricti, quoniam tamen de hoc vel cogitaverunt, hoc ipsum apud sacerdotes Dei dolenter & simpliciter confitentes, exomologesin conscientiae faciunt, animi sui pondus exponunt, salutarem medelam parvis licet & modicis vulneribus exquirunt, scientes scriptum esse: *Deus non deridetur*. Derideri & circumveniri Deus non potest, nec astutia aliqua fallente deludi. Plus immo delinquit, qui secundum hominem Deum cogitans, evadere se poenam criminis credit, si non palam crimen admisit. Christus in praeceptis suis dicit: *Qui confusus me fuerit, confundet eum filius hominis*. Et Christianum se putat, qui Christianus esse aut confunditur, aut veretur? Quomodo potest esse cum Christo, qui ad Christum pertinere aut erubescit, aut metuit? Minus plane peccaverit non videndo idola, nec sub oculis circumstantis atque insultantis populi sanctitatem fidei prophanando, non polluendo manus suas funestis sacrificiis, nec sceleratis cibis oramaculando. Hoc eo proficit ut sit minor culpa, non ut innocens conscientia. Facilius potest ad veniam criminis pervenire. Non est tamen immunis a crimine. Neo cesset in agenda poenitentia, atque in Domini misericordia deprecanda, ne quod minus esse in qualitate delicti videtur, in neglecta satisfactione cumuletur. Confiteantur singuli, quaeso vos, fratres dilectissimi, delictum suum, dum adhuc qui delinquit, in saeculo est, dum admitti confessio ejus potest, dum satisfactio & remissio facta per sacerdotes apud*

Dominum grata est. Convertamur ad Dominum mente tota; & poenitentiam criminis veris doloribus exprimentes, Dei misericordiam deprecemur. Illi se anima prosterнат, illi mœstitia satisfaciāt, illi spes omnis incumbat. Rogare qualiter debemus, dicit ipse: *Revertimini*, inquit, *ad me ex toto corde vestro, simulque & jejuniis, & fletu, & planctu; & scindite corda vestra, & non vestimenta vestra.* Ad Dominum toto corde redeamus. Iram & offensam ejus jejuniis, fletibus, planctibus, sicut admonet ipse, placemus. Lamentari eum putamus ex toto corde, jejuniis, fletibus, planctibus Dominum deprecari, qui ex primo criminis die lavacra quotidie cum feminis celebrat, qui epulis affluentibus pastus, & sagina largiore distentus cruditates suas postridie ructat, nec cibos & potus suos cum pauperum necessitate communicat? Qui hilaris ac lætus incedit, quomodo mortem suam deflet? Cumque scriptum sit: *Non corrumpetis effigiem barba vestra*, barbam vellit, & faciem suam comit? Et placere nunc cuiquam studet, qui Deo displicet? An illa ingemiscit & plangit, cui vacat cultum pretiosæ vestis induere, nec indumentum Christi, quod perdidit, cogitare, accipere pretiosa ornamenta & monilia elaborata, nec divini & cælestis ornatus damna deflere? Tu licet indumenta peregrina & vestes sericas induas, nuda es. Auro te licet & margaritis gemmisque condecores, sine Christi decore deformis es. Et quæ capillos tuos inficis, vel nunc in doloribus desine; & quæ nigri pulveris ductu oculorum liniamenta depingis, vel nunc lacrimis oculos tuos ablue. Si quem de tuis carum mortalitatis exitu perdidisses, ingemisceres dolenter & fleres, facie inculta, veste mutata, neglecto capillo, vultu nubilo, ore dejecto indicia mœroris ostenderes. Animam tuam misera perdidisti, spiritualiter mortua supervivere hic tibi, & ipsa ambulans funus tuum portare cœpi-

cepisti; & non acriter plangis, non jugiter ingemiscis, non te vel pudore criminis, vel continuatione lamentationis abscondis? Ecce pejora adhuc peccandi vulnera, ecce majora delicta, peccasse, nec satisfacere, deliquisse, nec delicta desistere. Ananias, Azarias, Misahel illustres ac nobiles pueri, quo minus exomologesin Deo facerent, nec inter flammam & camini exæstantis incendia quieverunt. Bene sibi licet conscii, & Dominum fidei ac timoris obsequio sæpe promeriti, humilitatem tamen tenere, & Domino satisfacere nec inter ipsa gloriosa virtutum suarum martyria destiterunt. Loquitur scriptura divina: *Stans, inquit, Azarias precatus est, & aperuit os suum, & exomologesin faciebat Deo simul cum sodalibus suis in medio ignis.* Daniel quoque post fidei atque innocentie suæ multiplicem gratiam, post dignationem Domini circa virtutes ac laudes suas sæpe repetitam, jejuniis adhuc promereri Deum nititur, in sacco & in cinere volutatur, exomologesin faciens dolenter, & dicens: *Dominus Deus magnus & fortis, & metuentus, qui servas testamentum tuum & miserationes eis qui te diligunt, & conservant imperia tua, peccavimus, facinus admisimus, impii fuimus, transgressi sumus, ac deservimus præcepta tua & judicia tua, non audivimus verba puerorum tuorum prophetarum, quæ locuti sunt in nomine tuo super reges nostros, & omnes gentes, & super omnem terram. Tibi, Domine, justitia, nobis autem confusio.* Hæc mites, hæc simplices, hæc innocentes in promerenda Dei majestate fecerunt; & nunc satisfacere, & Dominum rogare detrectant, qui Dominum negaverunt. Quæso vos, fratres, acquiescite salubribus reñediis, consiliis obedite melioribus; cum lacrimis nostris vestras lacrimas jungite, cum nostro gemitu vestros gemitus copulate. Rogamus vos, ut pro vobis Deum rogare possimus. Preces ipsas ad vos prius vertimus, quibus Deum pro vobis ut misereatur,

tur, oramus. Agite pœnitentiam plenam, dolentis ac lamentantis animi probate mœsticiam. Nec vos quorundam moveat aut error improvidus, aut stupor vanus, qui cum teneantur in tam gravi crimine, percussi sunt animi cœcitate, ut nec intelligant delicta, nec plangant. Indignantis Dei major hæc plaga est, sicut scriptum est: *Et dedit illis Deus spiritum transpunctionis.* Et iterum: *Dilectum veritatis non receperunt ut salvi fierent; ac propterea mittet illis Deus operationem erroris, ut credant mendacio, ut judicentur omnes qui non crediderunt veritati, sed sibi placent in injustitia.* Injuste sibi placentes, & transpunctæ mentis alienatione dementes Domini præcepta contemnunt, medelam vulneris negligunt, agere pœnitentiam nolunt. Ante admissum facinus improvidi, post facinus obstinati, nec prius stabiles, nec postmodum supplices. Quando debuerant stare, jacuerunt; quando jacere & prostrernere se Deo debent, stare se opinantur. Pacem sibi ultro nemine dante sumpserunt. Falsa sollicitatione seducti, & apostatis ac perfidis juncti, errorem pro veritate suscipiunt. Communicationem non communicantium ratam ducunt; hominibus contra Deum credunt, qui contra homines Deo non crediderunt. Ejusmodi homines quantum potestis, effugite, perniciosis contactibus adhærentes saluæ cautione vitate. Sermo eorum sicut cancer serpit, colloquium velut contagium transilit, noxia & venenata persuasio persecutione ipsa pejus interficit. Illic superest pœnitentia, quæ satisfaciât. Qui autem pœnitentiam criminis tollunt, satisfactionis viam cludunt. Ita fit, ut dum temeritate quorundam vel promittitur salus falsa, vel creditur, spes veræ salutis adimatur. Vos vero, fratres dilectissimi, quorum timor in Deum pronus est, & in ruina licet animus constitutus, mali sui memor est; pœnitentes ac dolentes peccata vestra perspicite, gravissimum conscientiam-

scientia crimen agnoscat, ad intelligentiam delicti
 vestri oculos cordis aperiat, nec desperantes misericor-
 diam Domini, nec tamen jam veniam vindican-
 tes. Deus quantum patris pietate indulgens semper
 & bonus est, tantum iudicis maiestate metuendus est.
 Quam magna deliquimus, tam granditer defleamus.
 Alto vulnere dilgens & longa medicina non desit.
 Pœnitentia crimine minor non fit. Putasne tu Domi-
 num cito posse placari, quem verbis perfidis abnuisti,
 cui patrimonium præponere maluisti, cujus templum
 sacrilega contagione violasti? Putas facile eum mise-
 reri tui, quem tuum non esse dixisti? Orare oportet
 impensius & rogare, diem luctu transigere, vigiliis
 noctes ac fletibus ducere, tempus omne lacrimosis
 lamentationibus occupare, stratos solo adherere, in
 cinere & cilicio & sordibus volutari, post indumen-
 tum Christi perditum, nullum jam velle vestitum,
 post diaboli cibum malle jejunium, iustis operibus
 incumbere, quibus peccata purgantur, eleemosynis
 frequenter insistere, quibus a morte animæ liberan-
 tur. Quod adversarius auferebat, Christus accipiat.
 Nec teneri jam nec amari patrimonium debet, quod
 quis & deceptus & victus est. Pro hoste vitanda res,
 pro latrone fugienda, pro gladio metuenda possiden-
 tibus & veneno. Ad hoc tantum profuerit quod re-
 mansit, ut inde crimen & culpa redimatur. Incun-
 titer & largiter fiat operatio, census omnis in mode-
 lam vulneris erogetur, opibus & facultatibus no-
 stris qui de nobis iudicaturus est, Domino sœnere-
 tur. Sic sub apostolis fides viguit. Sic primus cre-
 dentium populus Christi mandata servavit. Prompti
 erant, largi erant, distribuendum per apostolos to-
 tum habant, & non talia delicta redimebant. Si præ-
 cem totæ corde quis faciat, si veris pœnitentia lamen-
 tationibus & lacrimis ingemiscat, si ad veniam delicti
 sui Dominum iustis & continuis operibus inflectat,

misereri talium potest, qui & misericordiam suam protulit, dicens: *Cum conversus ingemueris, tunc sal-
vaberis, & scies ubi fueris.* Et iterum: *Nolo mortem
morientis, dicit Dominus, quantum ut revertatur & vivat.*
Et Johel propheta pietatem Domini Domino ipso mo-
nente declarat: *revertimini, inquit, ad Dominum Deum
vestrum, quoniam misericors & pius est, & patiens & multa
misericordiae, & qui sententiam flectat adversus malitias irro-
gatas.* Potest ille indulgentiam dare, sententiam suam
potest ille deflectere. Pœnitenti, operanti, roganti
potest clementer ignoscere, potest in acceptum re-
ferre, quidquid pro talibus & petierint martyres, &
fecerint sacerdotes. Vel si quis plus eum suis satis-
factionibus moverit, si ejus iram, si indignantis of-
fensam justa deprecatione placaverit, dat ille & ar-
ma rursum, quibus victus armetur, reparat & cor-
roborat vires, quibus fides instaurata vegetetur. Re-
petet certamen suum miles, iterabit aciem, provo-
cabit hostem, & quidem factus ad prælium fortior
per dolorem. Qui sic Deo satisfecerit, qui pœni-
tentia facti sui, qui pudore delicti, plus & virtutis
& fidei de ipso lapsus sui dolore conceperit, exaudi-
tus & adjutus a Domino, quam contristaverat nu-
per, lætam faciet ecclesiam; nec jam solam Dei ve-
niam merebitur, sed & coronam.



L I B E R

DE UNITATE ECCLESIAE.

Cum moneat Dominus & dicat: *Vos estis sal terra,*
cumque esse nos jubeat ad innocentiam simpli-
ces, & tamen cum simplicitate prudentes, quid aliud,
fratres dilectissimi, quam providere nos convenit,
&

& sollicito corde vigilantes subdoli hostis insidias intelligere pariter, & cavere, ne qui Christum sapientiam Dei patris induimus, minus sapere in tuenda salute videamur? Neque enim persecutio sola metuenda est, & ea quæ subruendis ac dejectis Dei servis aperta impugnatione grassantur. Facilior cautio est, ubi manifesta formido est, & ad certamen animus ante præstruitur, quando se adversarius confitetur. Plus metuendus est & cavendus inimicus, cum latenter obrepit, cum per pacis imaginem fallens, occultis accessibus serpit, unde & nomen serpentis accepit. Ea est ejus semper astutia, ea est circumveniendi hominis cæca & latebrosa fallacia. Sic ab initio statim mundi fefellit, & verbis mendacibus blandiens, rudes animas incauta credulitate decepit. Dominum ipsum tentare conatus, quasi obreperet rursus & falleret, latenter accessit. Intellectus tamen est & retusus; & ideo prostratus, quia agnitus, atque detectus. Unde nobis exemplum datum est veteris hominis viam fugere, vestigiis Christi viventis insitere; ne denuo incauti in mortis laqueum revolvamur, sed ad periculum providi accepta immortalitate potiamur. Immortalitate autem potiri quomodo possumus, nisi ea quibus mors expugnatur & vincitur, Christi mandata servemus, ipso monente & dicente: *Si vis ad vitam venire, serva mandata.* Et iterum: *Si feceritis quæ mando vobis, jam non dico vos servos, sed amicos.* Hos denique fortes dicit & stabiles, hos super petram robusta mole fundatos, hos contra omnes tempestates & turbines sæculi immobili & inconcussa firmitate solidatos. *Qui audit, inquit, verba mea & facit ea, similibo eum viro sapienti, qui edificavit domum suam supra petram. Descendit pluvia, venerunt flumina, flaverunt venti & impeerunt in domum illam, & non cecidit. Fundata enim fuit super petram. Verbis igitur ejus insistere, quæcumque & docuit & fecit, discere*
&

& facere debemus. Ceterum credere se in Christum quomodo dicit, qui non facit quod Christus facere præcepit? Aut unde perveniet ad præmium fidei, qui fidem non vult servare mandati? Nutet necesse est & vagetur, & spiritu erroris abreptus velut pulvis, quem ventus excutit, ventiletur; nec ambulando proficiet ad salutem, qui salutaris viæ non tenet veritatem. Cavenda sunt autem, fratres dilectissimi, non solum quæ sunt aperta atque manifesta, sed & astutæ fraudis subtilitate fallentia. Quid vero astutius, quidve subtilius, quam ut Christi adventu detectus, ac prostratus inimicus, postquam lux gentibus venit & sospitandis hominibus salutare lumen effulsit, ut surdi auditum gratiæ spiritualis admitterent, aperirent ad Deum oculos suos cæci, infirmi æterna sanitate revalescerent, claudi ad ecclesiam currerent, muti christi vocibus & precibus orarent; videris ille idola derelicta, & per nimium credentium populum sedes suas ac templa deserta, excogitaverit novam fraudem, ut sub ipso christiani nominis titulo allat incautos? Hæreses invenit & schismata, quibus subverteret fidem, veritatem corrumperet, scinderet unitatem. Quos detinere non potest in viæ veteris cæcitæ, circumscribit & decipit novi itineris errore. Rapti de ipsa ecclesia homines; & dum sibi appropinquasse jam lumini, atque evasisse sæculi noctem videntur, alias nescientibus tenebras rursus infundit, ut cum evangelio Christi, & cum observatione ejus, & lege non stantes, christianos se vocent, & ambulantes in tenebris habere se lumen existiment, blandiente adversario atque fallente, qui secundum apostoli vocem transfigurat se velut angelum lucis, & ministros suos subornat velut ministros justitiæ, asserentes noctem pro die, interitum pro salute, desperationem sub obtentu spei, perfidiam sub prætextu fidei, antichristum sub vocabulo Christi,

ut

ut dum verisimilia mentiuntur, veritatem subtilitate frustrentur. Hoc eo fit, fratres dilectissimi, dum ad veritatis originem non reditur, nec caput quaeritur, nec magistri cælestis doctrina servatur. Quasi quis consideret & examinet, tractatu longo atque argumentis opus non est. Probatio est ad fidem facilis compendio veritatis. Loquitur Dominus ad Petrum: *Ego tibi dico, inquit, quia tu es Petrus & super hanc petram ædificabo ecclesiam meam, & porta inferorum non vincunt eam. Et tibi dabo claves regni cælorum; & quæ ligaveris super terram, erunt ligata & in cælis; & quæcumque solveris super terram, erunt soluta & in cælis.* Et iterum eidem post resurrectionem suam dicit: *Pasce oves meas.* Super illum unum ædificat ecclesiam suam, & illi pascendas mandat oves suas. Et quamvis apostolis omnibus post resurrectionem suam parem potestatem tribuat, & dicat: *sicut misit me pater, & ego mitto vos, accipite Spiritum sanctum, si cujus remiseritis peccata, remittentur illi, si cujus tenueritis, tenebuntur:* tamen ut unitatem manifestaret, unitatis ejusdem originem ab uno incipientem sua auctoritate disposuit. Hoc erant utique & ceteri apostoli, quod fuit Petrus, pari consortio præditi & honoris, & potestatis; sed exordium ab unitate profiscitur, & primatus Petro datur, ut una Christi ecclesia, & cathedra una monstretur. Et pastores sunt omnes, & grex unus ostenditur, qui ab apostolis omnibus unanimi consensione pascatur, ut ecclesia Christi una monstretur. Quam unam ecclesiam etiam in cantico canticorum Spiritus sanctus ex persona Domini designat, & dicit: *Una est columba mea, perfecta mea, una est matri suæ, electa genitrici suæ.* Hanc ecclesiæ unitatem qui non tenet, tenere se fidem credit? Qui ecclesiæ renititur & resistit, qui cathedram Petri, super quem fundata est ecclesia, deserit, in ecclesia se esse confidit? Quando & beatus apostolus

Paulus

Paulus hoc idem doceat, & sacramentum unitatis ostendat dicens: *Unum corpus & unus spiritus, una spes vocationis vestra, unus Dominus, una fides, unum baptisma, unus Deus.* Quam unitatem firmiter tenere, & vindicare debemus, maxime episcopi, qui in ecclesia præsides, ut episcopatum quoque ipsum unum atque indivisum probemus. Nemo fraternitatem mendacio fallat, nemo fidei veritatem perfida prævaricatione corrumpat. Episcopatus unus est, cujus a singulis in solidum pars tenetur. Ecclesia quoque una est, quæ in multitudinem latius incremento fecunditatis extenditur. Quomodo solis multi radii, sed lumen unum; & rami arboris multi, sed robur unum tenaci radice fundatum; & cum de fonte uno rivi plurimi defluunt, numerositas licet diffusa videatur exundantis copię largitate, unitas tamen servatur in origine. Avelle radium solis a corpore, divisionem lucis unitas non capit. Ab arbore frange ramum, fractus germinare non poterit. A fonte præcide rivum, præcisus arefcet. Sic & ecclesia Domini luce perfusa, per orbem totum radios suos porrigit. Unum tamen lumen est, quod ubique diffunditur, nec unitas corporis separatur. Ramos suos in universam terram copia ubertatis extendit, profluentes largiter rivos latius expandit. Unum tamen caput est, & origo una, & una mater fecunditatis successibus copiosa. Illius fetu nascimur, illius lacte nutrimur, spiritu ejus animamur. Adulterari non potest sponsa Christi, incorrupta est & pudica. Unam domum novit, unius cubiculi sanctitatem casto pudore custodit. Hæc nos Deo servat, hæc filios regno quos generavit, assignat. Quisquis ab ecclesia segregatus adulteræ jungitur, a promissis ecclesiæ separatur. Nec perveniet ad Christi præmia, qui relinquit ecclesiam Christi. Alienus est, prophanus est, hostis est. Habere jam non potest Deum patrem,

trem, qui ecclesiam non habet matrem. Si potuit evadere quisquam, qui extra arcam Noe fuit; & qui extra ecclesiam foris fuerit, evadit. Monet Dominus & dicit: *Qui non est mecum, adversus me est; & qui non mecum colligit, spargit.* Qui pacem Christi & concordiam rumpit; adversus Christum facit. Qui alibi præter ecclesiam colligit; Christi ecclesiam spargit. Dicit Dominus: *Ego & pater unum sumus.* Et iterum de patre & filio & spiritu sancto scriptum est: *Et hi tres unum sunt.* Et quisquam credit hanc unitatem de divina firmitate venientem, sacramentis cælestibus coherentem, scindi in ecclesia posse, & voluntatum collidentium divortio separari? Hanc unitatem qui non tenet, Dei legem non tenet, non tenet patris & filii fidem, vitam non tenet & salutem. Hoc unitatis sacramentum, hoc vinculum concordie inseparabiliter coherentis ostenditur; quando in evangelio tunica Domini Jesu Christi non dividitur omnino nec scinditur, sed fortientibus de veste Christi quis Christum indueret, integra vestis accipitur, & incorrupta atque indivisa tunica possidetur. Loquitur ac dicit scriptura divina: *De tunica autem, quia de superiore parte non consutilis, sed per totum textilis fuerat, dixerunt ad invicem: Non scindamus illam, sed sortiamur de ea cujus sit.* Unitatem illa portabat de superiore parte venientem, id est de cælo & a patre venientem, quæ ab accipiente ac possidente scindi omnino non poterat, sed totam simul & solidam firmitatem inseparabiliter obtinebat. Possidere non potest indumentum Christi, qui scindit & dividit ecclesiam Christi. Contra denique cum, Salomone moriente, regnum ejus & populus scinderetur, Achias propheta Jeroam regi obviæ factus in campo, in duodecim scissuras vestimentum suum discidit, dicens: *Sume tibi decem scissuras, quia hac dicit Dominus: Ecce scindo regnum de manu Salomonis, & dabo tibi decem sceptræ,* &
duo

duo sceptrā erunt ei propter servum meum David, & propter Hierusalem civitatem, quam elegi, ut ponam nomen meum illi. Cum duodecim tribus Israel scinderentur, vestimentum suum propheta Achias discidit. At vero quia Christi populus non potest scindi, tunica ejus per totum textilis & cohærens divisa a possidentibus non est. Individua, copulata, connexa ostendit populi nostri, qui Christum induimus, concordiam cohærentem. Sacramento vestis & signo declaravit ecclesiæ unitatem. Quis ergo sic est sceleratus & perfidus, quis sic discordiæ furore vesanus, ut aut credat scindi posse, aut audeat scindere unitatem Dei, vestem Domini, ecclesiam Christi? Monet ipse in evangelio suo, & docet dicens: *Et erit unus grex & unus pastor.* Et esse posse uno in loco aliquis existimat aut multos pastores, aut plures greges? Apostolus item Paulus hanc eandem nobis insinuans unitatem, obsecrat & hortatur dicens: *Obsecro, inquit, vos fratres, per nomen Domini nostri Jesu Christi, ut id ipsum dicatis omne, & non sint in vobis schismata. Sitis autem compositi in eodem sensu & in eadem sententia.* Et iterum dicit: *Sustinentes invicem in dilectione, satis agentes servare unitatem spiritus in conjunctione pacis.* Stare tu & vivere putas posse de ecclesia recedentem, sedes sibi alias & diversa domicilia condentem? cum dictum sit ad Rahab, in qua præformabatur ecclesia: *Patrem tuum & matrem tuam, & fratres tuos, & totam domum patris tui colliges ad te ipsam in domum tuam, & omnis qui exierit ostium domus tuæ foras, reus sibi erit.* Item sacramentum Paschæ nihil aliud in Exodi lege contineat, quam ut agnus, qui in figura Christi occiditur, in domo una edatur. Loquitur Deus dicens: *In domo una comedetur, non ejicietis de domo carnem foras.* Caro Christi & sanctum Domini ejici foras non potest, nec alia ulla credentibus præter unam ecclesiam domus est. Hanc domum, hoc unanimatis
 hospi-

hospitium designat, & denuntiat Spiritus sanctus in psalmis, dicens: *Deus qui inhabitare facit unanimes in domo.* In domo Dei, in ecclesia Christi, unanimes habitant, concordēs & simplices perseverant. Iccirco & in columba venit Spiritus sanctus, simplex animal & lætum, non felle amarum, non morsibus sævum, non ungiū laceratione violentum, hospitia humana diligere, unius domus confortium nosse, cum generant, simul filios edere, cum commeant, volatibus invicem cohærere, communi conversatione vitam suam degere, oris osculo concordiam pacis agnoscere, legem circa omnia unanimatis implere. Hæc est in ecclesia nescenda simplicitas, hæc caritas obtinenda, ut columbas dilectio fraternitatis imitetur, ut mansuetudo & lenitas agnis & ovibus æquetur. Quid facit in pectore christiano luporum feritas, & canum rabies, & venenum letale serpentum, & cruenta sævitia bestiarum? Gratulandum est, cum tales de ecclesia separantur, ne columbas, ne oves Christi sæva sua & venenata contagione prædentur. Cohærere & conjungi non potest amaritudo cum dulcedine, caligo cum lumine, pluvia cum serenitate, pugna cum pace, cum fecunditate sterilitas, cum fontibus siccitas, cum tranquillitate tempestas. Nemo existimet bonos de ecclesia posse discedere. Triticum non rapit ventus, nec arborem solida radice fundatam procella subvertit. Inanes paleæ tempestate jactantur, invalidæ arbores turbinis incursione evertuntur. Hos execratur & percutit Joannes apostolus, dicens: *Ex nobis exierunt, sed non fuerunt ex nobis. Si enim fuissent ex nobis, mansissent utique nobiscum.* Hinc hæreses & factæ sunt frequenter, & fiunt, dum perversa mens non habet pacem, dum perfidia discordans non tenet unitatem. Fieri vero hæc Dominus permittit & patitur, manente propriæ libertatis arbitrio; ut dum corda nostra & mentes nostras veritatis discrimen

examinat, probatorum fides integra manifesta luce clarescat. Per apostolum præmonet Spiritus sanctus, & dicit: *Oportet hæreses esse, ut probati manifesti sint in vobis.* Sic probantur fideles, sic perfidi deteguntur. Sic & ante iudicii diem hic quoque jam justorum atque iniustorum animæ dividuntur, & a frumento palæ separantur. Hi sunt, qui se ultro apud temerarios convenas sine divina dispositione præficiunt, qui se præpositos sine ulla ordinationis lege constituunt, qui nemine episcopatum dante, episcopi sibi nomen assumunt; quos designat in psalmis Spiritus sanctus sedentes in pestilentie cathedra, pestes & lues fidei, serpentis ore fallentes, & corrumpendæ veritatis artifices, venena letalia linguis pestiferis evomentes: quorum sermo ut cancer serpit, quorum tractatus pectoribus & cordibus singulorum mortale virus infundit. Contra ejusmodi clamat Dominus, ab his refrenat & revocat errantem plebem suam, dicens: *Nolite audire sermones pseudoprophetarum; quoniam visiones cordis eorum frustrantur eos. Loquuntur, sed non ab ore Domini. Dicunt eis qui abjiciunt verbum Dei: Pax erit vobis, & omnibus ambulanti in voluntatibus suis. Omnis qui ambulat in errore cordis sui, non venient super eum mala. Non locutus sum ad eos, & ipsi prophetaverunt. Si stetissent in substantia mea, & audissent verba mea, & si docuissent populum meum, convertissem eos a malis cogitationibus eorum.* Hos eosdem denuo Dominus designat & denotat, dicens: *Me dereliquerunt fontem aqua viva, & effoderunt sibi lacus detritos, qui non possunt aquam portare.* Quando aliud baptisma præter unum esse non possit, baptizare se posse opinantur. Vitæ fonte deserto, vitalis & salutaris aquæ gratiam pollicentur. Non abluuntur illic homines, sed potius sordidantur; nec purgantur delicta, sed immo cumulantur. Non Deo nativitas illa, sed diabolo filios generat. Per mendacium nati veritatis promissa

non

non capiunt. De perfidia procreati, fidei gratiam perdunt. Ad pacis præmium venire non possunt, qui pacem Domini discordiæ furore ruperunt. Nec se quidam vana interpretatione decipiant, quod dixerit Dominus: *Ubicumque fuerint duo aut tres collecti in nomine meo, ego cum eis sum.* Corruptores evangelii atque interpretes falsi extrema ponunt, & superiora prætereunt, partis memores, & partem subdole comprimantes. Ut ipsi ab ecclesia scissi sunt, ita capituli unius sententiam scindunt. Dominus enim cum discipulis suis unanimitatem suaderet & pacem: *Dico, inquit, vobis: Quoniam si duobus ex vobis convenerit in terra, de omni re quamcumque petieritis, continget vobis a patre meo qui in caelis est.* *Ubicumque enim fuerint duo aut tres collecti in nomine meo, ego cum eis sum,* ostendens non multitudini, sed unanimitati deprecantium plurimum tribui. *Si duobus, inquit, ex vobis convenerit in terra,* unanimitatem prius posuit, concordiam pacis ante præmisit, ut conveniat nobis, fideliter & firmiter docuit. Quomodo autem potest ei cum aliquo convenire, cui cum corpore ipsius ecclesiæ, & cum universa fraternitate non convenit? Quomodo possunt duo aut tres in nomine Christi colligi, quos constat a Christo & ab ejus evangelio separari? Non enim nos ab illis, sed illi a nobis recesserunt. Et cum hæreses & schismata postmodum nata sint, dum conventicula sibi diversa constituunt, veritatis caput atque originem reliquerunt. Dominus autem de ecclesia sua loquitur, & ad hos qui sunt in ecclesia, loquitur, ut si ipsi concordēs fuerint, si secundum quod mandavit & monuit, duo aut tres licet, collecti unanimiter oraverint, duo aut tres licet sint, impetrare possint de Dei majestate, quod postulant. *Ubicumque fuerint duo aut tres collecti in nomine meo, ego, inquit, cum eis sum,* cum simplicibus scilicet atque pacatis, cum Deum timentibus, & Dei præcepta

servantibus. Cum his duobus vel tribus licet esse se dixit, quomodo & cum tribus pueris in camino ignis fuit, & quia in Deum simplices, atque inter se unanimes permanebant, flammis ambientibus medios spiritu roris animavit. Quomodo apostolis duobus in custodia clausis, quia simplices, quia unanimes erant, ipse adfuit, ipse resolutis carceris claustris, ut verbum quod fideliter prædicabant, multitudini traderent, ad forum rursus imposuit. Quando ergo in præceptis suis ponit & dicit: *Ubi fuerint duo aut tres collecti in nomine meo, ego cum eis sum*: non homines ab ecclesia dividit, qui instituit & fecit ecclesiam, sed exprobrans discordiam perfidis, & fidelibus pacem sua voce commendans, ostendit magis esse se cum duobus aut tribus unanimiter orantibus, quam cum dissidentibus plurimis, plusque impetrari posse paucorum concordie prece, quam discordiosa oratione multorum. Ideo & cum orandi legem daret, addidit dicens: *Et cum steteritis ad orationem, remittite si quid habetis adversus aliquem, ut & pater vester qui in calis est, remittat vobis peccata*. Et ad sacrificium cum dissensione venientem revocat ab altari, & jubet prius concordare cum fratre, tunc cum pace redeuntem Deo munus offerre, quia nec ad Cain munera respexit Deus: neque enim pacatum habere Deum poterat, qui cum fratre pacem per zeli discordiam non habebat. Quam sibi igitur pacem promittunt inimici fratrum, quæ sacrificia celebrare se credunt æmuli sacerdotum? An secum esse Christum cum collecti fuerint, opinantur; qui extra Christi ecclesiam colliguntur? Tales etiam si occisi in confessione nominis fuerint, macula ista nec sanguine abluitur. Inexpiabilis & gravis culpa discordiæ nec passione purgatur. Esse martyr non potest, qui in ecclesia non est. Ad regnum pervenire non poterit, qui eam quæ regnatura est, derelinquit. Pacem nobis Christus de-

dit,

dit, concordes atque unanimes esse præcepit, dilectionis & caritatis fœdera incorrupta atque inviolata servari mandavit. Exhibere se non potest martyrem, qui fraternam non tenuit caritatem. Docet hoc & contestatur Paulus apostolus, dicens: *Et si habuero fidem ita ut montes transferam, caritatem autem non habeam, nihil sum. Et si in cibos pauperum distribuero omnia mea, & si tradidero corpus meum ut ardeam, caritatem autem non habeam, nihil proficio. Caritas magnanima est, caritas benigna est, caritas non amulatur, non agit perperam, non inflatur, non irritatur, non cogitat malum, omnia diligit, omnia credit, omnia sperat, omnia sustinet. Caritas numquam excidit.* Numquam, inquit, excidit caritas. Hæc enim semper in regno erit, hæc in æternum fraternitatis sibi coherentis unitate durabit. Ad regnum cælorum non potest pervenire discordia. Ad præmia Christi, qui dixit: *Hoc est mandatum meum ut diligatis invicem, quemadmodum dilexi vos*, pertinere non poterit, qui dilectionem Christi perfida dissensione violavit. Qui caritatem non habet, Deum non habet. Joannis beati apostoli vox est: *Deus, inquit, dilectio est, & qui manet in dilectione, in Deo manet, & Deus in illo morietur.* Cum Deo manere non possunt, qui esse in ecclesia Dei unanimes noluerunt. Ardeant licet flammis & ignibus traditi, vel objecti bestiis animas suas ponant, non erit illa fidei corona, sed poena perfidiæ, nec religiosæ virtutis exitus gloriosus, sed desperationis interitus. Occidi talis potest, coronari non potest. Sic se christianum esse profitatur, quomodo & Christum diabolus sæpe mentitur, ipso Domino præmonente & dicente: *Multi venient in nomine meo dicentes: Ego sum Christus, & multos fallent.* Sicut ille Christus non est, quamvis fallat in nomine, ita nec christianus videri potest, qui non permanet in evangelii cæcis & fidei veritate. Nam & prophetare, & demonia excludere, & virtutes magnas in

terris facere, sublimis utique & admirabilis res est:
 non tamen regnum cæleste consequitur, quisquis in
 his omnibus invenitur, nisi recti & justi itineris ob-
 servatione gradiatur. Denuntiat Dominus & dicit:
Multi mihi dicent in illo die: Domine, Domine, nonne in
tuo nomine prophetavimus, & in tuo nomine demonia ex-
clausimus, & in nomine tuo virtutes magnas fecimus? Et
tunc dicam illis: Numquam vos cognovi, recedite a me qui
operamini iniquitatem. Justitia opus est, ut promereri
 quis possit Deum judicem. Præceptis ejus & monitis
 obtemperandum est, ut accipiant merita nostra mer-
 cedem. Dominus in evangelio suo cum spei & fidei
 nostræ viam compendio breviante dirigeret: *Domi-*
nus Deus tuus, inquit, Deus unus est: &: Diliges Do-
minum Deum tuum de toto corde tuo, & de tota anima tua,
& de tota virtute tua. Hoc est primum mandatum; & se-
cundum simile huic: Diliges proximum tuum tamquam te.
In his duobus præceptis tota lex pendet & propheta. Uni-
 tatem simul & dilectionem magisterio suo docuit, pro-
 phetas omnes & legem præceptis duobus inclusit.
 Quam vero unitatem servat, quam dilectionem cu-
 stodit aut cogitat, qui discordiæ furore vefanus ec-
 clesiam scindit, fidem destruit, pacem turbat, cari-
 tatem dissipat, sacramentum prophanat? Malum hoc,
 fidelissimi fratres, jam pridem cœperat; sed nunc cre-
 vit ejusdem mali infesta clades; & exurgere ac pul-
 lulare plus cœpit hæreticæ perversitatis, & schisma-
 tum venenata pernicies: quia & sic in occasu mundi
 fieri oportebat, prænuntiante per apostolum nobis,
 & præmonente Spiritu sancto: *In novissimis, inquit,*
diebus aderunt tempora molesta, & erunt homines sibi pla-
centes, superbi, tumidi, cupidi, blasphemii, parentibus
inobedientes, ingrati, impii, sine affectu, sine fœdere,
delatores, incontinentes, immites, bonum non amantes,
proditores, procaces, stupore inflati, voluptates magis quam
Deum diligentes, habentes deformationem religionis, vir-
tutem

tutem autem ejus abnegantes. Ex iis sunt qui repunt in domos, & prædantur mulierculas operatas peccatis, quæ ducuntur variis desideriis, semper discennes, & numquam ad scientiam veritatis pervenientes. Et quomodo Jamnes & Mambres resistebant Moysi, sic & hi resistunt veritati, sed non proficiunt plurimum. Imperitia enim eorum manifesta erit omnibus, sicut & illorum fuit. Adimplentur quæcumque prædicta sunt, & appropinquante jam sæculi fine, hominum pariter ac temporum probatione venerunt. Magis ac magis adversario faviente error fallit, extollit stupor, livor incendit, cupiditas excæcat, depravat impietas, superbia inflat, discordia exasperat, ira præcipitat. Non tamen nos moveat, aut turbet multorum nimia & abrupta perfidia, sed potius fidem nostram prænuntiante rei veritate corroboret. Ut quidam tales esse cœperunt, quia hæc ante prædicta sunt, ita ceteri fratres ab ejusmodi caveant, quia & hæc ante prædicta sunt, instruente Domino & dicente: *Vos autem cavete, ecce prædixi vobis omnia.* Vitæ, quæso vos, fratres, ejusmodi homines, & a latere atque auribus vestris pernicioſa colloquia velut contagium mortis arcete, sicut scriptum est: *Sepi aures tuas spinis, & noli audire linguam nequam.* Et iterum: *Corrumpunt ingenia bona confabulationes pessima.* Docet Dominus, & admonet a talibus recedendum: *Caci sunt, inquit, duces cæcorum. Cacus autem cecum ducens simul in foveam cadunt.* Aversandus est talis atque fugiendus, quisquis fuerit ab ecclesia separatus. Perversus est hujusmodi & peccat, & est a semetipso damnatus. An esse sibi cum Christo videtur, qui adversus sacerdotes Christi facit, qui se a cleri ejus & plebis societate secernit? Arma ille contra ecclesiam portat, contra Dei dispositionem repugnat. Hostis altaris, adversus sacrificium Christi rebellis, pro fide perfidus, pro religione sacrilegus, inobsequens servus, filius impius, frater

inimicus, contemptis episcopis, & Dei sacerdotibus derelictis, constituere audet aliud altare, precem alteram illicitis vocibus facere, dominicæ hostiæ veritatem per falsa sacrificia prophanare, nec scire quoniam qui contra ordinationem Dei nititur, ob temeritatis audaciam divina animadversione punitur. Sic Chore & Dathan & Abiron, qui sibi contra Moysen & Aaron sacerdotem sacrificandi licentiam vindicare conati sunt, pœnas pro suis statim conatibus pependerunt. Terra compagibus ruptis, in profundum finem patuit, stantes atque viventes recedentis folii hiatus absorbit. Nec tantum eos qui auctores fuerant, Dei indignantis ira percussit, sed & ceteros ducentos quinquaginta participes ejusdem furoris & comites, qui coagulati cum iisdem simul ad audaciam fuerant, exiens a Domino ignis properata ultione consumpsit, admonens scilicet & ostendens, contra Deum fieri, quidquid improbi fuerint ad destruendam ordinationem Dei humana voluntate conati. Sic & Ozias rex, cum turibulum ferens, & contra legem Dei sacrificium sibi violenter assumens, resistente sibi Azaria sacerdote, obtemperare nollet & cedere, divina indignatione confusus, & lepræ varietate in fronte maculatus est, ea parte corporis notatus offenso Domino, ubi signantur qui Dominum promerentur. Et filii Aaron, qui imposuerunt altari ignem alienum, quem non præceperat Dominus, in conspectu statim Domini vindicantis extincti sunt. Quos imitantur scilicet atque sectantur, qui Dei traditione contempta, alienas doctrinas appetunt, & magisteria humanæ institutionis inducunt; quos increpat Dominus, & objurgat in evangelio suo dicens: *Rejicitis mandatum Dei, ut traditionem vestram statuatis.* Pejus hoc crimen est, quam quod admisisse lapsi videntur; qui tamen in pœnitentia criminis constituti, Deum plenis satisfactionibus deprecantur. Hic ecclesia quæritur,

&

& rogatur, illic ecclesiæ repugnatur. Hic potest necessitas fuisse, illic voluntas tenetur in scelere. Hic qui lapsus est, sibi tantum nocuit, illic qui hæresim vel schisma facere conatus est, multos secum trahendo decepit. Hic animæ unius est damnum, illic periculum plurimorum. Certe peccasse se hic & intelligit, & lamentatur, & plangit; ille tumens in pectore suo, & in ipsis sibi delictis placens, a matre filios segregat, oves a pastore sollicitat, Dei sacramenta disturbat. Et cum lapsus semel peccaverit, ille quotidie peccat. Postremo lapsus martyrium postmodum consecutus, potest regni promissa percipere; ille si extra ecclesiam fuerit occisus, ad ecclesiæ non potest præmia pervenire. Nec quisquam miretur, dilectissimi fratres, etiam de confessoribus quosdam ad ista procedere, inde quoque aliquos tam nefanda quam gravia peccare. Neque enim confessio immunem facit ab insidiis diaboli, aut contra tentationes & pericula, & incursum atque impetum sæculares adhuc in sæculo positum perpetua securitate defendit. Ceterum numquam in confessoribus fraudes, & stupra, & adulteria postmodum videremus, quæ nunc in quibusdam videntes ingemiscimus & dolemus. Quisquis ille confessor est, Salomone major, aut melior, aut Deo carior non est: qui tamen quamdiu in viis Domini ambulavit; tamdiu gratiam quam de Domino fuerat consecutus, obtinuit; postquam dereliquit Domini viam, perdidit & gratiam Domini. Et ideo scriptum est: *Tene quod habes, ne alius accipiat coronam tuam.* Quod utique Dominus non minaretur, auferri posse coronam justitiæ, nisi quia recedente justitia, recedat necesse est & corona. Confessio exordium gloriæ est, non meritum jam coronæ; nec perficit laudem, sed initiat dignitatem. Cumque scriptum sit: *Qui perseveraverit usque in finem, hic salvus erit,* quidquid ante finem fuerit, gradus est quo ad fasti-

Z s

gium

gium salutis ascenditur, non terminus quo jam culminis summa teneatur. Confessor est; sed post confessionem periculum majus est, quia plus adversarius provocatus est. Confessor est; hoc magis stare debet cum Domini evangelio, per evangelium gloriam consecutus a Domino. Ait enim Dominus: *Cui multum datur, multum quæritur ab eo; & cui plus dignitatis adscribitur, plus de illo exigitur servitutis.* Nemo per confessoris exemplum pereat, nemo injustitiam, nemo insolentiam, nemo perfidiam de confessoris moribus discat. Confessor est. Sit humilis & quietus, sit in actu suo cum disciplina modestus, ut qui Christi confessor dicitur, Christum quem confitetur, imitetur. Nam cum dicat ille: *Qui se extollit, humiliabitur, & qui humiliat se, exaltabitur,* & ipse a patre exaltatus sit, quia se in terris sermo, & virtus, & sapientia Dei patris humiliavit, quomodo potest extollentiam diligere, qui & nobis humilitatem sua lege mandavit, & ipse a patre amplissimum nomen præmio humilitatis accepit? Confessor est Christi, sed si non postea blasphemetur per ipsum majestas & dignitas Christi. Lingua Christum confessa non sit maledica, non sit turbulenta, non conviciis & litibus perstrepsens audiatur, non contra fratres & Dei sacerdotes post verba laudis serpentis venena jaculetur. Ceterum si culpabilis & detestabilis postmodum fuerit, si confessionem suam mala conversatione prodegerit, si vitam suam turpi scœditate maculaverit, si ecclesiam denique, ubi confessor factus est, derelinquens, & unitatis concordiam scindens fidem primam perfidia posteriore mutaverit, blandiri sibi per confessionem non potest, quasi sit electus ad gloriæ præmium, quando ex hoc ipso magis creverint merita pœnarum. Nam & Judam inter apostolos Dominus elegit, & tamen Dominum Judas postmodum prodidit. Non tamen iccirco apostolorum fides & firmitas cecidit, quia proditor Judas ab eorum

eorum societate defecit. Sic & hic non statim confessorum sanctitas & dignitas comminuta est, quia quorundam fides fracta est. Beatus Paulus apostolus in epistola sua loquitur: *Quid enim si exciderunt a fide quidam illorum, numquid infidelitas illorum fidem Dei evacuavit? Absit. Est enim Deus verax, omnis autem homo mendax.* Stat confessorum pars major & melior in fidei suæ robore, & in legis ac disciplinæ dominicæ veritate; nec ab ecclesiæ pace discedunt, qui se in ecclesia gratiam consecutos de Dei dignatione meminerunt; atque hoc ipso ampliorem consequuntur fidei suæ laudem, quod ab eorum perfidia segregati, qui juncti confessionis confortio fuerunt, a contagio criminis recesserunt, vero illuminati evangelii lumine, pura & candida Domini luce radiati, tam sunt in conservanda Christi pace laudabiles, quam fuerunt in diaboli congressione victores. Opto equidem, dilectissimi fratres, & consulo pariter & suadeo, ut, si fieri potest, nemo de fratribus pereat, & consentientis populi corpus unum gremio suo gaudens mater includat. Si tamen quosdam schismatum duces & dissensionis auctores, in cæca & obstinata dementia permanentes, non potuerit ad salutis viam consilium salubre revocare, ceteri tamen vel simplicitate capti, vel errore inducti, vel aliqua fallentis astutiæ calliditate decepti, a fallaciæ vos laqueis solvite, vagantes gressus ab erroribus liberate, iter rectum viæ cælestis agnoscite. Contestantis apostoli vox est: *Præcipimus vobis, inquit, in nomine Domini nostri Jesu Christi, ut recedatis ab omnibus fratribus ambulantes inordinate, & non secundum traditionem quam acceperunt a nobis. Et iterum dicit: Nemo vos decipiat inanibus verbis. Propterea enim venit ira Dei super filios contumacia. Nolite ergo esse participes eorum. Recedendum est a delinquentibus, vel immo fugiendum, ne dum quis male ambulantis jungitur, & per itinera erroris & criminis graditur,*
a via

a via veri itineris exerrans, pari crimine & ipse teneatur. Deus unus est, & Christus unus, & una ecclesia ejus, & fides una, & plebs una in solidam corporis unitatem concordiae glutino copulata. Scindi unitas non potest, nec corpus unum discidio compaginis separari, divulsis laceratione visceribus in frustra discerpi. Quidquid a matrice discesserit, seorsum vivere & spirare non poterit, substantiam salutis amittit. Monet nos Spiritus sanctus & dicit: *Quis est homo qui vult vitam, & amat videre dies optimos? Contine linguam tuam a malo, & labia tua ne loquantur in fidoſe. Declina a malo & fac bonum, quere pacem & sequere eam.* Pacem quærere debet & sequi filius pacis, a dissensionis malo continere linguam suam debet, qui novit & diligit vinculum caritatis. Inter sua divina mandata & magisteria salutaria, passioni jam proximus Dominus addidit, dicens: *Pacem dimitto vobis, pacem meam do vobis:* Hanc nobis hereditatem dedit, dona omnia suæ pollicitationis & præmia in pacis conservatione promisit. Si coheredes Christi sumus, in Christi pace maneamus. Si filii Dei sumus, pacifici esse debemus. *Beati, inquit, pacifici, quoniam ipsi filii Dei vocabuntur.* Pacificos esse oportet Dei filios, corde mites, sermone simplices, affectione concordēs, fideliter sibi unanimiſatis nexibus cohærentes. Hæc unitas sub apostolis olim fuit. Sic novus credentium populus Domini mandata custodiens, caritatem suam tenuit. Probat scriptura divina quæ dicit: *Turba autem eorum qui crediderant, anima & mente una agebant.* Et iterum: *& erant perseverantes omnes unanimes in oratione cum mulieribus & Maria, quæ fuerat mater Jesu, & fratribus ejus.* Et ideo quia efficacibus precibus orabant, ideo impetrare cum fiducia poterant, quodcumque de Domini misericordia postulabant. In nobis vero sic unitas diminuta est, ut & largitas operationis infracta est. Domos tunc

&

& fundos venumdabant, & thesauros sibi in cælo reponentes, distribuenda in usus indigentium pretia apostolis offerebant. At nunc de patrimonio nec decimas damus; & cum vendere jubeat Dominus, emimus potius & augemus. Sic in nobis emarcuit vigor fidei, sic credentium robur elanguit. Et ideo Dominus tempora nostra respiciens, in evangelio suo dicit: *Filius hominis cum venerit, putas inveniet fidem in terra?* Videmus fieri quod ille prædixit. In Dei timore, in legē justitiæ, in dilectione, in opere fides nulla est. Nemo futurorum metum cogitat, diem Domini, & iram Dei, & incredulis ventura supplicia, & statuta perfidis æterna tormenta nemo considerat. Quod metueret conscientia nostra, si crederet. Quia non credit omnino, nec metuit. Si autem crederet, & caveret. Si caveret, evaderet. Excitemus nos quantum possumus, dilectissimi fratres, & somno inertiae veteris abrupto, ad observanda & gerenda Domini præcepta vigilemus. Simus tales, quales esse nos ipse præcepit, dicens: *Sint lumbi vestri accincti, & lucerna ardentes in manibus vestris, & vos similes hominibus expectantibus dominum suum quando veniat a nuptiis, ut cum venerit & pulsaverit; aperiant ei. Beati servi quos adveniens Dominus inveniet vigilantes.* Accinctos nos esse oportet, ne cum expeditionis dies venerit, impediat nos & implicitos apprehendat. Luceat in bonis operibus nostrum lumen & fulgeat, ut ipsum nos ad vitam claritatis æternæ de hac sæculi nocte perducatur. Expectemus solliciti semper & cauti adventum Domini repentinum, ut quando ille pulsaverit, evigilet fides nostra, vigilantia præmium de Domino receptura. Si hæc mandata servantur, si hæc monita & præcepta teneantur, opprimi dormientes diabolo fallente non possumus, servi vigiles Christo dominante regnabimus.

LIBER

DE ORATIONE DOMINICA.

Evangelica præcepta, fratres dilectissimi, nihil aliud sunt quam magisteria divina, fundamenta ædificandæ spei, firmamenta corroborandæ fidei, nutrimenta fovendi cordis, gubernacula dirigendi itineris, præsidia obtinendæ salutis: quæ dum dociles credentium mentes in terris instruunt, ad cælestia regna perducunt. Multa & per prophetas servos suos dicere Deus voluit, & audiri; sed quanto majora quæ filius loquitur, quæ Dei sermo qui in prophetis fuit, propria voce testatur, non jam mandans ut paretur venienti via, sed ipse veniens, & viam nobis aperiens & ostendens; ut qui in tenebris mortis errantes, improvidi & cæci prius fuimus, luce gratiæ luminati iter vitæ duce & rectore Domino teneremus, qui inter cetera salutaria sua monita & præcepta divina, quibus populo suo consulit ad salutem, etiam orandi ipse formam dedit, ipse quid precaremur, monuit & instruxit. Qui fecit vivere, docuit & orare, benignitate ea scilicet, qua & cetera dare, & conferre dignatus est, ut dum prece & oratione quam filius docuit, apud patrem loquimur, facilius audiamur. Jam prædixerat horam venire, quando veri adoratores adorarent patrem in spiritu & veritate, & implevit quod ante promisit; ut qui spiritum & veritatem de ejus sanctificatione percepimus, de traditione quoque ejus vere & spiritualiter adoremus. Quæ enim potest esse magis spiritalis oratio, quam quæ a Christo nobis data est, a quo nobis & Spiritus sanctus missus est? Quæ vera magis apud patrem precatio, quam quæ a filio, qui est veritas, de ejus ore prolata est?

Ut

Ut aliter orare quam docuit, non ignorantia sola sit, sed & culpa, quando ipse posuerit, & dixerit: *Rejicitis mandatum Dei, ut traditionem vestram statuais.* Oremus itaque, fratres dilectissimi, sicut magister Deus docuit. Amica & familiaris oratio est Deum de suo rogare, ad aures ejus ascendere Christi oratione. Agnoscat pater filii sui verba, cum precem facimus. Qui habitat intus in pectore, ipse sit & in voce. Et cum ipsum habeamus apud patrem advocatum pro peccatis nostris, quando peccatores pro delictis nostris petimus, advocati nostri verba promamus. Nam cum dicat quia quodcumque petierimus a patre in nomine ejus, dabit nobis: quanto efficacius impetramus, quod petimus in Christi nomine, si petamus ipsius oratione? Sit autem orantibus sermo & precatio cum disciplina, quietem continens & pudorem. Cogitemus nos sub conspectu Dei stare. Placendum est divinis oculis & habitu corporis, & modo vocis. Nam ut impudentis est clamoribus strepere, ita contra congruit verecundo modestis precibus orare. Denique magisterio suo Dominus secreto orare nos praecepit, in abditis & semotis locis, in cubiculis ipsis, quod magis convenit fidei; ut sciamus Deum ubique esse praesentem, audire omnes & videre, & majestatis suae plenitudinem in abdita quoque & occulta penetrare, sicut scriptum est: *Ego Deus approximans, & non Deus de longinquo. Si absconditus fuerit homo in absconditis, ego ergo non video eum? Nonne caelum & terram ego impleo?* Et iterum: *In omni loco oculi Dei speculantur bonos & malos.* Et quando in unum cum fratribus convenimus, & sacrificia divina cum Dei sacerdote celebramus, verecundiae & disciplinae memores esse debemus, non passim ventilare preces nostras inconditis vocibus, nec petitionem commendandam modeste Deo, tumultuosa loquacitate jactare, quia Deus non vocis, sed cordis auditor est.

Nec

Nec admonendus est clamoribus, qui cogitationes hominum videt, probante Domino & dicente: *Quid cogitatis nequam in cordibus vestris? Et alio loco: Et scient omnes ecclesia quia ego sum scrutator renis & cordis.* Quod Anna in primo regnorum libro ecclesiæ typum portans, custodit & servat; quæ Dominum non clamorosa petitione, sed tacite & modeste intra ipsas peccatoris latebras precabatur. Loquebatur prece occulta, sed manifesta fide. Loquebatur, non voce, sed corde, quia sic Deum sciebat audire; & impetravit efficaciter quod petiit, quia fideliter postulavit. Declarat scriptura divina, quæ dicit: *Loquebatur in corde suo, & labia ejus movebantur, & vox ejus non audiebatur, & exaudivit eam Deus.* Item legimus in psalmis: *Dicite in cordibus & in stratis vestris, & transpungimini.* Per Hieremiam quoque hæc eadem Spiritus sanctus suggerit & docet, dicens: *In sensu autem tibi debet adorari Deus.* Adorans autem, fratres dilectissimi, nec illud ignoret, quemadmodum in templo cum pharisæo publicanus oraverit, non allevatis in cælum impudenter oculis, nec manibus insolenter erectis, sed pectus suum pulsans, & peccata intus inclusa contestans, divinæ misericordiæ implorabat auxilium. Et cum sibi pharisæus placeret, sanctificari hic magis meruit qui sic rogavit, qui spem salutis non in fiducia innocentiae suæ posuit, cum innocens nemo sit, sed peccata confessus humiliter oravit, & exaudivit orantem, qui humilibus ignoscit. Quæ Dominus in evangelio suo ponit, & dicit: *Homines duo ascenderunt in templum orare, unus pharisæus, & unus publicanus. Pharisæus cum stetisset, talia apud se precabatur: Deus, gratias tibi ago quia non sum sicut ceteri homines, injusti, raptores, adulteri, quomodo & publicanus iste. Jejunio bis in sabbato, decimas de omnium quæcumque possideo. Publicanus autem de longinquo stabat, & neque oculos volebat ad cælum levare, sed percutiebat*

tebat pectus suum dicens: Deus, propitius esto mihi peccatori. Dico vobis, descendit hic justificatus in domum suam magis, quam ille phariseus. Quia omnis qui se extollit, humiliabitur, & qui se humiliat, exaltabitur. Quæ nos, fratres dilectissimi, de divina lectione discentes, postquam cognovimus qualiter ad orationem accedere debeamus, cognoscamus docente Domino, & quid oremus. Sic, inquit, orate: Pater noster qui es in calis, sanctificetur nomen tuum, adveniat regnum tuum, fiat voluntas tua sicut in calo, & in terra, panem nostrum quotidianum da nobis hodie, & remitte nobis debita nostra; sicut & nos remittimus debitoribus nostris, & ne nos patiaris induci in tentationem, sed libera nos a malo. Amen. Ante omnia pacis doctor atque unitatis magister singillatim noluit, & privatim precem fieri, ut quis cum precatur, non pro se tantum precetur. Non enim dicimus: *Pater meus qui es in calis, nec Panem meum da mihi hodie*; nec dimitti sibi tantum unusquisque debitum postulat, aut ut in tentationem non inducatur, atque a malo liberetur, pro se solo rogat. Publica est nobis & communis oratio; & quando oramus, non pro uno, sed pro toto populo oramus, quia totus populus unum sumus. Deus pacis & concordie magister, qui docuit unitatem, sic orare unum pro omnibus voluit, quomodo in uno omnes ipse portavit. Hanc orationis legem servaverunt tres pueri in camino ignis inclusi, consonantes in prece, & spiritus consensione concordēs. Quod declarat scripturæ divinæ fides, & dum docet quomodo oraverint tales, dat exemplum quod imitari in precibus debeamus, ut tales esse possimus. *Tunc illi tres, inquit, quasi ex uno ore hymnum canebant, & benedicebant Dominum. Loquebantur quasi ex uno ore, & nondum illos Christus docuerat orare. Et ideo orantibus fuit impetrabilis & efficax sermo, quia promerebatur Dominum pacifica, & simplex, & spiri-*

S. Cypriani Tom. I. A a talis.

talis oratio. Sic & apostolos cum discipulis post ascensum Domini invenimus orasse. *Erant*, inquit, *perseverantes omnes unanimes in oratione cum mulieribus & Maria, quæ fuerat mater ejus.* Perseverabant in oratione unanimes, orationi suæ & instantiam simul & concordiam declarantes: quia Deus qui inhabitare facit unanimes in domo, non admittit in divinam & æternam domum nisi eos, apud quos est unanimes oratio. Qualia autem sunt, fratres dilectissimi, orationis dominicæ sacramenta, quam multa, quam magna, breviter in sermone collecta, sed in virtute spiritaliter copiosa, ut nihil omnino prætermisissimum sit, quod non in precibus atque orationibus nostris cælestis doctrinæ compendio comprehendatur. Sic, ait, *orato: Pater noster qui es in cælis.* Homo novus, renatus, & Deo suo per gratiam ejus restitutus, *Pater*, primo in loco dicit, quia filius esse jam coepit. *In sua*, inquit, *propria venit, & sui eum non receperunt.* Quotquot autem eum receperunt, *dedit illis potestatem ut filii Dei fierent his qui credunt in nomine ejus.* Qui ergo credidit in nomine ejus, & factus est Dei filius, hinc debet incipere, ut & gratias agat, & profiteatur se Dei filium, dum nominat patrem sibi esse in cælis Deum, contestetur quoque inter prima statim natiuitatis suæ verba, renuntiassse se terrenæ & carnali patri, & patrem solum nosse se, & habere coepisse, qui sit in cælis, sicut scriptum est: *Qui dicunt patri & matri, non novi te, & filios suos non agnoverunt, hi custodierunt præcepta tua, & testamentum tuum servaverant.* Item Dominus in evangelio suo præcepit, ne vocemus nobis patrem in terra, quod sit scilicet nobis unus pater, qui est in cælis. Et discipulo qui mentionem defuncti patris fecerat, respondit: *Sui mortui mortuos suos sepeliant.* Dixerat enim patrem suum mortuum, cum sit credentium pater vivus. Nec hoc solum, fratres dilectissimi, animadvertere

&

& intelligere debemus, quod appellemus patrem qui sit in cælis, sed jungimus & dicimus, *Pater noster*, id est eorum qui credunt, eorum qui per eum sacrificati, & gratiæ spiritualis nativitate reparati filii Dei esse cœperunt. Quæ vox etiã Judæos perstringit & percutit, qui Christum sibi per prophetas annuntiatum, & ad se prius missum non tantum infideliter spreverunt, sed & crudeliter necaverunt: qui jam non possunt patrem Deum vocare, cum Dominus eos confundat, & redarguat dicens: *Vos de diabolo patre nati estis, & concupiscentias patris vestri facere vultis. Ille enim homicida fuit ab initio, & in veritate non stetit quia veritas non est in illo.* Et per Esaiam prophetam Deus clamat indignans: *Filios generavi & exaltavi, ipsi autem me spreverunt. Agnovit bos possessorem suum, & asinus præsepe domini sui; Israel autem me non cognovit, & populus meus me non intellexit. Vae gens peccatrix, populus plenus peccatis, semen nequam, filii scelesti. Dereliquistis Dominum, & indignationem misistis illum sanctum Israel.* In quorum exprobrationem christiani, quando oramus, *Pater noster* dicimus, quia noster esse cœpit, & Judæorum, qui eum reliquerunt, esse desit. Nec peccator populus potest esse filius: sed quibus remissa peccatorum datur, eis filiorum nomen adscribitur, & eis æternitas repromittitur, Domino ipso dicente: *Omnis qui facit peccatum servus est peccati. Servus autem non manet in domo in æternum, filius autem manet in æternum.* Quanta autem Domini indulgentia, quanta circa nos dignationis ejus & bonitatis ubertas; qui sic nos voluerit orationem celebrare in conspectu Dei, ut Deum patrem vocemus, & ut est Christus Dei filius, sic & nos Dei filios nuncupemus? Quod nomen nemo nostrum in oratione auderet attingere, nisi ipse nobis sic permisisset orare. Meminisse itaque, fratres dilectissimi, & scire debemus; quia quando patrem Deum dicimus,

quasi filii Dei agere debemus, ut quomodo nos nobis placemus de Deo patre, sic sibi placeat & ille de nobis. Converteremur quasi Dei templa, ut Deum in nobis constet habitare. Nec sit degener actus noster a spiritu, ut qui cælestes & spirituales esse cœpimus, non nisi spiritalia & cælestia cogitemus & agamus, quia & ipse Dominus Deus dixit: *Eos qui clarificant me, clarificabo; & qui me spernit, spernetur.* Beatus quoque apostolus in epistola sua posuit: *Non estis vestri. Empti enim estis pretio magno. Clarificate & portate Deum in corpore vestro.* Post hoc dicimus: *Sanctificetur nomen tuum.* Non quod optemus Deo, ut sanctificetur orationibus nostris, sed quod petamus ab eo, ut nomen ejus sanctificetur in nobis. Ceterum a quo Deus sanctificatur; qui ipse sanctificat? Sed quia ipse dixit, *Sancti estote, quoniam & ego sanctus sum*, id petimus & rogamus, ut qui in baptismo sanctificati sumus, in eo quod esse cœpimus, perseveremus. Et hoc quotidie deprecamur. Opus est enim nobis quotidiana sanctificatione, ut qui quotidie delinquimus, delicta nostra sanctificatione assidua repurgemus. Quæ autem sit sanctificatio, quæ nobis de Dei dignatione confertur, apostolus prædicat dicens: *Neque fornicarii, neque idolis servientes, neque adulteri, neque molles, neque masculorum appetitores, neque fures, neque fraudulentii, neque ebrii, neque maledici, neque raptores regnum Dei consequentur.* *Et hæc quidem fuistis; sed abluti estis, sed justificati estis, sed sanctificati estis in nomine Domini nostri Jesu Christi, & in spiritu Dei nostri.* Sanctificatos nos dicit in nomine Domini Jesu Christi & in spiritu Dei nostri. Hæc sanctificatio ut in nobis permaneat, oramus. Et quia Dominus & judex noster sanato a se & vivificato comminatur jam non delinquere, ne quid ei deterius fiat, hanc continuis orationibus precem facimus, hoc diebus ac noctibus postulamus, ut sanctificatio & vivificatio, quæ de Dei

gratia

gratia fumitur, ipsius protectione fervetur. Sequitur in oratione: *Adveniat regnum tuum.* Regnum etiam Dei repræsentari nobis petimus, sicuti & nomen ejus ut in nobis sanctificetur, postulamus. Nam Deus quando non regnat, aut apud eum quando incipit, quod & semper fuit, & esse non desinit? Nostrum regnum petimus advenire a Deo nobis repromissum, Christi sanguine & passione quæsitum; ut qui in sæculo ante servivimus, postmodum Christo dominante regnemus, sicut ipse pollicetur & dicit: *Venite benedicti patris mei, percipite regnum quod vobis paratum est ab origine mundi.* Potest vero, fratres dilectissimi, & ipse Christus esse regnum Dei, quem venire quotidie cupimus, cujus adventus ut cito nobis repræsentetur, optamus. Nam cum resurrectio ipse nostra sit, quia in ipso resurgimus, sic & regnum Dei potest ipse intelligi, quia in illo regnaturi sumus. Bene autem regnum Dei petimus, id est, regnum cæleste, quia est & terrestre regnum. Sed qui renuntiavit jam sæculo, major est & honoribus ejus, & regno. Et ideo qui se Deo & Christo dedicat, non terrena, sed cælestia regna desiderat. Continua autem oratione & prece opus est, ne excidamus a regno cælesti, sicut Judæi, quibus hoc prius promissum fuerat, exciderunt, Domino manifestante & probante: *Multi, inquit, venient ab oriente & occidente, & recumbent cum Abraham & Isaac & Jacob in regno calorum. Filii autem regni expellentur in tenebras exteriores. Illic erit ploratio & stridor dentium.* Ostendit quia ante filii regni Judæi erant, quando & filii Dei esse perseverabant. Postquam cessavit circa illos nomen paternum, cessavit & regnum. Et ideo christiani, qui in oratione appellare patrem Deum cœpimus, nos & ut regnum Dei nobis veniat, oramus. Addimus quoque & dicimus: *Fiat voluntas tua sicut in celo & in terra, non ut Deus faciat quod vult, sed ut nos facere possimus,*

quod Deus vult. Nam Deo quis obsistit quo minus quod velit, faciat? sed quia nobis a diabolo obsistitur, quo minus per omnia noster animus atque actus Deo obsequatur, oramus & petimus, ut fiat in nobis voluntas Dei, quæ ut fiat in nobis opus est Dei voluntate, id est, ope ejus & protectione; quia nemo suis viribus fortis est, sed Dei indulgentia & misericordia tutus est. Denique & Dominus infirmitatem hominis quem portabat, ostendens ait: *Pater, si fieri potest, transeat a me calix iste.* Et exemplum discipulis suis tribuens, ut non voluntatem suam, sed Dei faciant, addidit dicens: *Verumtamen non quod ego volo, sed quod tu.* Et alio loco dicit: *Non descendi de calo ut faciam voluntatem meam, sed voluntatem ejus qui misit me.* Quod si filius obaudivit, ut faceret patris voluntatem, quanto magis servus obaudire debet, ut faciat domini voluntatem, sicut in epistola sua Joannes quoque ad faciendam Dei voluntatem hortatur & instruit, dicens: *Nolite diligere mundum neque ea, quæ in mundo sunt. Si quis dilexerit mundum, non est caritas patris in illo; quia omne quod in mundo est, concupiscentia carnis est, & concupiscentia oculorum, & ambitio saculi, quæ non est a patre, sed ex concupiscentia mundi, & mundus transibit & concupiscentia ejus; qui autem fecerit voluntatem Dei, manet in æternum, quomodo & Deus manet in æternum.* Qui in æternum manere volumus, Dei, qui æternus est, voluntatem facere debemus. Voluntas autem Dei est, quam Christus & fecit & docuit. Humilitas in conversatione, stabilitas in fide, verecundia in verbis, in factis justitia, in operibus misericordia, in moribus disciplina, injuriam facere non nosse, & factam posse tolerare, cum fratribus pacem tenere, Deum toto corde diligere, amare in illo quod pater est, timere quod Deus est, Christo nihil omnino præponere, quia nec nobis quidquam ille præposuit, caritati ejus inseparabiliter adherere, erui

ejus

ius fortiter ac fidenter assistere, quando de ejus nomine & honore certamen est, exhibere in sermone constantiam, qua confitemur, in questione fiduciam, qua congregamur, in morte patientiam, qua coronamur. Hoc est coheredem Christi esse velle, hoc est præceptum Dei facere, hoc est voluntatem patris adimplere. Fieri autem petimus voluntatem Dei in cælo & in terra: quod utrumque ad consummationem nostræ incolumitatis pertinet & salutis. Nam cum corpus e terra, & spiritum possideamus e cælo, ipsi terra & cælum sumus; & in utroque, id est, & corpore & spiritu, ut Dei voluntas fiat, oramus. Est enim inter carnem & spiritum colluctatio, & discordantibus adversus se invicem quotidiana congressio, ut non quæ volumus, ipsa faciamus, dum spiritus cælestis & divina querit, caro terrena & secularia concupiscit. Et ideo petimus impense inter duo ista, ope & auxilio Dei concordiam fieri; ut dum & in spiritu & in carne voluntas Dei geritur, quæ per eum renata est, anima fervetur. Quod aperte atque manifeste apostolus Paulus sua voce declarat: *Caro, inquit, concupiscit adversus spiritum, & spiritus adversus carnem. Hac enim invicem adversantur sibi, ut non quæ vultis ipsa faciatis. Manifesta autem sunt opera carnis, quæ sunt adulteria, fornicationes, immunditia, spurcitia, idololatria, veneficia, homicidia, inimicitia, contentiones, amulationes, animositates, provocationes, simulationes, dissensiones, irascas, invidia, ebrietates, comestiones, & his similia, quæ prædico vobis sicut prædixi, quoniam qui talia agunt, regnum Dei non possidebunt. Fructus autem spiritus est caritas, gaudium, pax, magnanimitas, bonitas, fides, mansuetudo, continentia, castitas.* Et iccirco quotidianis immo continuis orationibus hoc precamur, & in cælo & in terra voluntatem circa nos Dei fieri; quia hæc est voluntas Dei, ut terrena cælestibus cedant, spiritalia & divina præ-

valeant. Potest & sic intelligi, fratres dilectissimi, ut quoniam mandat, & monet Dominus etiam inimicos diligere, & pro iis quoque qui nos persequuntur, orare, petamus & pro illis, qui adhuc terra sunt, & necdum cælestes esse cœperunt, ut & circa illos voluntas Dei fiat, quam Christus hominem conservando & redintegrando perfecit. Nam cum discipuli ab eo non jam terra appellentur, sed sal terræ, & apostolus primum hominem vocet de terræ limo, secundum vero de cælo, merito & nos, qui esse debemus patri Deo similes, qui solem suum oriri facit super bonos & malos, & pluit super iustos & iniustos, sic Christo monente oramus & petimus, ut precem pro omnium salute faciamus; ut quomodo in cælo, id est, in nobis, per fidem nostram voluntas Dei facta est, ut essemus e cælo, ita & in terra, hoc est, in illis non credentibus, fiat voluntas Dei, ut qui adhuc sunt prima nativitate terrepi, incipiant esse cælestes, ex aqua & spiritu nati. Procedente oratione postulamus & dicimus: *Panem nostrum quotidianum da nobis hodie.* Quod potest & spiritaliter & simpliciter intelligi, quia & uterque intellectus utilitate divina proficit ad salutem. Nam panis vitæ Christus est, & panis hic omnium non est, sed noster est. Et quomodo dicimus *Pater noster*, quia intelligentium & credentium pater est, sic & panem nostrum vocamus, quia Christus eorum qui corpus ejus contingunt, panis est. Hunc autem panem dari nobis quotidie postulamus, ne qui in Christo sumus, & eucharistiam quotidie ad cibum salutis accipimus, intercedente aliquo graviore delicto, dum abstenti & non communicantes a cælesti pane prohibemur, a Christi corpore separemur, ipso prædicante & monente: *Ego sum panis vitæ qui de calo descendi. Si quis ederit de meo pane, vivet in æternum. Panis autem quem ego dedero, caro mea est pro sæculi vita.* Quando ergo dicit in æternum vive-

vivere, si quis ederit de ejus pane; ut manifestum est eos vivere, qui corpus ejus attingunt, & eucharistiam jure communicationis accipiunt, ita contra timendum est & orandum, ne dum quis abstentus separatur a Christi corpore; procul remaneat a salute, comminante ipso & dicente: *Nisi ederitis carnem filii hominis & biberitis sanguinem ejus, non habebitis vitam in vobis.* Et ideo panem nostrum, id est, Christum, dari nobis quotidie petimus, ut qui in Christo manemus & vivimus, a sanctificatione ejus & corpore non recedamus. Potest vero & sic intelligi, ut qui sæculo renuntiavimus, & divitias ejus & pompas fide gratiæ spiritualis abjecimus, cibum nobis tantum petamus & victum, quando instruat Dominus & dicat: *Qui non renuntiat omnibus quæ sunt ejus, non potest meus discipulus esse.* Qui autem Christi cœpit esse discipulus, secundum magistri sui vocem renuntians omnibus, diurnum debet cibum petere, nec in longum desideria petitionis extendere, ipso iterum Domino præscribente & dicente: *Nolite in crastinum cogitare. Crastinus enim ipse cogitabit sibi. Sufficit dies malitia sua.* Merito ergo Christi discipulus victum sibi in diem postulat, qui de crastino cogitare prohibetur; quia & contrarium sibi sit & repugnans, ut quæramus in sæculo diu vivere, qui petimus regnum Dei velociter advenire. Sic & beatus apostolus monet, formans & corroborans spei nostræ ac fidei firmitatem. *Nihil, inquit, intulimus in hunc mundum, verum nec auferre possumus. Habentes itaque exhibitionem & tegumentum, his contenti sumus. Qui autem volunt divites fieri, incidunt in tentationem & mûscipulam, & desideria multa & nocentia, quæ mergunt hominem in perditionem & in interitum. Radix enim omnium malorum est cupiditas, quam quidam appetentes naufragaverunt a fide, & inseruerunt se doloribus multis.* Docet non tantum contemnendas, sed & periculosas esse divitias, illic esse

radicem malorum blandientium, cæcitatem mentis humanæ occulta deceptione fallentium. Unde & divitem stultum sæculares copias cogitantem, & se exuberantium fructuum largitate jactantem redarguit Deus, dicens: *Stulte, hac nocte expostulatur anima tua. Quæ ergo parasti cujus erunt? Lætabatur stultus in fructibus ipsa nocte moriturus; & cui vita jam deerat, victus abundantiam cogitabat.* Contra autem Dominus perfectum & consummatum docet fieri qui, omnibus suis venditis, atque in usum pauperum distributis, thesaurum sibi condat in cælo. Eum dicit posse se sequi, & gloriam dominicæ passionis imitari, qui expeditus & succinctus nullis laqueis rei familiaris involvitur, sed solutus ac liber facultates suas ad Deum ante præmissas ipse quoque comitatur. Ad quod ut possit unusquisque nostrum parare se; sic discat orare, & de orationis lege qualis esse debeat, noscere. Neque enim deesse quotidianus cibus potest iusto, cum scriptum sit: *Non occidet Dominus fame animam justam.* Et iterum; *Junior fui, & senui; & non vidi justum derelictum, neque semen ejus querens panem.* Item Dominus promittat & dicat: *Nolite cogitare dicentes; Quid edamus, aut quid bibemus, aut quid vestiemur? Hac enim nationes querunt. Scit autem pater vester quia horum omnium indigetis. Quarite primum regnum Dei & justitiam ejus, & hæc omnia apponentur vobis.* Quærentibus regnum & justitiam Dei omnia promittit apponi. Nam cum Dei sunt omnia, habenti Deum nihil deerit, si Deo ipse non desit. Sic Danieli in leonum lacu jussu regis incluso, prandium divinitus procuratur, & inter feras esurientes & parcentes homo Dei pascitur. Sic alitur Helias in fuga; & in solitudine corvis ministrantibus, & volucris cibum sibi apportantibus, in persecutione nutritur. Atque, o humanæ malitiæ detestanda crudelitas, feræ parcent, aves pascunt, & homines insi-

diantur

liantur & ſerviunt. Poſt hæc & pro peccatis noſtris
 leprecamur, dicentes: *Et remitte nobis debita noſtra, ſi-
 ut & nos remittimus debitoribus noſtris.* Poſt ſubſidium
 ſibi petitur & venia delicti; ut qui a Deo paſcitur,
 a Deo vivat, nec tantum præſenti & temporali vitæ,
 ſed & æternæ conſulatur; ad quam venire poteſt, ſi
 peccata donentur: quæ debita Dominus appellat, ſi-
 cut in evangelio ſuo dicit: *Dimiſi tibi omne debitum,*
quia me rogavi. Quam neceſſarie autem, quam provi-
 denter & ſalutaliter admonemur, quod peccatores
 ſumus, qui pro peccatis rogare compellimur, ut dum
 indulgentia de Deo petitur, conſcientiæ ſuæ animus
 recordetur. Ne quis ſibi quaſi innocens placeat, &
 ſe extollendo plus pereat, inſtruitur & docetur pec-
 care ſe quotidie, dum quotidie pro peccatis jubetur
 orare. Sic denique & Joannes in epiſtola ſua monet
 licens; *Si dixerimus quia peccatum non habemus, nos ip-
 ſos decipimus, & veritas in nobis non eſt. Si autem con-
 feſſi fuerimus peccata noſtra, fidelis & juſtus eſt Dominus,*
qui nobis peccata dimittat. In epiſtola ſua utrumque
 complexus eſt, quod & rogare pro peccatis debea-
 mus, & impetremus indulgentiam cum rogamus.
 Ideo & fidelem dixit Dominum ad dimittenda pecca-
 ta, fidem pollicitationis ſuæ reſervantem. Quia qui
 orare nos pro debitis & peccatis docuit, paternam
 miſericordiam promiſit, & veniam ſecuturam. Ad-
 unxit plane & addidit legem certa nos conditione &
 poſitione conſtringens, ut ſic nobis dimitti debita
 poſtulemus, ſecundum quod & ipſi debitoribus no-
 ſtris dimittimus, ſcientes impetrari non poſſe, quod
 pro peccatis petimus, niſi & ipſi circa debitores no-
 ſtros paria fecerimus. Idcirco & alio in loco dicit;
In qua menſura menſi fueritis, in ea remetietur vobis.
 Et qui ſervus poſt dimiſſum ſibi a domino omne debi-
 tum conſervo ſuo noluit ipſe dimittere, in carcerem
 religatur. Quia indulgere conſervo ſuo noluit, quod
 ſibi

sibi a Domino indultum fuerat, amisit. Quæ adhuc fortius Christus in præceptis suis majore censuræ suæ vigore proponit: *Cum steteritis, inquit, ad orationem, remittite si quid habetis adversus aliquem, ut & pater vester qui in calis est, remittat peccata vestra vobis. Si autem vos non remiseritis, neque pater vester qui in calis est, remittet vobis peccata vestra.* Excusatio tibi nulla in die judicii superest, cum secundum tuam sententiam judiceris, & quod feceris, hoc & ipse patiaris. Pacificos enim & concordēs atque unanimes esse in domo sua Deus præcipit, & quales nos fecit secunda nativitate, tales vult renatos perseverare; ut qui filii Dei esse cœpimus, in Dei pace maneamus, & quibus spiritus unus est, unus sit & animus & sensus. Sic nec sacrificium Deus recipit dissidentis, & ab altari revertentem prius fratri reconciliari jubet, ut pacificis precibus & Deus possit esse pacatus. Sacrificium Deo majus est pax nostræ, & fraterna concordia, & de unitate patris & filii & spiritus sancti plebs adunata. Neque enim in sacrificiis quæ Abel & Cain primi obtulerunt, munera eorum Deus, sed corda intuebatur; ut ille placeret in munere, qui placebat in corde. Abel pacificus & justus, dum Deo sacrificat innocenter, docuit & ceteros quando ad altare munus offerunt, sic venire cum Dei timore, cum simplici corde, cum lege justitiæ, cum concordie pace. Merito ille dum in sacrificio Dei talis est, ipse postmodum sacrificium Deo factus est, ut martyrium primus ostendens, initiaret sanguinis sui gloria dominicam passionem, qui & justitiam Domini habuerat & pacem. Tales denique a Domino coronantur, tales in die judicii cum Domino judicabunt. Ceterum discordans & dissidens, & pacem cum fratribus non habens, secundum quod beatus apostolus & scriptura sancta testatur, nec si pro nomine Christi occisus fuerit, crimen dissensionis fraternæ poterit evadere.

evadere, quia sicut scriptum est: *Qui fratrem suum odit, homicida est, nec ad regnum celorum pervenit, aut cum Deo vivit homicida*, non potest esse cum Christo, qui imitator Judæ maluit esse quam Christi. Quale delictum est, quod nec baptismo sanguinis potest abluī? Quale crimen est, quod martyrio non potest expiari? Illud quoque necessarie admonet Dominus, ut in oratione dicamus: *Et ne nos patiaris induci in tentationem*. Qua in parte ostenditur nihil contra nos adversarium posse, nisi Deus ante permiserit, ut omnis timor noster, & devotio atque observatio ad Deum convertatur; quando in tentationibus nostris nihil malo liceat, nisi potestas inde tribuatur. Probat scriptura divina, quæ dicit: *Venit Nabuchodonosor rex Babylonia in Hierusalem & expugnabat eam, & dedit eam Dominus in manu ejus*. Datur autem potestas adversus nos malos secundum nostra peccata, sicut scriptum est: *Quis dedit in direptionem Jacob & Israel eis qui prædantur illum? Nonne Deus cui peccaverunt, & nolebant in viis ejus ambulare, neque audire legem ejus, & superduxit super eos iram animationis suæ?* Et iterum Salomone peccante, & a præceptis atque a viis Domini recedente positum est: *Et excitavit Dominus satanam ipsi Salomoni*. Potestas vero dupliciter adversus nos datur, vel ad pœnam, cum delinquimus, vel ad gloriam, cum probamur: sicut de Job factum videmus, manifestante Deo & dicente: *Ecce omnia quaecumque habet, in manus tuas do; sed ipsum cave ne tangas*. Et Dominus in evangelio suo loquitur tempore passionis: *Nullam haberes adversum me potestatem, nisi datum esset tibi desuper*. Quando autem rogamus ne in tentationem veniamus, admonemur infirmitatis & imbecillitatis nostræ, dum sic rogamus, ne quis se insolenter extollat, ne quis sibi superbe atque arroganter aliquid assumat, ne quis sibi aut confessionis aut passionis gloriam suam ducat, cum Dominus ipse hu-

mili-

militatem docens dixerit: *Vigilate, & orate ne venia-*
tis in tentationem. Spiritus quidem promptus est, caro
autem infirma; ut dum præcedit humilis & summissa
 confessio, & datur totum Deo, quidquid suppliciter
 cum timore & honore Dei petitur, ipsius pietate præ-
 stetur. Post ista omnia in consummatione orationis ve-
 nit clausula, universas petitiones & preces nostras
 collecta brevitate concludens. In novissimo enim
 ponimus, *sed libera nos a malo*, comprehendentes ad-
 versa cuncta, quæ contra nos in hoc mundo molitur
 inimicus; a quibus potest esse fida & firma tutela, si
 nos Deus liberet, si deprecantibus atque imploranti-
 bus opem suam præstet. Quando autem dicimus, *li-*
bera nos a malo, nihil remanet, quod ultra adhuc de-
 beat postulari, quando semel protectionem Dei adver-
 sus malum petamus; qua impetrata, contra omnia
 quæ diabolus & mundus operantur, securi stamus &
 tuti. Quis enim ei de sæculo metus est, cui in sæcu-
 lo Deus tutor est? Quid mirum, fratres dilectissimi,
 si oratio talis est quam Deus docuit, qui magisterio
 suo omnem precem nostram salutari sermone brevia-
 vit? Hoc jam per Esaïam prophetam fuerat ante præ-
 dictum, cum plenus spiritu sancto de Dei majestate
 ac pietate loqueretur. *Verbum consummans, inquit,*
& breviens in iustitia, quoniam sermonem breviatum fa-
ciat Deus in toto orbe terræ. Nam cum Dei sermo Do-
 minus noster Jesus Christus omnibus venerit, & col-
 ligens doctos pariter & indoctos, omni sexui atque
 ætati præcepta salutis ediderit, præceptorum suorum
 fecit grande compendium, ut in disciplina cælesti dis-
 centium memoria non laboraret, sed quod esset sim-
 plici fidei necessarium, velociter disceret. Sic cum
 doceret quid sit vita æterna, sacramentum vitæ mag-
 na & divina brevitate complexus est, dicens: *Hæc est*
autem vita æterna, ut cognoscant te solum & verum Deum,
& quem misisti Jesum Christum. Item cum de lege &
 prophe-

prophetis præcepta prima & majora decerperet: *Audi, inquit, Israel. Dominus Deus tuus Deus unus est. Et diliges Dominum Deum tuum de toto corde tuo, & de tota anima tua, & de tota virtute tua. Hoc est primum mandatum. Et secundum simile est huic: Diliges proximum tibi tamquam te ipsum. In his duobus præceptis tota lex pendet & propheta. Et iterum: Quicumque volueritis ut faciant vobis homines bona, ita & vos facite illis. Hac est enim lex & propheta. Nec verbis tantum, sed & factis Dominus orare nos docuit, ipse orans frequenter & deprecans, & quid facere nos oporteret, exempli sui contestatione demonstrans, sicut scriptum est: Ipse autem fuit sedens in solitudinem & adorans. Et iterum: Exiit in montem orare, & fuit pernoctans in oratione Dei. Quod si ille orabat, qui sine peccato erat, quanto magis peccatores oportet orare? Et si ille per totam noctem jugiter vigilans, continuis precibus orabat, quanto nos magis in frequentanda oratione debemus nocte vigilare? Orabat autem Dominus & rogabat, non pro se, quid enim pro se innocens precaretur? sed pro delictis nostris, sicut & ipse declarat, cum dicit ad Petrum: Ecce satanas postulavit ut vos vexaret quomodo trititum. Ego autem rogavi pro te, ne deficiat fides tua. Et postmodum pro omnibus patrem deprecatur dicens: Non pro his autem rogo solis, sed & pro illis qui credituri sunt per verbum ipsorum in me, ut omnes unum sint, sicut tu pater in me & ego in te, ut & ipsi in nobis unum sint. Magna Domini propter salutem nostram benignitas pariter & pietas, ut non contentus quod nos sanguine suo redimeret, adhuc pro nobis amplius & rogaret. Rogantis autem desiderium videte quod fuerit, ut quomodo unum sunt pater & filius, sic & nos in ipsa unitate maneamus. Ut hinc quoque possit intelligi quantum delinquat, qui unitatem scindit & pacem, cum pro hoc & rogaverit Dominus, volens scili-*

scilicet sic plebem suam salvam fieri, & in pace vivere, cum sciret ad regnum Dei discordiam non venire. Quando autem stamus ad orationem, fratres dilectissimi, vigilare & incumbere ad preces toto corde debemus. Cogitatio omnis carnalis & secularis abscedat, nec quidquam tunc animus, quam id solum cogitet, quod precatur. Ideo & sacerdos ante orationem præfatione præmissa parat fratrum mentes dicendo: *Sursum corda*; ut dum respondet plebs, *habemus ad Dominum*, admoneatur nihil aliud se quam Dominum cogitare debere. Claudatur contra adversarium pectus, & soli Deo pateat, nec ad se hostem Dei tempore orationis adire patiatur. Obrepat enim frequenter & penetrat, & subtiliter fallens preces nostras a Deo avocat, ut aliud habeamus in corde, aliud in voce, quando intentione sincera Dominum debeat non vocis sonus, sed animus & sensus, orare. Quæ autem segnitia est, alienari & rapi ineptis cogitationibus & prophanis, cum Dominum deprecari, quasi sit aliud quod magis debeas cogitare, quam quod cum Deo loqueris? Quomodo te audiri a Deo postulas, cum te ipse non audias? Vis esse Deum memorem tui cum rogas, quando tu ipse memor tui non sis? Hoc est ab hoste in totum non cavere. Hoc est, quando oras Deum, majestatem Dei negligentia orationis offendere. Hoc est vigilare oculis & corde dormire, cum debeat christianus & cum dormit oculis, corde vigilare, sicut scriptum est ex persona ecclesiæ loquentis in cantico canticorum: *Ego dormio, & cor meum vigilat*. Quapropter sollicite & caute apostolus admonet dicens: *Instate orationi vigilantes in ea*, docens scilicet & ostendens, eos impetrare quod postulant de Deo posse, quos Deus videat in oratione vigilare. Orantes autem non infructuosis nec nudis precibus ad Deum veniant. Inefficax petitio est, cum precatur Deum sterilis oratio. Nam cum

cum omnis arbor non faciens fructum excidatur, & in ignem mittatur, utique & sermo non habens fructum promereri Deum non potest, quia nulla est operatione fecundus. Et ideo scriptura divina instruit dicens: *Bona est oratio cum jejuniis & eleemosyna.* Nam qui in die iudicii præmium pro operibus & eleemosynis redditurus est, hodie quoque ad orationem cum operatione venienti benignus auditor est. Sic denique Cornelius centurio cum oraret, meruit audiri. Fuit enim faciens multas eleemosynas in plebem, & semper orans Deum. Huic circa horam nonam oranti astitit angelus, testimonium reddens sui operis, & dicens: *Corneli, orationes tuae & eleemosynae tuae ascenderunt ad memoriam coram Deo.* Cito orationes ad Deum ascendunt, quas ad Deum merita nostri operis imponunt. Sic & Raphael angelus Tobiae oranti semper, & semper operanti testis fuit dicens: *Opera Dei revelare & confiteri honorificum est.* Nam quando orabas tu & Sarra, ego obtuli memoriam orationis vestrae in conspectu claritatis Dei. Et cum sepelires tuos mortuos simpliciter, & quia non es cunctatus exsurgere & derelinquere prandium tuum, sed abisti & condidisti mortuum, missus sum tentare te; iterum me misit Deus curare te & Sarram nurum tuam. Ego enim sum Raphael, unus ex septem angelis iustis, qui assistimus & conversamur ante claritatem Dei. Per Esaiam quoque Dominus admonet, & docet similia contestans: *Solve, inquit, omnem nodum iniquitatis, resolve suffocationes impotentium commerciorum. Dimitte quassatos in requiem, & omnem conflagrationem iniquitatis dissipa: frange esurienti panem tuum, & egenos sine tecto induc in domum tuam. Si videris nudum, vesti; & domesticos seminis tui non despicias. Tunc erumpet temperaneum lumen tuum, & vestimenta tua cito orientur, & praebit ante te iustitia, & claritas Dei circumdabit te. Tunc exclamabis, & Deus exaudiet te, & dum adhuc loqueris, dicet: Ecce adsum. Adesse se re-*

S. Cypriani Tom. I.

B b

mittit,

mittit, & audire ac protegere se eos dicit, qui iniustitiæ nodos de corde solventes, & eleemosynas circa domesticos Dei secundum ejus præcepta facientes, dum audiunt quod Deus præcipit fieri, ipsi quoque a Deo merentur audiri. Beatus apostolus Paulus in necessitate pressuræ adjutus a fratribus, opera bona quæ fiunt, sacrificia Dei dixit esse. *Saturatus sum, inquit, recipiens ab Epaphrodito ea quæ a vobis missa sunt, odorem suavitatis, sacrificium acceptum & placitum Deo.* Nam quando quis miseretur pauperis, Deum fenerat; & qui dat minimis, Deo donat, spiritualiter Deo suavitatis odorem sacrificat. In orationibus vero celebrandis invenimus observasse cum Daniele tres pueros in fide fortes, & in captivitate victores horam tertiam, sextam, nonam, sacramento scilicet trinitatis, quæ in novissimis temporibus manifestari habebat. Nam & prima hora in tertiam veniens consummatum numerum trinitatis ostendit. Itemque ad sextam quarta procedens declarat alteram trinitatem. Et quando a septima nona completur, per ternas horas trinitas perfecta numeratur. Quæ horarum spatia jampridem spiritualiter determinantes adoratores Dei, statutis & legitimis ad precem temporibus servabant. Et manifestata postmodum res est sacramenta olim fuisse, quod ante sic justi precabantur. Nam super discipulos hora tertia descendit Spiritus sanctus, qui gratiam dominicæ repromissionis implevit. Item Petrus hora sexta in tectum superius ascendens, signo pariter & voce Dei monentis instructus est, ut omnes ad gratiam salutis admitteret, cum de emundandis gentilibus ante dubitaret. Et Dominus hora sexta crucifixus, ad nonam peccata nostra sanguine suo abluït, & ut redimere & vivificare nos posset, tunc victoriam suam passione perfecit. Sed nobis, fratres dilectissimi, præter horas antiquitus observatas, orandi nunc & spatia & sacramenta creverunt. Nam

&

& mane orandum est, ut resurrectio Domini matutina oratione celebretur. Quod olim Spiritus sanctus designabat in psalmis, dicens: *Rex meus & Deus meus, quoniam ad te orabo Domine; mane exaudies vocem meam, mane assistam tibi, & contemplantur te.* Et iterum per prophetam loquitur Dominus: *Diluculo vigilabunt ad me dicentes: Eamus & revertamur ad Dominum Deum nostrum.* Recedente item sole ac die cessante necessario rursus orandum est. Nam quia Christus sol verus & dies est verus, sole ac die sæculi recedente, quando oramus & petimus, ut super nos lux denuo veniat, Christi precamur adventum, lucis æternæ gratiam præbiturum. Christum autem, diem dictum, declarat in psalmis Spiritus sanctus: *Lapis, inquit, quem reprobaverunt ædificantes, hic factus est in caput anguli. A Domino factus est iste, & est admirabilis in oculis nostris. Iste est dies quem fecit Dominus, ambulemus & jucundemur in eo.* Item quod sol appellatus sit, Malachias propheta testatur dicens: *Vobis autem, qui timeatis nomen Domini, oriatur sol justitiæ, & in alis ejus curatio est.* Quod si in scripturis sanctis sol verus & dies verus est Christus, hora nulla a christianis excipitur, quo minus frequenter ac semper Deus debeat adorari; ut qui in Christo hoc est in sole & in die vero sumus, insistamus per totum diem precibus & oremus, & quando mundi lege decurrens vicibus alternis nox revoluta succedit, nullum de nocturnis tenebris esse orantibus damnum potest, quia filiis lucis & in noctibus dies est. Quando enim sine lumine est, cui lumen in corde est? Aut quando sol ei & dies non est, cui sol & dies Christus est? Qui autem in Christo, hoc est in lumine, semper sumus, nec noctibus ab oratione cessamus. Sic Anna vidua sine intermissione rogans semper & vigilans, perseverabat in promerendo Deo, sicut in evangelio scriptum est: *Non recedebat, inquit, de templo, jejuniis & ora-*

tionibus serviens nocte ac die. Viderint vel gentiles, qui necdum illuminati sunt, vel Judæi, qui deserto lumine in tenebris remanserunt. Nos, fratres dilectissimi, qui in Domini luce semper sumus, qui meminimus & tenemus, quid esse accepta gratia cœperimus, computemus noctem pro die. Ambulare nos credamus semper in lumine, non impediamur a tenebris quas evasimus. Nulla sint horis nocturnis preteritum damna, nulla orationum pigra & ignava dispendia. Per Dei indulgentiam recreati spiritaliter & renati imitemur, quod futuri sumus. Habituri in regno sine interventu noctis solum diem; sic nocte quasi in lumine vigilemus. Oraturi semper & acturi gratias Deo, hic quoque orare & gratias agere non desinamus.



LIBER

AD DEMETRIANUM.

Oblatrantem te, & adversus Deum, qui unus & verus est, ore sacrilego & verbis impiis obstrepentem frequenter, Demetriane, contemseram, verecundius ac melius existimans errantis imperitiam silentio spernere; quam loquendo dementis insaniam provocare. Nec hoc sine magisterii divini auctoritate faciebam, cum scriptum sit: *In aures imprudentis noli quidquam dicere; ne quando audierit, irrideat sensatos sermones tuos.* Et iterum: *Noli respondere imprudenti ad imprudentiam ejus, ne similis fias illi.* Et sanctum quoque jubeamur intra conscientiam nostram tenere, nec inculcandum porcis, & canibus exponere, loquente Domino & dicente: *Ne dederitis sanctum canibus, neque miseritis margaritas vestras ante porcos,*

cos, ne inculcent eas pedibus, & conveni elidant vos. Nam cum ad me sæpe studio magis contradicendi, quam voto discendi venires, & clamoris vocibus personans, malles tua impudenter ingerere, quam nostra patienter audire, ineptum videbatur congregi tecum, quando facilius esset & levius, turbulenti maris concitos fluctus clamoribus retundere, quam tuam rabiem tractatibus coercere. Certe & labor irritus & nullus effectus, offerre lumen cæco, sermonem furdo, sapientiam bruto; cum nec sentire brutus possit, nec cæcus lumen admittere, nec surdus audire. Hæc considerans sæpe continui, & impatientem patientia vici, cum nec docere indocilem possem, nec impium religione comprimere, nec furentem lenitate cohibere. Sed enim cum dicas plurimos conqueri, quod bella crebrius surgant, quod lues, quod fames sæviant, quodque imbres & pluvias serena longa suspendant, nobis imputari, tacere ultra non oportet; ne jam non verecundiæ, sed diffidentiae esse incipiat, quod tacemus, & dum criminationes falsas contemnimus refutare, videamur crimen agnoscere. Respondeo igitur & tibi, Demetriane, pariter & ceteris quos tu forsitan concitasti, & adversum nos odia tuis maledicis vocibus seminando, comites tibi plures radicis, atque originis tuæ pululatione fecisti; quos tamen sermonis nostri admittere credo rationem. Nam qui ad malum motus est mendacio fallente, multo magis ad bonum movebitur veritate cogente. Dixisti per nos fieri, & quod nobis debeant imputari omnia ista, quibus nunc mundus quatitur & urgetur, quod dii vestri a nobis non colantur. Qua in parte, quia ignarus divinæ cognitionis & veritatis alienus es, illud primo in loco scire debes, senuisse jam mundum, non illis viribus stare, quibus prius steterat, nec vigore & robore eo valere, quo antea prævalebat. Hoc etiam nobis ta-

centibus, & nulla de scripturis sanctis prædicationibusque divinis documenta promentibus, mundus ipse jam loquitur, & occasum sui rerum labentium probatione testatur. Non hieme nutriendis feminibus tanta imbrium copia est, non frugibus æstate torrendis solis tanta flagrantia est, nec sic vernante temperie sata læta sunt, nec adeo arboreis fetibus autumnæ fecunda sunt. Minus de effossis & fatigatis montibus eruuntur marmorum crustæ, minus argenti & auri opes suggerunt exhausta jam metalla, & pauperes venæ breviantur in dies singulos, & decrescunt, deficit in arvis agricola, in mari nauta, miles in castris, innocentia in foro, justitia in judicio, in amicitiiis concordia, in artibus peritia, in moribus disciplina. Putasne tu tantam posse substantiam rei senescentis existere, quantum prius potuit novella adhuc & vegeta juventa pollere? Minuatur necesse est, quidquid sine jam proximo in occidua & extrema devertit. Sic sol in occasu suo radios minus claro & igneo splendore jaculatur, sic declinante jam cursu, exoletis cornibus luna tenuatur, & arbor quæ fuerat ante viridis & fertilis, arescentibus ramis fit postmodum sterili senectute deformis, & fons qui exundantibus prius venis largiter profluebat, senectute deficiens, vix modico sudore distillat. Hæc sententia mundo data est, hæc Dei lex est, ut omnia orta occidant, & aucta senescant, & infirmentur fortia, & magna minuantur, & cum infirmata & diminuta fuerint, finiantur. Christianis imputas, quod minuantur singula mundo senescente. Quid si & senes imputent christianis, quod minus valeant in senectute, quod non perinde ut prius vigeant auditu aurium, cursu pedum, oculorum acie, virium robore, succo viscerum, mole membrorum? & cum olim ultra octingentos, & nongentos annos vita hominum longæva procederet, vix nunc possit ad centenarium numerum

rum perveniri? Canos videmus in pueris, capilli deficiunt antequam crescant; nec ætas in senectute definit, sed incipit a senectute. Sic in ortu adhuc suo ad finem nativitas properat, sic quodcumque nunc nascitur, mundi ipsius senectute degenerat. Ut nemo mirari debeat singula in mundo cœpisse deficere, quando totus ipse jam mundus in defectione sit & in fine. Quod autem crebrius bella continuant, quod sterilitas & fames sollicitudinem cumulant, quod sævientibus morbis valetudo frangitur, quod humanum genus luis populatione vastatur: & hoc scias esse prædictum, in novissimis temporibus multiplicari mala, & adversa variari, & appropinquante jam judicii die magis ac magis in plagas generis humani censuram Dei indignantis accendi. Non enim, sicut tua falsa querimonia & imperitia veritatis ignara jactat & clamat, ista accidunt quod dii vestri a nobis non colantur, sed quod a vobis non colatur Deus. Nam cum ipse sit mundi dominus & rector, & cuncta arbitrio ejus & nutu gerantur, nec quidquam fieri possit, nisi quod aut fecerit, aut fieri ipse permiserit, utique quando ea fiunt, quæ iram Dei indignantis ostendunt, non propter nos fiunt, a quibus Deus collitur, sed delictis & meritis vestris irrogantur; a quibus Deus omnino nec quæritur, nec timetur, nec relictis vanis superstitionibus religio vera cognoscitur; ut qui Deus unus est omnibus, unus colatur ab omnibus & rogetur. Ipsum denique audi loquentem, ipsum voce divina instruente nos pariter ac monente: *Dominum Deum tuum adorabis, inquit, & illi soli servies.* Et iterum: *Non erunt tibi dii alii absque me.* Et iterum: *Nolite ambulare post deos alienos ut serviatis eis, & ne adoraveritis eos; & ne incitetis me in operibus manuum vestrarum ad disperdendos vos.* Propheta item Spiritu sancto plenus contestatur & denuntiat iram Dei, dicens: *Hac dicit Dominus omnipotens: Eo quod domus mea deserta est, &*

B b 4

autem

autem seditamini unusquisque in domum suam, propterea abstinebit calum a rore, & terra subtrahet procreationes suas, & inducam gladium super terram, & super frumentum, & super vinum, & super oleum, & super homines, & super pecora, & super omnes labores manuum eorum. Item propheta alius repetit & dicit: *Et pluam super unam civitatem, & super aliam non pluam. Pars una compluetur, & pars super quam non pluerò, arefiet. Et congregabuntur duæ & tres civitates in unam civitatem potandæ aquæ causa, nec satiabuntur; & non convertimini ad me, dicit Dominus.* Indignatur ecce Dominus & irascitur, & quod ad eum non convertamini comminatur; & tu miraris aut quereris in hac obstinatione & contemtu vestro, si rara desuper pluvia descendat, si terra situ pulveris squaleat, si vix jejunas & pallidas herbas sterilis gleba producat, si vineam debilitet grando cædens, si oleam detruncet turbo subvertens, si fontem siccitas statuat; aerem pestilens aura corrumpat, hominem morbida valetudo consumat, cum omnia ista peccatis provocantibus veniant, & plus exacerbetur Deus, quando nihil talia & tanta proficiant. Fieri enim ista vel ad disciplinam contumacium, vel ad pœnam malorum declarat in scripturis sanctis idem Deus, dicens: *Sine causa percussi filios vestros, disciplinam non exceperunt.* Et propheta devotus ac dicatus Deo ad hæc eadem respondet, & dicit: *Verberasti eos, nec doluerunt; flagellasti eos, nec valuerunt accipere disciplinam.* Ecce irrogantur divinitus plagæ, & nullus Dei metus est. Ecce verbera desuper & flagella non desunt, & trepidatio nulla, nulla formido est. Quid si non intercederet rebus humanis vel ista censure, quanto adhuc major in hominibus esset audacia, facinorum impunitate secunda? Quereris quod minus nunc tibi uberes fontes, & auræ salubres, & frequens pluvia, & fertilis terra obsequium præbeant, quod non ita utilitatibus tuis & voluptatibus elementa deserviant. Tu enim Deo servis, per quem

quem tibi cuncta deserviunt, famularis illi, cujus nutu tibi universa famulantur. Ipse de servo tuo exigis servitutem, & homo hominem parere tibi & obedire compellis. Et cum sit vobis eadem sors nascendi, conditio una moriendi, corporum materia consimilis, animarum ratio communis, æquali jure & pari lege vel veniatur in istum mundum, vel de mundo postmodum recedatur: tamen nisi tibi pro arbitrio tuo serviatur, nisi ad voluntatis obsequium pareatur, imperiosus & nimius servitutis exactor, flagellas, verberas, fame, siti, nuditate, ferro etiam frequenter & carcere affligis & crucias; & non agnoscis miser Dominum Deum tuum, cum sic exerceas ipse dominatum? Merito ergo incurstantibus plagis non desunt Dei flagella nec verbera: quæ cum nihil istic promoveant, nec ad Deum singulos tanto cladium terrore convertant, manet postmodum carcer æternus, & jugis flamma, & pœna perpetua; nec audietur illic rogantium gemitus, quia nec hic Dei indignantis terror auditus est, qui per prophetam clamat & dicit: *Audite sermonem Domini, filii Israel, quia judicium est Domini adversus incolas terræ, eo quod neque misericordia, neque veritas, neque agnitio Dei sit super terram, sed execratio, & mendacium, & cædes, & furtum, & adulterium diffusum est super terram, sanguinem sanguini supermiscunt. Idcirco terra lugebit cum universis incolis suis, cum bestiis agri, cum serpentibus terræ, cum volucribus celi, & deficient pisces maris, ut nemo judicet, nemo revincat.* Indignari se Deus dicit & irasci, quod agnitio Dei non sit in terris, & Deus non agnoscitur nec timetur. Delicta mendaciorum, libidinum, fraudium, crudelitatis, impietatis, furoris Deus increpat & incusat, & ad innocentiam nemo convertitur. Fiunt ecce, quæ verbis Dei ante prædicta sunt, nec quisquam fide præsentium, ut in futurum consulat, admonetur. Inter ipsa adversa quibus vix coartata & conclusa

anima respirat, vacat malos esse, & in periculis tantis non de se magis, sed de altero judicare. Indignari ni indignari Deum, quasi aliquid boni male vivendo mereamini, quasi non omnia ista quæ accidunt, minora adhuc sint, & leviora peccatis vestris. Qui alios judicas, aliquando & tu esto tui iudex, conscientia tua latebras intueri, immo (quia nullus jam delinquendi metus vel pudor est, & sic peccatur, quasi magis per ipsa peccata placeatur) qui perspicuus & nudus videris a cunctis, & ipse te respice. Aut enim superbia inflatus es, aut avaritia rapax, aut iracundia sævus, aut alea prodigus, aut vinolentia temulentus, aut livore invidus, aut libidine incestus, aut crudelitate violentus; & miraris in pœnas generis humani iram Dei crescere, cum crescat quotidie quod puniatur? Hostem quereris exsurgere, quasi, etsi hostis desit, esse pax inter ipsas togas possit. Hostem quereris exsurgere, quasi non etsi externa de barbaris arma, & pericula comprimantur, ferocius intus & gravius, de calumniis & injuriis potentium civium, domesticæ impugnationis tela grassentur. De sterilitate & fame quereris, quasi famem majorem siccitas quam rapacitas faciat, quasi non de captatis annonarum incrementis & pretiorum cumulis flagrantior inopiæ ardor excrescat. Quereris claudi imbribus cælum, cum sic horrea claudantur in terris. Quereris nunc minus nasci, quasi quæ nata sunt, indigentibus præbeantur. Pestem & luem criminaris, cum peste ipsa & lue vel detecta sint, vel aucta crimina singulorum, dum nec infirmis exhibetur misericordia, & defunctis avaritia inhiat ac rapina. Idem ad pietatis obsequium timidi, ad impia lucra temerarii, fugientes morientium funera, & appetentes spolia mortuorum, ut appareat in ægritudine sua miseros ad hoc forsitan derelictos esse, ne possint, dum curantur, evadere. Nam perire ægrum voluit, qui censum pereuntis invadit.

Tantus

Tantus cladum terror dare non potest innocentiae disciplinam, & inter populum frequenti strage morientem, nemo considerat se esse mortalem. Passim discurretur, rapitur, occupatur. Prædandi dissimulatio nulla, nulla cunctatio. Quasi liceat, quasi oporteat, quasi ille qui non rapit, damnum & dispendium proprium sentiat, sic unusquisque rapere festinat. In latronibus est utcumque aliqua scelerum verecundia, avias fauces, & desertas solitudines diligunt, & sic illic delinquitur, ut tamen delinquentium facinus tenebris & nocte veletur. Avaritia palam sævit, & ipsa audacia sua tuta, in fori luce abruptæ cupiditatis arma prostituit. Inde falsarii, inde venefici, inde in media civitate sicarii, tam ad peccandum præcipites, quam impune peccantes. A nocente crimen admittitur, nec innocens qui vindicet, invenitur. De accusatore vel iudice metus nullus. Impunitatem consequuntur mali, dum modesti tacent, timent conscii, veneunt iudicaturi. Et ideo per prophetam divino spiritu & instinctu rei veritas promittitur, certa & manifesta ratione monstratur Deum posse adversa prohibere, sed ne ille subveniat, merita peccantium facere: *Numquid, ait, non valet manus Domini ut salvos vos faciat, aut gravavit aurem ut non exaudiat? Sed peccata vestra inter vos & Deum separant, & propter delicta vestra avertit faciem suam a vobis, ne misereatur.* Peccata itaque & delicta reputentur, conscientiae vulnera cogitentur; & desinet unusquisque de Deo vel de nobis conqueri, si quod patitur, intelligat se mereri. Ecce id ipsum quale est, unde nobis vobiscum maxime sermo est, quod nos infestatis innoxios; quod in contumeliam Dei impugnatis, atque opprimitis Dei servos. Parum est quod furentium varietate vitiorum, quod iniquitate feralium criminum, quod cruentarum compendio rapinarum vita vestra maculatur, quod superstitionibus falsis religio vera subver-

subvertitur, quod Deus omnino nec quæritur, nec
timetur. Adhuc insuper Dei servos & majestati ac
nomini ejus dicatos injustis persecutionibus fatigatis.
Satis non est, quod ipse tu Deum non colis; adhuc
insuper eos qui colunt, sacrilega infestatione perfe-
queris. Deum nec colis, nec coli omnino permittis, &
cum ceteri, qui non tantum ista inepta idola, & manu
hominis facta simulacra, sed & portenta quædam & mon-
stra venerantur, tibi placeant, solus tibi displicet De-
cultor. Fumant ubique in templis vestris hostiarum bu-
sta & rogi pecorum, & Dei altaria vel nulla sunt, vel
occulta. Crocodili & cynocephali, & lapides, & serpen-
tes a vobis coluntur, & Deus solus in terris aut non co-
litur, aut non est impune quod colitur. Innoxios
justos, Deo caros domo privas, patrimonio spoliatis,
catenis premis, carcere includis, gladio, bestiis,
ignibus punis. Nec saltem contentus es dolorum
nostrorum compendio, & simplici ac veloci brevitate
pœnarum. Admoves laniandis corporibus longa
tormenta; multiplicas lacerandis visceribus numerosa
supplicia, nec feritas atque immanitas tua usitatis po-
test contenta esse tormentis; excogitat novas pœnas
ingeniosa crudelitas. Quæ hæc est insatiabilis carnis
ficinæ rabies, quæ inexplebilis libido sævitiae? Quin
potius elige tibi alterum de duobus. Christianum esse
se aut est crimen, aut non est. Si crimen est, quid
non interficis confitentem? Si crimen non est, quid
persequeris innocentem? Torqueri enim debui, &
negarem. Si pœnam tuam metuens id quod prius fueram,
& quod deos tuos non colueram, mendaciter
fallente celarem, tunc torquendus fuisset, tunc ad
confessionem criminis vi doloris adigendus, sicut in
ceteris quæstionibus torquentur rei, qui se negant
crimine quo accusantur, teneri, ut facinoris veritas
quæ indice voce non promitur, dolore corporis ex-
primatur. Nunc vero cum sponte confitear & cla-
mem,

mem, & crebris ac repetitis identidem vocibus christianum me esse contester, quid tormenta admoves confitenti, & deos tuos non in abditis & secretis locis, sed palam, sed publice, sed in foro ipso, magistratibus & præsilibus audientibus, destruenti; ut etsi parum fuerat, quod in me prius criminaberis, creverit quod & odisse, & punire plus debeas, quod dum me christianum celebri loco & populo circumstante pronuntio, & vos & deos vestros clara & publica prædicatione confundo? Quid te ad infirmitatem corporis vertis, quid cum terrenæ carnis imbecillitate contendis? Cum animi vigore congregere, virtutem mentis infringe, fidem destrue, disceptatione, si potes, vince, vince ratione. Vel si quid diis tuis numinis & potestatis est, ipsi in ultionem suam surgant, ipsi se sua maiestate defendant. Aut quid præstare se colentibus possunt, qui se de non colentibus vindicare non possunt? Nam si eo qui vindicatur, pluris est ille, qui vindicat, tu diis tuis major es. Si autem iis quos colis, major es, non tu illos colere, sed ab ipsis potius coli debes, & timeri ut dominus. Sic illos læsos ultio vestra defendit, quomodo & clausos, ne pereant, tutela vestra custodit. Pudeat te eos colere, quos ipse defendis, pudeat tutelam de iis sperare, quos tu ipse tueris. O si audire eos velles & videre, quando a nobis adjurantur, & torquentur spiritualibus flagris, & verborum tormentis de obsessis corporibus ejiciuntur, quando ejulantes & gementes voce humana, & potestate divina flagella & verbera sentientes, venturum judicium confitentur. Veni & cognosce vera esse, quæ dicimus. Et quia sic deos colere te dicis, vel ipsis quos colis, crede; aut si volueris & tibi credere, de te ipso loquetur, audiente te, qui nunc tuum pectus obsedit, qui nunc mentem tuam ignorantiae nocte cæcavit. Videbis nos rogari ab eis, quos tu rogas, timeri ab eis,

eis, quos tu times, quos tu adoras. Videbis sub manu nostra stare vinctos, & tremere captivos, quos tu suspicis & veneraris ut dominos. Certe vel sic confundi in istis erroribus tuis poteris, quando conspexeris & audieris deos tuos, quid sint, interrogatione nostra statim prodere &, præsentibus licet vobis, præstigias illas & fallacias suas non posse celare. Quæ ergo mentis ignavia est, immo quæ desipientium cæca & stulta dementia, ad lucem de tenebris nolle venire, & mortis æternæ laqueis vinctos, spem nolle immortalitatis excipere, non metuere Deum comminantem & dicentem? *Sacrificans diis eradicabitur nisi Domino soli.* Et iterum: *Adoraverunt eos quos fecerunt digiti eorum, & incurvatus est homo, & humiliatus est vir, & non laxabo illis.* Quid te ad falsos deos humilias & inclinas? Quid ante inepta simulacra & figmenta terrena captivum corpus incurvas? Rectum te Deus fecit; & cum cetera animalia prona, & ad terram situ vergente depressa sint, tibi sublimis status, & ad cælum atque ad Deum sursum vultus erectus est. Illuc intueri, illuc oculos tuos erige, in supernis Deum quære. Ut carere inferis possis, ad alta & cælestia suspensum pectus attolle. Quid te in lapsum mortis cum serpente, quem colis, sternis? Quid in ruinam diaboli per ipsum & cum ipso cadis? Sublimitatem serva, qua natus es. Persevera talis, qualis a Deo factus es. Cum statu oris & corporis animum tuum statue. Ut cognoscere Deum possis, te ante cognosce. Relinque idola, quæ humanus error invenit. Ad Deum convertere; quem si imploraveris, subvenit. Christo crede, quem vivificandis ac reparandis nobis pater misit. Lædere servos Dei & Christi persecutionibus tuis desine, quos læsos ultio divina defendit. Inde est quod nemo nostrum, quando apprehenditur, reluctatur, nec se adversus injustam violentiam vestram, quamvis nimis & copiosus

pius noster sit populus, ulciscitur. Patientes facit de secutura ultione securitas. Innocentes nocentibus cedunt. Infantes pœnis & cruciatibus acquiescunt, certi & fidentes quod inultum non remaneat, quodcumque perpetimur, quantoque major fuerit persecutionis injuria, tanto & justior fiat, & gravior pro persecutione vindicta, nec umquam impiorum scelere in nostrum nomen exsurgitur, ut non statim divinitus vindicta comitetur. Ut memorias taceamus antiquas, & ultiones pro cultoribus Dei sæpe repetitas nullo vocis præconio revolvamus: documentum recentis rei satis est, quod sic celeriter, quodque in tanta celeritate sic granditer nuper secuta defensio est, ruinis rerum, jacturis opum, dispendio militum, diminutione castrorum. Nec hoc casu occidisse aliquis existimet, aut fuisse fortuitum putet, cum jam pridem scriptura divina posuerit & dixerit: *Mihi vindictam, ego retribuam, dicit Dominus*; & iterum Spiritus sanctus præmoneat & dicat: *Ne dixeris, ulciscar me de inimico meo, sed exspecta Dominum, ut tibi auxilio sit.* Unde clarum est atque manifestum, quia non per nos, sed pro nobis accidunt cuncta ista, quæ de Dei indignatione descendunt. Nec ideo quis putet christianos iis quæ accidunt, non vindicari, quod & ipsi videantur accidentium incurfione perstrin-
gi. Pœnam de adversis mundi ille sentit, cui & læticia & gloria omnis in mundo est. Ille mœret & delet, si sibi male sit in sæculo, cui bene non potest esse post sæculum, cujus vivendi fructus omnis hic capitur, cujus hic solatium omne finitur, cujus caluca & brevis vita hic aliquam dulcedinem computat & voluptatem, quando istinc excesserit, pœna jam sola superest ad dolorem. Ceterum nullus iis dolor est le incurfione malorum præsentium, quibus fiducia est futurorum bonorum. Denique nec consternimur adversis, nec frangimur, nec dolemus, neque in ulla
aut

aut rerum clade, aut corporum valetudine mustamus. Spiritu magis quam carne viventes, firmitate animi infirmitatem corporis vincimus. Per ipsa quæ vos cruciant & fatigant, probari & corroborari nos scimus, & fidimus. Putatis nos adversa vobiscum æqualiter perpeti, cum eadem adversa videatis a nobis & vobis non æqualiter sustineri? Apud vos impatientia clamorosa semper & querula est; apud nos fortis & religiosa patientia, quieta semper, & semper in Deum grata est, nec quidquam istuc lætum aut prosperum sibi vindicat, sed mitis & lenis, & contra omnes fluctuantis mundi turbines stabilis, divinæ pollicitationis tempus expectat. Quamdiu enim corpus hoc permanet, commune cum ceteris sit necesse est, & corporalis conditio communis; nec separari generi humano ab invicem datur, nisi si istinc de sæculo recedatur. Intra unam domum boni & mali interim continemur. Quidquid intra domum evenerit, pari sorte perpetimur, donec ævi temporalis fine completo, ad æternæ vel mortis, vel immortalitatis hospitia dividamur. Non ergo iccirco compares vobis & æquales sumus, quia in isto adhuc mundo & carne hac constituti, mundi & carnis incommoda vobiscum pariter incurrimus. Nam cum in sensu doloris sit omne quod punit, manifestum est, eum non esse participem pœnæ tuæ, quem tecum videas æqualiter non dolere. Viget apud nos spei robur, & firmitas fidei, inter ipsas sæculi labentis ruinas erecta mens est, & immobilis virtus, & numquam non læta patientia, & de Deo suo semper anima secura, sicut per prophetam Spiritus sanctus loquitur, & hortatur, spei ac fidei nostræ firmitatem cælesti voce corroborans. *Ficus, inquit, non afferet fructum, & non erunt nascentia in vineis. Mentietur opus olivæ, & campi non prastabunt cibum. Deficient a pabulo oves, & non erunt in præsepibus boves. Ego autem in Domino exultabo, &*

gaude-

gaudebo in Deo salutari meo. Dei nominem, & cultorem Dei subnixum spei veritate, & fidei stabilitate fundatum negat mundi hujus & sæculi infestationibus commoveri. Vineæ licet fallat, & olea decipiat, & herbis siccitate morientibus æstuans campus afescat, quid hoc ad christianos, quid ad Dei servos, quos paradus invitat, quos gratia omnis, & copia regni cælestis exspectat? Exsultant semper in Domino, & lætantur & gaudent in Deo suo, & mala atque adversa mundi fortiter tolerat, dum dona & prospera futura prospectant. Nam qui exposita nativitate terrena, spiritu recreati & renati sumus, nec jam mundo, sed Deo vivimus, non nisi cum ad Deum venerimus, Dei munera & promissa capiemus. Et tamen pro arcendis hostibus, & imbribus impetrandis, & vel auferendis vel temperandis adversis, rogamus semper & preces fundimus, & pro pace ac salute vestra propitiantes, ac placantes Deum, diebus ac noctibus jugiter atque instanter oramus. Nemo itaque sibi blandiatur, quod nobis & prophanis Dei cultoribus, & Deo adversantibus sit interim per æqualitatem carnis & corporis laborum sæcularium conditio communis, ut ex hoc opinetur, non omnia ista quæ accidunt, vobis irrogari, cum Dei ipsius prædicatione, & prophetica contestatione ante prædictum sit, venturam super injustos iram Dei & persecutiones, quæ nos humanitus læderent non defuturas, sed & ultiones quæ læsos divinitus defenderent, secuturas. Et quanta sunt, quæ istic pro nobis interim fiunt? In exemplum aliquid datur ut Dei vindicis ira noscatur. Ceterum retro est iudicii dies, quem scriptura sancta denuntiat, dicens: *Ulylate.* Proximus est enim dies Domini, & obtritio a Deo aderit. Ecce enim dies Domini venit insanabilis indignationis & ira, ponere orbem terra desertum, & peccatores perdere ex eo. Et iterum: *Ecce dies Domini venit*

S. Cypriani Tom. I. C c ardens

*ardens velut clibanus, eruntque omnes alienigenae, & omnes iniqui stipula; & succedet illos adveniens dies, dicit Dominus. Succendi & cremari alienigenas præcinit Dominus, id est, alienos a divino genere & prophapos, spiritualiter non renatos, nec Dei filios factos. Evadere enim eos solos posse, qui renati & signo Christi signati fuerint, alio in loco Deus loquitur, quando ad vastationem mundi & interitum generis humani angelos suos mittens, gravius in ultimo comminatur, dicens: *Vadite & cadite, & nolite parcere oculis vestris. Nolite misereri senioris aut juvenis, & virgines, & parvulos, & mulieres interficite, ut perdeantur. Omnem autem super quem signum scriptum est, ne tetigeritis.* Quod autem sit hoc signum, & qua in parte corporis positum, manifestat alio in loco Deus dicens: *Transi per mediam Hierusalem, & notabis signum super frontes virorum qui ingemunt, & moerent ob iniquitates, quæ sunt in medio ipsorum.* Et quod ad passionem & sanguinem Christi pertineat hoc signum, & ille salvus atque incolumis reservetur, quisquis in hoc signo invenitur, item Dei testimonio comprobatur dicentis: *Et erit sanguis in signo vobis super domos, in quibus vos eritis, & videbo sanguinem, & protegam vos, & non erit in vobis plaga diminutionis, cum percutiam terram Ægypti.* Quod ante occiso agno præcedit in imagine, impletur in Christo, secuta postmodum veritate. Ut illic percussa Ægypto Judaicus populus evadere non nisi sanguine & signo agni potuit, ita & cum vastari cæperit mundus & percuti, quisquis in sanguine & signo Christi inventus fuerit, solus evadet. Respicite itaque dum tempus est, ad veram & æternam salutem; & quia jam mundi finis in proximo est, ad Deum mentes vestras Dei timore convertite. Nec vos delectet in sæculo inter justos & mites impotens ista, & vana dominatio, quando & in agro inter cultas & fertiles segetes lolium & avena dominetur. Nec dicatis*

tatis mala accidere, quia dii vestri a nobis non colan-
 tur, sed sciatis hanc iræ Dei esse censuram, (ut qui
 beneficiis non intelligitur, vel plagis intelligatur.
 Deum vel sero quærite, quia jam pridem per prophe-
 tiam Deus præmonens hortatur & dicit: *Quærite*
Deum, & vivet anima vestra. Deum vel sero cognos-
 cite, quia Christus adveniens hoc admonet & docet,
 dicens: *Hæc est autem vita æterna ut cognoscant te solum*
verum Deum, & quem misisti Jesum Christum. Credite
 illi, qui omnino non fallit. Credite illi, qui hæc om-
 nia futura prædixit. Credite illi, qui credentibus
 præmium vitæ æternæ dabit. Credite illi, qui incre-
 dulis æterna supplicia gehennæ ardoribus irrogabit.
 Quæ tunc erit fidei gloria, quæ pœna perfidiæ, cum
 iudicii dies venerit, quæ lætitia credentium, quæ
 nœstitia perfidorum, poluisse istic prius credere, &
 ut credant jam redire non posse? Cremabit addictos
 urdens semper gehenna, & vivacibus flammis vorax
 pœna; nec erit, unde habere tormenta vel requiem
 possint aliquando vel finem. Servabuntur cum cor-
 poribus suis animæ infinitis cruciatibus ad dolorem.
 Spectabitur illic a nobis semper, qui hic nos spectavit
 ad tempus, & in persecutionibus factis oculorum cru-
 delium brevis fructus perpetua visione pensabitur,
 secundum scripturæ sanctæ fidem dicentis: *Vermis eo-*
rum non morietur, & ignis eorum non exstinguetur; &
erunt ad visionem universæ carni. Et iterum: *Tunc*
stabunt iusti in magna constantia adversus eos, qui se an-
gustiauerunt & qui abstulerunt labores eorum. *Videntes*
turbabuntur timore horribili, & mirabuntur in subitatio-
ne insperata salutis, dicentes inter se, pœnitentiam habentes,
& præ angustia spiritus gementes: Hi sunt quos ha-
uimus aliquando in derisum & in similitudinem impropertii.
Nos insensati viam illorum æstimabamus insaniam, & fi-
nem illorum sine honore. Quomodo computati sunt inter
filios Dei, & inter sanctos fors eorum est? Ergo erra-

vimus a via veritatis, & iustitia lumen non luxit nobis, & sol non ortus est nobis. Lassati sumus in iniquitatis via & perditionis, ambulavimus solitudines difficiles, viam autem Domini ignoravimus. Quid nobis profuit superbia, aut quid divitiarum jactatio contulit nobis? Transierunt omnia illa tamquam umbra. Erit tunc sine fructu pœnitentiæ dolor pœnæ, inanis ploratio, & inefficax deprecatio. In æternam pœnam sero credent, qui in vitam æternam credere noluerunt. Securitati igitur & vitæ, dum licet, providete. Offerimus vobis animi & consilii nostri salutare munus. Et quia odisse non licet nobis, & sic Deo plus placemus, dum nullam pro injuria vicem reddimus, hortamur dum facultas adest, dum adhuc aliquid de sæculo superest, Deo satisfacere, & ad veræ religionis candidam lucem de profundo tenebrôsæ superstitionis emergere. Non invidemus commodis vestris, nec beneficia divina celamus. Odiis vestris benevolentiam reddimus, & pro tormentis ac suppliciis quæ nobis inferuntur, salutis itinera monstramus. Credite & vivite; & qui nos ad tempus persequimini, in æternum gaudete nobiscum. Quando istinc excessum fuerit, nullus jam pœnitentiæ locus est, nullus satisfactionis effectus. Hic vita aut amittitur, aut tenetur. Hic salutis æternæ cultu Dei & fructu fidei providetur. Nec quisquam aut peccatis retardetur, aut annis, quo minus veniat, ad consequendam salutem. In isto adhuc mundo manenti pœnitentia nulla sera est. Patet ad indulgentiam Dei aditus, & quærentibus atque intelligentibus veritatem facilis accessus est. Tu sub ipso licet exitu & vitæ temporalis occasu pro delictis roges, & Deum, qui unus & verus est, confessione & fide agnitionis ejus implores, venia confitenti datur, & credenti indulgentia salutaris de divina pietate conceditur, & ad immortalitatem sub ipsa morte transitur. Hanc gratiam Christus impertit,
hoc

hoc munus misericordiæ suæ tribuit subigendo mortem tropæo crucis, redimendo credentem pretio sanguinis sui, reconciliando hominem Deo patri, vivificando mortalem regeneratione cælesti. Hunc, si fieri potest, sequamur omnes, hujus sacramento & signo censemur. Hic nobis viam vitæ aperit, hic ad paradysum reduces facit, hic ad cælorum regna perducit. Cum ipso semper vivemus, facti per ipsum filii Dei. Cum ipso semper exultabimus, ipsius cruore reparati. Erimus christiani cum Christo simul gloriosi, de Deo patre beati, de perpetua voluptate lætantes semper in conspectu Dei, & agentes Deo gratias semper. Neque enim poterit nisi lætus esse semper & gratus, qui cum morti fuisset obnoxius, factus est immortalitate securus.

L I B E R

DE IDOLORUM VANITATE.

Quod idola dii non sint, & quod Deus unus sit, & quod per Christum salus credentibus data sit. Deos non esse, quos colit vulgus, hinc notum est. Reges olim fuerunt, qui ob regalem memoriam, colli apud suos, postmodum etiam in morte cœperunt. Inde illis instituta templa; inde ad defunctorum vultus per imaginem detinendos, expressa simulacra; & immolabant hostias, & dies festos dando, honore celebrabant. Inde posteris facta sunt sacra, quæ primis fuerant assumpta solatia. Et videamus, an stet hæc apud singulos veritas. Melicertes & Leucothea præcipitantur in maria, & fiunt postmodum maris numina. Castores alternis moriuntur, ut vivant. Æsculapius, ut in Deum surgat, fulminatur. Her-

cules ut hominem exuat, Oeteis ignibus concrema-
 tur. Apollo Admeti pecus pavit. Laomedonti mu-
 ros Neptunus instituit, nec mercedem operis infelix
 structor accepit. Antrum Jovis in Creta visitur, &
 sepulchrum ejus ostenditur, & ab eo Saturnum fu-
 gaturn esse, manifestum est. Inde Latium de latebra
 ejus nomen accepit. Hic litteras imprimere, hic
 signare nummos in Italia primus instituit; inde æra-
 rium Saturni vocatur. Et rusticitatis hic cultor fuit;
 inde falcem ferens senex pingitur. Hunc fugatum
 hospitio Janus exceperat; de cujus nomine Janicu-
 lum dictum est, & mensis Januarius institutus est.
 Ipse bifrons exprimitur, quod in medio constitutus
 annum incipientem pariter & recedentem spectare vi-
 deatur. Mauri vero manifeste reges colunt, nec
 ullo velamento hoc nomen obtexunt. Inde per gen-
 tes & provincias singulas varia deorum religio muta-
 tur, dum non unus ab omnibus Deus colitur, sed
 propria cuique majorum suorum cultura servatur. Hoc
 ita Alexander magnus insigni volumine ad matrem
 suam scribit, metu suæ potestatis proditum sibi de
 diis hominibus a sacerdote secretum, quod majorum
 & regum memoria servata sit, inde colendi & sacri-
 ficandi ritus inoleverit. Si autem aliquando dii nati
 sunt, cur non hodieque nascuntur? Nisi si forte Ju-
 piter senuit, aut partus in Junone defecit. Cur vero
 deos putas pro Romanis posse, quos videas nihil pro
 suis, adversus eorum arma valuisse? Romanorum
 enim vernaculos deos novimus. Est Romulus peje-
 rante Proculo deus factus, & Picus, & Tiberinus, &
 Pilumus, & Consus, quem deum fraudis, velut con-
 filiorum deum, coli Romulus voluit, postquam in
 raptum Sabinarum perfidia provenit. Deam quoque
 Cloacinam Tatus & invenit, & coluit, Pavorem
 Hostilius atque Pallorem. Mox a nescio quo Febris
 dedicata, & Acca & Flora meretrices. Hi dii Ro-
 mani.

hani. Ceterum Mars Thracius, & Juppiter Creticus, & Juno vel Argiva, vel Samia, vel Pœna, & Diana Taurica, & deorum mater Idæa, & Ægyptia portenta, non numina: quæ utique si quid potestatis habuissent, sua ac suorum regna servassent. Plane sunt apud Romanos & victi penates, quos Æneas profugus advexit. Est & Venus calva, multo hic turpius calva, quam apud Homerum vulnerata. Regna autem non merito accidunt, sed forte variantur. Ceterum imperium ante tenuerunt & Assyrii, & Medi, & Persæ; & Græcos, & Ægyptios regnasse cognovimus. Ita vicibus potestatum variantibus, Romanis quoque, ut & ceteris, imperandi tempus obvenit. Ceterum si ad originem redeas, erubescas. Populus de sceleratis & nocentibus congregatur, & asylo constituto, facit numerum impunitas criminum. Nunc ut rex ipse principatum habeat ad crimina, fit Romulus parricida. Atque ut matrimonium faciat, rem concordiae per discordias auspicatur. Rapiunt, ferociunt, fallunt ad copiam civitatis augendam. Nuptiæ sunt illis rupta hospitii fœdera & cum soceris bella crudelia. Est & gradus summus in Romanis honoribus consulatus. Sic consulatum cœpisse videmus ut regnum. Filios interficit Brutus, ut crescat de suffragio sceleris commendatio dignitatis. Non ergo de religionibus sanctis, nec dignitatis, nec de auspiciis, aut auguriis Romana regna creverunt, sed acceptum tempus certo fine custodiunt. Ceterum & Regulus auspicia servavit, & captus est & victus; & Mancinus religionem tenuit, & sub jugum missus est. Pullos edaces Paulus habuit, & apud Cannas tamen cæsus est. C. Cæsar, ne ante brumam in Africam navigia transmitteret, auguriis & auspiciis renitentibus, sprexit, eo facilius & navigavit & vicit. Horum autem omnium ratio est illa, quæ fallit & decipit, & præstigiis cæcantibus veritatem, stultum &

credulum vulgus inducit. Spiritus sunt. insinceri & vagi, qui postea quam terrenis vitiis immerſi ſunt, & a vigore cæleſti terreno contagio receſſerunt, non deſinunt perſiſtere perdere, & depravati errorem pravitatis infundere. Hos & poetæ dæmonas norunt; & ſocrates inſtrui ſe, & regi ad arbitrium dæmonis prædicabat, & magis inde eſt ad pernicioſa vel ludicra potentatus; quorum tamen præcipuus Hoſtanes & formam veri Dei negat conſpici poſſe, & angelos veros ſedi ejus dicit aſſiſtere. In quo & Plato pari ratione conſentit, & unum Deum ſervans, ceteros angelos vel dæmonas dicit. Hermes quoque Trimegiſtus unum Deum loquitur, eumque incomprehenſibilem atque inæſtimabilem conſtituit. Hi ergo ſpiritus ſub ſtatuſque imaginibus conſecratis deliteſcunt. Hi aſſatu ſuo vatū pectora inſpirant, extorum fibras animant, avium volatus gubernant, ſortes regunt, oracula efficiunt, falſa veris ſemper involvunt, nam & falluntur & fallunt, vitam turbant, ſomnos inquietant, irrepentes etiam ſpiritus in corporibus occulte mentes terrent, membra diſtorquent, valetudinem frangunt, morbos læceſſunt, ut ad cultum ſui cogant, ut nidore altarium, & rogis pecorum ſaginati, remiſſis quæ conſtrinxerant, curaffe videantur. Hæc eſt de illis medela, cum illorum ceſſat injuria; nec aliud illis ſtudio eſt, quam a Deo homines avocare, & ad ſuperſtitionem ſui ab intellectu veræ religionis avertere, & cum ſint ipſi pœnales, quærere ſibi ad pœnam comites, quos ad crimen ſuum fecerint errore participes. Hi tamen adjurati per Deum verum a nobis, ſtatim cedunt, & fatentur, & de obſeſſis corporibus exire coguntur. Videas illos noſtra voce & operatione majeſtatis occultæ ſagris cædi, igne torreri, incremento pœnæ propagantis extendi, ejulare, gemere, deprecari, unde veniant, & quando diſcedant, ipſis etiam; qui
ſe

le cōiunt, audientibus, confiteri; & vel exsiliunt
 statim, vel evanescent gradatim, prout fides patien-
 tis adjuvat, aut gratia curantis aspirat. Hinc vul-
 gus in odium nostri nominis cogunt, ut nos odisse in-
 cipiant homines, antequam nosse, ne cognitos aut
 mitari possint, aut damnare non possint. Unus igi-
 tur omnium dominus est Deus. Neque enim illa su-
 blimitas potest habere consortem, cum sola omnem
 teneat potestatem. Ad divinum imperium etiam de
 terris mutuemur exemplum. Quando umquam regni
 societas aut cum fide cœpit, aut sine cruore desit?
 Sic Thebanorum germanitas rupta, & permanens
 rogis dissidentibus etiam in morte discordia. Et Ro-
 manos geminos unum non capit regnum, quos unum
 iteri cœpit hospitium. Pompejus & Cæsar affines fue-
 runt, nec tamen necessitudinis fœdus in æmula po-
 testate tenuerunt. Nec hoc tu de homine mireris,
 cum in hoc omnis natura consentiat. Rex unus est
 apibus, & dux unus in gregibus, & in armentis re-
 ctor unus. Multo magis mundi unus est rector, qui
 universa quæcumque sunt, verbo jubet, ratione dis-
 pensat, virtute consummat. Hic nec videri potest,
 visu clarior est: nec comprehendi, tactu purior est;
 nec æstimari, sensu major est. Et ideo sic eum digne
 estimamus, dum inæstimabilem dicimus. Quod ve-
 ro templum habere possit Deus, cujus templum to-
 tus est mundus? & cum homo latius maneat, intra
 nam ædiculam vim tantæ majestatis includam? In
 nostra dedicandus est mente, in nostro consecran-
 lus est pectore. Nec nomen Deo quæras. Deus no-
 nen est illi. Illic vocabulis opus est, ubi propriis
 appellationum insignibus multitudo dirimenda est.
 Deo, qui solus est, Dei vocabulum totum est. Ergo
 unus est, & ubique totus diffusus est. Nam & vul-
 gus in multis Deum naturaliter constitetur, cum mens
 & anima sui auctoris & principis admonetur. Dici

frequenter audimus : *• Deus, & Deus videt, & Deo commendo, & Deus tibi reddat, & quod vult Deus, & si Deus dederit.* Atque hæc est summa delicti ; nolle agnoscere, quem ignorare non possis. Quod vero Christus sit, & quomodo per ipsum nobis salus venerit, sic est ordo, sic est ratio. Judæis primum erat apud Deum gratia. Sic olim iusti erant, sic majores eorum religionibus obediebant. Inde illis & regni sublimitas floruit, & generis magnitudo provenit. Sed illi negligentes, & indisciplinati, & superbi postmodum facti, & fiducia patrum inflati, dum divina præcepta contemnunt, datam sibi gratiam perdiderunt. Quam vero fuërit illis prophana vita, quæ contracta sit violatæ religionis offensa, ipsi quoque testantur, qui etsi voce tacent, exitu confitentur. Dispersi & palabundi vagantur, soli & cæli sui profugi, per hospitia aliena jactantur. Necnon Deus ante prædixerat fore, ut vergente sæculo, & mundi fine jam proximo, ex omni gente, & populo, & loco cultores sibi allegeret Deus multo fideiiores, & melioris obsequii, qui indulgentiam de divinis muneribus haurirent, quam acceptam Judæi contemptis religionibus perdidissent. Hujus igitur gratiæ disciplinæque arbiter & magister sermo & filius Dei mittitur, qui per prophetas omnes retro illuminator & doctor humani generis prædicabatur. Hic est virtus Dei, hic ratio, hic sapientia ejus & gloria. Hic in virginem illabitur, carnem Spiritus sanctus induitur, Deus cum homine miscetur. Hic Deus noster, hic Christus est, qui mediator duorum, hominem induit, quem perducatur ad patrem. Quod homo est, esse Christus voluit, ut & homo possit esse, quod Christus est. Sciebant & Judæi Christum esse venturum. Nam hic illis semper prophetis admonentibus annuntiabatur. Sed significato duplici ejus adventu, uno, qui exercitio & exemplo hominis fungere-

tur,

tur, altero, qui Deum fateretur, non intelligendo primum adventum, qui in passione præcessit occultus, unum tantum credunt, qui erit in potestate manifestus. Quod autem hoc Judæorum populus intelligere non potuit, delictorum meritum fuit. Sic erant sapientiæ & intelligentiæ cæcitate multati, ut qui vita indigni essent, haberent vitam ante oculos, nec viderent. Itaque cum Christus Jesus, secundum a prophetis ante prædicta, verbo & vocis imperio dæmonia de hominibus excuteret, paralyticos restringeret, leprosos purgaret, illuminaret cæcos, claudis gressum daret, mortuos rursus animaret, cogeret sibi elementa famulari, servire ventos, maria obedire, inferos cedere, Judæi, qui illum crediderant hominem tantum, de humilitate carnis & corporis, existimabant magnum de licentia potestatis. Hunc magistri eorum atque primores, hoc est, quos & doctrina ille & sapientiâ revincebat, accensi ira & indignatione provocati, insecuti sunt, & postremo detentum Pontio Pilato, qui tunc ex parte Romana Syriam procurabat, tradiderunt, crucem ejus & mortem suffragiis violentis ac pertinacibus flagitantes. Hoc eos facturos & ipse prædixerat, & prophetarum omnium testimonium sic ante præcesserat, oportere illum pati, non ut sentiret mortem, sed ut vinceret, & cum passus esset, ad superos denuo regredi, ut vim divinæ majestatis ostenderet. Fidem itaque rerum cursus implevit. Nam & crucifixus prævento carnificis officio, spiritum sponte dimisit, & die tertio rursus a mortuis sponte surrexit. Apparuit discipulis suis talis, qualis & fuerat, agnoscendum se videntibus præbuit, simul victus & substantiæ corporalis firmitate conspicuus, ad dies quadraginta remoratus est, ut de eo ad præcepta vitalia instrui possent, & discerent, quæ docerent. Tunc in cælum circumfusa nube sublatus est, ut hominem quem dile-

xit,

xit, quem induit, quem a morte protexit, ad patrem victor imponeret, jam venturus e cælo ad pœnam diaboli, & ad censuram generis humani, ultoris vigore & iudicis potestate, per orbem vero discipuli magistro, & Deo monente diffusi, præcepta in salutem darent, ab errore tenebrarum ad viam lucis adducerent, cæcos & ignaros ad agnitionem veritatis ocularent. Ac ne esset probatio minus solida, & de Christo delicata confessio, per tormenta, per cruces, per multa pœnarum genera tentantur. Dolor, qui veritatis testis est, admovetur ut Christus Dei filius, qui hominibus ad vitam datus creditur, non tantum præconio vocis, sed & passionis testimonio prædicaretur. Hunc igitur comitamur, hunc sequimur, hunc habemus itineris ducem, lucis principem, salutis auctorem, cælum pariter & patrem quærentibus, & credentibus pollicentem. Quod est Christus, erimus christiani, si Christum fuerimus imitati.

LIBER

DE MORTALITATE.

Et si apud plurimos vestrum, fratres dilectissimi, mens solida est, & fides firma, & anima devota, quæ ad præsentis mortalitatis copiam non movetur, sed tamquam petra fortis & stabilis turbidos impetus mundi, & violentos sæculi fluctus frangit potius ipsa, nec frangitur, & tentationibus non vincitur, sed probatur: tamen quia animadverto in plebe quosdam vel imbecillitate animi, vel fidei parvitate, vel dulcedine sæcularis vitæ, vel sexus mollietie, vel, quod majus est, veritatis errore minus stare fortiter, nec pectoris sui divinum atque invictum robur exerere; diffimu-

disſimulanda res non fuit nec tacenda, quo minus, quantum noſtra mediocritas ſufficit, vigore pleno & ſermone de dominica lectione concepto, delicatæ mentis ignavia comprimatur, & qui homo Dei & Chriſti eſſe jam cœpit, Deo & Chriſto dignus habeatur. Agnoſcere enim ſe debet, fratres dilectiſſimi, qui Deo militat, qui poſitus in cæleſtibus caſtris divina jam ſperat, ut ad procellas & turbineſ mundi trepidatio nulla ſit in nobis, nulla turbatio, quando hæc ventura prædixerit Dominus, providæ vocis hortatu inſtruens & docens & præparans atque corroborans eccleſiæ ſuæ populum ad omnem tolerantiam futurorum, bella, & fames, & terræ motus, & peſtilentias per loca ſingula exſurgere prænuntiavit, & cecinit. Et ne inopinatus nos & novus rerum inſeſtantium metus quateret, magis ac magis in noviffimis temporibus adverſa crebreſcere ante præmonuit. Fiunt ecce quæ dicta ſunt; & quando fiunt quæ ante prædicta ſunt, ſequentur & quæcumque promiſſa ſunt, Domino ipſo pollicente & dicente: *Cum autem videritis hæc omnia fieri, ſcitate quoniam in proximo eſt regnum Dei.* Regnum Dei, fratres dilectiſſimi, eſſe cœpit in proximo. Præmium vitæ & gaudium ſalutis æternæ, & perpetua ſecuritas, & poſſeſſio paradifi nuper amiſſa, mundo tranſeunte jam veniunt; jam terrenis cæleſtia, & magna parvis, & caducis æterna ſuccedunt. Quis hic anxietatis & ſollicitudinis locus eſt? Quis inter hæc trepidus & meſtus eſt, niſi cui ſpes & fides deeſt? Ejus eſt enim mortem timere, qui ad Chriſtum nolit ire. Ejus eſt ad Chriſtum nolle ire, qui ſe non credat cum Chriſto incipere regnare. Scriptum eſt enim juſtum fide vivere. Si juſtus eſ, & fide vivis, ſi vere in Chriſtum credis; cur non cum Chriſto futurus, & de Domini pollicitatione ſecurus, quod ad Chriſtum voceris, amplecteris, & quod diabolo careas, gratularis? Symeôn denique ille juſtus,

stus, qui vere justus fuit, qui fide plena Dei præcepta servavit, cum ei divinitus responsum fuisset, quod non ante moreretur quam Christum vidisset, & Christus infans in templum cum matrè venisset, agnovit in spiritu natum esse jam Christum, de quo sibi fuerat ante prædictum; quo viso, scivit se cito esse moriturum. Lætus itaque de morte jam proxima, & de vicina accersitione securus, accepit in manus puerum, & bene dicens Dominum exclamavit, & dixit: *Nunc dimittis servum tuum Domine, secundum verbum tuum in pace. quoniam viderunt oculi mei salutare tuum.* Probans scilicet, atque contestans tunc esse servis Dei pacem, tunc liberam, tunc tranquillam quietem, quando de istis mundi turbinibus extracti, sedis & securitatis æternæ portum petimus, quando expuncta hac morte ad immortalitatem venimus. Illa est enim vera pax, illa fida tranquillitas, illa stabilis & firma, & perpetua securitas. Ceterum quid aliud in mundo, quam pugna adversus diabolum quotidie geritur, quam adversus jacula ejus & tela conflictationibus assiduis dimicatur? Cum avaritia nobis, cum impudicitia, cum ira, cum ambitione congressio est, cum carnalibus vitiis, cum illecebris sæcularibus assidua & molesta luctatio est. Obsessa mens hominis, & undique diaboli infestatione vallata vix occurrit singulis, vix resistit. Si avaritia prostrata est, exsurgit libido. Si libido compressa est, succedit ambitio. Si ambitio contempta est, ira exasperat, inflat superbia, vinolentia invitat, invidia concordiam rumpit, amicitiam zelus abscindit. Cogaris maledicere, quod divina lex prohibet. Compelleris jurare, quod non licet. Tot persecutiones animus quotidie patitur, tot periculis pectus urgetur, & delectat hic inter diaboli gladios diu stare, cum magis concupiscendum sit & optandum ad Christum, subveniente velocius morte, properare, ipso instruente nos & dicente: *Amen amen dico vobis;*

vobis, quoniam vos plorabitis & plangētis, sæculum autem gaudebit; vos tristes eritis, sed tristitia vestra in lætitiā veniet. Quis non tristitia carere optet, quis non ad lætitiā venire festinet? Quando autem in lætitiā veniat nostra tristitia Dominus, denuo ipse declarat, dicens: *Iterum videbo vos, & gaudebit cor vestrum, & gaudium vestrum nemo auferet a vobis.* Cum ergo Christum videre gaudere sit, nec possit esse gaudium nostrum, nisi cum viderimus Christum, quæ cæcitas animi, quæve dementia est, amare pressuras & pœnas, & lacrimas mundi, & non festinare potius ad gaudium, quod numquam possit auferri? Hoc autem sit, fratres dilectissimi, quia fides deest, quia nemo credit vera esse quæ promittit Deus, qui verax est, cujus sermo credentibus æternus & firmus est. Si tibi vir gravis & laudabilis aliquid polliceretur, haberes utique pollicenti fidem, nec te falli aut decipi ab eo crederes, quem stare in sermonibus atque in actibus suis scires. Nunc Deus tecum loquitur; & tu mente incredula perfidus fluctuas? Deus tibi de hoc mundo recedenti immortalitatem atque æternitatem pollicetur; & tu dubitas? Hoc est Deum omnino non nosse, hoc est Christum credentium dominum & magistrum peccato incredulitatis offendere, hoc est in ecclesia constitutum, fidem in domo fidei non habere. Quantum profit exire de sæculo, Christus ipse salutis atque utilitatis nostræ magister ostendit, qui cum discipuli ejus contristarentur, quod se jam diceret recessurum, locutus est ad eos dicens: *Si me dilexissetis, gauderetis utique, quoniam vado ad patrem, docens scilicet & ostendens, cum cari quos diligimus, de sæculo exeunt, gaudendum potius quam dolendum.* Cujus rei memor beatus apostolus Paulus in epistola sua ponit & dicit: *Mihi vivere Christus est, & moxi lucrum,* lucrum maximum computans jam sæculi laqueis non teneri, jam nullis peccatis & vitiis carnis obnoxium fieri,

fieri, exemptum pressuris argentibus, & venetiatis diaboli faucibus liberatum, ad lætitiā salutis æternæ Christo vocante proficisci. At enim quosdam movet, quod æqualiter cum gentilibus nostros morbi istius validudo corripit; quasi ad hoc crediderit christianus, ut immunis a contactu malorum, mundo & sæculo feliciter perfruat, & non omnia hic adversa perpeffus, ad futuram lætitiā reservetur. Movet quosdam quod sit nobis cum ceteris mortalitas ista communis. Quid enim nobis in hoc mundo non commune cum ceteris, quamdiu adhuc secundum legem primæ nativitatis manet caro ista communis? Quoadusque istic in mundo sumus, cum genere humano carnis æqualitate conjungimur, spiritu separamur. Itaque donec corruptivum istud induat incorruptionem, & mortale hoc accipiat immortalitatem, & Christus nos perducatur ad Deum patrem, quæcumque sunt carnis incommoda, sunt nobis cum humano genere communia. Sic cum fetu sterili terra jejuna est, neminem fames separat. Sic cum irruptione hostili civitas aliqua possessa est, omnes simul captivitas vastat. Et quando imbrem nubila serena suspendunt, omnibus siccitas una est. Et cum navem scopulosa saxa constringunt, navigantibus naufragium sine exceptione commune est. Et oculorum dolor, & impetus febrium, & omnium validudo membrorum cum ceteris communis est nobis, quamdiu portatur in sæculo caro ista communis. Quintimmo si qua conditione, qua lege crediderit christianus; noscat & teneat, sciet plus sibi quam ceteris in sæculo laborandum, cui magis sit cum diaboli impugnatione luctandum. Docet & præmonet scriptura divina dicens: *Fili, accedens ad servitutem Dei, sta in justitia & timore, & præpara animam tuam ad tentationem.* Et iterum: *In dolore sustine, & in humilitate tua patientiam habe, quoniam in igne probatur aurum & argentum,*
homines

homines vero receptibiles in camino humiliationis. Sic Job post rerum damna, post pignorum funera, vulneribus quoque & vermibus graviter afflictus, non victus est, sed probatus; qui in ipsis conflictationibus & doloribus suis patientiam religiosæ mentis ostendens, ait: Nudus exivi de utero matris, nudus etiam ibo sub terram. Dominus dedit, Dominus abstulit. Sicut Domino visum est, ita factum est. Sit nomen Domini benedictum. Et cum eum uxor quoque compelleret, ut vi doloris impatiens aliquid adversus Deum querula & invidiosa voce loqueretur, respondit & dixit: Tamquam una ex ineptis mulieribus locuta es. Si bona exceperimus de manu Domini, mala cur non tolerabimus? In his omnibus quæ contigerunt ei, nihil peccavit Job labiis suis in conspectu Domini. Itaque illi Dominus Deus perhibet testimonium dicens: Animadvertisti puerum meum Job. Non enim est similis illi quisquam in terris, homo sine querela, verus Dei cultor. Et Tobias post opera magnifica, post misericordiæ suæ multa & gloriosa præconia, cæcitatem luminum passus, timens & benedicens in adversis Deum, per ipsam corporis sui cladem crevit ad laudem; quem & ipsum uxor sua depravare tentavit dicens: Ubi sunt justitia tuæ? Ecce quæ pateris. At ille circa timorem Dei stabilis & firmus, & ad omnem tolerantiam passionis fide religionis armatus, tentationi uxoris invalidæ in dolore non cessit, sed magis Deum patientia majore promeruit; quem postmodum Raphael angelus collaudat & dicit: Opera Dei revelare & confiteri honorificum est. Nam quando orabas tu & Sarra nurus tua, ego obtuli memoriam orationis vestræ in conspectu claritatis Dei. Et cum sepelires tu mortuos simpliciter, & quia non es cunctatus exsurgere & derelinquere prandium tuum, & abisti, & condidisti mortuum, missus sum tentare te, & iterum me misit Deus curare te & Sarram nurum tuam. Ego enim sum Raphael unus ex septem angelis

S. Cypriani Tom. I.

D d

gelis

gelis sanctis, qui assistimus & conversamur ante claritatem Dei. Hanc tolerantiam iusti semper habuerunt, hanc apostoli disciplinam de Domini lege tenuerunt, non mussitare in adversis, sed quæcumque in sæculo accidunt, fortiter & patienter accipere, cum Judæorum populus hinc semper offenderit, quod adversus Deum frequentius murmuraret, sicut testatur in Numeris Dominus Deus dicens: *Definat murmuratio eorum a me, & non morientur.* Murmurandum non est in adversis, fratres dilectissimi, sed patienter & fortiter quidquid acciderit, sustinendum, cum scriptum sit: *Sacrificium Deo spiritus contribulatus, cor contritum & humiliatum Deus non despicit.* In Deuteronomio quoque moneat per Moysen Spiritus sanctus, & dicat: *Dominus Deus tuus vexabit te, & famem injiciet tibi, & cognoscetur in corde tuo si bene custodieris præcepta ejus, siue non.* Et iterum: *Tentat vos Dominus Deus vester, ut sciat si diligitis Dominum Deum vestrum ex toto corde vestro, & ex tota anima vestra.* Sic Abraham Deo placuit, qui, ut placere Deo, nec amittere filium timuit, nec gerere parricidium recusavit. Qui filium non potes lege & sorte mortalitatis amittere, quid faceres si filium jubereris occidere? Ad omnia te paratum facere timor Dei & fides debet. Sit licet rei familiaris amissio, sit de infestantibus morbis assidua membrorum & cruenta vexatio, sit de uxore, de liberis, de excedentibus caris funebris & tristis avulsio: non sint tibi scandala ista, sed prælia; nec debilitent aut frangant christiani fidem, sed potius ostendant in collocatione virtutem, cum contemnenda sit omnis injuria malorum præsentium, fiducia futurorum bonorum. Nisi præcesserit pugna, non potest esse victoria. Cum fuerit in pugna congressione victoria, tunc datur vincentibus & corona. Navis gubernator in tempestate dignoscitur, in acie miles probatur. Delicata jactatio est, cum periculum non est. Con-

ficta-

fictatio in adversis probatio est veritatis. Arbor
 quæ alta radice fundata est, ventis incumbentibus
 non movetur; & navis quæ forti compage solida est,
 pulsatur fluctibus, nec foratur: & quando area fruges
 terit, ventos grana fortia & robusta contemnunt,
 inanes paleæ flatu portante rapiuntur. Sic & aposto-
 lus Paulus post naufragia, post flagella, post carnis
 & corporis multa & gravia tormenta, non vexari sed
 emendari se dicit adversis, ut dum gravius affligitur,
 verius probaretur. *Datus est mihi*, inquit, *stimulus*
carnis meæ, angelus satanæ qui me colaphizet, ut non
extollar. Propter quod ter Dominum rogavi ut disce-
deret a me, & dixit mihi: Sufficit tibi gratia mea. Nam
virtus in infirmitate perficitur. Quando ergo infirmi-
 tas & imbecilitas, & vastitas aliqua grassatur, tunc
 virtus nostra perficitur, tunc fides, si tentata persti-
 terit, coronatur, sicut scriptum est: *Vasa figuli pro-*
bat fornax, & homines justos tentatio tribulationis. Hoc
 denique inter nos & ceteros interest qui Deum nesci-
 unt, quod illi in adversis queruntur & murmurant,
 nos adversa non avocant a virtutis & fidei veritate,
 sed corroborant in dolore. Hoc quod nunc corporis
 vires solutus in fluxum venter eviscerat, quod in fau-
 cium vulnera conceptus medullitus ignis exæstuat,
 quod assiduo vomitu intestina quatiuntur, quod oculi
 vi sanguinis inardescunt, quod quorundam vel pedes
 vel aliquæ membrorum partes contagio morbidæ pu-
 tredinis amputantur, quod per jacturas & damna cor-
 porum prorumpente languore vel debilitatur incessus,
 vel auditus obstruitur, vel cæcatur aspectus, ad do-
 cumentum proficit fidei. Contra tot impetus vasti-
 tatis & mortis inconcussi animi virtutibus congregi,
 quanta pectoris magnitudo est, quanta sublimitas in-
 ter ruinas generis humani stare erectum, nec cum
 eis quibus spes in Deum nulla est, jacere prostratum?
 Gratulari magis oportet, & temporis munus amplecti,
 quod

quod dum nostram fidem fortiter promimus, & labore tolerato ad Christum per angustam Christi viam pergimus, præmium vitæ ejus & fidei ipso judicante capiamus. Mori plane timeat; sed qui ex aqua & spiritu non renatus, gehennæ ignibus mancipatur. Mori timeat qui non Christi cruce & passione censetur. Mori timeat qui ad secundam mortem de hac morte transibit. Mori timeat quem de sæculo recedentem, perennibus pœnis æterna flamma torquet. Mori timeat cui hoc mora longiore confertur, ut cruciatus ejus & gemitus interim differatur. Multi ex nostris in hac mortalitate moriuntur, hoc est, multi ex nostris de sæculo liberantur. Mortalitas ista ut Judæis & gentilibus & Christi hostibus pestis est, ita Dei servis salutaris excessus est. Hoc quod sine ullo discrimine generis humani cum injustis moriuntur & justis, non est quod putetis bonis & malis interitum esse communem. Ad refrigerium justis vocantur, ad supplicium rapiuntur injusti. Datur velocius tutela fidentibus, perfidis pœna. Improvidi & ingrati sumus, fratres dilectissimi, ad divina beneficia nec quid nobis conferatur, agnoscimus. Excedunt ecce in pace tutæ cum gloria sua virgines, venientes antichristi minas & corruptelas & lupanaria non timentes, pueri periculum lubricæ ætatis evadunt, ad continentiam atque innocentiam præmium feliciter perveniunt, tormenta jam non timet delicata matrona, metum persecutionis, & manus cruciatusque carnificis moriendi celeritate lucrata. Pavore mortalitatis & temporis accenduntur tepidi, constringuntur remissi, excitantur ignavi, desertores compelluntur redeant, gentiles coguntur ut credant, vetus fidelium populus ad quietem vocatur, ad aciem recens & copiosus exercitus robore fortiore colligitur, pugnaturus sine metu mortis cum prælium venerit, qui militiam tempore mortalitatis accedit. Quid deinde illud,

illud, fratres dilectissimi, quale est, quam pertinens, quam necessarium, quod pestis ista & lues, quæ horribilis & feralis videtur, explorat justitiam singulorum, & mentes humani generis examinat? an infirmis serviant sani, an propinqui cognatos pie diligant, an misereantur servorum languentium domini, an deprecantes ægros non deferant medici, an feroces violentiam suam comprimant, an rapaces avaritiæ furentis insatiabilem semper ardorem vel metu mortis extinguant, an cervicem flectant superbi, an audaciam leniant improbi, an pereuntibus caris, vel sic aliquid divites indigentibus largiantur, & donent sine herede morituri. Ut nihil aliud mortalitas ista contulerit, hoc christianis & Dei servis plurimum præstitit, quod martyrium cœpimus libenter appetere, dum mortem discimus non timere. Exercitia sunt nobis ista, non funera. Dant animo fortitudinis gloriam, contemptu mortis præparant ad coronam. Sed fortasse aliquis opponat & dicat: Hoc me ergo in præsentī mortalitate contristat, quod qui paratus ad confessionem fueram, & ad tolerantiam passionis toto me corde & plena virtute devoveram, martyrio meo privor, dum morte prævenior. Primo in loco non est in tua potestate, sed in Dei dignatione martyrium, nec potes te dicere perdidisse, quod nescis an merearis accipere. Tunc deinde Deus scrutator renis & cordis, & occultorum contemplator & cognitor videt te, & laudat, & comprobat, & qui perspicit apud te paratam fuisse virtutem, reddet pro virtute mercedem. Numquid Cain cum Deo munus offerret, jam peremerat fratrem? Et tamen parricidium mente conceptum Deus providus ante damnavit. Ut illic cogitatio mala & perniciofa conceptio Deo providente prospecta est, ita & in Dei servis, apud quos confessio cogitatur, & martyrium mente concipitur, animus ad bonum deditus Deo iudice coronatur.

D d 3

Aliud

Aliud est martyrio animum deesse, aliud animo defuisse martyrium. Qualem te invenit Dominus cum vocat, talem pariter & judicat, quando ipse testetur & dicat: *Et scient omnes ecclesia quia ego sum scrutator renis & cordis.* Nec enim Deus sanguinem nostrum desiderat, sed fidem quærit. Nam nec Abraham, nec Isaac, nec Jacob occisi sunt, & tamen fidei ac justitiæ meritis honorati, inter patriarchas primi esse meruerunt; ad quorum convivium congregatur, quisquis fidelis & justus & laudabilis invenitur. Meminisse debemus voluntatem nos non nostram, sed Dei facere debere, secundum quod nos Dominus quotidie jussit orare. Quam præposterum est quamque perversum, ut cum Dei voluntatem fieri postulemus, quando evocat nos & accersit de hoc mundo Deus, non statim voluntatis ejus imperio pareamus. Obnitimur & reluctamur, & pervicacium more servorum ad conspectum Domini cum tristitia & mœnore perducimur, exeuntes istinc necessitatis vinculo, non obsequio voluntatis: & volumus ab eo præmiis cælestibus honorari, ad quem venimus inviti. Quid ergo oramus & petimus, ut adveniat regnum cælorum, si captivitas terrena delectat? Quid precibus frequenter iteratis rogamus, & poscimus, ut acceleret dies regni, si majora desideria & vota potiora sunt, servire istic diabolo, quam regnare cum Christo? Denique ut manifestius divinæ providentiæ indicia clarescerent, quod Dominus præscius futurorum suis consulat ad veram salutem: cum quidam de collegis & confacerdotibus nostris infirmitate defessus, & de appropinquante jam morte sollicitus commeatum sibi precaretur, adstitit deprecanti, & jam pæne morienti juvenis honore & majestate venerabilis, statu celsus, & clarus aspectu, & quem assistentem sibi vix posset humanus aspectus oculis carnalibus intueri, nisi quod talem videre jam poterat de sæculo recessurus. Atque

que ille non sine quadam animi & vocis indignatione infremuit & dixit: Pati timetis, exire non vultis, quid faciam vobis? Increpantis vox est & monentis; qui de persecutione sollicitis, de accersitione securis non consentit ad præsens desiderium, sed consulit in futurum. Audivit frater noster & collega moriturus, quod ceteris diceret. Nam qui moriturus audivit, ad hoc audivit ut diceret. Audivit non sibi ille, sed nobis. Nam quid sibi disceret jam recessurus? Didicit immo nobis remanentibus; ut dum sacerdotem qui comæatum petebat, increpitum esse comperimus, quid cunctis expediat agnosceremus. Nobis quoque ipsis minimis & extremis quoties revelatum est, quam frequenter atque manifeste de Dei dignatione præceptum est, ut contestarer assidue, & publice prædicarem fratres nostros non esse lugendos accersitione dominica de sæculo liberatos; cum sciamus non eos amitti, sed præmitti, recedentes præcedere ut proficiscentes, ut navigantes solent, desiderari eos debere, non plangi, nec accipiendas esse hic atras vestes, quando illi ibi indumenta alba jam sumpserint, occasionem dandam non esse gentilibus, ut nos merito ac jure reprehendant, quod quos vivere apud Deum dicimus, ut extinctos & perditos lugeamus, & fidem quam sermone & voce depromimus, cordis & pectoris testimonio non probemus. Spei nostræ ac fidei prævaricatores sumus; simulata, ficta, fucata videntur esse quæ dicimus. Nihil prodest verbis præferre virtutem, & factis destruere veritatem. Increpat denique apostolus Paulus, & objurgat, & culpatur, si qui contristentur in excessu suorum: *Nolumus, inquit, ignorare vos, fratres, de dormientibus, ut non contristamini sicut & ceteri qui spem non habent. Si enim credimus quia Jesus mortuus est & resurrexit, sic & Deus eos qui dormierunt in Jesu, adducet cum illo.* Eos contristari dicit in excessu suorum

rum, qui spem non habent. Qui autem spe vivimus, & in Deum credimus, & Christum passum esse pro nobis & resurrexisse confidimus, in Christo manentes, & per ipsum atque in ipso resurgentes, quid aut ipsi recedere istinc de sæculo volumus, aut nostros recedentes quasi perditos plangimus ac dolemus, ipso Christo Domino & Deo nostro monente ac dicente: *Ego sum resurrectio & vita. Qui credit in me, licet moriatur vivet; & omnis qui vivit, & credit in me, non morietur in æternum.* Si in Christum credimus, si fidem verbis & promissis ejus habemus, & non morimur in æternum, ad Christum, cum quo & victuri & regnaturi semper sumus, læta securitate veniamus. Quod interim morimur, ad immortalitatem morte transgredimur: nec potest vita æterna succedere, nisi hinc contigerit exire. Non est exitus iste, sed transitus, & temporali itinere decurso ad æterna transgressus. Quis non ad meliora venire festinet? Quis non mutari & transformari ad Christi speciem, & ad cælestis gloriæ dignitatem venire citius exoptet, Paulo apostolo prædicante & dicente: *Nostra autem conversatio, inquit, in calis est, unde & Dominum exspectamus Jesum Christum, qui transformabit corpus humilitatis nostræ conformatum corpori claritatis suæ.* Tales nos futuros & Christus Dominus pollicetur, quando ut cum illo simus, & cum illo in æternis sedibus vivamus, atque in regnis cælestibus gaudeamus, patrem pro nobis precatur dicens: *Pater, quos mihi dedisti, volo ut ubi ego fuero, & ipsi sint mecum, & videant claritatem quam mihi dedisti prius, quam mundus fieret.* Venturus ad Christi sedem, ad regnorum cælestium claritatem, lugere non debet nec plangere, sed potius pollicitationem Domini, secundum fidem veri, in professione hac sua & translatione gaudere. Sic denique invenimus & Enoch translatum esse, qui Deo placuit; sicut in Ge-

nesi

nesi testatur, & loquitur scriptura divina: *Et placuit Enoch Deo, & non est inventus postmodum, quia Deus illum transtulit.* Hoc fuit placuisse in conspectu Dei, de hoc contagio sæculi meruisse transferri. Sed & per Salomonem docet Spiritus sanctus eos qui Deo placeant, maturius istinc eximi, & citius liberari, ne dum in isto mundo diutius immorantur, mundi contactibus polluantur. *Raptus est, inquit, ne malitia mutaret intellectum illius. Placida enim erat Deo anima ejus. Propter hoc properavit educere eum de media iniquitate.* Sic & in psalmis ad Dominum properat spiritali fide Deo suo anima devota, dicens: *Quam dilectissima habitationes tue, Deus virtutum. Desiderat & properat anima mea ad atria Dei.* Ejus est in mundo diu velle remanere, quem mundus oblectat, quem sæculum blandiens atque decipiens illecebris terrenæ voluptatis invitat. Porro cùm mundus oderit christianum, quid amas eum qui te odit, & non magis sequeris Christum, qui te & redemit & diligit? Joannes in epistola sua clamat & loquitur, & ne carnalia desideria sectantes mundum diligamus, hortatur: *Nolite, inquit, diligere mundum neque ea quæ in mundo sunt. Si quis dilexerit mundum, non est caritas patris in illo: quia omne quod in mundo est, concupiscentia carnis est, & concupiscentia oculorum, & ambitio sæculi, quæ non est a patre, sed ex concupiscentia mundi, & mundus transibit & concupiscentia ejus. Qui autem fecerit voluntatem Dei, manet in æternum, quomodo & Deus manet in æternum.* Potius, fratres dilectissimi, mente integra, fide firma, virtute robusta, parati ad omnem voluntatem Dei simus, pavore mortis excluso immortalitatem quæ sequitur, cogitemus. Hoc nos ostendamus esse quod credimus, ut neque carorum lugeamus excessum, & cum accerfitionis propriæ dies venerit, incunctanter & libenter ad Dominum ipso vocante veniamus. Quod cum semper

faciendum fuerit Dei servus, nunc fieri multo magis debet, corruente jam mundo, & malorum infestantium turbinibus obfesso; ut qui cernimus cœpisse jam gravia, & scimus imminere graviora, lucrum maximum computemus, si istinc velocius recedamus. Si in habitaculo tuo parietes vetustate nutarent, tecta desuper tremarent, domus jam fatigata, jam lassâ, ædificiis senectute labentibus, ruinam proximam minaretur, nonne omni celeritate migrares? Si navigante te turbida & procellosa tempestas, fluctibus violentius excitatis, prænuntiaret futura naufragia, nonne portum velociter peteres? Mundus ecce nutat & labitur, & ruinam sui non jam senectute rerum, sed sine testatur; & tu non Deo gratias agis, non tibi gratularis quod exitu maturiore substractus, ruinis, & naufragiis, & plagis imminentibus exuaris? Considerandum est, fratres dilectissimi, & idemtidem cogitandum renuntiâsse nos mundo, & tamquam hospites & peregrinos istinc interim degere. Amplectamur diem qui assignat singulos domicilio suo, qui nos istinc ereptos, & laqueis secularibus exsolutos paradiso restituit, & regno. Quis non peregre constitutus properaret in patriam regredi? Quis non ad suos navigare festinans, ventum prosperum cupidius optaret, ut velociter caros liceret amplecti? Patriam nostram paradysum computamus. Parentes patriarchas habere jam cœpimus. Quid non properamus & currimus, ut patriam nostram videre, ut parentes salutare possimus? Magnus illic nos carorum numerus expectat, parentum, fratrum, filiorum frequens nos & copiosa turba desiderat, jam de sua incolumitate secura, & adhuc de nostra salute sollicita. Ad horum conspectum & complexum venire, quanta & illis, & nobis in commune lætitia est? Qualis illic cœlestium regnorum voluptas sine timore moriendi, & cum æternitate vivendi quam summa & perpetua felicitas? Illic

Illic apostolorum gloriosus chorus, illic prophetarum exultantium numerus, illic martyrum innumerabilis populus ob certaminis & passionis victoriam coronatus, triumphantes illic virgines, quæ concupiscentiam carnis & corporis continentiae robore subegerunt, remunerati misericordes, qui alimentis & largitionibus pauperum iustitiae opera fecerunt, qui dominica praecepta servantes, ad caelestes thesauros terrena patrimonia transtulerunt. Ad hos, fratres dilectissimi, avida cupiditate properemus, ut cum his cito esse, ut cito ad Christum venire contingat, optemus. Hanc cogitationem nostram Deus videat, hoc propositum mentis & fidei Dominus Christus aspiciat, daturus eis gloriae suae ampliora praemia, quorum circa se fuerint desideria majora.

LIBER

DE OPERE ET ELEEMOSYNIS.

Multa & magna sunt, fratres carissimi, beneficia divina quibus in salutem nostram Dei patris & Christi larga & copiosa clementia & operata sit, & semper operetur, quod conservandis ac vivificandis nobis pater filium misit, ut reparare nos posset, quodque filius missus esse, & hominis filius fieri voluit, ut nos Dei filios faceret. Humiliavit se, ut populum qui prius jacebat, erigeret. Vulneratus est, ut vulnera nostra curaret. Servivit, ut ad libertatem fervientes extraheret. Mori sustinuit, ut immortalitatem mortalibus exhiberet. Multa haec sunt & magna divinae misericordiae munera. Sed adhuc qualis providentia illa, & quanta clementia est, quod nobis saluari ratione prospicitur, ut homini qui redemptus est,

est, reservando plenius consulatur. Nam cum Dominus adveniens sanasset illa, quæ Adam portaverat vulnera, & venena serpentis antiqua curasset, legem dedit sano, & præcepit ne ultra jam peccaret, ne quid peccanti pravius eveniret. Coartati eramus, & in angustum innocentiae præscriptione conclusi. Nec haberet quid fragilitatis humanæ infirmitas atque imbecillitas faceret, nisi iterum pietas divina subveniens, justitiæ & misericordiæ operibus ostensis, viam quamdam tuendæ salutis aperiret, ut sordes postmodum, quas cumque contrahimus, eleemosynis abluamus. Loquitur in scripturis divinis Spiritus sanctus, & dicit: *Eleemosynis & fide delicta purgantur.* Non utique illa delicta quæ fuerant ante contracta. Nam illa Christi sanguine & sanctificatione purgantur. Item denuo dicit: *Sicut aqua exstinguit ignem, sic eleemosyna exstinguit peccatum.* Hic quoque ostenditur & probatur, quia sicut lavacro aquæ salutaris gehennæ ignis exstinguitur, ita & eleemosynis atque operationibus justis delictorum flamma sopitur. Et quia semel in baptismo remissa peccatorum datur, assidua & jugis operatio, baptismi instar imitata, Dei rursus indulgentiam largitur. Hoc & in evangelio Dominus docet. Nam cum denotarentur discipuli ejus quod ederent, nec prius manus abluissent, respondit & dixit: *Qui facit quod intus est, fecit & quod foris est. Verum date eleemosynam, & ecce vobis munda omnia.* Docens scilicet, & ostendens, non manus lavandas esse, sed pectus, & sordes intrinsecus potius quam extrinsecus detrahendas, verum qui purgaverit quod est intus, eum quoque id quod foris est, repurgasse, & emundata mente, cute quoque & corpore mundum esse cœpisse. Porro autem monens & ostendens unde mundi & purgati esse possimus, addidit eleemosynas esse faciendas. Misericors docet & monet, misericordiam fieri; & quia servare quærit, quos magno pretio redemit,

mit, post baptismi gratiam sordidatos docet denuo posse purgari. Agnoscamus itaque, fratres carissimi, divinæ indulgentiæ munus salubre, & emundandis purgandisque peccatis nostris, qui sine aliquo conscientiae vulnere esse non possumus, medelis spiritalibus vulnera nostra curemus. Nec quisquam sic sibi de puro atque immaculato pectore blandiatur, ut innocentia sua fretus, medicinam non putet adhibendam esse vulneribus, cum scriptum sit: *Quis gloriabitur castum se habere cor, aut quis gloriabitur mundum se esse a peccatis?* Et iterum in epistola sua Joannes ponat & dicat: *Si dixerimus quia peccatum non habemus, nos ipsos decipimus, & veritas in nobis non est.* Si autem nemo esse sine peccato potest, & quisquis inculpatum se esse dixerit, aut superbus, aut stultus est; quam necessaria, quam benigna est divina clementia, quæ cum sciat non deesse sanatis quædam postmodum vulnera, dedit curandis denuo sanandisque vulneribus remedia salutaria. Numquam denique, fratres dilectissimi, admonitio divina cessavit, & tacuit, quo minus in scripturis sanctis tam veteribus, quam novis, semper & ubique ad misericordiæ opera Dei populus provocaretur: & canente atque exhortante Spiritu sancto quisquis ad spem regni cælestis instruitur, facere eleemosynas jubetur. Mandat & præcipit Esaïæ Deus: *Exclama, inquit, in fortitudine, & noli parcere. Sicut turba exalta vocem tuam, & annuntia plebi meæ peccata ipsorum, & domui Jacob facinora eorum.* Et cum peccata eis sua exprobrari præcepisset, cumque eorum facinora pleno indignationis impetu protulisset, dixissetque eos, nec si orationibus & precibus & jejuniis uterentur, satisfacere pro delictis posse, nec si in cilicio & cinere volverentur, iram Dei posse lenire, in novissima tamen parte demonstrans solis eleemosynis Deum posse placari, addidit dicens: *Frangere esurienti panem tuum, & egenos sine tecto inducere in domum tuam.*

tugui. Si videris nudum, vesti eum, & domesticos seminis tui non despicias. Tunc erumpet temporaneum lumen tuum, & vestimenta tua cito orientur, & praeibit ante te iustitia, & claritas Dei circumdabit te. Tunc exclamabis, & Deus exaudiet te. Dum adhuc loqueris, dicet: Ecce adsum. Remedia propitiando Deo ipsius Dei verba data sunt, quid deberent facere peccantes, magisteria divina docuerunt, operationibus iustis Deo satisfieri, misericordiae meritis peccata purgari. Et apud Salomonem legimus: *Conclude eleemosynam in corde pauperis, & hac pro te exorabit ab omni malo.* Et iterum: *Qui obturat aures ne audiat imbecillum, & ipse invocabit Deum, & non erit qui exaudiat eum.* Neque enim promereri misericordiam Domini poterit, qui misericors ipse non fuerit, aut impetrabit de divina pietate aliquid in precibus, qui ad precem pauperis non fuerit humanus. Quod item in psalmis Spiritus sanctus declarat, & probat, dicens: *Beatus qui intelligit super egenum & pauperem, in die mala liberabit eum Dominus.* Quorum praeceptorum memor Daniel, cum rex Nabuchodonosor adverso somnio territus aestuaret, praevitendis malis ad divinam opem impetrandam remedium dedit, dicens: *Propterea, rex concilium meum placeat tibi, & peccata tua eleemosynis redime, & iniustitias tuas miserationibus pauperum, & erit Deus parcens peccatis tuis.* Cui rex non obtemperans, adversa quae viderat, & infesta perpeffus est: quae evadere & vitare potuisset, si peccata sua eleemosynis redemisset. Raphael quoque angelus paria testatur, & ut eleemosyna libenter ac largiter fiat, hortatur, dicens: *Bona est oratio cum jejunio & eleemosyna, quia eleemosyna a morte liberat, & ipsa purgat peccata.* Ostendit orationes nostras ac jejunia minus posse, nisi eleemosynis adjuventur, deprecationes solas parum ad impetrandum valere, nisi factorum & operum accessione satientur. Revelat angelus & manifestat, & firmat eleemosynis petitiones nostras

nostras efficaces fieri, eleemosynis vitam de periculis
 redimi, eleemosynis animas a morte liberari. Nec
 sic, fratres carissimi, ista proferimus, ut non quod
 Raphael angelus dixit, veritatis testimonio compro-
 bemus. In actibus apostolorum facti fides posita est,
 & quod eleemosynis, non tantum a secunda, sed a
 prima morte animæ liberentur, gestæ & impletæ rei
 probatione compertum est. Tabitha operationibus ju-
 tis & eleemosynis præstandis plurimum dedita, cum
 infirmata esset & mortua, ad cadaver exanime Petrus
 accitus est: qui cum impigre pro apostolica humanitate
 venisset, circumsteterunt eum viduæ flentes & rogan-
 tes, pallia, & tunicas, & omnia illa, quæ prius sumpse-
 rat indumenta monstrantes, nec pro defuncta suis
 precibus, sed ipsius operibus deprecantes. Sensit Pe-
 trus impetrari posse, quod sic petebatur, nec defu-
 rum Christi auxilium viduis deprecantibus, quan-
 to esset in viduis ipse vestitus. Cum itaque genibus
 prostratus orasset, viduarum ac pauperum idoneus advo-
 catus legatas sibi preces ad Dominum pertulisset,
 conversus ad corpus, quod in tabula jam lotum ja-
 cebat: *Tabitha*, inquit, *exsurge in nomine Jesu Christi*.
 Nec defuit Petro, quo minus statim ferret auxilium,
 cui in evangelio dari dixerat, quidquid fuisset ejus
 nomine postulatum. Mors itaque suspenditur, &
 spiritus redditur, & mirantibus ac stupentibus cunctis,
 ad hanc mundi denuo lucem redivivum corpus ani-
 matur. Tantum potuerunt misericordiæ merita, tan-
 tam opera justa valuerunt. Quæ laborantibus viduis
 largita fuerat subsidia vivendi, meruit ad vitam vidua-
 rum petitione revocari. Itaque in evangelio Domi-
 nus, doctor vitæ nostræ & magister salutis æternæ,
 vivificans credentium populum, & vivificatis consu-
 mens in æternum, inter sua mandata divina & præcep-
 ta cælestia nihil crebrius mandat & præcipit, quam
 ut insistamus eleemosynis dandis, nec terrenis posses-
 sioni-

sionibus incumbemus, sed cælestes thesauros potius recondamus. *Vendite*, inquit, *res vestras*, & *date eleemosynam*. Et iterum: *Nolite vobis condere thesauros super terram*, ubi *tinea* & *comeštura* exterminat, & ubi *fures* effodiunt, & *furantur*. *Thesaurizate autem vobis thesauros in calo*, ubi neque *tinea* neque *comeštura* exterminat, & ubi *fures* non effodiunt, nec *furantur*. Ubi enim fuerit *thesaurus tuus*, ibi erit & *cor tuum*. Et cum observata lege perfectum & consummatum vellet ostendere: Si vis, inquit, perfectus esse, vade & vende omnia tua, & da egenis, & habebis thesaurum in calo, & veni, sequere me. Item alio loco negotiatorem cælestis gratiæ, & comparatorem salutis æternæ, distractis omnibus rebus suis, pretiosam margaritam, hoc est, vitam æternam Christi cruore pretiosam, de quantitate patrimonii sui dicit debere mercari. *Simile est*, inquit, *regnum calorum homini negotiatori quærenti bonas margaritas*. Ubi autem invenit pretiosam margaritam, abiit, & vendidit omnia quæ habuit, & emit illam. Eos denique & Abrahæ filios dicit, quos in juvandis alendisque pauperibus operarios cernit. Nam cum Zachæus dixisset: *Ecce dimidium ex substantia mea do egenis*, & si cui quid fraudavi, quadruplum reddo; respondit Jesus, & dixit: *Quia salus hodie huic domui facta est, quoniam & hic filius est Abrahæ*. Nam si Abraham credidit Deo, & deputatum est ei ad justitiam, utique qui secundum præceptum Dei eleemosynas facit, Deo credit, & qui habet fidei veritatem, servat Dei timorem; qui autem Dei timorem servat, in miserationibus pauperum Deum cogitat. Operatur enim ideo quia credit, quia scit vera esse, quæ prædicta sunt verbis Dei, nec scripturam sanctam posse mentiri, arbores infructuosas, id est, steriles homines, excidi & in ignem mitti, misericordes autem ad regnum vocari. Qui & alio in loco operarios, & fructuosos fideles appellat, infructuosis vero & sterilibus fidem dero-

derogat, dicens: *Si in injusto mammona fideles non fuistis, quod est verum, quis credet vobis? Et si in alieno fideles non fuistis, quod est vestrum, quis dabit vobis? Si vereris & metuis, ne si operari plurimum cœperis, patrimonio tuo larga operatione finito ad penuriam forte redigaris: esto in hac parte intrepidus, esto securus; finiri non potest, unde in usus Christi impenditur, unde opus cœleste celebratur. Nec hoc tibi de meo spondeo, sed de sanctarum scripturarum fide, & divinæ pollicitationis auctoritate promitto. Loquitur per Salomonem Spiritus sanctus, & dicit: *Qui dat pauperibus, numquam egebit, qui autem avertit oculum suum, in magna penuria erit*; ostendens misericordes atque operantes egere non posse, magis parcos & steriles ad inopiam postmodum devenire. Item beatus apostolus Paulus dominicæ inspirationis gratia plenus: *Qui administrat, inquit, semen seminanti, & panem ad edendum præstabit, & multiplicabit seminationem vestram, & auget incrementa frugum justitiæ vestræ, ut in omnibus locupletemini. Et iterum: Administratio hujus officii non tantum supplebit ea quæ sanctis desunt, sed & abundabit per multam gratiarum actionem in Deum. Quoniam dum gratiarum actio ad Deum pro eleemosynis atque operationibus nostris pauperum oratione dirigitur, census operantis Dei retributione cumulat. Et Dominus in evangelio jam tunc ejusmodi hominum corda considerans, & perfidis atque incredulis præscia voce denuntians, contestatur & dicit: *Nolite cogitare dicentes: Quid edemus, aut quid bibemus, aut quid vestiemur? Hac enim nationes quærunt. Scit autem pater vester quia omnium horum indigetis. Quærite primum regnum Dei & justitiam ejus, & omnia ista apponentur vobis. Eis omnia apponi dicit & tradi, qui regnum & justitiam Dei quærunt. Eos enim Dominus, cum judicii dies venerit, ad percipiendum regnum dicit admitti, qui fuerint in ecclesia ejus operati,***

St. Cypriani Tom. I. E e rati,

rati. Metuis ne patrimonium tuum forte deficiat, si operari ex eo largiter cœpetis; & nescis, miser, quia dum timens ne res familiaris deficiat, vita ipsa & salus deficit, & dum ne quid de rebus tuis minuat, attendis; non respicis quod ipse minuaris, amator magis mammonæ quam animæ tuæ; ut dum times, ne pro te patrimonium tuum perdas, ipse pro patrimonio tuo pereas. Et ideo bene apostolus clamat & dicit: *Nihil intulimus in hunc mundum, verum nec auferre quid possumus. Habentes itaque exhibitionem & tegumentum, his contenti sumus. Qui autem volunt divites fieri, incidunt in tentationem, & in mulpulam, & desideria multa & nocentia, quæ mergunt hominem in perditionem & in interitum. Radix enim omnium malorum est cupiditas, quam quidam appetentes naufragaverunt a fide, & inseruerunt se doloribus multis.* Metuis ne patrimonium tuum forte deficiat, si operari ex eo largiter cœperis? Quando enim factum est ut iusto possent deesse subsidia vitæ, cum scriptum sit: *Non occidet fame Dominus animam iustam.* Helias in solitudine corvis ministrantibus pascitur, & Danieli in lacu ad leonum prædam iussu regis incluso, prandium divinitus apparetur, & tu metuis ne operanti tibi, & Dominum promerenti desit alimentum, quando ipse in evangelio ad exprobrationem eorum, quibus mens dubia est, & fides parva, contestetur & dicat: *Aspicite volatilia cali, quoniam non seminant, neque metunt, neque colligunt in horrea, & pater vester celestis alit illa. Nonne vos pluris illis estis? Volucres Deus pascit, & passeribus alimenta diurna præstantur; & quibus nullus divinæ rei sensus est, eis nec potus nec cibus deest. Tu christiano, tu Dei servo, tu operibus bonis dedito, tu domino suo caro aliquid existimas defuturum? Nisi si putas quia qui Christum pascit, a Christo ipse non pascitur, aut eis terrena deerunt, quibus celestia & divina tribuantur. Unde hæc incredula cogitatio,*
unde

unde impia & sacrilega ista meditatio? Quid facit in domo fidei perfidum pectus? Quid qui Christo omnino non credit, appellatur & dicitur christianus? Pharisei tibi magis congruit nomen. Nam cum Dominus in evangelio de eleemosynis disputaret, & ut nobis amicos de terrestribus lucris provida operatione faceremus, qui nos postmodum in tabernacula æterna susciperent, fideliter ac salubriter præmoneret; addidit post hæc scriptura dicens: *Audiebant autem hæc omnia Pharisei, qui erant cupidissimi, & irridebant eum.* Quales nunc quosdam in ecclesia videmus, quorum præclusæ aures & corda cæcata, nullum de spiritualibus ac salutaribus monitis lumen admittunt; de quibus mirari non oportet, quod contemnant in tractatibus servum, quando a talibus ipsum Dominum videamus esse contemptum. Quid tibi in istis ineptis & stultis cogitationibus plaudis, quasi metu & sollicitudine futurorum ab operibus retarderis? Quid umbras & præstigias quasdam vanæ excusationis obtendis? Confitere immo quæ vera sunt; quia scientes non potes fallere, secreta & abdita mentis exprime. Obsederunt animum tuum sterilitatis tenebræ, & recedente inde lumine veritatis, carnale pectus altum & profunda avaritiæ caligo cæcavit. Pecuniæ tuæ captivus & servus es, catenis cupiditatis & vinculis alligatus es, & quem jam solverat Christus, denno vinctus es. Servas pecuniam, quæ te servata non servat. Patrimonium cumulas, quod te pondere suo onerat; nec meministi, quid Deus responderit diviti, exuberantium fructuum copiam stulta exultatione jactanti: *Stulpe, inquit, hac nocte expostulatur anima tua a te. Quæ ergo parasti, cujus erunt?* Quid divitiis tuis solus incubas? quid in pœnam tuam patrimonii tui pondus exaggeras, ut quo locupletior sæculo fueris, pauperior Deo fias? Redditus tuos divide cum Domino Deo tuo, fructus tuos partire cum

Christo, fac tibi possessionum terrestrium Christum participem, ut & ille te sibi faciat regnorum cælestium coheredem. Erras & falleris, quisquis te in sæculo divitem credis. Audi in apocalypsi Domini tui vocem, ejusmodi homines justis objurgationibus increpantem. *Dicis, inquit, dives sum, & ditatus sum, & nullius rei ego; & nescis quoniam tu es miser, & miserabilis, & pauper, & cæcus, & nudus. Suadeo tibi emere a me aurum ignitum de igni, ut sis dives, & vestem albam, ut vestiarius, & non appareat in te sorditas nuditatis tuæ, & collyrio inunge oculos tuos ut videas.* Qui ergo locuples & dives es, eme tibi a Christo aurum ignitum, ut sordibus tuis tamquam igne decoctis, esse aurum mundum possis, si eleemosynis & justa operatione purgeris. Eme tibi albam vestem, ut qui secundum Adam nudus fueras, & horrebas ante deformis, indumento Christi candido vestiarius. Et quæ matrona in ecclesia Christi locuples & dives es, inunge oculos tuos, non stibio diaboli, sed collyrio Christi; ut pervenire ad videndum Deum possis, dum Deum & operibus & moribus promereris. Ceterum quæ talis es, nec operari in ecclesia potes. Egentem enim & pauperem non vident oculi tui, superfusi nigroris tenebris, & nocte contexti. Locuples & dives es, & dominicum celebrare te credis, quæ corban omnino non respicis, quæ in dominicum sine sacrificio venis, quæ partem de sacrificio, quod pauper obtulit, sumis? Intuere in evangelio viduam præceptorum cælestium memorem, inter ipsas pressuras & angustias egestatis operantem, in gazophylacium duo, quæ sola sibi fuerant, minuta mittentem: quam cum animadverteret Dominus & videret: non de patrimonio, sed de animo opus ejus examinans, & considerans non quantum sed ex quanto dedisset; respondit & dixit: *Amen dico vobis, quoniam vidua ista plus omnibus misit in dona Dei. Omnes enim isti ex eo quod abundavit illis,*

*illis, miserunt in dona Dei. Hac autem de inopia sua omnem, quemcumque habuit victum misit. Multum beata mulier & gloriosa, quæ etiam ante diem iudicii meruit iudicis voce laudari. Pudeat divites sterilitatis atque infidelitatis suæ. Vidua, & vidua inops, rebus dives in opere invenitur. Cumque universa quæ dantur, pupillis & viduis conferantur, dat illa quam oportebat accipere; ut sciamus quæ pœna sterilem divitem maneat, quando hoc ipso documento operari etiam pauperes debeant. Atque ut intelligamus hæc opera Deo dari, & eum quisquis hæc faciat, Dominum promereri, Christus illud Dei dona appellat, & in dona Dei viduam duos quadrantes misisse significat, ut magis ac magis possit esse manifestum, quia qui miseretur pauperis, Deum fenerat. Sed nec illa res, fratres carissimi, a bonis operibus & iustis refrenet, & revocet christianum, quod excusari se posse aliquis existimet beneficio filiorum, quando in impensis spiritalibus Christum cogitare, qui accipere se professus est, debeamus, nec conservos liberis nostris, sed Dominum præferamus, ipso instruente & monente: *Qui diligit, inquit, patrem aut matrem super me, non est me dignus; & qui diligit filium aut filiam super me, non est me dignus.* Item in Deuteronomio, ad corroborationem fidei & dilectionem Dei, paria conscripta sunt. *Qui dicunt, inquit, patri aut matri, non novi te, & filios suos non agnoverunt, hi custodierunt præcepta tua, & testamentum tuum servaverunt.* Nam si Deum toto corde diligimus, nec parentes nec filios Deo præferre debemus. Quod & Joannes in epistola sua ponit, caritatem Dei apud eos non esse, quos videamus operari in pauperes nolle. *Qui habuerit, inquit, substantiam mundi, & viderit fratrem suum desiderantem, & clauserit viscera sua, quomodo caritas Dei manet in illo?* Si enim Deus eleemosynis pauperum feneratur, & cum datur minimis, Christo da-*

tur; non est quod quis terrena cælestibus præferat, nec divinis humana præponat. Sic vidua illa in tertio regnorum libro, cum in siccitate & fame, consumptis omnibus. de modico farre & oleo quod superfuerat, fecisset subcinericium panem, quo absumpto moritura cum liberis esset: supervenit Helias, & petiit sibi prius ad edendum dari, tunc quod superfuisset, inde illam cum filiis suis vesci. Nec obtemperare illa dubitavit, aut Heliæ filios mater in fame & egestate præposuit. Fit immo in conspectu Dei, quod Deo placeat; prompte ac libenter quod petebatur, offertur; nec de abundantia portio, sed de modico totum datur, & esurientibus liberis alter prius pascitur, neque in penuria & fame cibus, ante quam misericordia cogitatur; ut dum in opere salutari carnaliter vita contemnitur, spiritualiter anima servetur. Helias itaque typum Christi gerens, & quod ille pro misericordia vicem singulis reddat, ostendens, respondit & dixit: *Hæc dicit Dominus: Fidelia farris non deficiet, & capsaces olei non minuetur usque in diem, quod dabit Dominus imbrem super terram.* Secundum divinæ pollicitationis fidem multiplicata sunt viduæ & cumlata, quæ præstitit, & operibus justis ac misericordiæ meritis augmenta & incrementa sumentibus, farris & olei vasa completa sunt. Nec filiis abstulit mater quod Heliæ dedit, sed magis contulit filiis, quod benigne & pie fecit. Et illa nondum Christum sciebat, nondum præcepta ejus audierat, non cruce & passione ejus redempta, cibum & potum pro sanguine rependebat: ut ex hoc appareat quantum in ecclesia peccet, qui se & filios Christo anteponebat, divitias suas servat, nec patrimonium copiosum cum indigentium paupertate communicat. Sed enim multi sunt in domo liberi, & retardat te numerositas filiorum, quo minus largiter bonis operibus insistas. Atqui hoc ipso operari amplius debes, quo multorum pig-
norum

norum pater es. Plures sunt pro quibus Dominum deprecaberis, multorum delicta redimenda sunt, multorum purgandæ conscientiæ, multorum animæ liberandæ. Ut in hac vita sæculari alendis sustinendisque pignoribus quo major est numerus, hoc major & sumptus est: ita & in vita spiritali atque cælesti, quo amplior fuerit pignorum copia, esse & operum debet major impensa. Sic & Job sacrificia numerosa pro liberis offerebat: quantusque erat in domo pignorum numerus, tantus dabatur Deo & numerus hostiarum. Et quoniam quotidie deesse non potest, quod peccetur in conspectu Dei, sacrificia quotidiana non deerant, quibus possent peccata tergeri. Probat scriptura divina dicens: *Job homo verus: & justus habuit filios septem, & filias tres, & emundabat illos offerens pro eis hostias Deo secundum numerum illorum, & pro peccatis eorum vitulum unum.* Si ergo vere filios tuos diligis, si eis exhibes plenam & paternam dulcedinem caritatis; operari magis debes, ut filios tuos Deo justa operatione commendes. Nec eum liberis tuis cogites patrem, qui & temporarius & infirmus est, sed illum pares, qui æternus & firmus filiorum spiritalium pater est. Illi assigna facultates tuas, quas heredibus servas. Ille sit liberis tuis tutor, ille curator, ille contra omnes injurias seculares divina majestatem protector. Patrimonium Deo creditum nec respublica eripit, nec fiscus invadit, nec calumnia aliqua forensis evertit. In tuto hereditas ponitur, quæ Deo custode servatur. Hoc est caris pignoribus in posterum providere, hoc est futuris heredibus paterna pietate consulere, secundum fidem scripturæ sanctæ dicentis: *Junior fui, & senui, & non vidi justum derelictum, neque semen ejus egens pane. Tota die miseretur & fenerat, & semen ejus in benedictione est.* Et iterum: *Qui conversatur sine vituperatione in justitia, beatos post se filios relinquet.* Prævaricator itaque & proditor pater es, nisi filiis tuis

fideliter confulas, nisi conservandis eis religiosa & vera pietate prospicias. Qui studes terreno magis quam cælesti patrimonio, filios tuos diabolo magis commendare quam Christo: bis delinquis, & geminum ac duplex crimen admittis; & quod non præparas filiis tuis Dei patris auxilium, & quod doces filios patrimonium plus amare quam Christum. Esto potius liberis tuis pater talis, qualis Tobias existit. Da utilia & salutaria præcepta pignoribus, qualia ille filio dedit: manda filiis tuis, quod & ille filio mandavit, dicens: *Et nunc, fili, mando tibi; servi Deo in veritate, & fac coram illo quod illi placet, & filiis tuis manda ut faciant justitiam & eleemosynas, & sint memores Dei, & benedicant nomen ejus omni tempore: Et iterum: Omnibus diebus vita tua, fili dilectissime, Deum in mente habe, & noli præterire præcepta ejus. Justitiam fac omnibus diebus vita tua, & noli ambulare viam iniquitatis; quoniam agente te ex veritate, erit respectus operum tuorum. Ex substantia tua fac eleemosynam, & noli avertere faciem tuam ab ullo paupere. Ita fiet ut nec a te avertatur facies Dei. Prout habueris, fili, sic fac. Si tibi fuerit copiosa substantia, plus ex illa fac eleemosynam. Si exiguum habueris, ex hoc ipso exiguo commutua. Et ne timueris cum facis eleemosynam. Præmium enim bonum reponis tibi in diem necessitatis, quia eleemosyna a morte liberat, & non patitur ire in gehennam. Munus bonum est eleemosyna omnibus, qui faciunt eam coram summo Dei. Quale munus est, fratres carissimi, cujus editio Deo spectante celebratur? Si in gentilium munere grande & gloriosum videtur, proconsules vel imperatores habere præsentem, & apparatus ac sumptus apud munerarios major est, ut possint placere majoribus; quanto illustrior muneris & major est gloria, Deum & Christum spectatores habere? Quanto istic & apparatus uberior, & sumptus largior exhibendus est, ubi ad spectaculum conveniunt cælorum virtutes, conveniunt*

niunt angeli omnes, ubi munerario non quadriga vel consulatus petitur, sed vita æterna prestatur, nec captatur inanis & temporarius favor vulgi, sed perpetuum præmium regni cælestis accipitur? Atque ut pigros & steriles, & cupiditate nummaria nihil circa fructum salutis operantes magis pudeat, ut plus conscientiam sordidam dedecoris ac turpitudinis suæ rubor cædat, ponat unusquisque ante oculos suos diabolum cum servis suis, id est, cum populo perditionis ac mortis; in medium proflire, plebem Christi, præsentem & judicantem ipso, comparisonis examine provocare dicentem: Ego pro istis quos mecum vides, nec alapas accepi, nec flagella sustinui, nec crucem pertuli, nec sanguinem fudi, nec familiam meam pretio passionis & cruoris redemi; sed nec regnum illi, cælestem promitto, nec ad paradysum restituta immortalitate (denuo revoco; & munerera mihi quam pretiosa quam grandia, quam nimio & longo labore quæsitâ sumptuosissimis apparatus comparant, rebus suis vel obligatis in muneris comparatione, vel venditis; ac nisi editio honesta successerit, conviciis ac sibilis eiiciuntur, & furore populari, nonnumquam pæne lapidantur? Tuos tales munerarios, Christe, demonstra, illos divites, illos copiosis opibus affluentes, an in ecclesia præsidente & spectante te ejusmodi munus edant, oppignoratis vel distractis rebus suis, immo ad cælestes thesauros mutata in melius possessione translatis. In istis muneribus meis caducis atque terrenis nemo pascitur, nemo vestitur, nemo cibi alicujus aut potus solatio sustinetur. Cuncta inter furorem edentis & spectantis errorem prodiga & stulta voluptatum frustrantium vanitate depereunt. Illic in pauperibus tuis tu vestiris & pascaris, tu æternam vitam operantibus polliceris; & vix tui meis pereuntibus adæquantur, qui a te divinis mercedibus & præmiis cælestibus honorantur. Quid ad hæc re-

E e 5

spon-

spondemus, fratres carissimi? Sacrilega sterilitate, & quadam tenebrarum nocte coopertas divitum mentes, qua ratione defendimus, qua excusatione purgamus, qui diaboli servis minores sumus, ut Christo pro pretio passionis & sanguinis, vicem nec in modicis rependamus? Præcepta ille nobis dedit, quid facere servos suos oporteret, instruxit, operantibus præmium pollicitus, & supplicium sterilibus comminatus, sententiam suam protulit, quid judicaturus sit, ante prædixit. Quæ potest excusatio esse cessanti, quæ defensio sterili, nisi quod non faciente servo quod præcipitur, Dominus faciet quod minatur; qui & dicit: *Cum venerit filius hominis in claritate sua, & omnes angeli cum eo, tunc sedebit in throno claritatis suæ, & colligentur ante eum omnes gentes, & segregabit eos ab invicem, quemadmodum pastor segregat oves ab hædis, & statuet oves ad dexteram suam, hædos autem ad sinistram. Tunc dicet rex iis qui ad dexteram suam erunt: Venite benedicti patris mei, percipite regnum quod vobis paratum est ab origine mundi. Esurivi enim, & dedistis mihi manducare; Siti- vi, & potastis me; hospes fui, & adduxistis me; nudus, & vestistis me; infirmatus sum, & visitastis me; in carcere fui, & venistis ad me. Tunc respondebunt ei justi dicentes: Domine, quando te vidimus esurientem & pavimus, sitientem & potavimus? Quando te vidimus hospitem, & adduximus, nudum, & vestivimus, quando autem te vidimus infirmari & in carcere, & venimus ad te? Tunc respondens rex dicet eis: Amen dico vobis, quamdiu fecistis uni horum ex fratribus meis minimis, mihi fecistis. Tunc dicet & illis, qui ad sinistram ejus erunt: Discedite a me maledicti in ignem æternum, quem paravit pater meus diabolo & angelis ejus. Esurivi enim, & non dedistis mihi manducare; siti- vi, & non potastis me; hospes fui, & non adduxistis me; nudus, & non vestistis me; infirmus & in carcere, & non visitastis me. Tunc respondebunt & ipsi dicentes: Domine, quando te vidimus esurientem, aut sitientem,*

aut

aut hospitem, aut nudum, aut infirmum, aut in carcere, & non ministravimus tibi? Et respondebis illis: Amen dico vobis quamdiu non fecistis uni ex minimis his, neque mihi fecistis. Et abibunt isti in ambustionem æternam, justi autem in vitam æternam. Quid potuit nobis majus Christus edicere? Quomodo magis potuit justitiæ ac misericordiæ nostræ opera provocare, quam quod præstari dixit sibi, quidquid egenti præstatur & pauperi; & se dixit offendi, nisi egenti præstetur & pauperi; ut qui respectu fratris in ecclesia non movetur, vel Christi contemplatione moveatur, & qui non cogitat in labore atque in egestate conservum, vel Dominum cogitet in ipso illo, quem despicit, constitutum. Et ideo, fratres carissimi, quibus metus in Deum pronus est, & spreto calcatoque jam mundo, ad superna & divina animus erectus est, fide plena, mente devota, operatione continua promerendo Domino obsequium præbeamus. Demus Christo vestimenta terrena, indumenta cælestia recepturi. Demus cibum & potum sæcularem, cum Abraham & Isaac & Jacob ad convivium cæleste venturi. Ne parum metamus, plurimum seminemus. Securitati ac saluti æternæ, dum tempus est, consulamus, Paulo apostolo admonente & dicente: *Ergo dum tempus habemus, operemur quod bonum est ad omnes, maxime autem ad domesticos fidei: Bonum autem facientes non deficiamus. Tempore nimis suo metemus.* Cogitemus, fratres dilectissimi, quid sub apostolis fecerit credentium populus, quando inter ipsa primordia majoribus virtutibus mens vigeat, quando credentium fides novo adhuc fidei calore fervebat. Domicilia tunc & prædia venundabant, & dispensandam pauperibus quantitatem libenter ac argiter apostolis offerebant, terreno patrimonio venilito atque distracto fundos illuc transferentes, ubi ructus caperent possessionis æternæ, illic comparantes domos, ubi inciperent semper habitare. *Talis tunc*

tunc fuit in operationibus cumulus, qualis in dilectione consensus, sicut legimus in actis apostolorum: *Turba autem eorum qui crediderant, anima ac mentem agebant; nec fuit inter illos discrimen ullum, nec quidquam suum judicabant ex bonis quæ eis erant, sed fuerunt illis omnia communia.* Hoc est natiuitate spiritali vere Dei filios fieri. Hoc est lege cælesti æquitatem Dei patris imitari. Quodcumque enim Dei est, in nostra usurpatione commune est, nec quisquam a beneficiis ejus & muneribus arcetur, quo minus omne humanum genus bonitate ac largitate divina æqualiter perfruatür. Sic æqualiter dies illuminat, sol radiat, imber rigat, ventus aspirat; & dormientibus somnus unus est, & stellarum splendor ac lunæ communis est. Quo æqualitatis exemplo, qui possessor in terris redditus ac fructus suos cum fraternitate partitur, dum largitionibus gratuitis communis ac justus est, Dei patris imitator est. Quæ illa erit, fratres carissimi, operantium gloria, quam grandis & summa lætitia, cum populum suum Dominus cœperit recensere, & meritis atque operibus nostris præmia promissa contribuens, pro terrenis cælestia, pro temporalibus sempiterna, pro modicis magna præstare, offerre nos patri, cui nos sua sanctificatione restituit, æternitatem nobis immortalitatemque largiri, ad quam nos sanguinis sui vivificatione reparavit, reduces ad paradysum denuo facere, regna cælorum fide & veritate suæ pollicitationis aperire. Hæc hæreant firmiter sensibus nostris, hæc intelligantur plena fide, hæc corde toto diligantur, hæc indefinentium operum magnanimitate redimantur. Præclara & divina res, fratres carissimi, salutaris operatio, solatium grande credentium, securitatis nostræ salubre præsidium, munimentum spei, tutela fidei, medela peccati, res posita in potestate facientis, res & grandis, & facilis, sine periculo persecutionis, corona pacis, verum
Dei

Dei munus & maximum, infirmis necessarium, fortius gloriosum, quo christianus adjutus præfert gratiam spiritalem, promeretur Christum judicem, Deum computat debitorem. Ad hanc operum salutarium almam libenter ac prompte certemus, omnes in agone justitiæ Deo & Christo spectante curramus, & qui eculo & mundo majores esse jam cœpimus, cursum nostrum nulla sæculi & mundi cupiditate tardemus. si expeditos, si celeres, si in hoc operis agone currentes dies nos vel redditionis, vel persecutionis inrenerit, nusquam Dominus meritis nostris ad præmium leerit. In pace vincentibus coronam candidam pro operibus dabit, in persecutione purpuream pro passione geminabit.

LIBER

DE BONO PATIENTIÆ.

De patientia locuturus, fratres dilectissimi, & utilitates ejus & commoda prædicaturus, unde potius incipiam, quam quod nunc quoque ad audientiam, vestram patientiam video esse necessariam, ut nec hoc ipsum quod auditis & discitis, sine patientia facere possitis. Tunc enim demum sermo & ratio salutaris efficaciter discitur, si patienter quod dicitur, audiatur. Nec invenio, fratres dilectissimi, inter ceteras cœlestis disciplinæ vias, quibus ad consequenda divinitus præmia spei ac fidei nostræ secta dirigitur; quid magis sit vel utilius ad vitam, vel majus ad gloriam, quam ut qui præceptis dominicis obsequio timoris ac devotionis innitimur, patientiam maxime tota observatione tueamur. Hanc se sectari philosophi quoque profitentur. Sed tam illic patientia falsa est.

est, quam & falsa sapientia est. Unde enim vel sapiens esse, vel patiens possit, qui nec sapientiam, nec patientiam Dei novit, quando ipse de his, qui sibi sapere in mundo videntur, moneat & dicat: *Perdam sapientiam sapientium & prudentiam prudentium reprobo.* Item beatus apostolus Paulus plenus spiritu sancto, & vocandis formandisque gentibus missus contestetur, & instruat dicens: *Videte ne quis vos depraedetur per philosophiam & inanem fallaciam, secundum traditionem hominum, secundum elementa mundi, & non secundum Christum, quia in ipso habitat omnis plenitudo divinitatis.* Et alio loco: *Nemo se, inquit, decipiat. Si quis se putat sapientem esse in vobis, mundo huic stultus fiat, ut fiat sapiens. Sapientia enim mundi hujus stultitia est apud Deum. Scriptum est enim: Reprehendam sapientes in astutia ipsorum.* Et iterum: *Cognovit Dominus cogitationes sapientium, quia sunt stultæ.* Quare si sapientia illic vera non est, esse non potest & vera patientia. Nam si sapiens ille est, qui est humilis & mitis, philosophos autem nec humiles videmus esse nec mites, sed sibi multum placentes, & hoc ipso quod sibi placeant, Deo displicentes: apparet illic veram non esse patientiam, ubi sit insolens affectatæ libertatis audacia, & exerti ac seminudi pectoris inverecunda jactantia. Nos autem, fratres dilectissimi, qui philosophi non verbis sed factis sumus, nec vestitu sapientiam, sed veritate præferimus, qui virtutum conscientiam magis quam jactantiam novimus, qui non loquimur magna, sed vivimus, quasi servi & cultores Dei, patientiam quam magisteriis cælestibus discimus, obsequiis spiritalibus præbeamus. Est enim nobis cum Deo virtus ista communis. Inde patientia incipit, inde claritas ejus & dignitas caput sumit. Origo & magnitudo patientiæ Deo auctore procedit. Diligenda res homini, quæ Deo cara est. Bonum quod amat, majestas divina commendat. Si
domi-

dominus nobis & pater Deus est, sectemur patientiam domini pariter & patris: quia & servos oportet esse obsequentes, & filios non decet esse degeneres. Qualis vero in Deo & quanta patientia, quod in conumeliam suæ majestatis & honoris instituta ab hominibus prophana templa, & terrena figmenta, & sacra sacrilega patientissime sustinens, super bonos & malos æqualiter facit diem nasci, & lumen solis oboriri, & cum imbribus terras rigat, nemo a beneficiis ejus excluditur, quo minus justis similiter & injustis indiscretas pluvias largiatur. Videmus inseparabili æqualitate patientiæ nocentibus & innoxiiis, religiosis & impiis, gratias agentibus & ingratis, Dei nutu tempora obsequi, elementa famulari, spirare ventos, fontes fluere, grandescere copias messium, fructus maturefcere vinearum, exuberare pomis arbuta, nemora frondescere, prata florere. Et cum crebris immo continuis exacerbetur offensis Deus, indignationem suam temperat, & præstitutum semel retributionis diem patienter exspectat. Cumque habeat in potestate vindictam, mavult diu tenere patientiam, sustinens scilicet clementer & differens, ut, si fieri potest, multum malitia protracta aliquando mutetur, & homo in errorum & scelerum contagione volutatus, vel sero ad Deum convertatur, ipso monente & dicente: *Nolo mortem morientis, quantum ut revertatur & vivat.* Et iterum: *Revertimini ad me, dicit Dominus.* Et iterum: *Revertimini ad Dominum Deum vestrum, quoniam misericors & pius, & patiens, & multa miserationis, & qui sententiam sedit adversus malitias irrogatas.* Quod item beatus apostolus Paulus commemorans, & peccatorem ad pœnitentiam revocans, proponit & dicit: *An numquid opulentiam bonitatis ejus, & sustentiam & patientiam contemnis, ignorans quoniam patientia & bonitas Dei ad pœnitentiam te adducit? Tu autem secundum duritiam tuam & cor im-*
pens-

*penitens thesaurizas tibi iram in die ira, & revelationis
 iusti iudicii Dei, qui reddet unicuique secundum opera sua.*
 Iustum iudicium Dei dicit esse, quia serum est, quia
 diu multumque differtur, ut homini ad vitam longa
 Dei patientia consulatur. Tunc repræsentatur pœna
 impio & peccatori, quando jam non potest pœniten-
 tia prodesse peccati. Atque ut plenius intelligere pos-
 simus, fratres dilectissimi, quia patientia Dei res est,
 & quisquis lenis, & patiens, & mitis est, Dei patris imita-
 tor est, cum in evangelio suo Dominus præcepta in sa-
 lutem daret, & divina monita depromens ad perfe-
 ctum discipulos erudiret, posuit & dixit: *Audistis quia
 dictum est: Diliges proximum tuum, & odio habebis inimi-
 cum tuum. Ego autem dico vobis: Diligite inimicos ve-
 stras, & orate pro eis qui vos persequuntur, ut sitis filii
 patris vestri qui in calis est, qui solem suum oriri facit
 super bonos & malos, & pluit super iustos & iniustos.*
*Si enim dilexeritis eos qui vos diligunt, quam mercedem
 habebitis? Nonne sic & publicani faciunt? Et si saluta-
 veritis fratres vestros tantum, quid amplius facitis? Non-
 ne & ethnici idipsum faciunt? Estote itaque vos perfecti,
 sicut pater vester cælestis perfectus est. Sic perfectos di-
 xit fieri Dei filios, sic consummari ostendit & docuit
 cælesti nativitate reparatos, si patientia Dei patris
 maneat in nobis, si similitudo divina, quam peccato
 Adam perdiderat, manifestetur & luceat in actibus
 nostris. Quæ gloria est similem Deo fieri, qualis &
 quanta felicitas, habere in virtutibus, quod divinis
 laudibus possit æquari. Nec hoc, fratres dilectissimi,
 Jesus Christus Deus & Dominus noster tantum verbis
 docuit, sed implevit & factis. Et quia ad hoc de-
 scendisse se dixerat, ut voluntatem patris faceret, in-
 ter cetera mirabilia virtutum suarum, quibus indicia
 divinæ majestatis expressit, paternam quoque patien-
 tiam tolerantiae tenore servavit. Omnes denique
 actus ejus ab ipso statim adventu patientia comite si-
 gnant-*

gnantur, quod primum de illa sublimitate cælesti ad terrena descendens, non aspernatur Dei filius carnem hominis induere, & cum peccator ipse non esset, aliena peccata portare. Immortalitate interim posita, fieri se & mortalem patitur, ut innocens pro nocentium salute perimatur. Dominus baptizatur a servo; & remissam peccatorum daturus, ipse non dedignatur lavacro regenerationis corpus abluere. Diebus quadraginta jejuna, per quem ceteri saginantur. Esurit, & famem sentit, ut qui in fame sermonis & gratiæ fuerant, cælesti pane faturentur. Cum diabolo tentante concreditur, & inimicum tantum vicisse contentus, nihil ultra verba conatur. Discipulis non ut servis dominica potestate præfuit, sed benignus & mitis fraterna eos caritate dilexit. Dignatus est etiam pedes apostolorum lavare, ut dum circa servos talis est dominus, exemplo suo doceret, qualis circa compares & æquales debeat esse conservus. Nec mirandum quod circa compares obaudientes talis exstiterit, qui Judam potuit usque ad extremum longa patientia sustinere, cibum cum inimico capere, hostem domesticum scire, nec palam ostendere, traditoris osculum non recusare. In Judæis vero tolerandis æquanimitas quanta, & quanta patientia, incredulos ad fidem suadendo flectere, obsequio ingratos fovere, contradicentibus respondere leniter, superbos sustinere clementer, humiliter persequentibus cedere, prophetarum interfectores, & adversum Deum semper rebelles usque ad crucis & passionis horam velle colligere. Sub ipsa autem passione & cruce, priusquam ad crudelitatem necis, & effusionem sanguinis veniretur, quæ conviciorum probra patienter audita, quæ contumeliarum tolerata ludibria, ut insultantium sputamina exciperet, qui sputo suo cæci oculos paulo ante formasset; & in cujus nomine a servis nunc ejus diabolus cum angelis suis flagellatur, flagella ipse pateretur;

S. Cypriani Tom. I.

FF

tur;

tur; coronaretur spinis, qui martyres floribus coronat æternis; palmis in faciem verberaretur, qui palmas veras vincentibus tribuit; spoliaretur veste terrena, qui indumento immortalitatis ceteros vestit; cibaretur felle, qui cibum cælestem dedit; aceto potaretur, qui salutare poculum propinavit. Ille innocens, ille justus, immo innocentia ipsa & ipsa iustitia, inter facinorosos deputatur, & testimoniis falsis veritas premitur, judicatur judicaturus, & Dei sermo ad victimam tacens ducitur. Et cum ad crucem Domini confundantur sidera, elementa turbentur, contremiscat terra, nox diem claudat, sol, ne judæorum facinus aspicere cogatur, & radios & oculos suos subtrahat: ille non loquitur, nec movetur, nec majestatem suam sub ipsa saltem passione proficitur. Usque ad finem perseveranter ac jugiter tolerantur omnia, ut consummetur in Christo plena & perfecta patientia. Et post ista omnia, adhuc interfectores suos, si conversi ad eum venerint, suscipit; & patientia salutare ad conservandum benignus & patiens, ecclesiam suam nemini claudit. Illos adversarios, illos blasphemos, illos nominis sui semper inimicos, si pœnitentiam delicti agant, si admissum facinus agnoscant, non solum ad indulgentiam criminis, sed & ad præmium regni cælestis admittit. Quid potest patientius, quid benignius dici? Vivificatur Christi sanguine, etiam qui fudit sanguinem Christi. Talis est Christi ac tanta patientia; quæ nisi talis ac tanta exsisteret, Paulum quoque apostolum ecclesia non haberet. Quod si & nos, fratres dilectissimi, in Christo sumus, si ipsum induimus, si ipse est salutis nostræ via, qui Christum vestigiis salutaribus sequimur, per Christi exempla gradiamur, sicut Joannes apostolus instruit dicens: *Qui dicit se in Christo manere, debet quomodo ille ambulavit, & ipse ambulare.* Item Petrus, super quem ecclesia Domini dignatione funda-

fundata est, in epistola sua ponit & dicit: *Christus passus est pro nobis, relinquens vobis exemplum ut sequamini vestigia ejus, qui peccatum non fecit, nec dolus inventus est in ore ejus, qui cum malediceretur, non remaledicebat, cum pateretur, non comminabatur, tradebat autem se judicanti se injuste.* Invenimus denique & patriarchas, & prophetas, & justos omnes, qui figuram Christi imagine præeunte portabant, nihil magis custodisse in laude virtutum suarum; quam quod patientiam forti & stabili æquanimirate tenuerunt. Sic Abel originem martyrii, & passionem justī hominis initiāns primus & dedicans, adversus fratrem fratricidam non resistit nec reluctatur, sed humilis & mitis patienter occiditur. Sic Abraham Deo credens, & radicem ac fundamentum fidei primus instituens, tentatus in filio, non dubitat neque cunctatur, sed præceptis Dei tota patientia devotionis obsequitur. Et Isaac ad hostiæ dominicæ similitudinem præfiguratus, quando a patre immolandus offertur, patiens invenitur. Et Jacob fugatus a fratre, de terra sua patienter excedit, & majore patientia postmodum supplex, adhuc magis impium & persecutorem muneribus pacificis ad concordiam redigit. Joseph venumdatus a fratribus & relegatus, non tantum patienter ignoscit, sed & gratuita frumenta venientibus largiter & clementer impertit. Moyses ab ingrato & perfido populo contemnitur frequenter, & pæne lapidatur, & tamen lenis & patiens pro eisdem Dominum deprecatur. In David vero, ex quo secundum carnem Christi nativitas oritur, quam magna & mira, & christiana patientia, habuisse in manu sæpe ut Saul regem persequentem se, & interficere concupiscentem posset occidere, & tamen subditum sibi & traditum maluisse servare, nec rependisse inimico vicem, sed occisum adhuc insuper & vindicare. Tot denique prophætæ interfecti, tot martyres gloriosis mortibus honorati, qui omnes ad cælestes coronas

patientiæ laude venerunt. Neque enim potest accipi dolorum & passionum corona, nisi præcedat in dolore & passione patientia. Quam sit autem patientia utilis & necessaria, fratres dilectissimi, ut manifestius possit & plenius nosci, Dei sententia cogitetur, quam in origine statim mundi & generis humani, Adam præcepti immemor, & datæ legis transgressor accepit. Tunc sciemus quam patientes esse in isto sæculo debeamus, qui sic nascimur, ut pressuris istis & conflictationibus laboremus. *Quia audisti, inquit, vocem mulieris tuæ, manducaſti ex illa arbore, de qua ſola præceperam tibi ne manducares, maledicta terra erit in omnibus operibus tuis, in triſtitia & gemitu edes ex ea omnibus diebus vita tua, ſpinas & tribulos ejiciet tibi, & edes palum agri, in ſudore vultus tui edes panem tuum, donec revertaris in terram de qua ſumptus es; quia terra es, & in terram ibis.* Hujus ſententiæ vinculo colligati omnes & conſtricti ſumus, donec expuncta morte de iſto ſæculo recedamus. In triſtitia & gemitu ſimus necesse est omnibus diebus vitæ noſtræ, edamus panem necesse est cum ſudore & labore. Unde unusquiſque noſtrum cum naſcitur, & hoſpitio mundi hujus excipitur; initium ſumit a lacrimis, & quamvis adhuc omnium neſcius & ignarus, nihil aliud novit in illa ipſa prima nativitate, quam flere. Providentia naturali lamentatur, vitæ mortalis anxietates & labores, & procellas mundi quas ingreditur, in exordio ſtatim ſuo, ploratu & gemitu rudis anima teſtatur. Sudatur enim, quamdiu iſtic vivitur & laboratur. Nec ſudantibus & laborantibus poſſunt alia magis, quam patientiæ ſubvenire ſolatia: quæ cum apta ſint & neceſſaria in iſto mundo univerſis, tum magis nobis, qui diabolo impugnante plus quatimur, qui in acie quotidie ſtantes, inveterati & exercitati hoſtis coluſtationibus fatigamur, quibus, præter varias & aſſiduas tentationum pugnas, in perſecutionum quoque

certa-

certamine patrimonia relinquenda sunt, subeundus carcer, portandæ catenæ, animæ impendendæ, gladius, bestiæ, ignes, cruces, omnia denique tormentorum ac pœnarum genera fide & virtute patientiæ perferenda, Domino ipso instruente & dicente: *Hæc locutus sum vobis, ut in me pacem habeatis, in mundo autem pressuram habebitis, sed fidite, quoniam ego vici mundum.* Si autem qui diabolo & mundo renuntiavimus, pressuras & infestationes diaboli & mundi crebrius ac violentius patimur; quanto magis patientiam tenere debemus, qua adjutrice & comite omnia infesta toleremus? Domini & magistri nostri salutare præceptum est: *Qui toleraverit, inquit, usque ad finem, hic salvus erit.* Et iterum: *Si permanseritis, inquit, in verbo meo, vere discipuli mei eritis, & cognoscetis veritatem, & veritas liberabit vos.* Tolerandum & perseverandum est, fratres dilectissimi, ut ad spem veritatis & libertatis admissi, ad veritatem & libertatem ipsam pervenire possimus: quia hoc ipsum quod christiani sumus, fides & spei res est. Ut autem spes & fides ad fructum sui possint pervenire, patientia opus est. Non enim præsentem gloriam sequimur, sed futuram, secundum quod & Paulus apostolus monet, dicens: *Spe salvati sumus. Spes autem quæ videtur, non est spes. Quod enim videt quis, quid sperat? Si autem quod non videmus speramus, per patientiam expectamus.* Propterea expectatio & patientia necessaria est, ut id quod cœpimus, impleamus, & quod credimus, & speramus, Deo repræsentante capiamus. Denique alio in loco idem apostolus justos & operantes, & divini fœnoris incremento cælestes thesauros sibi reconcentes, ut patientes quoque sint, instruit & docet dicens: *Ergo dum tempus habemus, operemur quod bonum est ad omnes, maxime vero ad domesticos fidei. Bonum autem facientes non deficiamus. Tempore enim suo metemur.* Admonet, ne quis impatiens in operatione deficiat;

ne quis tentationibus aut avocatus, aut victus, in medio laudis & gloriæ itinere desistat, & pereant præterita, dum quæ cœperant, desinunt esse perfecta, sicut scriptum est: *Iustitia iusti non liberabit eum in quacumque die exerraverit.* Et iterum: *Tene quod habes, ne alius accipiat coronam tuam.* Quæ vox adhortatur patienter & fortiter perseverare; ut qui ad coronam laude jam proxima nititur, durante patientia coronetur. Patientia autem, fratres dilectissimi, non tantum bona custodit, sed & repellit adversa. Spiritui sancto favens, & cælestibus ac divinis cohærens, contra facta carnis & corporis, quibus anima expugnatur & capitur, virtutum suarum propugnaculo reluctatur. Inspiciamus denique pauca de multis, ut de paucis intelligantur & cetera. Adulterium, fraus, homicidium, mortale crimen est. Sit fortis & stabilis in corde patientia; & nec adulterio sanctificatum corpus & Dei templum polluitur, nec iustitiæ dicata innocentia contagione fraudis inficitur, nec post gestatam eucharistiam, manus gladio & cruore maculatur. Caritas fraternitatis vinculum est, fundamentum pacis, tenacitas ac firmitas unitatis, quæ & spe & fide major est, quæ & opera, & martyria præcedit, quæ nobiscum semper æterna apud Deum in regnis cælestibus permanebit. Tolle illi patientiam, & desolata non durat. Tolle illi sustinendi tolerandique substantiam, & nullis radicibus ac viribus perseverat. Apostolus denique cum de caritate loqueretur, tolerantiam illi & patientiam junxit. *Caritas, inquit, magnanima est, caritas benigna est, caritas non emulatur, non inflatur, non irritatur, non cogitat malum, omnia diligit, omnia credit, omnia sperat, omnia sustinet.* Ostendit inde illam perseverare tenaciter posse, quod noverit omnia sustinere. Et alio in loco: *Sustinentes, inquit, invicem in dilectione, satis agentes servare unitatem spiritus in conjunctione pacis,*

Proba-

Probavit nec unitatem servari posse nec pacem, nisi se invicem fratres mutua tolerantia foveant, & concordiae vinculum patientia intercedente custodiant. Quid deinde, ut non jures, neque maledicas, ut tua ablata non repetas, ut accepta alapa, & alteram maxillam verberanti praebeas, ut fratri in te peccanti non tantum septies sed septuagies, sed & omnia omnino peccata dimittas, ut diligas inimicos tuos, ut pro adversariis & persecutoribus precem facias. Poterisne ista perficere, nisi patientiae & tolerantiae teneas firmitatem? Quod factum videmus in Stephano; qui cum a Judæis vi & lapidibus necaretur, non sibi vindictam, sed interfectores veniam postulabat, dicens: *Domine, ne statuas illis hoc peccatum.* Sic esse oportuit primum martyrem Christi, qui martyres secuturos gloriosa morte praecurrens, non tantum dominicae passionis praedicator esset, sed & patientissimae lenitatis imitator. Quid dicam de ira, de discordia, de similitudine, quae in christiano esse non debent? Sit patientia in pectore, & haec illic locum habere non possunt; aut si adire tentaverint, cito exclusae discedunt, ut domicilium pacificum perseveret in corde, ubi Deum pacis delectet habitare. Admonet denique apostolus & docet, dicens: *Nolite contristare spiritum sanctum Dei, in quo signati estis in diem redemptionis. Omnis amaritudo, & ira, & indignatio, & clamor, & blasphemia auferatur a vobis.* Si enim christianus a furore & contentione carnalis, tamquam de maris turbinibus excessit, & tranquillus ac lenis in portu Christi esse jam coepit; nec iram nec discordiam debet intra pectus admittere, cui nec malum pro malo reddere liceat, nec odisse. Necnon ad varia quoque carnis incommoda, & crebros corporis durosque cruciatus, quibus humanum genus quotidie fatigatur & quatitur, patientia necessaria est. Nam cum in illa prima transgressione praeepti firmitas corporis cum

immortalitate discesserit, & cum morte infirmitas venerit, nec possit firmitas recipi, nisi cum recepta & immortalitas fuerit; oportet in hac fragilitate atque infirmitate corporea luctari semper & congregari. Quæ luctatio & congregatio non nisi patientiæ viribus potest sustineri. Examinandis autem nobis atque explorandis diversi importantur dolores, & multiplex tentationum qualitas irrogatur, de jacturis facultatum, de ardoribus febrium, de cruciatibus vulnerum, de amissione carorum. Nec aliud magis inter injustos discernit & justos, quam quod in adversis per impatientiam queritur & blasphematur injustus, patientia justus probatur, sicut scriptum est: *In dolore sustine, & in humilitate tua patientiam habe, quoniam in igne probatur aurum & argentum.* Sic Job examinatus est & probatus, & ad summum fastigium laudis patientiæ virtute provectus. Quanta adversus eum diaboli jacula emissæ? quanta admota tormenta? Jactura rei familiaris infligitur, numerosæ sobolis orbitas irrogatur. Dives in censu dominus, & in liberis pater ditior, nec dominus repente, nec pater est. Accedit vulnerum vastitas, & tabescentes ac fluentes artus edax quoque vermium pœna consumit. Ac ne quid omnino remaneret, quod non Job in suis tentationibus experiretur, armat diabolus & uxorem, illo antiquo nequitiae suæ usus ingenio, quasi omnes per mulierem decipere posset & fallere, quod fecit in mundi origine; nec tamen Job gravibus ac densis conficiationibus frangitur; quo minus inter illas angustias & pressuras suas Dei benedictio victrice patientiæ prædicetur. Tobias quoque post justitiæ & misericordiæ suæ opera magnifica luminum amissione tentatus, in quantum patienter cæcitatem pertulit, in tantum granditer Deum patientiæ laude promeruit. Atque ut magis, fratres dilectissimi, patientiæ bonum luceat, quid mali e contrario impatientia importet, confide-

remus.

remus. Nam ut patientia bonum Christi est, sic e contra impatientia diaboli malum; & sicut in quo habitat & manet Christus, patiens invenitur, ita impatientiens semper existit, cujus mentem diaboli nequitia possidet. Exordia denique ipsa videamus. Diabolus hominem ad imaginem Dei factum impatienter tulit. Inde & periit primus, & perdidit. Adam contra cæleste præceptum cibi letalis impatiens, in mortem cecidit, nec acceptam divinitus gratiam patientia custode servavit; & ut fratrem Cain perimeret, sacrificii ejus & muneris impatiens fuit; & quod Esau de majoribus ad minora descendit, primatus suos per impatientiam lentis amisit. Quid Judaicus populus circa beneficia divina perfidus & ingratus, nonne quod a Deo primum recessit, impatientiæ crimen fuit? dum Moyse cum Deo conloquentis moras non potest ferre, prophanos deos ausus est postulare, ut itineris sui duces nuncuparet caput bubulum, & terrestre figmentum; nec umquam ab eadem impatientia destitit, quo minus semper docilitatis & divinæ admonitionis impatiens, prophetas suos & justos quosque perimendo, ad crucem quoque & ad sanguinem Domini profiliret. Impatientia etiam in ecclesia hæreticos facit, & ad Judæorum similitudinem contra Christi pacem & charitatem rebelles, ad hostilia & furiosa odia compellit. Et ne longum sit singula recensere, omnia omnino quæ patientia operibus suis ædificat ad gloriā, impatientia destruit ad ruinam. Quare, fratres dilectissimi, & bonis patientiæ, & impatientiæ malis diligenter expensis, patientiam, per quam in Christo manemus, ut venire cum Christo ad Deum possimus, plena observatione teneamus; quæ copiosa & multiplex non angusto fine concluditur, nec brevibus terminis coercetur. Late patet patientiæ virtus, & ubertas ejus & largitas de unius quidem nominis fonte proficitur, sed exundantibus venis per multa gloriarum ita-

nera diffunditur; nec proficere aliquid in actibus nostris potest ad consummandam laudem, nisi inde consummationis accipiat firmitatem. Patientia est, quæ nos Deo & commendat & servat. Ipsa est quæ iram temperat, quæ linguam frenat, mentem gubernat, pacem custodit, disciplinam regit, libidinis impetum frangit, tumoris violentiam comprimit, incendium simultatis exstinguit, coercet potentiam divitum, inopiam pauperum refovet, tuetur in virginibus beatam integritatem, in viduis laboriosam castitatem, in conjunctis & maritatis individuum caritatem. Facit humiles in prosperis, in adversis fortes, contra injurias & contumelias mites. Docet delinquentibus cito ignoscere; si ipse delinquas, diu & multum rogare. Tentationes expugnat, persecutiones tolerat, passiones & martyria consummat. Ipsa est quæ fidei nostræ fundamenta firmiter munit. Ipsa est quæ incrementa spei sublimiter provehit. Ipsa actum dirigit, ut tenere possimus viam Christi, dum per ejus tolerantiam gradimur. Ipsa efficit, ut perseveremus filii Dei, dum patientiam patris imitamur. Sed quoniam plurimos scio, fratres dilectissimi, vel pondere injuriarum agentium, vel dolore, de iis qui adversum se grassantur & sæviunt, vindicari velociter cupere, nec illud in extrema parte reticendum est, ut in istis fluctuantis mundi turbinibus, & Judæorum, sive gentilium & hæreticorum quoque persecutionibus constituti, patienter expectemus ultionis diem, nec ad vindictam doloris nostri querula festinatione propereamus, cum scriptum sit: *Expecta me, dicit Dominus, in die resurrectionis meæ in testimonium, quoniam judicium meum ad congregationes gentium, ut excipiam reges, & effundam super eos iram meam.* Expectare nos jubet Dominus, & futuræ ultionis diem forti patientia sustinere. Qui & in apocalypsi loquitur dicens: *Ne signaveris verba prophetiæ libri hujus, quia jam tempus in proxima est, ut &*

ii qui perseverant nocere, noceant, & qui in sordibus est, sordescat adhuc, justus autem adhuc justiora faciat, similiter & qui sanctus est, sanctiora. Ecce venio cito, & merces mea mecum est, reddere unicuique secundum facta sua. Unde etiam clamantes martyres, & ad vindictam suam dolore erumpente properantes expectare adhuc jubentur, & temporibus consummandis, implendisque martyribus præbere patientiam. Et cum aperuisset, inquit, quintum sigillum, vidi sub ara Dei animas occisorum propter verbum Dei & martyrium suum, & clamaverunt voce magna dicentes: Quousque, Domine sanctus & verus, non judicas & vindicas sanguinem nostrum, de iis qui in terris inhabitant? Et data sunt eis singula stola alba, & dictum est eis ut requiescerent brevi adhuc tempore, donec impleatur numerus conservorum & fratrum eorum, qui postea occidentur exemplo ipsorum. Quando autem veniat sanguinis iusti divina vindicta; declarat per Malachiam prophetam spiritus sanctus, dicens: Ecce dies Domini venit ardens velut clibanus; eruntque omnes alienigenæ & omnes iniqui stipula, & succendet illos adveniens dies, dicit Dominus. Quod item legimus in psalmis, ubi Dei iudicis prædicatur adventus, censuræ suæ maiestate venerandus. Deus manifestus veniet, Deus noster, & non flebit. Ignis ante eum ardebit, & in circuitu ejus procella nimia. Advocabit calum sursum, & terram deorsum, ut separet populum suum. Colligite illi justos ejus, eos qui disponunt testamentum ejus in sacrificiis; & annuntiabunt cali justitiam ejus, quoniam Deus iudex est. Et Esaias eadem prænuntiat dicens: Ecce enim Dominus sicut ignis veniet, & sicut procella currus ejus, retribuere in ira vindictam. In igne enim Domini judicabuntur, & in gladio ejus vulnerabuntur. Et iterum: Dominus Deus virtutum prodibit & comminuet bellum, excitabit certamen, & clamabit super inimicos suos cum fortitudine. Tacui, numquid semper tacebo? Quis autem est hic, qui tacuisse se prius dicit; & non semper tacebit? Utique ille

ille qui sicut ovis ad victimam ductus est, & sicut agnus coram tondente se, sine voce, non aperuit os suum. Utique ille qui non clamavit, neque in plateis vox ejus audita est. Utique ille qui non fuit contumax, neque contradixit, cum dorsum suum poneret ad flagella, & maxillas ad palmas, faciem autem suam non avertit a seditate sputorum. Utique ille, qui cum accusaretur a sacerdotibus & senioribus, nihil respondit, & admirante Pilato patientissimum silentium tenuit. Hic est qui cum in passione tacuerit, in ultione postmodum non tacebit. Hic est Deus noster, id est, non omnium, sed fidelium & credentium Deus, qui cum in secundo adventu manifestus venerit; non silebit. Nam cum in humilitate prius fuerit occultus, veniet in potestate manifestus. Hunc expectemus, fratres dilectissimi, judicem & vindicem nostrum, ecclesiae suae populum, & ab initio mundi justorum omnium numerum secum pariter vindicaturum. Quid ad vindictam suam nimium festinat & properat, consideret, quia necdum vindicatus est ipse, qui vindicat. Pater Deus praecepit filium suum adorari, & apostolus Paulus divini praecepti memor, ponit & dicit; *Deus exaltavit illum, & donavit illi nomen, quod est super omne nomen, ut in nomine Jesu omne genu flectatur caelestium, terrestrium, & infernorum.* Et in apocalypsi angelus Joanni volenti adorare se resistit & dicit; *Vide ne feceris, quia conservus tuus sum & fratrum tuorum, Jesum Dominum adora.* Qualis Dominus Jesus, & quanta patientia ejus, ut qui in caelis adoratur, necdum vindicetur in terris. Hujus patientiam, fratres dilectissimi, in persecutionibus & passionibus nostris cogitemus. Hujus adventui plenum expectationis obsequium praebemus. Nec defendi ante Dominum servi irreligiosa & inverecunda festinatione properemus. Insistamus potius & elaboramus, & toto corde vigilantes, atque ad omnem

tole-

tolerantiam stabiles, dominica præcepta fervemus; ut cum ille iræ & vindictæ dies venerit, non cum impiis & peccatoribus puniamur, sed cum justis & Deum timentibus honoremur.

LIBER DE ZELO ET LIVORE.

Zelare, quod bonum videas, & invidere melioribus, leve apud quosdam & modicum crimen videtur, fratres dilectissimi; dumque existimatur leve esse & modicum, non timetur; dum contemnitur, non facile vitatur, & fit cæca & occulta perniciēs: quæ dum minus perspicitur, ut caveri a providentibus possit, improvidas mentes latenter affligit. Porro autem Dominus prudentes esse nos jussit, & cauta sollicitudine vigilare præcepit; ne adversarius vigilans semper, & semper insidians, ubi in pectus obreperit, de scintillis confleret incendia, de parvis maxima exaggeret, & dum remissis & incautiā, leniore aura & flatu molliore planditur, procellis ac turbini-bus excitatis, ruinas fidei, & salutis ac vitæ naufragia moliatur. Excubandum est itaque, fratres dilectissimi, atque omnibus viribus elaborandum, ut inimico sævienti, & jacula sua in omnes corporis partes, quibus percuti & vulnerari possumus, dirigenti, sollicita & plena vigilantia repugnemus, secundum quod Petrus apostolus in epistola sua præmonet & docet, dicens: *Sobrii estote & vigilate, quia adversarius vester diabolus tamquam leo rugiens circuit, aliquem devorare querens.* Circuit ille nos singulos, & tamquam hostis clausos obsidens, muros explorat, & tentat, an sit pars aliqua murorum minus stabilis, & minus
fida,

fida, cujus aditu ad interiora penetretur. Offert oculis formas illices, & faciles voluptates, ut visu destruat castitatem. Aures per canora musica tentat, ut soni dulcioris auditu solvat, & molliat christianum vigorem. Linguam convicio provocat, manum injuriis laceffentibus ad petulantiam cædis instigat; ut fraudatorem faciat, lucra opponit injusta; ut animam pecunia capiat, ingerit perniciofa compendia; honores terrenos promittit, ut cælestes adimat; ostentat falsa, ut vera subripiat; & cum latenter non potest fallere, exerte atque aperte minatur, terrorem turbidæ persecutionis intentans, ad debellandos Dei servos inquietus semper, & semper infestus, in pace subdolus, in persecutione violentus. Quamobrem, fratres dilectissimi, contra omnes diaboli fallaces insidias, vel apertas minas stare debet instructus animus & armatus, tam paratus semper ad repugnandum, quam est ad impugnandum semper paratus inimicus. Et quoniam frequentiora sunt tela ejus, quæ latenter obrepunt, magisque occulta & clandestina jaculatio quo minus perspicitur, hoc & gravius & crebrius in vulnera nostra grassatur, ad hæc quoque intelligenda & depellenda vigilemus, ex quibus est zeli & livoris malum. Quod si quis penitus inspiciat, invenit nihil magis christiano cavendum, nihil cautius providendum, quam ne quis invidia & livore capiatur, ne quis fallentis inimici cæcis laqueis implicatus, dum zelo frater in fratris odia convertitur, gladio suo necius ipse perimatur. Quod ut colligere plenius, & manifestius perspicere possimus, ad caput ejus atque originem recurramus. Videamus unde zelus, & quando, & quomodo cœperit. Facilius enim a nobis malum tam perniciosum vitabitur, si ejusdem mali & origo & magnitudo noscatur. Hinc diabolus inter initia statim mundi & periit primus, & perdidit. Ille angelica majestate subnixus, ille Deo acceptus & carus, post-

postquam hominem ad imaginem Dei factum conspexit, in zelum malivolo livore prorupit, non prius alterum dejiciens instinctu zeli, quam ipse zelo ante dejectus, captivus antequam capiens, perditus antequam perdens, dum stimulante livore homini gratiam datæ immortalitatis eripit, ipse quoque id, quod primus fuerat, amisit. Quale malum est, fratres dilectissimi, quo angelus cecidit, quo circumveniri & subverti alta illa & præclara sublimitas potuit, quo deceptus est ipse, qui decepit? Exinde invidia grassatur in terris, dum livore periturus, magistro perditionis obsequitur, dum diabolus qui zelat, imitatur, sicut scriptum est: *Invidia autem diaboli mors introivit in orbem terrarum.* Imitantur ergo illum, qui sunt ex parte ejus. Hinc denique novæ fraternitatis prima odia, hinc parricidia nefanda cœperunt, dum Abel justum Cain zelat injustus, dum malus invidia & livore persequitur. Tantum valuit ad consummationem facinoris æmulationis furor; ut nec caritas fratris, nec sceleris immanitas, nec timor Dei, nec pœna delicti cogitaretur. Injuste oppressus est, qui justitiam primus ostenderat; odia perpessus est, qui odisse non noverat; occisus est impie, qui moriens non repugnabat. Et quod Esau fratri suo Jacob inimicus existit, zelus fuit. Nam quia ille benedictionem patris acceperat, hic in odium persecutionis facibus livoris exarsit. Et quod Joseph fratres sui vendiderunt, causa vendendi de æmulatione descendit. Postquam id, quod sibi in visionibus prosperum fuerat ostensum, simpliciter, ut fratribus frater exposuit, in invidiam malivulus animus erupit. Saul quoque rex ut David odisset, ut persecutionibus sæpe repetitis innocentem, misericordem, mitem, lenitate patientem necare cuperet, quid aliud, quam zeli stimulus provocavit? Quia Goliath interfecto, & ope ac dignatione divina tanto hoste deleta, populus admirans in

in laudes David prædicationis suffragio profiliit, Saul similitatis atque infectionis furias de livore concepit. Et ne longum faciam singulos recensendo, pereuntis semel populi attendamus interitum. Judæi nonne inde perierunt, dum Christo malunt invidere, quam credere? Obtrectantes magnalibus quæ ille faciebat, zelo excæcante decepti sunt, nec ad divina noscenda cordis oculos aperire potuerunt. Quæ nos considerantes, fratres dilectissimi, contra tantam mali perniciem vigilanter & fortiter dicata Deo pectora muniamus. Aliorum mors proficiat ad nostram salutem, imprudentium pœna providentibus conferat sanitatem. Non est autem, quod aliquis existimet malum istud una specie contineri, aut brevibus terminis & angusto fine concludi. Late patet zeli multiplex & fecunda pernicies. Radix est malorum omnium, fons cladium, seminarium delictorum, materia culparum. Inde odium surgit, animositas inde procedit. Avaritiam zelus inflammat, dum quis suo non potest esse contentus, videns alterum ditiozem. Ambitionem zelus excitat, dum cernit quis alium in honoribus altiozem. Zelo excæcante sensus nostros, atque in ditionem suam mentis arcana redigente, Dei timor spernitur, magisterium Christi negligitur, judicii dies non providetur. Inflat superbia, exacerbatur sævitia, perfidia prævaricatur, impatientia concutit, furit discordia, ira ferverescit; nec se jam potest cohibere vel regere, qui factus est potestatis alienæ. Hinc dominicæ pacis vinculum rumpitur; hinc caritas violatur, hinc adulteratur veritas, unitas scinditur, ad hæreses atque ad schismata profilitur; dum obtrectatur sacerdotibus, dum episcopis invidetur, dum quis aut queritur non se potius ordinatum, aut dedignatur alterum ferre præpositum. Hinc recalcitrat, hinc rebellat de zelo superbus, de æmulatione perversus, animositate & livore non hominis, sed honoris, inimicus. Quâ-
lis

his vero est animæ quæ cogitationum tabes, pectoris quanta rubigo, zelare in altero vel virtutem ejus vel felicitatem, id est, odisse in eo vel merita propria, vel beneficia divina, in malum proprium bona aliena convertere, illustrium prosperitate torqueri, aliorum gloriam facere suam pœnam, & velut quosdam pectori suo admoveere carnifices, cogitationibus & sensibus suis adhibere tortores, qui se intestinis cruciatibus lacerent, qui cordis secreta malivolentiæ ungulis pulsent. Non cibus talibus lætus, non potus potest esse jucundus. Suspiratur semper, & ingemiscitur, & doletur; dumque ab invidis numquam livor exponitur, diebus ac noctibus pectus obsessum sine intermissione laniatur. Mala cetera habent terminum; & quodcumque delinquitur, delicti consummatione finitur. In adultero cessat facinus perpetrato stupro, in latrone conquiescit scelus homicidio admissio, & prædoni rapacitatem statuit præda possessa, & falsario modum ponit impleta fallacia. Zelus terminum non habet, permanens jugiter malum, & sine fine peccatum; quantoque ille cui invidetur, successu meliore profecerit, tanto invidus in majus incendium livoris ignibus inardescit. Hinc vultus minax, torvus aspectus, pallor in facie, in labiis tremor, stridor in dentibus, verba rabida, effrenata convicia, manus ad cædis violentiam prompta, etiam si a gladio interim vacua, odio tamen furiatæ mentis armata. Et iccirco Spiritus sanctus dicit in psalmis: *Noli zelare beniaminitem in via sua.* Et iterum: *Observabit peccator justum, & stridebit ad eum dentibus suis. Deus autem iridebit eum, quoniam providet, quia veniet dies ejus.* Hos beatus apostolus Paulus designat & denotat, dicens: *Venenum aspidum sub labiis eorum, & os eorum maledictione & amaritudine plenum est. Veloces ad effundendum sanguinem pedes eorum, contritio & calamitas in viis eorum, qui viam pacis non agnoverunt, nec est timor Dei.*

ante oculos eorum. Multo malum levius, & periculum minus est, cum membra gladio vulnerantur. Facilis cura est, ubi plaga perspicua est, & cito ad sanitatem medela subveniente perducitur, quod videtur. Zeli vulnera abstrusa sunt & occulta; nec remedium curæ medentis admittunt, quæ se intra conscientiae latebras cæco dolore clauferunt. Quicumque es invidus & malignus, videris; quam sis eis, quos odisti, insidiosus, perniciosus, infestus. Nullius magis, quam tuæ salutis inimicus es. Quisquis ille est, quem zelo persequeris, subterfugere & vitare te poterit. Tu te non potes fugere. Ubicumque fueris, adversarius tuus tecum est, hostis semper in pectore tuo est, perniciēs intus inclusa est, ineluctabili catenarum nexu ligatus & vinctus es, zelo dominante captivus es, nec solatia tibi ulla subveniunt. Perseverans malum est, hominem persequi, ad Dei gratiam pertinentem. Calamitas sine remedio est odisse felicem. Et iccirco, fratres dilectissimi, huic periculo consulens Dominus, ne quis zelo fratris in laqueum mortis incurreret, cum eum discipuli interrogarent: quis inter illos major esset: *Qui fuerit*, inquit, *minimus in omnibus vobis, hic erit magnus.* Amputavit omnem æmulationem responso suo, omnem causam & materiam mordacis invidiæ eruit & abscidit. Discipulo Christi zelare non licet, non licet invidere. Exaltationis apud nos non potest esse contentio. De humilitate ad summa crescimus, didicimus unde placeamus. Denique & apostolus Paulus instruens & monens, ut qui illuminati Christi lumine, tenebras nocturnæ conversationis evasimus, in factis atque in operibus luminis ambulemus, scribit & dicit: *Nox transiit, dies autem appropinquavit. Abjiciamus ergo opera tenebrarum, & induamus arma lucis. Tamquam in die decenter ambulemus, non in comessationibus & ebrietatibus, non in concupiscentiis & impudiciis, non*

in certaminibus & zelo. Si recesserunt de pectore tuo tenebræ, si nox inde discussa est, si caligo deterfa est, si illuminavit sensus tuos splendor diei, si homo lucis esse cœpisti: quæ sunt Christi gere; quia lux & dies Christus est. Quid in zeli tenebras ruis, quid te nubilo livoris involvis, quid invidiæ cæcitate omne pacis & caritatis lumen extinguis, quid ad diabolum cui renuntiaveras, redis, quid Cain similis existis? Homicidii namque facinore constringi eum qui zela- verit, & odio habuerit fratrem suum, declarat Joannes apostolus in epistola sua, dicens: *Qui fratrem suum odit, homicida est; & scitis quia omnis homicida non habet in se vitam manentem.* Et iterum: *Qui dicit se in luce esse, & fratrem suum odit, in tenebris est usque adhuc, & in tenebris ambulat, & non scit quo eat; quoniam tenebræ excacaverunt oculos ejus.* Qui odit, inquit, fratrem suum, in tenebris ambulat, & non scit quo eat. It enim nescius in gehennam, ignarus & cæcus præcipitatur in pœnam, recedens scilicet a Christi lumine, monentis & dicentis: *Ego sum lumen mundi. Qui me secutus fuerit, non ambulabit in tenebris, sed habebit lumen vite.* Sequitur autem Christum, qui præceptis ejus insistit, qui per magisterii ejus viam graditur, qui vestigia ejus atque itinera sectatur, qui id quod Christus & docuit & fecit, imitatur, secundum quod Petrus quoque hortatur & monet, dicens: *Christus passus est pro nobis, relinquens vobis exemplum ut sequamini vestigia ejus.* Meminisse debemus, quo vocabulo plebem suam Christus appellet, quo titulo gregem suum nuncupet. Oves nominat, ut innocentia christiana ovibus æquetur. Agnos vocat, ut agnorum naturam simplicem simplicitas mentis imitetur. Quid sub vestitu ovium lupus latitat, quid gregem Christi, qui se christianum mentitur, infamat? Christi nomen induere, & non per Christi viam pergere; quid aliud quam prævaricatio est divini nominis, quam

desertio itineris salutaris? quando ipse doceat & dicat eum ad vitam venire, qui mandata servaverit; & eum esse sapientem, qui verba ejus audierit & fecerit, doctorem quoque eum maximum in regno cælorum vocari, qui fecerit & sic docuerit, tunc prædicanti profuturum, quod bene atque utiliter prædicatum fuerit, si id quod ore promitur, factis sequentibus impleantur. Quid vero insinuavit crebrius discipulis suis Dominus, quid inter salutaria monita & præcepta cælestia, custodiendum magis servandumque mandavit; quam ut eadem dilectione qua discipulos ipse dilexit, nos quoque invicem diligamus? Quomodo autem vel pacem Domini, vel charitatem tenet, qui intercedente zelo nec pacificus potest esse, nec carus? Ideo & apostolus Paulus cum pacis & charitatis merita depromeret, cumque asseveraret firmiter & doceret, nec fidem sibi, nec eleemosynas, nec passionem quoque ipsam confessoris & martyris profuturam, nisi charitatis fœdera integra atque inviolata servasset, adjecit & dixit: *Charitas magnanima est, charitas benigna est, charitas non zelat.* Docens scilicet & ostendens, eum posse charitatem tenere, quisquis magnanimus fuerit, & benignus, & zeli ac livoris alienus. Item alio loco cum moneret, ut homo jam sancto Spiritu plenus, & nativitate cælesti Dei filius factus non nisi spiritalia & divina sectetur, ponit & dicit: *Et ego quidem, fratres, non potui vobis loqui quasi spiritalibus, sed quasi infantibus in Christo. Lacte vos potavi, non cibo. Nondum enim poteratis, sed neque nunc potestis. Adhuc enim estis carnales. Ubi enim in vobis zelus & contentio & dissensiones sunt; nonne carnales estis, & secundum hominem ambulatis?* Obterenda sunt, fratres dilectissimi, vitia & peccata carnalia, & terreni corporis infesta labes spiritali vigore calcanda; ne dum iterum ad veteris hominis conversationem revolvimur, letalibus laqueis implicemur, apo-
stolo

stolo hoc idem providenter & salubriter præmonente. Itaque, inquit, fratres, non secundum carnem vivamus. Si enim secundum carnem vixeritis, incipietis mori. Si autem spiritu opera carnis mortificaveritis, vivetis. Quotquot enim spiritu Dei aguntur, hi filii Dei sunt. Si filii Dei sumus, si templa ejus esse jam cœpimus, si accepto Spiritu sancto, sancte & spiritaliter vivimus, si de terris oculos ad cælum sustulimus, si ad superna & divina plenum Deo & Christo pectus ereximus: non nisi quæ sunt Deo & Christo digna, faciamus, sicut & apostolus excitat & hortatur: *Si consurrexistis, inquit, cum Christo, quæ sursum sunt querite, ubi Christus est in dextera Dei sedens; quæ sursum sunt sapite, non quæ super terram. Mortui enim estis, & vita vestra abscondita est cum Christo in Deo. Cum autem Christus apparuerit vita vestra, tunc & vos apparebitis cum ipso in gloria.* Qui ergo in baptismo secundum hominis antiqui peccata carnalia & mortui, & sepulti sumus, qui regeneratione cælesti Christo consurreximus, quæ sunt Christi & cogitemus pariter, & geramus, sicut idem apostolus docet rursus & monet, dicens: *Primus homo de terra limo, secundus homo de calo. Qualis ille de limo, tales & qui de limo; & qualis cælestis, tales & cælestes. Quomodo portavimus imaginem ejus qui de limo est, portemus & imaginem ejus qui de calo est.* Imaginem autem cælestem portare non possumus, nisi in eo, quod esse jam cœpimus, Christi similitudinem præbeamus. Hoc est enim mutasse quod fueras, & cœpisse esse quod non eras, ut in te divina nativitas luceat, ut ad patrem Deum deifica disciplina respondeat, ut honore & laude vivendi Deus in homine clarescat, ipso exhortante & monente, & eis qui se clarificant, vicem mutuam pollicente. *Eos, inquit, qui clarificant me, clarificabo; & qui spernit me, spernetur.* Ad quam clarificationem formans nos ac præparans Dominus, & filiis Dei similitudinem Dei patris insinuans,

in evangelio suo dicit: *Audistis quia dictum est: Diliges proximum tibi, & odio habebis inimicum tibi. Ego autem dico vobis, diligite inimicos vestros, & orate pro his qui vos persequuntur, ut sitis filii patris vestri, qui in calis est, qui solem suum oriri facit super bonos & malos, & pluit super justos & injustos.* Si hominibus lætum est & gloriosum, filios habere consimiles, & tunc magis generasse delectat, si ad patrem lineamentis paribus soboles subsiciva respondeat, quanto major in Deo patre lætitia est, cum quis sic spiritaliter nascitur, ut in actibus ejus & laudibus divina generositas prædicetur? Quæ justitiæ palma est, quæ corona, esse se talem, de quo Deus non dicat: *Filios generavi & exaltavi, ipsi autem spreverunt me.* Collaudet te potius Christus, & invitet ad præmium dicens: *Venite benedicti patris mei, percipite regnum quod vobis paratum est ab origine mundi.* His meditationibus corroborandus est animus, fratres dilectissimi, ejusmodi exercitationibus contra omnia diaboli jacula firmandus. Sit in manibus divina lectio, in sensibus dominica cogitatio. Oratio jugis omnino non cesset. Salutaris operatio perseveret. Spiritalibus semper actibus occupemur, ut quotiescumque inimicus accesserit, quoties adire tentaverit, & clausum adversum se pectus inveniat & armatum. Non enim christiani hominis corona una est, quæ tempore persecutionis accipitur. Habet & pax coronas suas, quibus de varia & multiplici congressione, victores prostrato & subacto adversario coronantur. Libidinem subegisse, continentiae palma est. Contra iram, contra injuriam repugnasse, corona patientiae est. De avaritia triumphus est, pecuniam spernere. Laus est fidei, fiducia futurorum mundi adversa tolerare. Et qui superbus in prosperis non est, gloriam de humilitate consequitur. Et qui ad pauperum fovendorum misericordiam pronus est, retributionem thesauri cælestis adipiscitur. Et
qui

qui zelare non novit, quique unanimis & mitis fratres suos diligit, dilectionis & pacis præmio honoratur. In hoc virtutum stadio quotidie currimus, ad has justitiæ palmas & coronas sine intermissione temporis pervenimus; ad quas ut pervenire tu etiam possis, qui fueras zelo & livore possessus, omnem illam malitiam, qua prius tenebaris, abjice, ad viam vitæ æternæ vestigiis salutaribus reformare. Evelle de pectore tuo spinas & tribulos, ut te dominicum semen fertili fruge locupletet, ut divina & spiritalis seges in copiam fecundæ messis exuberet. Venena fellis evome, discordiarum virus exclude, purgetur mens, quam serpentinus livor infecerat, amaritudo omnis quæ intus infederat, Christi dulcedine leniatur. Si de sacramento crucis & cibum sumis & potum; lignum, quod apud merrham profecit in imagine ad saporis dulcedinem, tibi in veritate proficiat ad mulcendi pectoris lenitatem, nec ad medelam prosperandæ validitudinis laborabis. Unde vulneratus fueras, inde curare. Ama eos quos ante oderas, dilige illos, quibus injustis obtreccionibus invidebas. Bonos imitare, si sectari potes. Si autem eos sectari non potes, collatere certe, & congratulare melioribus. Fac te illis adunata dilectione participem, fac te consortio charitatis, & fraternitatis vinculo cohærentem. Dimittentur tibi debita, quando & ipse dimiseris; accipientur sacrificia tua, cum pacificus ad Deum veneris. Sensus atque actus tui divinitus dirigentur, quando ea, quæ divina & iusta sunt, cogitaveris, sicut scriptum est: *Cor ultri cogitet iusta, ut a domino dirigantur gressus ejus.* Habes autem multa quæ cogites. Paradisum cogita, quo Cain non ingreditur, qui zelo fratrem peremit. Cogita cæleste regnum; ad quod non nisi concordēs atque unanimes Dominus admittit. Cogita quod filii Dei hi soli possint vocari, qui sint pacifici, qui nativitate cælesti & lege

divina ad similitudinem Dei patris & Christi respondeant adunati. Cogita sub oculis Dei nos stare, spectante ac judicante ipso conversationis ac vitæ nostræ curricula decurrere, pervenire nos tunc demum posse, ut eum videre contingat, si ipsum nunc videntem delectemur actibus nostris, si nos dignos gratia ejus & indulgentia præbeamus, si placituri semper in regno, in hoc mundo ante placeamus.

E P I S T O L A

A D

F O R T U N A T U M

D E

EXHORTATIONE MARTYRII.

Desiderasti, Fortunate carissime, ut quoniam persecutionum & pressurarum pondus incumbit, & in fine atque in consummatione mundi, antichristi tempus infestum appropinquare jam cœpit, ad præparandas & corroborandas fratrum mentes de divinis scripturis hortamenta componerem, quibus milites Christi ad cæleste & spiritale certamen animarem. Obtemperandum fuit desiderio tuo tam necessario, ut quantum sufficit mediocritas nostra, auxilio divinæ inspirationis instructa, quasi arma ac munimenta quædam pugnaturis fratribus de præceptis dominicis promerentur. Parum est enim quod Dei plebem classico nostræ vocis erigimus, nisi credentium fidem, & dicatam Deo devotamque virtutem divina lectione firmemus. Quid autem potius aut majus curæ nostræ ac sollicitudini congruit, quam ut commissum nobis divinitus populum, & exercitum in castris cælestibus consti-

constitutum, adversus diaboli tela & jacula, exhortationibus assiduis præparemus? Neque enim idoneus potest esse miles ad bellum, qui non exercitatus prius in campo fuerit, aut qui agonisticam coronam quaerit adipisci, in stadio coronabitur, nisi usum & peritiam virium ante meditetur. Adversarius vetus est & hostis antiquus, cum quo prælium gerimus. Sex millia annorum jam pæne complentur, ex quo hominem diabolus impugnat. Omnia genera tentandi, & artes atque insidias dejiciendi, usu ipso vetustatis edidicit. Si imparatum invenerit militem Christi, si rudem; si non sollicitum ac toto corde vigilantem, circumvenit nescium, fallit incautum, decipit imperitum. Si vero quis dominica præcepta custodiens, & fortiter Christo adhærens contra eum steterit, vincatur necesse est: quia Christus, quem confitetur, invictus est. Ac ne in longum sermonem meum extenderem, frater carissime, & audientem vel legentem stili latioris copia fatigarem: compendium feci; ut propositis titulis, quos quis & nosse debeat & tenere, capitula dominica subnecterem, & id quod proposueram, divinæ lectionis auctoritate solidarem, ut non tam tractatum meum videar tibi misisse, quam materiam tractantibus præbuisse. Quæ res in usum singulis proficit utilitate majore. Nam si confectam & paratam jam vestem darem, vestis esset mea, qua alius uteretur, & forsitan non pro habitudine stature & corporis res alteri facta, minus congruens haberetur. Nunc vero de agno, per quem redempti ac vivificati sumus, lanam ipsam & purpuram misi; quam cum acceperis, tunicam tibi pro voluntate conficies, & plus ut in domestica tua atque in propria veste lætaberis, & ceteris quoque ut conficere & ipsi pro arbitrio suo possint, quod misimus, exhibebis, ut vetere illa nuditate contexta, perferant omnes indumenta Christi, cælestis gratiæ sanctificatione vestiti. Nec-

non & illud consilium, frater carissime, utile & salubre prospexi, in exhortatione tam necessaria, quæ martyres faciat, amputandas esse verborum nostrorum mores & tarditates, atque ambages sermonis humani subtrahendas, ponenda sola illa quæ Deus loquitur, quibus fervos suos ad martyrium Christus hortatur. Præcepta ipsa divina velut arma pugnantibus suggerenda sunt. Illa sint militaris tubæ hortamenta, illa pugnantibus classica. Inde aures erigantur, inde instruantur mentes, inde & animi & corporis vires ad omnem passionis tolerantiam roborentur. Nos tantum qui Domino permittente primum baptismum credentibus dedimus, ad aliud quoque singulos præparemus, insinuantes & docentes hoc esse baptismum in gratia majus, in potestate sublimius, in honore pretiosius, baptismum in quo angeli baptizant, baptismum in quo Deus & Christus ejus exultant, baptismum post quod nemo jam peccat, baptismum quod fidei nostræ incrementa consummat, baptismum quod nos de mundo recedentes statim Deo copulat. In aquæ baptismo accipitur peccatorum remissa, in sanguinis baptismo corona virtutum. Amplectenda res est & optanda, & omnibus postulationum nostrarum precibus expetenda; ut qui servi Dei sumus, simus & amici. In exhortandis itaque ac præparandis fratribus nostris, & virtutis ac fidei firmitate, ad præconium dominicæ confessionis, atque ad prælium persecutionis & passionis armandis, primo in loco dicendum est, idola deos non esse, quæ homo sibi facit. Neque enim quæ fiunt, factore suo & fabricatore majora sunt, aut protegere & servare quemquam possunt, quæ ipsa de templis suis pereunt, nisi ab homine servantur. Sed nec elementa colenda esse, quæ homini secundum dispositionem & præceptum Dei serviunt. Destructis idolis, & elementorum ratione monstrata, ostendendum, Deum solum colendum esse. Tunc addendum quæ comminatio Dei sit adversus eos, qui

idolis

idolis sacrificant. Præterea docendum non facile ignoscere Deum idololatriæ, & quod sic idololatriæ indignetur Deus; ut præceperit etiam eos interfici, qui sacrificare & servire idolis suaserint. Subjungendum post hæc, quod redempti ac vivificati Christi sanguine, nihil Christo præponere debeamus, quia nec ille quidquam nobis præposuerit, & ille propter nos mala bonis prætulit, paupertatem divitiis, servitutem dominationi, mortem immortalitati: nos contra in passionibus nostris paupertati sæculari paradisi divitias & delicias præferamus, dominatum & regnum æternum temporariæ servituti, immortalitatem morti, Deum & Christum diabolo & antichristo. Insinuandum quoque ne erepti de faucibus diaboli, & de laqueis sæculi liberati, si in angustiis & pressuris esse cœperint, regredi denuo ad sæculum velint, & perdant quod evaserint. Insistendum potius esse, & perseverandum in fide & virtute, & cælestis ac spiritualis gratiæ consummatione, ut ad palmam & coronam possit perveniri. Ad hoc enim pressuras & persecutiones fieri, ut probemur. Nec timendas esse injurias & pœnas persecutionum, quia major est Dominus ad protegendum, quam diabolus ad impugnandum. Ac ne expavescat quis, & conturbetur ad pressuras & persecutiones, quas patimur in isto mundo, probandum ante prædictum esse quod nos mundus odio habiturus esset, & quod persecutiones adversum nos excitaret, ut ex hoc ipso quod hæc fiant, manifesta sit fides divinæ pollicitationis, in mercedibus & præmiis postmodum secuturis, nec novum quid accidat christianis, quando ab initio mundi boni laboraverint, & oppressi atque occisi sint ab injustis. In novissima parte ponendum est, quæ spes & quæ merces manet justos & martyres post conflictationes hujus temporis & passiones, & quod plus accepturi simus
in

in passionis remuneratione, quam quod hic sustineamus in ipsa passione.

Quod idola dii non sint, & quod nec elementa vice deorum colenda sint; ostenditur in psalmo CXIII. *Idola gentium argentum & aurum, opera manuum hominum: Os habent & non loquuntur, oculos habent & non vident, aures habent & non audiunt. Neque enim est spiritus in ore ipsorum. Similes illis fiunt qui faciunt ea.* Item in sapientia Salomonis: *Omnia idola nationum aestimaverunt deos; quibus neque oculorum usus est ad videndum, neque nares ad percipiendum spiritum, neque aures ad audiendum, neque digiti in manibus ad tractandum, sed & pedes eorum pigri ad ambulandum. Homo enim fecit illos, & qui spiritum mutuatus est, finxit illos. Nemo autem sibi similem homo poterit deum fingere. Cum sit enim mortalis, mortuum fingit manibus iniquis. Melior est autem ipse iis quos colit, quoniam ipse quidem vixit, illi autem numquam.* Item in Exodo: *Non facies tibi idolum, nec cuiusquam similitudinem.* Item apud Salomonem de elementis: *Neque opera attendentes agnoverunt, quis esset artifex, sed aut ignem, aut spiritum, aut citatum aerem, aut gyrum stellarum, aut nimiam aquam, aut solem, aut lunam deos putaverunt. Quorum si propter speciem hoc aestimaverunt, sciant quanto iis Dominus sit speciosior. Aut si virtutes & opera eorum mirati sunt, intelligant ab ipsis, quoniam qui hæc constituit fortia, fortior est illis.*

Quod Deus solus colendus sit, sicut scriptum est: *Dominum Deum tuum adorabis, & illi soli servies.* Item in Exodo: *Non erunt tibi dii alii absque me.* Item illic: *Videte, videte quia ego sum, & non est Deus præter me. Ego interimam & vivere faciam, percutiam & ego sanabo, & non est qui eripiat de manibus meis.* Item in apocalypsi: *Et vidi alium angelum volantem in medio calo, habentem evangelium æternum, ut annuntiaret super terram, & super omnes nationes, & tribus, & linguas, & populos,*
dicen-

dicentem voce magna: *Metuite potius Deum, & dato illi claritatem, quoniam venit hora iudicii ejus; & adorare eum qui fecit celum & terram, & mare, & omnia qua in eis sunt.* Sic & Dominus in evangelio commemorationem facit primi & secundi præcepti, dicens: *Audi Israel. Dominus Deus tuus Deus unus est: Et diliges Dominum tuum de toto corde tuo, & de tota anima tua, & de tota virtute tua. Hoc primum, & secundum simile huic: Diliges proximum tuum tamquam te.* In his duobus præceptis tota læ pendet, & propheta. Et iterum: *Hæc est autem vita æterna, ut cognoscant te solum & verum Deum, & quem misisti Jesum Christum.*

Quæ comminatio Dei sit adversus eos qui idolis sacrificant. In Exodo *Sacrificans diis eradicabitur, nisi Domino soli.* Item in Deuteronomio: *Sacrificaverunt demoniis, & non Deo.* Item apud Esaiam: *Adoraverunt eos quos fecerunt digiti eorum, & curvatus est homo, & humiliatus est vir, & non laxabo illis.* Et iterum: *Illis fudistis libamina, & illis imposuistis sacrificia. Super hæc ergo non indignabor, dicit Dominus?* Item apud Hieremiam: *Nolite ambulare post deos alienos ut serviatis eis, & ne adoraveritis eos, & ne incitet me in operibus manuum vestrarum ad disperdendos vos.* Item in apocalypsi: *Si quis adorat bestiam & imaginem ejus, & accipit notam in fronte sua aut in manu, bibit & ipse de vino iræ Dei mixto in poculo iræ ejus, & punietur igne. & sulphure sub oculis sanctorum angelorum, & sub oculis agni, & fumus de tormentis eorum in sæcula sæculorum ascendet; nec habebunt requiem die ac nocte, quicumque adorant bestiam & imaginem ejus.*

Non facile ignoscere Deum idololatriæ Moyses in Exodo pro populo rogat, nec impetrat. *Preco, ait, Domine, deliquit populus hic delictum grande. Fecerunt sibi deos aureos. Et nunc si dimittis illis delictum, dimitte. Sin autem, dele me de libro quem scripsisti.* Et dixit Dominus ad Moysen: *Si quis deliquit ante me, delega-*
cum

eum de libro meo. Item cum Hieremias pro populo deprecaretur, Dominus ad eum loquitur dicens: *Et tu noli orare pro populo hoc, & noli postulare pro ipsis in prece & oratione; quia non exaudiam in tempore quo invocabunt me, in tempore afflictionis sue.* Ezechiel quoque hanc eandem denuntiat indignationem Dei his, qui in Deum delinquant. *Et fuit, inquit, verbum Domini ad me dicens: Fili hominis, terra quaecumque peccaverit mihi, ut delinquat delictum, extendam manum meam super eam, & abteram stabilimentum panis, & immittam in eam famem, & auferam de ea hominem & pecora. Et si fuerint tres viri hi in medio ejus, Noe, Daniel, & Job, non liberabunt filios neque filias, ipsi soli salvi erunt.* Item in libro regnorum primo: *Si delinquendo peccet vir adversus virum, orabunt pro eo Dominum. Si autem in Deum peccet homo, quis orabit pro eo?*

Quod sic idololatriæ indignetur Deus, ut præceperit etiam eos interfici, qui sacrificare & servire idolis suaserint. In Deuteronomio: *Quod si rogaverit te frater tuus, aut filius tuus, aut filia tua, aut uxor tua, quæ est in sinu tuo, aut amicus tuus, qui æqualis est anima tua, latenter dicens: Eamus & serviamus diis alienis, diis gentium, non consenties ei, & non exaudies eum, & non porcet oculus tuus super eum, & non celabis eum, annuntians annuntiabis de illo. Manus tua erit super eum, in primis interficere eum, & manus omnis populi postremo; & lapidabunt eum & morietur, quoniam quæsoit avertere te a Domino Deo tuo.* Et iterum loquitur Dominus & dicit, nec civitati parcendum, etiamsi universa consenserit ad idololatriam: *Aut si audieris in una ex civitatibus, quas Dominus Deus tuus dabit tibi inhabitare te illic, dicentes: Eamus & serviamus diis aliis quos non nosci, interficiens necabis omnes, qui sunt in civitate cade gladii, & incendas civitatem igni, & erit sine habitaculo in æternum. Non reedificabitur etiam nunc, ut avertatur Dominus ab indignatione ira sua. Et dabit tibi misericordiam.*

*ricordiam, & miserebitur tui, & multiplicabit te, si exaudieris vocem Domini Dei tui, & observaveris praecepta ejus. Cujus praecepti & vigoris memor Mathathias interfecit eum, qui ad aram sacrificaturus accesserat. Quod si ante adventum Christi circa Deum colendum, & idola spernenda haec praecepta servata sunt: quanto magis post adventum Christi circa Deum colendum servanda sunt, quando ille veniens non verbis tantum nos hortatus sit, sed & factis, post omnes injurias & contumelias passus quoque & crucifixus; ut nos pati & mori exemplo suo doceret, ut nulla sit homini excusatio pro se non pati, cum passus sit ille pro nobis, & cum ille passus sit pro alienis peccatis, multo magis pro peccatis suis pati unumquemque debere. Et ideo in evangelio comminatur & dicit: *Quicumque confessus fuerit me coram hominibus, & ego confitebor eum coram patre meo, qui in caelis est. Qui autem negaverit me coram hominibus, & ego negabo eum coram patre meo, qui in caelis est.* Item apostolus Paulus: *Si enim commemoramur, inquit, & convivemus; si toleramus, & conregnabimus; si negaverimus, & ipse negabit nos.* Item Joannes: *Qui negat filium, neque patrem habet. Qui confitetur filium, & filium & patrem habet.* Unde nos ad contemptum mortis hortatur Dominus & corroboret, dicens: *Nolite timere eos qui occidunt corpus, animam autem non possunt occidere. Magis autem metuite eum, qui potest animam & corpus occidere in gehennam.* Et iterum: *Qui amat animam suam, perdet eam; & qui odit animam suam in isto saeculo, in vitam aeternam conservabit illam.**

Quod redempti & vivificati Christi sanguine, nihil Christo praepondere debeamus. In evangelio Dominus loquitur & dicit: *Qui diligit patrem aut matrem super me, non est me dignus, & qui diligit filium aut filiam super me, non est me dignus.* Sic & in Deuteronomio scriptum est: *Qui dicunt patri & matri, non requite, & filios*

filios suos non agnoverunt; hi custodierunt praecepta tua, & testamentum tuum servaverunt. Item apostolus Paulus: Quis nos, inquit, separabit a charitate Christi, pressura, an angustia, an persecutio, an fames, an nuditas, an periculum, an gladius? sicut scriptum est: Quia propter te occidimur tota die, aestimati sumus ut oves victimae, sed in his omnibus superamus propter eum qui dilexit nos. Et iterum: Non estis vestri. Empti enim estis pretio magno. Clarificate & portate Deum in corpore vestro. Et iterum: Pro omnibus mortuus est Christus, ut & qui vivunt, jam non sibi vivant, sed ei qui pro ipsis mortuus est, & resurrexit.

Ereptos de faucibus diaboli, & de laqueis saeculi liberatos non debere denuo ad saeculum reverti, ne perdant quod evaserint. In Exodo Judaicus populus ad umbram nostri & imaginem praefiguratus, cum Deo tutore & vindice evasisset Pharaonis atque Aegypti, id est diaboli & saeculi durissimam servitutem: circa Deum perfidus & ingratus, adversus Moysen mussitat, respiciens solitudinis ac laboris incommoda, & non intelligens libertatis ac salutis beneficia divina, & reverti quaerit ad Aegypti, hoc est, ad saeculi servitutem unde fuerat exutus; cum magis fidei deberet in Deum & credere, quoniam qui a diabolo & saeculo liberat populum suum, protegit liberatum. *Quid hoc nobis, inquiunt, fecisti in ejiciendo nos de Aegypto? Melius est nobis servire Aegyptiis quam mori in solitudine hac. Et dixit Moyses ad populum: Fidite, & state, & cernite salutem, quae a Domino est, quam vobis faciet hodie. Dominus ipse pugnabit pro vobis, & vos tacebitis. Quod nos admonens in evangelio suo Dominus, & docens, ne ad diabolum rursus & ad saeculum, quibus renuntiavimus, & unde evasimus, revertamur, dicit: Nemo retro attendens & superponens manum suam super aratrum, aptus est regno Dei. Et iterum: Et qui in agro est, non convertatur retro. Memores*

res estote uxoris Loth. Ac ne quis aliqua vel cupiditate rerum, vel suorum dulcedine retardetur, quominus Christum sequatur, addit & dicit: Qui non renuntiat omnibus quæ sunt ejus, non potest meus esse discipulus.

Insistendum esse & perseverandum in fide & virtute, & cælestis ac spiritalis gratiæ consummatione, ut ad palmam & coronam possit perveniri. In Paralipomenon: *Dominus vobiscum est, quamdiu & vos estis cum ipso. Si autem dereliqueritis eum, derelinquet vos.* Item apud Ezechielem: *Justi, justi non liberabit eum, in quacunque die exerraverit.* Item in evangelio Dominus loquitur & dicit: *Qui perseveraverit usque in finem, hic salvus erit.* Et iterum: *Si permanseritis in verbo meo, vere discipuli mei eritis, & cognoscetis veritatem, & veritas liberabit vos.* Præmonens quoque nos paratos semper esse debere, & expeditos in procinctu firmiter stare, addit & dicit: *Sint lumbi vestri præcincti, & lucerna ardentes, & vos similes hominibus expectantibus dominum suum, quando revertatur a nuptiis, ut cum venerit & pulsaverit, aperiant ei.* Felices servi illi, quos adveniens dominus invenerit vigilantes. Item beatus apostolus Paulus, ut fides nostra proficiat & crescat, & ad summa perveniat, hortatur dicens: *Nescitis quoniam qui in stadio currunt, omnes quidem currunt, unus tamen accipit palmam? Sic currite ut occupetis. Et illi quidem ut corruptibilem coronam accipiant, vos autem incorruptam.* Et iterum: *Nemo militans Deo obligat se molestiis secularibus, ut possit placere cui se probavit. Sed & si certaverit quis, non coronabitur, nisi legitime pugnaverit.* At iterum: *Oro autem vos, fratres, per misericordiam Dei ut constituatis corpora vestra hostiam viventem, sanctam, placentem Deo; nec configuremini saculo huic, sed transformamini in renovatione*

S. Cypriani Tom. I.

H h

tione

tionem spiritus, ad probandum quæ sit voluntas Dei bona, & placens, & perfecta. Et iterum: Sumus filii Dei. Si autem filii, & heredes Dei, coheredes autem Christi, siquidem compatiamur, ut & commagnificemur. Et in apocalypsi eadem loquitur divinæ prædicationis hortatio, dicens: Tene quod habes, ne alius accipiat coronam tuam. Quod exemplum perseverandi designatur in Exodo, ubi Moyses ad superandum Amalech, qui figuram portabat diaboli, in signo & sacramento crucis adlevabat supinas manus, nec vincere adversarium potuit, nisi postquam stabilis in signo adlevatis jugiter manibus perseveravit: Et factum est, inquit, cum levabat Moyses manus, prævalebat Israel; ubi autem submiserat manus, invalescebat Amalech. Et accepto lapide supposuerunt sub eo, & sedebat super eum. Et Aaron & Ur sustentabant manus ejus hinc & inde; & facta sunt manus Moyse stabiles usque in occasum solis. Et fugavit Jesus Amalech, & omnem populum ejus. Et dixit Dominus ad Moysen: Scribe hoc ut sit memoria in libro, & da in aures Jesu, quoniam deletionem deleam memoriam Amalech de sub cælo.

Ad hoc pressuras & persecutiones fieri ut probe-
mur. In Deuteronomio: *Tentat vos Dominus Deus
vester, ut sciat si diligitis Dominum Deum vestrum ex
toto corde vestro, & ex tota anima vestra, & ex tota
virtute vestra. Et iterum apud Salomonem: Vasa fi-
guli probat fornax, & homines justos tentatio tribulatio-
nis. Paulus quoque paria testatur ac loquitur, di-
cens: Gloriamur in spe claritatis Dei. Non solum au-
tem, sed & gloriamur in pressuris scientes, quoniam pres-
sura tolerantiam operatur, tolerantia autem probationem,
probatio autem spem, spes autem non confundit, quia dilectio
Dei infusa est in cordibus nostris per spiritum sanctum,
qui datus est nobis. Et Petrus in epistola sua ponit & di-
cit:*

Cit: Carissimi, nolite mirari ardorem accidentem vobis, qui ad tentationem vestram fit, nec excidatis tamquam ruvum aliquid vobis contingat. Sed quotiescumque communicatis Christi passionibus, per omnia gaudete, ut & in revelatione facta claritatis ejus, gaudentes exsultetis. Si impropere vobis in nomine Christi, beati estis, quia majestatis & virtutis Domini nomen in vobis requiescit: quod quidem secundum illos blasphematur, secundum nos autem honoratur.

Timendas non esse injurias & pœnas persecutionum, quia major est Dominus ad protegendum, quam diabolus ad impugnandum. Joannes in epistola sua probat dicens: *Major est qui in vobis est, quam qui in isto mundo.* Item in psalmo cxvii. *Non meam quid mihi faciat homo, Dominus mihi auxiliator est.* Et iterum: *Isti in curribus & isti in equis; nos autem in nomine Domini Dei nostri magnificabimus. Ipsi obligati sunt & ceciderunt, nos autem surreximus, & erecti sumus.* Et adhuc fortius docens & ostendens spiritus sanctus castra diaboli non timenda, & si bellum nobis hostis indixerit, in ipso magis bello spem nostram consistere, & congressione illa justos ad divinæ sedis & salutis æternæ præmium pervenire, in psalmo xxvi. ponit & dicit: *Si directæ fuerint in me castra, non timebit cor meum; si exsurrexerit super me bellum, in illud ego sperabo. Unam petii a Domino, hanc requiram, ut inhabitem in domo Domini per omnes dies vitæ meæ.* Item in Exodo declarat scriptura divina, pressuris multiplicari nos potius & augeri, dicens: *Quantoque eos deprimebant, tanto plures fiebant, & invalescebant magis.* Et in apocalypsi protectio divina promittitur passionibus nostris: *Nihil, inquit, eorum timeas quæ passurus es.* Nec alius securitatem nobis & protectionem pollicetur, quam qui

& per Esaiam prophetam loquitur, dicens: *Noli timere, quia te redemi, & vocavi te nomine tuo, meus es tu. Et si transferis per aquam, tecum sum, & flumina te non inundabunt. Et si transferis per ignem, flamma te non comburet, quoniam ego Dominus Deus tuus sanctus Israel, qui te salvum facio.* Qui & in evangelio promittit auxilium divinum Dei servis in persecutionibus non defuturum, dicens: *Cum autem vos tradiderint, nolite cogitare quomodo, aut quid loquamini. Dabitur enim vobis in illa hora, quid loquamini. Non enim vos estis qui loquimini, sed spiritus patris vestri, qui loquitur in vobis.* Et iterum: *Ponite in cordibus vestris non præmeditari excusare. Ego enim dabo vobis os & sapientiam, cui non poterunt resistere adversarii vestri.* Sicut in Exodo ad Moysen cunctantem, & ad populum ire trepidantem, Deus loquitur dicens: *Quis dedit os homini, & quis fecit molatorem, & quis surdum, & quis videntem & cæcum? Nunne ego Dominus Deus? Et nunc perge, & ego aperiam os tuum, & instruam te quid loquaris.* Nec difficile est Deo aperire os hominis devoti sibi, & confessori suo inspirare constantiam & fiduciam loquendi, qui in Numeris adversus Balaam prophetam etiam asinam fecerit loqui. Quare in persecutionibus nemo cogitet, quod periculum diabolus importet, sed immo consideret, quod auxilium Deus præstet; nec mentem labefactet humana infestatio, sed corroboret fidem divina protectio; quando unusquisque secundum dominica promissa & fidei suæ merita, tantum accipiat de Dei ope, quantum se credat accipere, nec sit quod omnipotens præstare non possit, nisi si accipientis fides caduca defecerit.

Ante prædictum esse, quod nos mundus odio habiturus esset, & quod persecutiones adversum nos
 excita-

excitaret, & quod nihil novum christianis accidat, quando ab initio mundi boni laboraverint, & oppressi atque occisi sint iusti ab iniustis. Dominus in evangelio præmonet & prænuntiat dicens: *Si mundus vos odit; scitote quoniam me primo odit. Si de mundo essetis, mundus quod suum esset, amaret: sed quia de mundo non estis, & ego elegi vos de mundo, propterea odit vos mundus. Mementote sermonis quem dixi vobis: Non est servus major domino suo. Si me persecuti sunt, & vos persequentur. Et iterum: Veniet hora ut omnis qui vos occiderit, putet se officium Deo facere; sed hæc facient, quoniam non cognoverunt patrem neque me. Hæc autem locutus sum vobis ut cum venerit hora, eorum memores sitis, quia ego dixi vobis. Et iterum: Amen amen dico vobis, quoniam vos plorabitis & plangetis, sæculum autem gaudebit; vos tristes eritis, sed tristitia vestra in lætitiā veniet. Et iterum: Hæc locutus sum vobis ut in me pacem habeatis, in sæculo autem pressuram; sed fidite, quoniam ego vici sæculum. Et cum a discipulis suis interrogaretur de signo adventus sui, & consummationis mundi, respondit & dixit: Cave-te ne quis vos fallat. Multi enim venient in nomine meo dicentes: Ego sum Christus, & multos fallent. Incipietis autem audire bella & auditus bellorum. Videte, nolite tumultuari. Oportet enim hæc fieri. Sed nondum est finis. Exsurgat enim gens super gentem, & regnum super regnum, & erunt fames, & terra motus, & pestilentia per singula loca. Omnia autem ista initia parturitionum sunt. Tunc tradent vos in pressuram, & interficient vos, & eritis odibiles omnibus gentibus propter nomen meum. Et tunc scandalizabuntur multi, & invicem tradent, & odient invicem. Et multi pseudoprophetae exsurgent, & seducent multos; & eo quod facinus abundet, refrigescet caritas multorum. Qui autem toleraverit usque in finem hic salvus erit. Et prædicabitur evangelium*

H b 3

istud

istius regni per totum orbem terra in testimonium omnibus
 gentibus, & tunc veniet finis. Cum ergo videritis abomina-
 tionem vastationis, qua dicta est per Danielelem prophetam,
 stantem in loco sancto, (qui legit intelligat) tunc qui in
 Iudaea sunt, fugiant in montes, & qui in tecto est, non
 descendat tollere quidquam de domo, & qui in agro est,
 non convertatur retro auferre vestimentum suum. *Va-*
te autem, ne fiat fuga vestra hieme, neque sabbato. Erit
enim tunc pressura magna, qualis non est facta ab initio
mundi usque nunc, sed neque fiet; & nisi breviati essent
dies illi, non esset salva omnis caro. Propter electos au-
tem breviabuntur illi dies. Tunc si quis dixerit vobis:
Ecce hic est Christus, aut ecce illic, nolite credere. Sur-
gent enim pseudochristi & pseudoprophetae, & dabunt signa
magna, & prodigia ad errorem faciendum, si fieri potest,
etiam electis. Vos autem cavete. Ecce praedixi vobis om-
nia. Si ergo dixerint vobis: Ecce in solitudine est, noli-
te exire: ecce in cubiculis, nolite credere. Sicut enim co-
ruscatio exit ab oriente, & apparet usque ad occidentem,
ita erit & adventus filii hominis. Ubi fuerit cadaver,
illuc colligentur aquilae. Continuo autem post pressuram die-
rum illorum sol tenebrescet, & luna non dabit lumen suum,
& stella cadent de calo, & virtutes calorum movebuntur.
Et tunc apparebit signum filii hominis in calo, & lamen-
tabuntur omnes tribus terra, & videbunt filium hominis
venientem in nubibus cali cum virtute magna & claritate,
Et mittet angelos suos cum tuba magna. Et colligent ele-
ctos ejus a quatuor ventis, a summis calorum usque ad
summitates eorum. Nec nova aut repentina haec sunt,
 quae nunc accidunt christianis, cum boni semper &
 justī, & Deo innocentiae lege ac verae religionis ti-
 more devoti, per pressuras & injurias, & graves ac
 multiformes infestationum poenas angusti itineris dif-
 ficultate gradientur. Sic in origine statim mundi

Abel

Abel justus a fratre primus occiditur, & Jacob fugatur, & Joseph venundatur, & David misericordem Saul rex persequitur, & Heliam majestatem Dei constanter ac fortiter asserentem rex Achab opprimere conatur. Zacharias sacerdos interficitur in medio templi & altaris, ut illic hostia ipse fiat, ubi Deo hostias immolabat. Tot denique martyria justorum sæpe celebrata, tot edita in posterum fidei & virtutis exempla. Tres pueri, Ananias, Azarias, Misahel, ætate compares, dilectione concordēs, fide stabiles, virtute constantes, flammis ac pœnis urgentibus fortiores, soli se Deo servire, solum nosse, solum colere proclamant, dicentes: *Nabuchodonosor rex, non opus est nobis de hoc verbo respondere tibi. Est enim Deus, cui nos servimus, potens nos eripere de camino ignis ardentis; & de manibus tuis, rex, liberabit nos. Et si non, notum sit tibi, quia diis tuis non servimus, & imaginem auream quam statuisti, non adoramus.* Et Daniel Deo devotus, & sancto spiritu plenus exclamat & dicit: *Nihil colo ego nisi Dominum Deum meum, qui condidit calum & terras.* Tobias quoque sub regali licet ac tyrannica servitute, sensu tamen ac spiritu liber, confessionem suam Deo servat, & virtutem majestatemque divinam sublimiter prædicat, dicens: *Ego in terra captivitatis meæ confiteor illi, & ostendo virtutem ejus in natione peccatrice.* Quid vero in Machabæis septem fratres, & natalium pariter & virtutum forte confimiles, septenarium sacramento perfectæ consummationis implentes? Sic septem fratres in martyrio cohærentes, ut primi in dispositione divina septem dies annorum septem millia continentes, ut septem spiritus & angeli septem, qui assistunt & conversantur ante faciem Dei, & lucerna septiformis in tabernaculo martyrii, & in apocalypsi septem candelabra aurea,

& apud Salomonem columnæ septem, super quas ædificavit domum sapientia: ita & istic septenarius fratrum numerus ecclesias septem numeri sui quantitate complexus, secundum quod in primo regnorum libro legimus, sterilem septem peperisse. Et apud Esaiam septem mulieres unum hominem apprehendunt, cujus invocari super se nomen exposcunt. Et apostolus Paulus, qui huius numeri legitimi & certi meminit, ad septem ecclesias scribit. Et in apocalypsi Dominus mandata sua divina & præcepta cælestia, ad septem ecclesias, & earum angelos dirigit. Qui nunc istic numerus in septem fratribus invenitur, ut consummatio legitima compleatur. Cum septem liberis plane copulatur & mater origo & radix; quæ ecclesias septem postmodum peperit, ipsa prima & una super Petrum Domini voce fundata. Nec vacat quod in passionibus sola cum liberis mater est. Martyres enim qui se Dei filios in passione testantur, jam non nisi Deo patre censentur, sicut in evangelio Dominus docet, dicens: *Ne vocaveritis vobis patrem super terram. Unus est enim pater vester, qui in calis est.* Quæ vero ediderunt confessionum præconia, quam præclara, quam magna documenta fidei præbuerunt? Rex Antiochus infestus, immo in Antiocho antichristus expressus, ora martyrum gloriosa, & spiritu confessionis invicta contagio suillæ carnis maculare quærebat; & cum flagellis graviter verberasset, ac nihil promovere potuisset, sartagine iussit igniri: quibus ignitis & accensis, eum qui primus locutus fuerat, & magis regem virtutis & fidei constantia provocaverat, admoveri præcepit & frigi, producta & exsecta prius lingua, quæ confessa Deum fuerat. Quod martyri gloriosius contigit. Lingua enim quæ confessa nomen Dei fuerat, prior ad Deum debuit ipsa proficisci. Post in secundo excogitatis
acrio-

acrioribus pœnis, antequam cetera membra torqueret, cutem capitis cum capillis detraxit, odio scilicet certo. Nam cum caput viri Christus sit, & caput Christi Deus, qui caput laniabat in martyre, Deum & Christum persequabatur in capite. At ille in martyrio suo fidens, & resurrectionis sibi præmii de Dei remuneratione promittens, exclamavit & dixit: *Tu quidem impotens ex hac presenti vita nos perdis; sed mundi rex defunctos nos pro suis legibus, in æternam vitam resurrectionem suscitabit*. Tertius linguam postulatus cito prætulit. Nam pœnam linguæ exsecandæ jam didicerat a fratre contemnere. Manus quoque amputandas constanter extendit, multum beatus genere isto supplicii, cui contigit extensis ad pœnam manibus passionis dominicæ instar imitari. Necnon & quartus pari virtute tormenta contemnens, & ad retundendum regem cælesti voce respondens exclamavit & dixit: *Potius est ab hominibus morti datos expectare spem a Deo iterum ab eo suscitandos in vitam æternam. Tibi enim resurrectio ad vitam non erit*. Quintus, præter quod carnificiam regis & duros variosque cruciatus fidei vigore calcabat, ad præscientiam quoque & notitiam futurorum spiritu divinitatis animatus, prophetavit regi indignationem Dei, & ultionem velociter secuturam. *Potestatem, inquit, inter homines habens, cum sis corruptibilis, facis quod vis. Noli autem putare genus nostrum a Deo derelictum esse. Sustine & vide magnam potestatem ejus, qualiter te & semen tuum torquet*. Quale illud levamentum fuit martyri, quam magnum, quam grande solatium, in cruciatibus suis non tormenta propria cogitare, sed tortoris sui supplicia prædicare? In sexto vero non virtus sola, sed & humilitas prædicanda est, nihil sibi martyrem vindicasse, nec confessionis suæ honorem superbis

H h 5

voci-

vocibus ventilasse, peccatis potius suis adscripsisse, quod persecutionem a rege pateretur, Deo vero dedisse quod postmodum vindicaretur. Docuit esse martyres verecundos, de ultione fidere, & nihil in passione jactare. *Noli, inquit, frustra errare. Nos enim propter nosmetipsos hac patimur, peccantes in Deum nostrum. Tu autem ne te existimes impunitum futurum, aggressus pugnare cum Deo.* Admirabilis quoque mater, quæ nec sexus infirmitate fracta, nec multiplici orbitate commota, morientes liberos spectavit libenter, nec pœnas illas pignorum, sed glorias computavit, tam grande martyrium Deo præbens virtute oculorum suorum, quam præbuerant filii ejus tormentis & passione membrorum. Cum sex punitis & occisis superesset unus ex fratribus, cui rex divitias & potentatus, & multa pollicebatur, ut crudelitas ejus ac feritas vel unius subacti solatio foveretur, & peteret ut ad filium deijciendum secum deprecaretur & mater; deprecata est illa, sed ut decebat martyrum matrem, ut decebat legis & Dei memorem, ut decebat filios suos non delicate, sed fortiter diligentem. Deprecata est enim, sed ut Deum confiteretur. Deprecata est, ne a fratribus suis frater in consortio laudis & gloriæ separaretur, tunc se septem filiorum computans matrem, si sibi contingeret filios septem Deo potius peperisse, non sæculo. Armans itaque eum & corroborans, & feliciore tunc partu filium generans: *Fili, inquit, miserere mei, quæ te in utero mensibus decem portavi, & lac triennio dedi & alui, & in ætatem istam perduxi. Oro, fili, aspicias in calum & terram, & omnibus quæ in eis sunt aspectis, intelligas, quia ex nihilo fecit illa Deus, & hominum genus. Itaque, fili, ne timeas carnificem istum, sed dignus fratribus effectus excipias mortem, ut in illa miseratione cum fratribus tuis*

se

te recipiam. Magna laus matris in exhortatione virtutis, sed major in Dei timore & in fidei veritate, quod nihil sibi aut filio de sex martyrum honore promisit, nec fratrum precem profuturam credidit ad negantis salutem; persuasit potius participem passionis fieri, ut in iudicii die posset cum fratribus inveniri. Post hæc liberis suis commoritur & mater. Neque enim aliud jam decebat, quam ut quæ martyres pepererat, & fecerat in consortio illis gloriæ jungeretur, & quos ad Deum præmiserat, ipsa quoque sequeretur. Ac ne quis vel libelli, vel alicujus rei oblata sibi occasione qua fallat, amplectatur decipientium malum munus, nec Eleazarus tacendus est; qui cum sibi a ministris regis offerretur facultas, ut accepta carne qua liceret sibi vesci, ad circumveniendum regem simularet se illa edere, quæ de sacrificiis atque illicitis cibis ingerebantur; consentire ad hanc fallaciam noluit, dicens, nec ætati suæ nec nobilitati convenire, id fingere, quo ceteri scandalizarentur, & in errorem inducerentur, existimantes Eleazarum nonaginta annos natum ad alienigenarum morem, relicta & prodita Dei lege, transisse, nec tanti esse lucrari breviam vitæ momenta, ut offenso Deo incurreret æterna supplicia. Atque ille excruciatuſ diu, & in extremo jam constitutus, cum inter verbera & tormenta moreretur, ingemiscens ait: *Domine, qui sanctam habes scientiam, manifestum est; quia cum possim a morte liberari, durissimos dolores tolero flagellis vapulans, animo autem propter tui ipsius metum libenter hac patior.* Sincera prorsus fides, & virtus integra ac satis pura, non regem Antiochum cogitasse, sed Deum iudicem, & scisse proficere sibi ad salutem non posse, si hominem derideret ac falleret, quando Deus, qui conscientie nostræ iudex est, & solus timendus est, nec
deri-

derideri possit omnino nec falli. Si igitur & nos dicati Deo ac devoti vivimus, si supra justorum antiqua & sancta vestigia iter facimus: per eadem documenta pœnarum, per eadem passionum martyria pergamus, hoc ampliorum gloriam computantes temporis nostri, quod cum vetera exempla numerentur, exuberante postmodum copia virtutis ac fidei, numerari non possunt martyres christiani, testante apocalypsi & dicente: *Pest hæc vidi turbam magnam, quam dinumerare nemo poterat, ex omni gente, & ex omni tribu & populo & lingua, stantes in conspectu throni & agni; & erant amicti stolas albas, & palma fuerunt in manibus eorum, & magno clamore dicebant: Salus Deo nostro sedenti super thronum & agna. Et respondit unus ex senioribus, dicens mihi: hi qui amicti sunt stolas albas qui sunt, & unde venerunt? Et dixi ei: Domine mi, tu scis. Et ait mihi: Hi sunt qui venerunt ex magna tribulatione, & lavaverunt stolas suas, & candidas eas fecerunt in sanguine agni. Propter hoc sunt in conspectu throni Dei, & serviunt ei die ac nocte in templo ejus. Quod si tantus ostenditur & probatur christianorum martyrum populus, nemo difficile vel arduum putet esse martyrem fieri, quando videat martyrum populum non posse numerari.*

Quæ spes & merces maneat justos & martyres post conflictationes hujus temporis & passionem; per Salomonem spiritus sanctus ostendit & præcinit, dicens: *Etsi coram hominibus tormenta passi sunt, spes eorum immortalitate plena est, & in paucis vexati, in multis bene disponentur; quoniam Deus tentavit illos, & invenit illos dignos se. Tamquam aurum in fornace probavit illos, & quasi holocausta hostiæ accepit illos, & in tempore erit respectus illorum. Fulgebunt,*

Et tamquam scintilla in arundineto discurrent. Judicabunt nationes, Et dominabuntur populis, Et regnabit dominus eorum in perpetuum. Item apud eundem vindicta nostra describitur, & persequentium nos atque infestantium poenitentia praedicatur. Tunc stabunt, inquit, iusti in magna constantia adversus eos, qui se angustiauerunt, Et qui abstulerunt labores eorum, videntes turbabuntur timore horribili, Et mirabuntur in subitatione insperatae salutis, dicentes inter se, poenitentiam habentes, Et pra angustia spiritus gementes: Hi sunt quos aliquando habuimus in derisum, Et in similitudinem improperii. Nos insensati vitam illorum aestimabamus insaniam, Et finem illorum sine honore. Quomodo ergo computati sunt inter filios Dei, Et inter sanctos sors illorum est? Ergo erravimus a via veritatis, Et iustitia lumen non luxit nobis, Et sol non est ortus nobis. Lassati sumus in iniquitatis via Et perditionis, Et ambulavimus solitudines difficiles, viam autem Domini ignoravimus. Quid nobis profuit superbia, aut quid divitiarum jactatio contulit nobis? Transferunt omnia illa tamquam umbra. Item in psalmo cxv. pretium & merces passionis ostenditur. Pretiosa est, inquit, in conspectu Domini mors sanctorum ejus. Item in psalmo cxxv. tristitia conflictationis & laetitia retributionis exprimitur. Qui seminant, inquit, in lacrimis, in gaudio metent. Ambulantes ambulabant Et flebant, mittentes semina sua; venientes autem venient in exultatione portantes gremia sua. Et iterum in psalmo cxviii. Beati qui immaculati sunt in via, qui ambulant in lege Domini. Beati qui perscrutantur martyria ejus, in toto corde exquirunt eum. Item Dominus in evangelio, ultor ipse persecutionis nostrae, & remunerator passionis: Beati, inquit, qui persecutionem passi fuerint propter iustitiam, quia ipsorum est regnum calorum. Et iterum: Beati eritis cum odio vos habuerint homines, Et separa-

separaverint vos, & expulerint, & maledixerint nomini vestro quasi nequam propter filium hominis. Gaudete in illa die, & exultate. Ecce enim merces vestra multa est in calis. Et iterum: Qui perdidit animam suam propter me, hic salvabit illam. Nec solus animadversos & interfectos divinæ pollicitationis manent præmia, sed etiam si ipsa passio fidelibus desit, fides tamen integra atque invicta perstiterit, & contemptis ac relictis suis omnibus Christum se sequi christianus ostenderit; ipse quoque a Christo inter martyres honoratur, pollicente ipso & dicente; Non est qui relinquat domum, aut agrum, aut parentes, aut fratres, aut uxorem, aut filios propter regnum Dei, & non recipiat septies tantum in isto tempore, in saculo autem venturo vitam æternam. Item in apocalypsi hoc idem loquitur: Et vidi, inquit, animas occisorum propter nomen Jesu & sermonem Dei. Et cum primo in loco posuisset occisos, addidit, dicens: Et quicumque imaginem bestie non adoraverunt, nec acceperunt inscriptionem in fronte aut in manu sua; quos universos a se in eodem loco simul visos conjungit & dicit: & vixerunt & regnaverunt cum Christo. Vivere omnes dicit & regnare cum Christo, non tantum qui occisi fuerint, sed & quique in fidei suæ firmitate & Dei timore perstantes, imaginem bestię non adbraverint, neque ad funesta ejus & sacrilega edicta consenserint. Plus nos accipere in passionis mercede, quam quod hic sustinemus in ipsa passione, probat beatus apostolus Paulus, qui dignatione divina usque in tertium cælum atque in paradysum raptus audisse se inenarrabilia testatur, qui oculata fide Jesum Christum vidisse se gloriatur, qui id quod & didicit, & vidit, majori conscientię veritate profitetur. Non sunt, inquit, condignæ passionibus hujus temporis ad superventuram claritatem, quæ revela-
bitur

bitur in n his. Quis ergo non omnibus viribus elaboret ad tantam claritatem pervenire, ut amicus Dei fiat, ut cum Christo statim gaudeat, ut post tormenta & supplicia terrena præmia divina percipiat? Si militibus sæcularibus gloriosum est, ut hoste devicto redeant in patriam triumphantes: quanto potior & major est gloria, victo diabolo ad paradysum triumphantem redire; & unde Adam peccator ejectus est, illic prostrato eo qui ante dejecerat, tropæa victricia reportare, offerre Deo acceptissimum munus, incorruptam fidem, & virtutem mentis incolumem, laudem devotionis illustrem, comitari eum, cum venire cœperit vindictam de inimicis recepturus, lateri ejus assistere, cum sederit judicaturus, coheredem Christi fieri, angelis adæquari, cum patriarchis, cum apostolis, cum prophetis cælestis regni possessione lætari? Has cogitationes quæ persecutio potest vincere, quæ possunt tormenta superare? Durat fortis & stabilis religiosus meditationibus fundata mens, & adversus omnes diaboli terrores, & minas mundi animus immobilis perstat, quem futurorum fides certa & solida corroborat. Clauduntur oculi in persecutionibus terræ, sed patet cælum; minatur antichristus, sed immortalitas sequitur; occiso mundus eripitur, sed restituto paradysus exhibetur; vita temporalis exstinguitur, sed æterna reparatur. Quanta est dignitas, & quanta securitas exire hinc lætum, exire inter pressuras & angustias gloriosum, claudere in momento oculos, quibus homines videbantur & mundus, & aperire eosdem statim, ut Deus videatur & Christus? Tam feliciter migrandi, quanta velocitas! Terris repente subtraheris, ut in regnis cælestibus reponaris. Hæc oportet mente & cogitatione complecti, hæc die ac nocte medita-

meditari. Si talem persecutionis dies invenerit Dei militem, vinci non poterit virtus ad praelium prompta. Vel si accersitio ante prævenerit, sine prämio non erit fides, quæ erat ad martyrium præparata. Sine damno temporis merces iudice Deo redditur. In persecutione militia, in pace conscientia coronatur.

VARIETATES QUÆDAM LECTIONUM.

IN EPISTOLA I.

- fol. 3.* iusta obtemperazione. *habet Rig.* operatione.
fol. 7. quæ loquuntur hujusmodi. Ore illo &c. *habet Rig.* loquuntur hujusmodi ore illo. Quidquid &c.
fol. 10. infra suam jacere &c. *habet Rig.* intra suam &c.
fol. 11. non habent veritatem. *habet Rig.* firmitatem.

IN EPISTOLA VI.

- fol. 21.* dum detrectant de vobis. *habet Rig.* retractant.
ibidem. quando aliquis temulentus &c. *habet Rig.* alius ab aquis temulentus. *Cod. corbejensis* apud aquas tumultuosus.
fol. 42. eos qui sacrilegis contrariis &c. *habet Rig.* contrariis.

IN EPISTOLA XX.

- fol. 50.* Peto a Domino, ut si ante cruore illo sancto &c. *habet Rig.* cum Pam. ut si non ante cruore illo &c.
fol. 52. usque ad Tria fata. *habet Rig.* usque ad Triangula.
ibidem. sed & omnium fratrum. *habet Rig.* sed & omnes fratres.

IN EPISTOLA XXI.

- fol. 53.* in qua te novi vivacitate &c. *habet Rig.* cum ed. Morelii in qua tenoris vivacitate.
ibidem. vide ergo frater, quoniam partim ejus quod mihi Paulus præcepit &c. *habet Rig.* cum aliis quod tam placuit mihi, quod Paulus &c.

IN EPISTOLA XXV.

fol. 60. Nam velle præter Do- *habet Rig.* propter Dominum.
minum martyrem fieri &c.

IN EPISTOLA XXVII.

fol. 67. potestas ejus invidæ *habet Rig.* invidiam patiatur.
patiatur.

IN EPISTOLA XXXV.

fol. 86. A comitibus quos ipse *habet Rig.* invitus.
præmiserat, remansit invi-
tus.

IN EPISTOLA XXXIX.

fol. 91. Caldonii ad Cypria- *habet Rig.* ad clerum Cartha-
num. ginensem.
ibidem. abstinimus Sophro- *habet Rig.* Sophronium, Solia-
nium Soliaffum budinarium. sum, Budinarium. ita ut
hic abstantos intelligat.

IN EPISTOLA XLV.

fol. 104. habet enim Numi- *habet Rig.* cum Manaria. Mau-
diam & Mauritaniam. ritanias duas.

IN EPISTOLA LII.

fol. 129. nec jam pœnitentibus &c. *habet Rig.* nec iram &c.

IN EPISTOLA LV.

fol. 157. in Cleri nostri sacrum *habet Rig.* Confessum,
congestum simulacra cum
aris suis transeant.

IN EPISTOLA LVI.

fol. 166. his nos juramentis *habet Rig.* tutamentia.
spiritualibus muniamus.

IN EPISTOLA LXII.

fol. 182. per zeli dolorem gla- *habet Rig.* cum codd. Veron. &
dium in manum sumit, Fur. per zeli livorem.

IN

IN EPISTOLA LXIX.

- fol. 219.* Apes habent regem, & ducem pecudes, & ei fident servant. Latrones mancipi &c. *habet Rig. pecudes, & fident servant latrones, mancipi &c.*

IN EPISTOLA LXXV.

- fol. 260.* nisi si his episcopis quibus nunc minor fuit Paulus. *habet Rig. episcopia, de quibus nunc &c.*

IN EPISTOLA LXXVI.

- fol. 276.* fiat adhuc in evangelio suo Dominus quasi probat ex abundantia. *habet Rig. cum Pam. sonat.*

IN LIBRO DE HABITU VIRGINUM.

- fol. 309.* minus sollicito timore teneatur. *addit Rig. cum Pam. post teneatur: quia scriptum est, qui perseveraverit usque in finem, hic salvus erit.*
- fol. 323.* minores natu praebe te comparibus &c. *addit. Rig. cum Pam. post praebe te: maioribus ministerium, comparibus,*

IN LIBRO DE LAP SIS.

- fol. 324.* pueri annos suos virtutibus transeuntes. *addit Rig. continentiae virtutibus.*
- fol. 327.* esurientibus in ecclesia fratribus. *addit Rig. non subvenire.*
- fol. 328.* quid victimam immolaturus impenis. *habet Rig. supplicaturus.*

IN LIBRO DE ORATIONE DOMINICA.

- fol. 380.* tales in die iudicii cum Domino iudicabunt. *habet Rig. cum aliis. vindicabuntur.*

IN LIBRO AD DEMETRIANUM.

- fol. 399.* quod sic celeriter nuper secuta defensio est, ruinis rerum. *habet Rig. cum quibusdam aliis ruinis regum.*

IN LIBRO DE IDOLORUM VANITATE.

fol. 406. post illa: mox a nescio quo, Febris dedicata, & Acca & Flora meretrices.

addit Rig. Interdum vero Deorum vocabula apud Romanos finguntur, ut sit apud illos viduus Deus, qui anima corpus viduet, qui quasi feralis & funebris intra muros non habetur, sed foris collocatur; & nihilominus, quia extorris factus, damnatur potius romana religione quam colitur. Est & Scansus ab ascensibus dictus, & Forculus a foribus, & a liminibus Limentinus, & Cardez a cardinibus, & ab orbitatibus Orbana, *eadem leguntur in ed. que dicitur Grævi, Pameliana, & Anglicana.*

fol. 410. carnem Spiritus S. induitur.

habet Rig. Spiritu S. coöperante induitur.

fol. 411. agnoscendum se videntibus præbuit, simul victus.

habet Rig. simul junctus *codd. Reg. & Veronensis* simul junctis,

IN LIBRO DE MORTALITATE.

fol. 424. si in Christum credimus, si fidem verbis ejus habemus, & non morimur in æternum, ad Christum &c.

habet Rig. Si credimus, fidem habeamus, & non morituri in æternum &c.

IN LIBRO DE OPERE ET ELEEMOSYNIS.

fol. 441. tuos tales munerarios, Christe, demonstra.

addit. Rig. post demonstra: præceptis tuis monitos, & pro terrenis cælestia recepturos.

IN LIBRO DE BONO PATIENTIÆ.

fol. 458. sed quoniam plurimos scio de his qui adversum se sœviunt, vindicari ve-

habet Rig. cum Morellio & Pam. cupere, nec in illum extremi judicii diem malorum retribui-

lociter cupere, nec illud in
extrema parte reticendum
est, ut in istis &c.

tributionem differre, nobis
cum hortamur, interim am-
plectimini patientiæ bonum,
ut in istis &c.

IN EPISTOLA AD FORTUNATUM.

fol. 476. neque agnoverunt,
quis esset artifex, sed aut so-
lem, aut lunam Deos pu-
taverunt.

addit Rig. rectores orbis ter-
rarum, Deos.

MAY 5 - 1915
